

А»

Ўзбекистон ШАРҚини юлдузидир

Шарқ юлдузи

Адабий-ижтимоий журнал

2005

Тўртинчи фасл

ТАҲРИР ҲАЙЪАТИ

Абдулла Орипов—
таҳрир ҳайъати раиси
Бобур Алимов
Эркин Воҳидов
Хуршид Дўстмуҳаммад
Жуманиёз Жабборов
Омон Мухтор
Тўлан Низом
Хайриддин Султонов
Сирожиддин Сайид
Александр Файнберг
Омонулла Юнусов
Ибройим Юсупов
Пиримқул Қодиров
Рустам Қосимов
Уткир Ҳошимов

ЖАМОАТЧИЛИК КЕНГАШИ

Абдулазиз Абдуқаҳхоров
Аъзамжон Гадойбоев
Нурбой Жабборов
Туробжон Жўраев
Алишер Каримов
Файзулла Муллахонов
Фатҳиддин Муҳиддинов
Холмуҳаммад Нурулаев
Ботир Парпиев
Бахтиёр Сайфуллаев
Нематилло Худойберганов
Файрат Шоумаров
Ислом Шогуломов
Ашур Қодиров
Қаҳрамон Қуронбоев

БОШ МУҲАРРИР МИНҲОЖИДДИН МИРЗО

Бахтиёр Карим
(Бош муҳаррир ўринбосари)
Юсуф Файзулло
(Масъул котиб)

Икром Отамурод
(Назм ва адабиётшунослик
бўлими)

МУАССИСЛАР:

ЎЗБЕКИСТОН ЁЗУВЧИЛАР УЮШМАСИ,
РЕСПУБЛИКА «МАТБУОТ ТАРҚАТУВЧИ»
АКЦИЯДОРЛИК КОМПАНИЯСИ

Ушбу сонда



Наср



Рисолат Ҳайдарова

МАГРУРА

Қисса

— Сиз Хуршид акани севасиз-а? Тўғрими?
Юзларим ёниб кетди. Қизариб кетганимни ўзим ҳам
сезардим.

— Бахтли одам экан! Фақат ўзи билмайди шуни... Чунки бе-
фарқ одам у! Йўқса, аллақачон сезиб, дўпписини осмонга отган
бўларди. Ахир, бепарво бўлмаса, мен сезган нарсани у сезмасми-
ди?



Муҳаббат, қўзатув, муҳаббат

Олим Тошбоев
**ГЛОБАЛЛАШУВ: ТАСЛАНУР ВА
ХАДЁТ**



...Дунёга қўз-қўз қилишга муносиб адабиёти-
миз бор. Аҳмад Яссавий, Алишер Навоий, Захириддин Муҳам-
мад Бобур, Бобораҳим Машраб, Оғаҳий, Фурқат, Чўлпон, Аб-
дулла Қодирий... Глобаллашув жараёнларининг асосий бир во-
ситаси бўлмиш Халқаро Интернет тизими адабиётимизни бутун
дунёга ташвиқ этадиган минбарга айланиши лозим.



Мерасимни ўринамиш

Шавкат Ҳайитов
ЖАВОНМАРДЛИК ҲАҚИҚАТИ

...Бундай марҳамат футувват аҳлига хос эди. Футувват аҳли
ахлоқининг туб моҳияти Алишер Навоийнинг қуиддаги фар-
дида ёрқин тажассумини топган:

*Мурувват барча бермакдур, емак йўқ,
Футувват барча қилмакдур, демак йўқ.*

Остонасига қадами еттанларни «хушҳол ва мунсабит» (хур-
санд) қилиб узатиш йўлида бисотидаги ҳеч нарсани аямас-
лик, инсон қалбига шодлик олиб кириши мумкин бўлган бор
имкониятларини ишга солиши Алишер Навоий шахси учун
ҳам хос хусусият эди.



Александр Файнберг
Ўзбекистон ҳалқ шоири

АЗИЗ ШАҲРИМ, ЗАНГОРИ МАКОН

Тошкент ҳақидами? Қўйсангиз-чи, ахир... Кучим етмайди. Буни тарихчилар ва элшунослар эплашади. «Кўз қўрқоқ, қўл ботир. Ишонч истеҳқомни забт этади», дейсизми? Ҳа, майли, уруниб кўрамиз. Фақат олдиндан айтиб қўяй, кино қиласман деб ваъда беролмайман. Шунчаки, айрим лавҳалар, узук-юлуқ воқеаларнигина тасвирлай оламан, холос. Розимисиз? Унда айбга буюрмайсиз. Менга ишонганингиз учун катта раҳмат. Бордию тасвир кўнгилдагидек чиройли чиқмаса, ўзингиздан кўринг. Оғзимдан чиққан гапнинг ҳар бир сўзи учун жавоб беришга тайёрман. Бироқ, суратга олинган тасмалар энди сизники бўлади.

Олисдан, 1967-йилнинг январидан бошлайман. Россиянинг қор остида қолган пойтахти. Оппоқ қор Москва давлат университетининг биноси атрофида қутуриб учаверади, учаверади... Ажаб, пастдан юқорига қараб учади. Оппоқ қор миттигина балет раққосалари каби ҳавода сакраб, улкан иморатни айланади.

Мен Россиянинг пойтахтига меҳмон бўлиб келганман. Мана у, кафта тургандек бутун борлиги билан кўриниб турибди. Ўн саккизинчи қават деразасидан ушбу шаҳарнинг уфқقا чузилиб кетган тарихига боқаман ва ундан ич-ичимдан нафратланаман. Бу шаҳар ўн еттинчи йилларда менинг ёлғизигина онамни Магадан остонасига улоқтириб юборган эди. Кўп йиллар ўтгандан сўнг, фақаттина Тошкент уни ўз бағрига олди ва эллик даражали совуқларда қолган вужудини меҳр билан иситди. Энди эса. Ҳа, нима энди? Дўмбиробод хилхонасида одамлар унинг қабри устига тепача қилиб тупроқ тортиб қўйишганидан буён орадан ҳеч қандай йил ўтган эмас. Онажонимнинг орқасидан сарсон бўлиб бўзлаб қолдим. Ўзни унутмоқни истайман. Қўлимдан келмайди.

Қабристонга бордим, қиши — баҳор эмас,
Юрагимда эсди мезон шамоли.
Осмондан ёғаётган оппоқ қор эмас,
Онамнинг бор-йўғи битта рўмоли.

Чор атрофда қор. Қиши.

Ана кўлмаклар. Биласизми, улар шундоққина қор ичида ётган улкан лаганга ўхшайди. Шу заҳоти... Ногаҳонда нима бу?.. Кичкинагина «спидола»дан Эдита Пъеханинг қўшиғи таралади:

«Қайгадир шаҳар бор, иссиқ, меҳрли»...

Бу сўзларни эшлитиб, юрагим шифиллаб кетади. Томофимга нимадир тиқилиб қолади.

«Қайгадир шаҳар бор...»

Кўзимдан оққан ёшни артаман. Вой, худойим-эй, нима қилганинг бу?

Ана, ана у — маҳалладан ўтаётган эшак арава. Аравада оппоқ сарабодроқлар солинган қоп. Чўғдек яшнаб турган қип-қизил хўроздаңдар... Ёғоч шакилдоқлар... Қоғоз қувурчага ранг-баранг шиша синиқдари солиниб ясалган қўлбола дурбинларни айтмайсизми?.. Бу ажойиб нарсаларни шиша идишлар, эски-туски жандаларга айрибошлаб олиш учун қўлимизга илинган нарсани қўлтиқда уриб, ўқдек отилиб кўчага чиқамиз. Аравакаш ортидан югурамиз... Онажоним балконга чиқиб, мени уйга чакиради... Нақадар баҳт. Нақадар қувонч.

«Қайгадир шаҳар бор...»

Сизга таъзим, эй хонанда. Шоир Роберт Рождественский, ушбу шеърни ёзганингиз учун сизга таъзим. «Грин филс» қўшиғини яратган негрларга таъзим. Секингина айтганда, «Том тоғанинг кулбаси» фильмида ўйнаган негрлардан мана шу мусиқани шундоққина ўзлаштириб олган бастакор Арно Бабажанянга тасанно.

Қалайсан, киночи? Механика сеники, плёнка меники. Орқага айлантирсангчи. «Қирқинчи, машъум, ҳарбий, порохли» йилларга қайтар. Аҳа! Айнан ўша дамларга қайтар. Фақат ўша жойдан бошқа ерда кунжарадан ҳам кўра лаззатли овқат йўқ. Оҳ, биз болалар озгина кунжара олиш учун нималар қиласр эдик-а! Салор бўйидаги еттинчи винзавод дарвозасидан елиб ўтаётган бир ярим тонналик юк машиналари ва «Зис — 5»ларнинг юхоналарига қандай сакраб чиқардик-а? Кунжарани қўйнимизга уриб, машина устидан ўзимизни қандай қилиб ерга отардик-а?

Кунжарани нимадан олишларини ҳануз тушунмайман. У ёғмойкомбинат эмас-ку, ароқ заводи-ку. Асосий маҳсулотни фўзапоядан олишар, чигит эзиш учун эса, алоҳида цех мавжуд бўлган экан. Мен бу юмушларни қандай бажарилишини қўришниям, билишниям истамасдим. Икки қўзим нуқул машиналарда. Юриб бораётган машинанинг шалоқ бортига осилиб чиқамизу ўзимизни брезент чодир остига урамиз ва колхоз моллари учун тайёрланган емиш тўлатилган яшикларни бирин-кетин тупроқ кўчага иргитамиз. Ундан кейин эса — «Мм-у-у!» Бўқиб қолгунимизча еймиз.

Айлантир, механик, менинг плёнкамни айлантир. Эслайсанми, биз плёнкадан «қурбақа» ясадик. Турли тасвиirlар туширилган кино-тасмалар ўрамини аввал обдон бурайсан, сўнгра Сталин, Молотов, Каганович ва ким билади яна бир қанча бошқа «улуглар» суратлари чоп этилган газета парчасига ўрайсану ёқасан. Ўрамлар тутайди ва кўча устида сакрай бошлайди. Охири повуллаб ёниб кетади. Тошкентнинг кузги шамоли бизнинг «қурбақаларимиз»дан тарқалган тутунни икки четида хазонлар уюми ёниб ётган Жуковский тошкӯчаси томонга учирив кетади. Бизнинг болалигимиз тутуни кўчадаги баргхазонлар тутунига қўшилиб кетади. Ўша тутунлар орасидан түялар арава тортиб ўтади. Улкан ёғоч фидирақлар кўчанинг юмалоқ тошларига тегиб тиқирлайди. Тутун эса Елена Сергеевна Булгакова, Анна

Ахматова, Фаина Раневская, Владимир Луговскийлар эвакуация қилиниб, кўчиб келган уйлар устидан учиб ўтиб, Алексей Толстой ҳовлиси томонга тарқалади, Татьяна Сергеевна Есенинанинг омонат кулбасини айланади. Менинг жонажон шахрим ўша йилларда, эҳ-ҳе, хона-донларига уруш ўт қўйган яна қанчадан-қанча одамларнинг жонини сақлаб қолмади, дейсиз. 1937 йилда бу ерга кўчиб келишган ва 1939 йилда мени дунёга келтиришган ота-онам ҳақида гапирмасам ҳам бўла-ди. Бироқ асосий гап мен ҳақимдамас, шекилли?

Тасвирлар, олға!

Аҳа, мана — Арпапоя кўчаси. Бу кўчада шоир, аллома Faфур Fuлom яшайди. Биз ҳикоя қилаётган даврлардан анча кейин, машҳур бўлиб кетган пайтларида, бир куни у ўзининг кичкинтой набираси билан бозорга борибди. У маҳаллар Чорсу бозори улкан зангори гумбаз билан ёпилмаган эди. Савдо расталари шундоқ очиқ майдонда эди. Faфур Fuлomга набираси шундай дебди:

— Бобожон, сиз бутун дунёни айланиб кўргансиз. Яна саёҳатга чиқсангиз, мени ҳам ўзингиз билан олакетинг. Мен ҳам бутун оламни кўришни истайман.

Faфур Fuлom бир чинорнинг тарвақайлаган шохларига, бир осмонга, бир кўкка тегиб турган Кўкалдош мадрасасига қараб ўйланиб қолибди. Сўнгра набирасини кутариб, елкасига ўтқазибди-да, бозорда юрган оломон орасига қўшилиб кетибди. Турли-туман расталар, бақириб-чакириб савдо қилаётган эркак-аёллар, тарвуз-қовун, помидор, узум, олма, нок мевалари, болғаларини тақиллатиб ётган темирчилар, усталар, этиқдўзлар, болта, пичоқ, арраларни чархлаб ётган чархчилар, гиламлар, дўппилар, хонатласлар, зарбоф чопонлар, маҳси-ковушлар, бешиклар ёнидан ўтаверибди, ўтаверибди, ўтаверибди....

Охири ҳалиги чинор тагига қайтиб келибди-да, набирасини елкасидан олиб, ерга туширибди. Сўнгра унга қараб шундай дебди:

— Мана, энди сен ҳам бутун дунёни кўрдинг.

* * *

Раҳмат сенга, киночи. Менинг ишларим бўйича плёнка айлантира-япсан. Мана, ёзувчиларнинг Аргиндан ижод боғи. Илгариги замонларда дўрмон уруғи Аргиндан анча олиса яшаган бўлса ҳам, негадир хозир бу жойни «Дўрмон» деб аташади...

Ўша ижод боғидаги дала ҳовлилардан бирида, Баҳодирнинг уйида биз — шўх ва шаддод ёшлар ўтирибмиз. Биз — бу Федя Камолов, Баҳодир ва мен. Ўтирибмиз, демак, шашлик тановул қиласяпмиз, орада қиттай-қиттай бўляяпти, учовлон қарта ўйнаяпмиз. Ҳалиги «дурак» дегани борку, қартани ўша ўйинга босаяпмиз. Кейинчалик Баҳодирга бағишлаб ёзган шеъримда бир сатр бор — «Ана, қаранг, уч ахмоқ ахмоқча ўйнаётир». Бу шунчаки сўз ўйини. Федя — ажойиб болалар ёзувчиси. Баҳодир — юксак малакали инженер, мироб, насос билан сув чиқариш бўйича мутахассис. Унинг отаси — Ўзбекистон ҳалқ ёзувчиши Комил Яшин ва онаси — Ўзбекистон ҳалқ артисти Ҳалима Носирова.

Менинг онам Москвада, отам Питернинг шундоққина бикинидаги Гатчина шаҳрида туғилган. Бироқ улар Тошкентта Сибирдан кўчиб келишган. Ҳойнаҳой, мен, айнан, шу ерда туғилишим учун кўчиб келишган бўлса керак... Федя, юр, сенинг қўлинг келди.

Камолов қарта ташлайди, мен эса, сўзлайвераман:

— Ўшанда ота-онам, акам Левка билан Биринчи май кўчасидаги меҳмонхонада яшаб туришган. Ҳали уй беришмаган эди-да. Хуллас, улар кечки пайт ўша меҳмонхона ресторанида овқатланиб ўтиришади. Ўзиям ресторанмисан-ресторан. Столларга солингган дастурхонлар оппоқ. Кутимагандা шов-шув кўтарилиб кетади: «Ҳалима»...

Қараган ҳам, қарамаган ҳам ёшгина хонандага қарайди. У эса, гул-гул ёниб туради. Бу гапни менга онам айтиб бергандилар...

Шу ондаёқ мен сүкутта толаман. Ўйин тутаган эди. Мен эса, қўлим-да бир талай қарта билан қолдим. Ҳар сафаргидек мен яна ахмоқ бўлиб қолдим. Худога шукурким, фақат қарта ўйинида. Шундоқ бўлса ҳам...

Тўхта, механик. Баҳодирга айтадиган икки оғиз гапим бор. Баҳодир, Ўрта ер дengизидаги этикчани эслайсанми? Ярим оролни-чи? У ерда Италия мамлакати жойлашган-ку? Ҳа, албатта, эслайсан. Ҳа-ҳа, уруш йилларида Мелкомини фамилияли бир одамни ўша ёқдан бизнинг ўлкамизга улоқтириб юборишган. У зўр мусиқачи эди. Тамара-хонимга ҳам, сенинг онангга ҳам мусиқа қўйиб берган. Ҳа, шундай, осмондаги юлдузлар нақадар мўъжизакор. Аллақанча йиллар ўтгандан кейин сенинг отанг менга ва менинг хотинимга — ўша италиялик-нинг набирасига катта яхшилик қилди. Бизга бошпана олиб берди. Дунёда бундан ҳам каттароқ яхшилик йўқ-ку ўзи? Ҳалима опанинг набираси — сенинг қизинг Гуля-чи? Истеъододли қиз, «Ўзбекфильм» студияси мультбирлашмаси режиссёри. У менинг сценариям асосида суратта олинган фильм бўйича қанча меҳнат қилди.

Гапни қисқа қилиб айтганда, эй, кўхна дўст, сенга ва сенинг оиласнгга бўлган миннатдорчилигининг чеку чегараси йўқ. Энди сен билан хайрлашман. Опанг Нодирага мендан салом айтиб қўй.

Айтгандай, сен ҳам, опанг ҳам Анна Ахматованинг шеърини унумагандирсиз:

Ўзимга қайтади ҳаммаси яна:
Чўтдек қизиган тун бирла укубат
(Алаҳлар Осиё каби тушимда),
Ҳалима қўшиғин булбул хониши,
Жаннат нарғисларин гули, ифори
Ва изҳор этилган меҳр — шукронা
Бу ўлкага кезар шамол мисоли.

Олға, кино, олға! Бироқ киночи зарда қилади. Гап қайтара бошлайди.

— Плёнка, албатта, сеники. Кошки, у ҳам бутун бўлса, нуқул узуқ-юлуқларини бир-бирига улайвериб, жоним бўғзимга келди. Сенинг плёнкангда эса, нуқул өдамлар, өдамлар...

— Ҳой, киночи, шаҳар нима ўзи? Биноларми? Ҳайкалларми? Шоҳ кўчаларми? Кўприкларми? Шаҳар — энг аввало, унда яшаётган одамлардир. Қолган ҳамма нарсалар иккинчи даражали.

Бу гапларни айтаяпман-у, ичимда ўйлайман — қўққисдан хато қила-ётган бўлсам-а?.. Бироқ... Мен албатта тушунаман: Тошкент — бу шарқ тамаддуни марказларидан бири. Тўғриси, ўзим унчалик яхши билмаган, ўз кўзим билан кўрмаган нарсалар ҳақида гапиришга маънавий ҳаққим йўқ. Шаҳар тарихининг нақадар қадимий эканини юрагим билан ҳис қиласман. Аммо бундан ортиқ билимим йўқ. Бу ҳақда илмий манбалар жуда кўп. Менда эса уларни ўзлаштириш учун қобилият этишмайди. Хўш, мен нимани биламан? Шаҳримнинг жуда кўп одамларини биламан. Салор бўйларида курилган қўлбола иморатларни яхши эслайман. Улар ҳозир бузилиб кетган. Эговларни эслайман, улардан Висоцкий куйлаганидек, биз ҳам пичоқ ясар эдик. Урушдан кейинги йилларда винзаводдан ўғирланган спирт, ўша йилларда содир этилган жиноятлар, Биринчи май кўчасининг безорилари тўдасининг бошлиқлари, Кашгарка, Тезиковкалар ҳақида биламан. Ақл-заковатим заҳираси омон бўлса, бас. Мен шунаقا суратларни ёпиштирайки, дод деб юборасан. Аммо буни истамайман. Ҳозир эса, киночи, сен Ашрафий, Козловский, Акбаров каби санъат усталарини кашф этган ажойиб инсон — Лев

Мелкомини ҳақида билишингни истайман. Бу табаррук зотлар йигирманчи аср Узбекистон мусиқа маданиятини яратган.

Айтмоқчи, Лев Мелкоминининг ўзи моҳир лирик тенор бўлган. Хўш нима? Санта Лючия? Мама Итальяна?.. Нега ўйланиб қолдинг? Мана, қарада, у қай тарзда тергов туфайли Мелкумов фамилиясига ўтиб қолган. Нима учун? Чунки, Лев ўзбек мусиқа маданияти тадқиқотчиси сифатидә меҳмонларни тўплаган. Аммо ўша давр махфий хизмат шоввазлари бундай нозик санъатни мутлақо тушунмасди. Улар учун қамоқца олиш режасини тоғдек қилиб бажариш муҳим эди. Шундай қилиб унинг номига арманча фамилия билан дашноқча наسابни ёпиширишади. Уруш арафасида италия ва унинг дуче¹си билан ҳалқаро алоқани бузиш совет терговчилари га манфаатли эмас эди. Моҳир мусиқачи хиёбондан унчалик узоқда бўлмаган карцерда нобуд бўлади. Хиёбон эса, Р-р-революция хиёбони деб аталар эди. Узбекистон маданиятининг жуда кўп намояндалари — ўзбеклар, арманилар, руслар олисдаги Брест шахри узра илк портлашлар бошланишига ўн етти лаҳза қолгунича ана шундай карцерларда ҳаётдан кўз юмдилар.

* * *

Уруш.

Аскарларнинг учбурчак хатлари. Корахатлар. Одамларнинг кўзига тик боқа олмайдиган почтачилар. Нон карточкалари, буларнинг ҳаммаси менинг Тошкентимнинг ҳам бошига тушган.

Маданият клублари ва мактабларнинг бинолари касалхоналар ва госпиталлар учун бўшатиб берилиган. Уларда турли миллатга мансуб бўлган аскар йигитларнинг қанчаси ҳаёт билан видолашган. Қанчадан-қанча одамлар очлик, терлама, ўлим оғатларидан қутқариб қолинган.

Тельман боғида эса, ўша йилларда «Икки жангчи» фильмини суратга олишган. «Қоп-қора тун. Симларда увиллайди шамол», — деб куйлади Марк Бёрнес. — «Чўлларда чийиллайди ўқлар»...

Сен бу воқеаларни эслайсанми, киночи?

Ахир, бу — шаҳар. Менинг шаҳрим.

Плёнка айлантираётган ғидиракча тўхтаб қолади. Киночи гўёки узр сўраётгандек гуноҳкорона боқади.

Ҳечқиси йўқ, азизим. Сени кечирдим. Келган жойидан айлантиравер.

Алангаси ер юзининг ярмини қоплаган иккинчи жаҳон уруши... Ҳар бир хонадон деворларига, кўчалар, майдонлардаги симёғочларга ўрнатилган қора ликопчалар — радиокарнайлар фронтдан хабарлар бериб туради. Хабарлар, хабарлар, хабарлар... Даҳшатли чекинишлар, шаҳарларни қўлдан бой берилиши ҳақида. Мен кейинчалик бошланғич синфда ўқиган мактабдан ўша даҳшатли урушга кетган болакайларга ҳали ҳайкал қўйилмаган эди. Бугун 64 мактаб ҳовлисида кўзга унчалик ташланмайгина турган тош ёдгорлиқдан уларнинг фамилияларини ўқиши мумкин. Ана шу тошга 64 мактабнинг собиқ ўқувчилари, урушнинг қора тупроғида жон таслим қилган беш ақа-ука Иброҳимовлар номи муҳрланган. Уларнинг ёнида машҳур шоира Марина Цветаеванинг ўғли — Эфроннинг фамилияси бор. Лев Мелкоминининг ўғли — Юрийнинг фамилияси ҳам ўша тошга битилган. Юрий мактабни битиргандан сўнг театр билим юргита ўқишига кирган эди. Ўз жонини сақлаб қолишдан воз кечиб, истеъдодли йигит эканини ўйлаб ҳам ўтирмай кўпчилик қайтиб келмаган ўша борса келмас тарафларга кетди. Курск — Орлов ёйи унга боқийликка рихлат қилишига фатво берди. Ва бу боқийликнинг нури Москвадаги Востряков қабристони-

¹ Дуче — Муссолини фашист деган маънода, назарда тутилмоқда.

даги биродарлик мозори ҳамда 64 мактаб ҳовлисидағи қаровсиз ёдгорлик узра порлаб турибди.

* * *

Етар. Анча сұхбатлашдық. Энди бўлса, 1961 йилга айлантири. Ҳа. Мана у. Тўхтат.

Тошкент университети биноси. Кўхна услубда терилган тўқ қизил рангли фиштлар. Айтишларича, ўн еттинчи йилгача бу бинода гимназия бўлган, унда Александр Керенский ўқиган экан. Бадий ҳаваскорлик тўтараги ёхуд гимназия театри машгулотига қатнашган ўқувчилар саҳнага чиқиб, томоша кўрсатишаркан. Менинг отдошим Керенский Гоголинг ўлмас бир асаридағи ролни йўнаган экан. Бу асар «Ревизор» бўлиб, бутун Рус муваққат хукуматининг бўлгуси раҳбари унда шаҳар ҳокимиини эмас, почта мудирини ҳам эмас, Хлестаков ролини ижро этган. Бу унинг ҳаётдаги биринчи роли эди. Тақдир йийини қаранг. Бироқ менинг кином бу ҳақда эмас. Бўлмаса нима ҳақда? Мана бу ҳақда. Мен яқиндагина ҳарбий хизматдан қайтган аскар кўптиражли «Тошкент университети» газетасига ҳарф терувчи бўлиб ишга кирганман. Таҳририят университет биносининг иккинчи қаватида жойлашган. Иш ҳақи қирқ сўм. Арзимайди. Аммо ишни ўлгудек ёқтириб қолдим. Газетанинг масъул котибасини айтмайсизми, гап йўқ. Бир умрлик баҳтига қарши мен бу қизни хотин қилиб олдим. Ҳечқиси йўқ. Мен билан яшашга қирқ икки йил чидади, яна чидайверади. Бир куни ўша фиштин бинодан чиқиб, Романов торқўчасига юрдиму яшин ургандек қотиб қолдим. Хиёбоннинг чўян панжараси ичида улкан бир темир маҳлуқ турибди. Унинг ўн беш метрлар узунлиқдаги хартуми асфалта теккан. Оёқлари гусеница устида. Хуллас, кўтарма кран. Қандайдир айёrona сирни яшириб тургандек гўё. Эҳ-ҳа, ҳаммаси равшан, бугун тунда хиёбон марказида турган Сталин ҳайкали адо бўлади.

Хайрият.

Тун, салафлар ёзганидек, сокин ва илиқ эди. Чаққон дастёrlар барча даврлар ва халқлар «доҳий»сини занжиirlар ва йўғон темир симлар билан боғлаб ташлашади — сўнgra бошланади. Темир маҳлукнинг хартуми тортилади, титрайди, занжир оёқлар шақур-шуқур этади. Сталиннинг оёғи шоҳсупадан узилади. Ўшбу тунги юмушни адо этаётган бригада раҳбарлари «сопрамат» деган фан ўзлари билан асло келишолмаслигига амин бўлишади. Улар материаллар қаршилиги нима эканини билишмасди. Уларнинг боши узра темир хартумга осилиб турган «материал» проҗекторлар нурида у ёқдан-бу ёқقا оғир силкиниб, қимирлади. Унинг силкиниши кўтарма кранни gox у, gox бу ёғини ердан узиб олиб, тебратা бошлади. Йишлилар ҳар тарафга тарикдек сочилиб кетади. Ҳайҳот! Проҗекторнинг кучли шуъласи, гумбур-гумбур, жаранг-жаранг — тебраниб турган кран бир ёнга ағдарилиб тушади. Бу кадрда қора осмон фонидаги «доҳий» сиймоси тўхтамай чайқалиб тураверади. Ўнлаб тонналар оғирликдаги фуко маятниги ер шари ўз ўқи бўйлаб айланишини исботлади. Бу файритабии ҳодиса мени довдиратиб қўйди. Иккита улкан юқ машинаси унинг оғир вужудини сўз билан таърифлаб бўлмайдиган мангаликка судраб кеттанидан сўнг ҳушим жойига тушиб, уйга қайтдим. Тўғрисини айтсан, ухлай олмадим.

Фақат бир туйғу менга таскин берди — ахир, мен Сибир авахтахоналарининг ёғоч сўрисида эмас, ўз уйимда ётибман-ку. Тошкентдаман-ку.

Аммо осмондаги ўша маҳлуқ ва унинг тумшуғидаги ўлжа плёнкамга бир умр муҳрланиб қолди.

* * *

Қалайсан, киночи? Мен сени унчалик чарчатиб қўймадимми?.. Дуруст. Бир гаплашамиз. Айлантир.

Ногаҳон..

Менинг юрагимдан бўрининг товушидек ёввойи увиллаш отилиб чиқаяпти. Ёнимда хотиним увилламоқда. Жудаям қўрқинчли. Ер остидан ақл бовар қўлмайдиган гувиллаш эшитилмоқда. Фалак ловулаб ёнмоқда. Ўн олти хонадондан иборат икки қаватли уй йўргалаб юрибди. Аммо бир, икки, уч... ўн лаҳза ўтгач — ҳушимиз жойига тушиб, англадик. Зилзила. Ҳа, ўша — 1966 йилнинг 26 априли. Омон қолган баъзи уйларнинг деворларидағи осма соатлар ойнаси ёрилиб кетган, соат миллиси эса, тонг вақти остидан йигирма нечадир ўтган дақиқада қотиб қолган эди. Гарчи мен тушунган бўлсам ҳам, хусусан, нимани тушундим? Тошкент шаҳрининг барча аҳли нимани тушунган бўлса, ўшани. Бошга кулфат тушди. Буни Қошфар маҳалласи ҳаммадан ҳам кўра чуқурроқ ҳис этди. Зилзила ўчоги — ўша ерда эди.

Ўттиз саккиз йилдан ортиқ вақт ўтди. Менинг шаҳрим янгидан курилди. У жуда гўзал бўлди. Гўзалликка ишқибоз одамлар дунёнинг ҳашаматли пойтахтларидан учиб келиб, бу гулзорда капалақдек сайр айламоқда. Бироқ энди ер остидан метро ўтганида ёки қурилиш бораётган қўшни ҳовлида машина ерни зичлаёттанида менинг уйимгача етиб келган салгина силкинишдан чўчийдиган ва беихтиёр шифтга осилган чироқ қўмирламаяптими деб қарайдиган бўлиб қолганман.

* * *

Ҳа, киноплёнканинг куйган кадрларини кўриш мушкул. Уларда Ойбек, Шайхзода, Абдулла Қаҳҳорнинг ажойиб қиёфаси, русийзабон ёзувчимиз Рауф Галимовнинг сурати туширилган эди. Ҳали боқийлик архиви менинг пири комилларим номларини қайта тирилтиришига чин юракдан ишонаман. Ана ўшанда келажак авлод нафақат уларни, балки мен номларини қайд этолмаган, мамлакат Мустақиллигини ва ўз озодлигини интизор кутган қанчадан-қанча фидойи кишиларни ҳам яхши таниб олади.

Энди эса, киночи, сен бир оз четта чиқиб, дам олиб тур. Энди мен ўзим.

Киноплёнка кадрлари тутаб учади. Улар фақат Тошкент устидан эмас, Орол ва Каспий денгизлари узра, 1979 йилнинг август ойида Украина ва Белоруссия осмонида учади. Ва ўша ёқда, икки славян диёри чегарасида ўн минг метрдан ортиқ баландликдан Куриловка қишлоғи устига қулаб тушиб, ёниб кетади..

Кулоғимга, билмадим, ўша ёқданми ёҳуд бошқа аллақаёқданми, радиоэфирдан чиқаётгандек овозлар эшитилади.

Мана, ТАСС мухбири Александр Горбунов:

— Спорт таҳририятида бизга нима ҳодиса рўй бергани ҳақида ҳабар тарқатишини қатъяян тақиқлашди...

Бу эса, радио ва телевидениенинг спорт шарҳловчиси Виктор Петрурин:

— Улар зўр йигитлар эди. Уюшқоқлик билан футбол ўйнашарди...

Россия Федерацияси ҳалқ артисти Зураб Соткилаванинг товуши янграйди:

— Нақадар буюк жамоа эди... Ушбу ҳодиса бутун дунё спортчиларининг фожеасицир.

Яна ТАССчи Александр Горбунов:

— Ўшанда барча ҳалқаро агентликлар билан телефон алоқалари узуб қўйилди...

Биз ахмоқлардек, ҳеч нарсадан хабаримиз йўқ деб жавоб беришга мажбур бўлганмиз...

Яна Зураб Соткилава:

Ўша фожеадан кейинги биринчи матчда қатнашдим. Тошкент Тбилисида майдонга тушганди. Стадионда ўттиз мингдан ортиқ футбол бол ишқибозлари ҳеч қандай чақириқсиз ва хатосиз бирдам бўлиб ўрнидан тургани ва шаҳид кетган футболчилар хотирасига бир лаҳзалик сукут сақлашганини ҳеч қачон ёдимдан чиқаролмайман...

Ўтлоқда шабада, шабада...

Футболчиларимиз вафотининг йигирма йиллиги муносабати билан ҳужжатли фильм олаётган эдим. Тошкентда ҳам, Москвада ҳам, Киевда ҳам, Минскда ҳам уларнинг ажойиб ўйинлари туширилган битта ҳам ҳужжатли кадр тополмадим. Видеода ҳам, кинода ҳам, ҳеч қаерда йўқ. Ҳатто бизнинг студиямизда сақланган плёнкалар ҳам кесиб олинган. Абдураимовнинг хайрлашув матчида улар иштирок этган бир минутликкина кадр қолган, холос. Бошқа плёнкаларнинг ҳаммаси йўқ қилинган, куйдирилган. Гёёки, бу дунёда бирорта «Пахтакор»чи бўлмагандек — на Ан, на Федоров, на Ашурев, на Покатилов, на Эшбўтаев, на Собиров...

Ўтлоқда шабада, шабада...

Мустабид тузум сиёсатчилари, устамон хуфялари, ахир, нечун бизнинг ёшлигимизнинг севимли футбол жамоасини бу кўйга солдингиз?

Улар ҳақида қаердадир, кимдадир, нимадир сақланиб қолган бўлса ажабмас — деган умиддан барибир воз кечаолмайман. Бироқ бу умидим ҳам аччиқ ўкинч билан йўғрилган.

Бир вақтлар биз — тошкентлик чурвақалар киноплёнкалар ўрамини «қурбақа» қилиб ёқмаган эдикми? Ўша плёнкалар билан қўшилиб нималар ёниб кетмаган, дейсиз. Нима учун! Аммо бизнинг елкамизда юлдузли погонлар йўқ эди-ку: Биз урущдан кейинги даврнинг безорилари эдик. Мана шунаقا. Биз ёқиб юборган плёнкалар ўлжа қилиб олинган кинофильмларнинг узуқ-юлуқ бўлаклари эди.

Бироқ шунча йил ўтгандан, кейин эсли-ҳушли, кап-катта амалдор одамларга жонли киноҳужжатларни «қурбақа» қилиш нима учун зарур бўлган? Яширин сирми? Ахир, бунда ҳеч қанақа сир йўқ. Шунчаки ўша даврда — шунчаки ҳаммаси зўр, гуллаб-яшнаб ётибди, соҳибжамол маркиза. Янада оддийроқ айтганда -жаноби олиялари Салтанатхон, ишлар яхши, ҳеч қанақа безовталик йўқ. Моҳиятан эса, бу иш — бориб турган маънавий жиноятдир. Жиноятчилар ҳалок бўлганлар, уларнинг етим қолган болалари, бевалари олдида жавобгардир. Алал оқибат Буюк Виждон Ҳукми қаршисидаги жавобгарлик ҳаммасидан оғир. Аслида, энг оғир жазо шу эмасми?

* * *

Айтгандай, бизнинг жамоамида Саша Питель деган йигит бўларди. У ҳозир Москвадаги Станиславский ва Немирович-Данченко номидаги театрнинг бош режиссёри. Тошкентликлар эса — кетганлар ва ҳаёт бўлганлар — Ткачук, Броневой, Ледогоров, Рецептер, Терехова? Бу қандай? Шундай. Бу менинг шахрим, у нақадар саховатли.

* * *

Хой, кино устаси, етмишинчи йилларнинг бошида дўстим Илюша Люксембургни хотини Хана ва қизи Дебора билан Тошкент темир

йўл вокзалидан Москвага қандай кузатганимни эслайсанми? У ёқдан Вена орқали Истроилга ўтиб кетишлари керак эди. Ўтиб кетишид ҳам. Бир умрга. Биз қачонлардир бу ёруғ дунёда яна қайта учрашамиз деб ҳеч ўйламаган эдим.

Энди эса, оғайни, 1998 йилга айлантир.

Мана. Худди шундай.

Тошкент Ўзбекистон мустақиллигининг етти йиллигини нишонла-моқда. Байрамга Иля Люксембург меҳмон бўлиб келди. Йигирма олти йил бурун у республикада бокс бўйича спорт устаси эди. Энди у ўз мамлакатида таниқди инсон, фарбда эса, бадиий наср устаси эди. Хотини Хана ҳам у билан бирга келганди. Биз кечқурун Ўзбекистон пойтахти кўчалари бўйлаб айланиб юрибмиз. Қорамтири осмонга рангбаранг мушаклар отилади. Кўча ясаниб-тусаниб олган турфа одамларга тўла. Ҳамма ёқда мусиқа янграйди. Илюша ва Хана ўзгариб кетган Тошкентни, чироқлари яшнаган янги биноларни, метро бекатларини, майдонларни ва фаввораларни кўриб ҳайрат бармогини тишлишади. Иля ҳаяжонланганидан Иерусалимда орттирган одатига кўра, аҳён-аҳён сувдонидан сув ҳўплаб қўяди, сўнгра яна атрофга аланглаб қарайди. Мен унинг анқаймаёттанини, балки қачонлардир қадрдан бўлган шахрининг номаълум чизгиларини зийрак адивона нигоҳ билан эслаб қолишига ҳаракат қилаёттанини сезиб турибман. Осмонга учқунлар отилади. Мушакларнинг шуълалари ёш йигит-қизларнинг юзларини ёритади. Гўдаклар ранг-баранг пуфаклар қўтаришган. Ўсмирларнинг кўлларида бенгал чақмоқлари учқун сачратаётир. Нуқул мусиқа, мусиқа, мусиқа...

Эртасига биз Иля билан болалигимиз ўтган кўчаларни айландик. Дўстим у ерларни аранг танийди. Бир замонлар ўзи яшаган жой — «Динамо» стадиони ёнидаги кўчага етганимизда, у таққа тўхтаб қолдиди, атрофга ўхтин-ўхтин аланглаб, ҳаяжонланиб кетди:

— Саха...

У мени ҳамиша шундай деб чақиради.

— Нима? — дейман мен муғомбирона кўз қисиб.

— Ахир, бу... Олий даражадаги мамлакат пойтахти!

Мен эса, бу гал ўз дўстим билан баҳслашмайман. Ҳолбуки, иккимиз доим тортишганимиз-тортишган эди.

* * *

Нима гап, оғайни? Плёнка қанақа? Бир-икки бўлак қолгандир, ахир? Киночи йўқ дея бош тебратади.

Унда сен бўшсан.

Киноаппарат проектори плёнка тугагандан кейин хайрлашаёттандек охирги марта ёрқин яшнади. Экранга тушиб турган нур лишилаб ўчди.

Жонажон шаҳрим Тошкент бўйлаб ёлғиз кезаяпман. Мен унда goҳ қизғин, goҳ сокин, goҳ шодон, goҳ ғамгин яшаб келаяпман. Бир одам қандай бўлса, худди шундай умр кечираяпман. Ўз юртим ҳақида қачонлардир ёзган сатрларим ҳар доим қалбимда янграйверади.

Азиз шаҳрим, зангори макон.
Илк табассум, биринчи кўз ёш.
Пешайвоним узра бу замон,
Яшнаб турар яшил новда — ёш.

Туника том устида Гена
Хуштак чалиб каптар ўйнарди.
Учратарман қаерда яна
Кўча тўла оғайниларди?

*Яна нима бетакрор, мутлақ?
Юлдузлар, ой, юлдузлар турғун.
Үй бузилиб кетди-ю, бироқ
Ёнар бир жуфт деразам ҳар тун.*

*Ёниб турар фидойи, ҳормай,
Мени кутар кўзи тўрт бўлиб.
Дунёнинг қай бурчида юрмай,
Мен ўламан шу ерга келиб.*

Менинг ўлимимни арши аълодаги девонхона қандай ҳал қилса, ўзи билади. Ҳозирча эса, Ҳудога шукр, ариқлар бўйидаги чархпалаклар фидирагининг гичирлашини, осмонда учайтган самолётлар товушини эшитиб турибман. Тошкентлик болакайларнинг омонлигидан қизалоқларнинг шодмонлигидан хурсандман. Улар биздан зўр бўлишини, биздан ҳам яхши яшашини Ҳудодан сўрайман. Вақтдан — ўтган умримдан нолимайман. Аммо, вақт асло тўхтамайди ва менга бепоёнликни қучиши имконини бермайди. Бепоёнлик бу — менинг шаҳрим. Ҳақкухукуқимизга кўра, у фақат сизники, сўнгра сизнинг болаларингизни-ки бўлади. Уни асраб-авайланг. У муқаддасдир. Унинг масжидлари гумбазларига, черковлари хочларига, католик ибодатхоналари томларининг куббаларига боқинг. Мудҳиш даврларда улар омборхоналарга айлантирилган эди. Уларнинг деворларига солинган суратлар ва нақшлар, лом ва чўқморлар билан, тўғрироғи, ўроқ ва болға билан кўчириб ташланган эди. Бир маҳаллар бу муқаддас иморатларда, маданиятсизликни қаранг, шифтта теккунича картошка, кўмир, инсон ҳаётини асраш учун нимаики зарур бўлса, ҳамма нарса сақланган. Инсонни руҳан бўлмаса ҳам, жисман қутқариб қолишга хизмат қилган.

Ҳув, ана, Тошкент осмонига боқинг. Балки... Юксакдан шох ташлаб учайтган варрагимни кўриб қоларсиз. Ҳозирча хайр, биродарлар.

Сен эса, жонажон шаҳрим, баҳтимга доимо омон бўл! Биласан-ку, бу олам нақадар чексиз бўлса ҳам, сенсиз мен ҳеч ёққа кета олмайман.

Рус тилидан Рустам Мусурмон таржимаси.



НАЗМ



**Халима
Худойбердиева,**
Ўзбекистон халқ шоираси

ЖУНГИЛДОРНИНГ ШУМПРОФИ-
ОСАН ИЗЛАНДА МЕНИ

Салом, гуруллаган ўт...

Салом дедим ёнмоққа,
салом гуруллаган ўт.
Мени қўймагин доқقا
келгил, ёнгинамдан ўт.

Шундай ўт, туташайнин
сезиб-сезмай ўзим ҳам.
Қирғоғимдан тошайнин,
тошсин сабру тўзим ҳам.

Қайтадан олов өлиб,
ёнайин бир чирсиллаб.
Руҳим — олча ниҳоли
қайта келаркан гуллаб.

Ишонайин метин рух,
вужуду сўнгагимга.
Ҳали узоқ — узоқдир
тўкилиш, сўнмагимга.

Салом, гуруллаган ўт,
йўқлаб тур, шундай тез-тез.
Кетаётган дўстларни
йўли хира тортган кез.

Салом, гуриллаган ўт...

Мен йўқласам...

Кампирларнинг камайди сафи,
Яна бирин қаро ер ютди.
Ёқа енги ёпик, арабий
Кўйлак кийган бир кампир ўтди.

Фимир-ғимир, онам Боёвут
Аввалидан маъюсроқ энди.
Ховлимизга соя соглан тут
Балки, онам билан у тенгдир.

У ўлганда зор кишнаган от
Чақноқ кўзи тўниб бормоқда.
Балки, у ҳам мен каби, хайҳот,
Айрилиққа кўниб бормоқда...

Аммо... онам ёқиб кетган шам —
Ёник турар кўнглим тўрида.
Мен йўқласам, йиғласам у ҳам
Ағдарилса керак гўрида...

Кампирларнинг камайди сафи...

Изланг мени

Агар тўлсам,
бир жом янглиғ агар тўлсам,
Кўнгилларнинг титроғидан изланг мени.
Чечак каби қовжираса сатрларим,
Кузнинг куйиб ўтмоғидан изланг мени.

Ўйласангиз бу дунё тор,
бу дунё кенг,
Япроқман, ўз дараҳтимдан
узманг мени.

«Сен» тилингиз «сиз»га кетса
бир мурид денг,
Яссавийнинг муриди деб
сизланг мени.

Қуёш билан юрсам,
юрсам баланд, бойиб,
Худо қўлим тутмоғидан
изланг мени.

Бир кун... бир кун топмасангиз
бўлсам ғойиб,
Туркистоннинг тупроғидан
изланг мени.

Учар қушларни дўст билинг

Ўтга солиб рухни, танни,
Кераксиз сўз демаганни,
Кўз ёғингиз емаганни
Ҳам қош билинг, ҳам кўз билинг!

Букилганлар, ёйланганлар,
Лек, осмонга бойланганлар,
Кўнгли қушга айланганлар.
Учар қушларни дўст билинг!

Ётсирамай бошин кўшса,
Ёвғонингга ошин кўшса,
Кўз ёшинингга ёшин кўшса,
Ўзгаларга ҳам ўз билинг!

Агар вафо топмасангиз,
Кўкда баҳтни ўпмасангиз.
Тупроқ сари қайтаверинг,
Қорни, музларни дўст билинг!

Миллий виждан кўтарсин

Ер тортса гар бағрини,
Томирда қон кўтарсин!
Ер шохлаган сағирни
Суяб, осмон кўтарсин!

Тиклаб яна тикларни,
Уйғотсин сулукларни,
Қабрдан-да ўликларни
Миллий виждан кўтарсин!

Ҳар халқни ҳар банд-бандда,
Турмоги-чун баландда.
Яссавий, Нақшбандий
Миллий туздон кўтарсин!

Шу туздонлар бериб туз,
Учсак-да, бўш қанотмиз,
Оллоҳга чўкармиз тиз,
Бизни биздан кўтарсин!

Ер тортса гар бағрини
Томирда қон кўтарсин!

Боёвутда

Онам – Қаршигул Хонназар қизи хотирасига

Кундан-кунга
бўлдим унга зор,
Қолди кўнглим гиряларида.
Энди онам ҳасратлари бор
Боёвутнинг дарёларида.

Саргаяман. Кузда. Тошканда
Онасилик озорларидан.
Одам нархи арzonлашгандай
Боёвутнинг бозорларида.

Энди ёшим ўтгани сайин
Нолам узун кўнглим қаърида.
Онам ивиб ўтиргандайин
Боёвутнинг ёмғирларида.

Оташкада ёнадир кўксим,
Куйдирати армонлар, чўғлар.
Энди мендай, аёлдай ўқсиб,
Боёвутда шамоллар йиглар.

Боёвутда сал оламан тин,
Ўчираман кўнглим ўтини.
Онам бериб кетди, деб: «Сигин!»
Ўзи ётган Боёвутини.

Кутиш

Баллада

Билмам, тўғримиди ва ёки хато,
Ўғилчасин уч кун кутдирди ота...

Уч кун унга умид боғлади етим,
Уч кун кир ёнгига йиглади етим.

Кейин ота кутди. Уч йиллаб кутди.
Кўзи ёшдан хира. Филтиллаб кутди.

Чиқиб кунчувоқقا, том орқасига,
Софинчларни экди томорқасига.

Кейин ўттиз йиллаб кўзи йўл ўйди,
Кейин кўрмай қолди. Кўзиям тўйди.

Сўнг, тимирскиланиб чиқди сўрига,
Ўлди... шу юк билан кетди гўрига...

Сўнг, у ҳам умр бўйи бўлганмиди хит,
Улар-чун ув торти ковлидаги ит...

«Инжулар китоби»дан

* * *

Билолмаслар ишқнинг урф-одатини,
Килолмаслар ишқнинг ибодатини.
Огоҳ бўл, қулласа тиклай олмассен,
Меъмори йўқ ишқнинг иморатини.

* * *

Яхшилик қил, билмаганга, мен, тан, билади,
Бахт қадрини, баҳт деб, юрак ёрган билади.
Бу бойларнинг саҳовату ҳотамтойлигин
Гадо бўлиб эшигига борган билади.

* * *

Мен бугунги одамдирман, ҳамда бурунги,
Кулогимдан кетмас тилло танга жиринги.
Тараққиёт шуълалари ёнса бошимда,
Оёғимда нафс занжирин жаранг-журунги.

* * *

Азал ўтдан эдим ўтга кетсам керак,
Дўст тутиниб ёмғир, хутга кетсам керак.
Бу ерларда Оллоҳ берган ризқим териб,
Йўл сўнгидаги Боёвутга кетсам керак.

* * *

Эй дунёи ғамбода, бодангдан қуй, сипкорай,
Энди сенга демасмен: «Маслаҳат бер, дил ёрай!»
Сенга қачон дил ёрсам, ёриғига туз сепдинг,
Мум тишлиладим. Энди мен маҳшаргача жим борай?

* * *

Ҳаётнинг ранги йўқ, сурга ўхшайди,
Най ноласи ҳазин сирга ўхшайди.
Қайдадир най йиглар, менам йиглайман,
Икковнинг дардимиз бирга ўхшайди.

* * *

Ўйлама, бу дунёда шундок ўтгувчилармиз,
Лаҳад эшигигача ишқни кутгувчилармиз.
Ё севгидан ой янглиғ чарақлармиз умрбод,
Ё севгига умрбод аза тутгувчилармиз.

* * *

Куйиб ўз жонима озор чеккизаман, мен,
Ердан униб чиқмас уруф эккизаман, мен.
Расулуллоҳ тўғрилолмай кетган дунёга
Нечун таҳрир қаламини теккизаман, мен?

* * *

Дилсизга сув ҳам дард айтмас ҳеч қачон,
Дарё дегил, дема тик, паст ҳеч қачон.
Мен ҳеч қачон ортга қайтолмагандай,
Бу дарё ҳам ортга қайтмас ҳеч қачон.

* * *


Гарчанд, зоҳирим баланд, сархушману қодирман,
Дунё ғамларин кумдай ичимга солодурман.
Сочдан тирногим қадар қум босмаган ерим йўқ,
Мен бунда юриб турган Дашиб карбалодирман.

* * *

Ўтар қайгуга қул, қувончга ғарқ ҳам,
Ўтар хушдоману, заҳару марг ҳам.
Келдик. Очилмади бир гул ортиқча.
Кетамиз. Тўкилмас бирорта барг ҳам.

* * *

Якун бер, ўзимни ўроқлашимга,
Яшин бер, чақмокдек чараклашимга.
Дўсти азиз, менга ишора етар,
Жоним куйиб, сени сўроқлашимга.





Яхё Тоға

Марди майдон қандини урсин

Халқона

Күрмаганнинг кўргани қурсин.
Халқ мақоли.

Олдингда олтин тоги очилиб қолса-да,
кўргансизлик қилма, болам!
Отам ўтиларидан.

1

Қирқ йигитга фармон қилса-да,
Кўрмаганнинг кўргани курсин!
Асқартогни талқон қилса-да,
Кўрмаганнинг кўргани курсин!

Марди майдон қандини урсин,
От чоптириб, даврини сурсин!

Мисли тузу мантиқсиз масал,
Кўргансизлик — юқумли касал,
Оҳ, элимнинг шул гапи асал:
«Кўрмаганнинг кўргани курсин!»

Элдошларим қандини урсин,
Кўкрагини ғоз қилиб юрсин!

2

Одим отар отадан олдин,
Ул бир нодон фарқ қилмас молдин,
Луқма ош деб, ошар дуволдин,
Кўрмаганнинг кўргани курсин!

Ҳар отахон иззатда юрсин,
Ошин ошаб, даврини сурсин!

Тўғри келса, онадан кечгай,
Тўрга чиқар этигин ечмай,
Ошиб борса, бўлар бир мечкай,
Кўрмаганнинг кўргани курсин!

Жўмард ўғлон қандини урсин,
Онасининг пойида юрсин!

Устозидан дуо олмаган,
Кўнглида бир зиё қолмаган,

ДИНАРЛА БОҚФИМ...



Нафсини пир қилиб ёллаган –
Кўрмаганинг кўргани қурсин!

Сабри сарбон қандини урсин,
Дуо олсин, даврини сурсин!

Тўрт танга пул топиб қолса гар,
Узини хон ё – султон сана,
Шундайларга тегмасин эгар,
Кўрмаганинг кўргани қурсин!

Ҳақиқий хон қандини урсин,
Юрт сўрасин, даврини сурсин!

3

Унвонидан олса-да, кувват,
Билмагай не – меҳру муруват,
Ул сийратсиз куруқ бир суврат,
Кўрмаганинг кўргани қурсин!

Сахий инсон қандини урсин,
Юзидан нур ёғилиб юрсин!

4

Харом ақча супургайдур у,
Саёз сойдай гупургайдур у,
Тузлуғига тупургайдур у,
Кўрмаганинг кўргани қурсин!

Бундан ҳайрон қандини урсин,
Сўнг бемалол даврини сурсин!

Покми, нопок – назарга илмас,
Ё алҳазар, ҳазар ҳам қилмас,
Киммати-ю қадрини билмас,
Кўрмаганинг кўргани қурсин!

Хар покдомон қандини урсин,
Қаноатни эш билиб юрсин!

Кунда қўй-у, қўзи сўйса-да,
Кўзи тўймас, ўзи тўйса-да,
Кўк тоқига нарвон қўйса-да,
Кўрмаганинг кўргани қурсин!

Кўксси осмон даврини сурсин,
Юлдузини бенарвон урсин!

Андишасин айламай писанд,
Дўст бўйнига ташлагай каманд,
Бек бўлса-да, бериб қўяр панд,
Кўрмаганинг кўргани қурсин!

Ҳар жонажон қандини урсин,
Улфат кўрсин, даврини сурсин!

Билганини айламас баён,
Ичиди не кечар, ноаён,
Кувласа-да, қочса-да қуён,
Кўрмаганинг кўргани қурсин!

Ҳалол полвон қандини урсин,
Юртим десин, даврини сурсин!

5

Ўзинг сақла ё қодир Оллоҳ,
Карғишимас бу, бир илинж, илло,
Бойми, қашшоқ, авомми, мулло,
Кўрмаганинг кўргани қурсин!

Ҳар бир муслим қандини урсин,
Ибодату ихлосда юрсин!

Яхё, у бир шайтони лайнин,
Кувнар дўсти қийналган сайин,
Лек, бир кун фош бўлмоғи тайин,
Кўрмаганинг кўргани қурсин!

Ўзбекистон қандини урсин,
Тўйлар кўрсин, даврини сурсин!

Аскар укамга

«Кўргонча»нинг қизлари
кўйнига анор солсин!
Кўлини минг ҳаёда
бўйнингга ул ёр солсин!

Отасидан пинҳона
сен учун дўппи тиккан,
кашта терган қўлларда
ип толсин, игна толсин!

Сен келарда йўлингга
чиқиб ҳаммадан олдин,
гўзал қизлар қўйнингга.
олмаю анор солсин.

Софинчдан ёна-ёна
мактуб битган бармоқлар,
қайтганингда қувончдан
майин титроқда қолсин!

Тугаб хизмат бурчинг ҳам,
кўзойдин айтиб бир кун
энг сулув қиз онамдан
ҳадя – суюнчи олсин!

Мен тушимда учдим

Баландликнинг ваҳмаси босдими
чўчиб уйғондим?
Кўзимни очсан,
қўлларим қанотга айланиб,
ёстиққа ястаниб ётар
паришон-паришон.
Беихтиёр яна учмоққа чоғландим.
Аммо, қанотларим —
қўлларимни кўтара олмадим.
Қанотларим хўл эди.
Мен йиглаганмидим, жоним, сенми
ё осмонда қанотларим
булутга тегиб кетганмиди,
билимадим?!
Билолмадим?!
Тунмиди,
тонг ёришиб келармиди,
тушу уйку аралаш учганимдами,
кўнганимдами-
ёнимда ётган фаришта
уйғониб бир керишди-да,
ўрнидан турди.
У эснаб, керишар экан
ошхона томон йўл олди
соллана-соллана.
Шунда, қанотларимга кўзим тушди,
яrim яланғоч мармардай оппоқ баданга
чўлғона-чўлғона,
менинг қанотларим борарди
унинг елкасида
тўлғона-тўлғона.
Мен бу дунёга боқдим
уйғона-уйғона.
Дунё менга боқди
ҳайрона-ҳайрона....





Рисолат Ҳайдарова

МАГРУРА

Қисса

*Неча сендерни гардун мубталоу дард қилди,
Дема мунча жафони менга қилди осмон ёлгуз.
Машраб.*

* * *

Бу сафар нима учундир фасллар адашиб кетди. Ёз гүё кетишни истамагандай, күёш тафтгини мезоннинг сўнгигача асраб юрди. Куз эса заъфар либосини қизғанғандай қавснинг ярмигача шамолларни бағрига йўлатмади. Оқибатда... Оқибатда қиш хафаланғандай қовоқ уйиб келди. Ва куз ноилож, титрай-титрай баргларини шамолларга улаша бошлади. Кейин зор-зор, йиглай-йиглай узоклашди. Охири қиш ҳам кузнинг кўз ёшларидан таъсирангган мисол маъюсланиб, қорларга-да ярамай қолди. Мана, яна ёмғир...

Уч кундан бери эзилаётган ёмғир асфальтларда қиш бўйи чириб адo бўлмаган хазонларни лойга қоришитиради. Бу қоришиқ ёқимсиз чилпиллаб пояфзал тагига ёпишади. Совуқ...

“Тўқсон”нинг поёни кўринса-да, изгирин тифи пасайгани йўқ. Бу йил баҳор ҳам кечикди...

Совуқ қалин кийимларимдан ҳам ўтиб, этимни жунжиктириб юборган, соябон тутган кўлим толиқиб, изгириндан кўзларим ёшланиб борардим. “Яна беш дақиқа сабр қила олсан бўлгани, етиб оламан”, ўйладим мен.

Арчалар ортидан университетнинг узун ойнабанд биноси кўринди. Хайрият, етдим шекилли. Дарсга кечикканим аниқ.

Кимсасиз совуқ фойеда бир зум тўхтаб, елкамни ўйиб юборган оғир чарм сумкамни чап билагимга туширдим. Ўнг кўлимдаги ёпиқ соябондан чакиллаб сув томарди. Шимим почалари ҳўл, этикчам пошналари лой... Ҳа, мени кўрган одамнинг юраги эзилиши турган гап.

-Яна кечикдиларми? – зинаю олдидағи ойнабанд хоначасидан мўралаб заҳарханда қилди қоровул чол.

Хижолат аралаш жилмайдим. Кейин зиналардан югуриб юқорига чиқа бошладим.

Талабаларимнинг ғовур-ғовури баражла эшитиларди. Ярамаслар, одамни фош қиласи булар!

Иккинчи қаватнинг зинаю майдончасида кимгadir урилиб кетдим. Шу етмай турувди ўзи! Йўлимдан чиқсан бу одам ким бўлди?

Димоғимга аччиқ тамаки ҳиди аралаш иссиқ нафас урилди. Бошимни кўтартсам... Ё худо, бу не кўргилик? Рўпарамда ҳурматли деканимиз, Хуршид Усмоновнинг шахсан ўзлари турибдилар-да!

Сумкам қўлимдан тушиб кетди. Турган жойимга михландим-қолдим.

Биринчи бўлиб Хуршид ака ўзига келди. Эгилиб, сумкамни кўтарди. Тилим калимага келса, қани? На салом бор... Амаллаб узр сўраган бўлдим. Хуршид ака: "Хечқиси йўқ", деди-ю, шошилмай пиллапоялардан паствга туша бошлади.

Сумкамни қачон ола қолдим? Эслолмайман... Уз-ўзидан жаҳлим чиқа бошлади. Кўзим қаёқда эди? Негаям кечикдим-а!

Аудиторияга кирдиму мени кўриб ўринларидан турган талабаларимга бир-бир қараб чиқдим.

— Шовқининглар зинагача эшитиляпти-я! Бутун факультет кечикканимни билди, шекилли, — дедим қўлқопларимни еча туриб.

— Ҳавотир олманг, опа, Усмонов сезмади, — бидирлади талабаларимдан бири.

— Нима? Ҳали бу ерга Усмонов кирдими?

— Ҳа. Биз сизни кафедрага чақириб қолишиди, дедик.

— Каранг-а!

"Вой бижилдоққинам! Қош қўяман деб кўз чиқарган қақажонгинам! Кафедра га чақиришганмиш".

Кафтим билан оғзимни ёпиб ортимга ўгирилдим. Энди менинг ростмана кулгим келарди. Доскага мавзуни ёздим. Лекин дарсни қандай ўтдим, эслолмайман. Хуршид аканинг эгилиб сумкамни олгани, менинг тентакнамо қотиб турганим, мана бу ландавур тилимнинг ҳатто саломга ҳам айланмагани — бари бирам кулгили туюлардики...

Ниҳоят, қўнғироқ чалинди.

— Яна кечикибсиз-да?

Садриддин мени иўлакда шу сўзлар билан қарши олди.

— Шунақа бўлиб қолди.

— Ухлаб қоласизми дейман?

— Нимайди?

Садриддин бирдан аллақандай чўкиб, мунғайиб қолди. Оҳ, тилим-а! Мунча заҳар бўйласам? Садриддин мени одам деб гапирди, ҳазил қилмоқчи бўлди. Нега силтадим?

Узр сўрасам бўларди... Лекин энди кеч, Садриддин кетиб қолган эди. Кўнглим хира тортиб кафедра хонасига йўналдим.

Кейинги соатим бўш эди. Истаганча севган машғулотим билан банд бўлишим, кўнгилхираликни бироз ёзишим мумкин.

Менинг иккита севимли машғулотим бор эди. Бири — уйда, тунда, бирон ёқимли куйни тинглаганча қўлимда китоб билан диваннинг бурчагига жойлашиб

Рисолат ўз тенгдошлари ва замондошлари ҳақида қалам тебратишни яхши кўради. Бу мавзулар унга яқин, уни юракдан ҳис қиласди. Рисолатнинг шеърларида ва матбуотда эълон қилинган «Ёнаётган одам», «Бир оқшом воқеаси» каби ҳикояларида ана шу мавзу қирраларини очишига ҳаракат қилинган.

«Магрура» — адібанинг биринчи йирик асари. Асарни қўлёзма ҳолида ўқиганимда унга анча адабий маслаҳатлар берган эдим. Рисолат уларга амал қилиб, асарни қайта ишлади.

Шуни айтиш керакки, Рисолат жуда мураккаб ҳолатларда ҳаракат қилаётган ҳаҳрамонларни ягона адабий майдонга жамлай олган. Турмушнинг ҳар хил шароитларида яшаган, «ўқийман», деб илм кетидан кувган қизлар, аёллар ҳаёти инсон учун зарур бўлган изларга тушмай қолади. Инсон эса буни сезмайди, вақт эса қараб турмайди. Магрура ана шундай оқила, ҳақиқатпарвар, ўзига ҳам, ўзгага ҳам талабчан бир қиз. Рисолатнинг қиссасида Магрура ана шундай қизларимиз, аёлларимизнинг типик вакили сифатида намоён бўлади. Чиндан ҳам шундай қизлар, аёллар ҳаётимизда кўплаб учрайди. Бу ўринда «магрура»ларнинг ҳам, турмуш ва ҳаётнинг ҳам «айби» бор. Адіба мана шундай катта инсоний мавзуга айланган муаммони қўрқмасдан, бадиият йўли билан ҳал қилишга киришгани қувонарлидир.

Рисолатнинг ижодий ишларига омад тилайман.

Муҳаммад Али,
Ўзбекистон халқ ёзувчиси

олиш, иккинчиси — кафедра хонасида, дераза токчасига ўтириб олганча ҳовлига тикилиб хаёл сурин эди.

Мана, ҳозир ҳам шарфимга ўралдиму токчага чиқиб, дераза пардасининг панасига ўтиридим.

Бугун душанба. Соат ўн иккигача кафедрада ҳеч ким бўлмайди. Демак, менга ҳеч ким халал беролмайди.

Ойнани кафтим билан артиб, буғдан тозалаган бўлдим. Ҳосил бўлган «дарча»-дан ҳовлига мўраладим.

Ҳовли анча чукур эди. Ўргадан ўтган йўлка ёмғирга бўккан, чеккадаги кекса ақиацияларнинг бужур таналари кўкнинг кўз ёшларини жимгина ютар, бағрига сифдиролмагани ёриқларидан тошиб ерга оқар эди. Фалати қиши! Чўзилиб кетган куз мисол на қори, на қора совуғи бор. Яккаш ожиз изғирину, шивалаган ёмғир. Ҳовли ўртаси кўлмак, чеккадаги йўлкада лойқа аралаш япроқлар кўзга ташланади, атрофи учбурчак фишт парчалари билан ўралган майдончада пастак қирқилган атиргул поялари чирик ҳазонлар орасидан бўртиб чиқиб ётади. Мунча ҳазин, куз мисол қиши!

Шарфимга маҳкамроқ ўрандим. Ҳовли кимсасиз, ёқимсиз ёмғир ҳаммани панага қувиб, энди истаганча борлиқни лойга қорар эди.

Бир вақт бино ёнбошидаги эшик очилиб, кимнингдир қораси кўринди. Йўқ, бу ёмғир ҳаммани ҳам қуволмаган, шекилли. Чиқсан одам эшик панасига ўтиб, сигарет тутатди. У — Хуршид ака эди.

Хуршид ака бошяланг, оқ оралаган қуюқ тўлқинсимон соchlарига кўнаётган ёмғир томчилари билан иши йўқ, аччиқ тутунни ичига тортар эди. Юзлари тўлиша бошлаган гавдасига мос буғдорянг тўгарак, ўртача қалинликдаги қошлари қовоқлари устидан кескин пастга қайрилган, лаблари худди ичидаги сўзини беҳос айтиб юборишни истамагандек бир-бирига жипс ёпишган, қораю қумуш аралаш соchlари пешонаси устидан чапдан ўнгга томон қуюқ тўлқин бўлиб оқиб ўтган, кишига очиқ боқадиган кўзларида ҳорғин ўткирлик сезиларди. Ўртача бўйбасти бир қараща кўримли эмасди, лекин вужудидан шу қадар шуур ва иқтидор ёғилардики, йўлақдан ўтиб қолганда ёшлар беихтиёр икки ёнга ёнга чекинишар, Хуршид ака ўртада пайдо бўлган «йўлка»дан саломларга алик олиб ўтар эди.

Хуршид аканинг ҳозирги туриши менга фалати кўринди. Илгари уни ҳовлида, ёмғирдан яшириниб чекканини кўрмаганман. Назаримда кўзларидағи ҳорғинлик ортгандай эди, лабларининг четида кескин икки чизиқ пайдо бўлибди. Хуршид ака сигаретини ташлади-ю, қўлларини шими чўнтакларига тиқиб, осмонга, кейин акация дарахтларига ўйчан тикилди. Унинг нимадандир юраги сиқилаётгани аён эди. Шу пайт ўнг томонидаги деразаларга қараб қолмасинми... Ҳайратдан кўздари катта очилиб кетди. У... мени кўриб қолган эди!

Ўзимни шоша-пиша пастга отдим. Стол қиррасига биқиним билан урилдиму, кўзимдан олов чиқиб кетди. Гурсиллаб йиқилдим. Кимдир хонага югуриб кирди. Жонкуяр қўллар мени ердан кўтариб, меҳрибонлик билан девор четидаги эски диванга ётқизди.

Инқилаб кўзларимни очдим. Тепамда Назира опа турарди.

— Хайрият-эй, ўзингга келдингми? Нима гурсиллади дедим-а!

Томогимга алам тиқилиб, овозимни бўғдию, кўзларимдан ёш бўлиб тирқираб оқиб тушди. Биқиним чида бўлмас даражада оғрир, юзим уятдан ёнар эди. Тен-так! Дераза токчасига чиқишини ким қўювди? Ҳовлини томоша қилишга бало борми? Хуршид ака нима деб ўйладийкин? Уни кузатиб турганимни сезиб қолди...

— Йиглама... Қаттиқ оғрияптими?

Назира опа елкаларимни силай бошлади. Бу эркакча шахт аёлнинг меҳрибонлиги бирам кўнгилни сув қиласардики... Қўлларини юзимга босиб, беихтиёр хиқилладим.

— Бўлди, бўлди... Ҳа, кўзингга қарасанг бўлмайдими? Қани, кўрай-чи?

Назира опа жун кофтамни кўтариб, биқинимни, белимни ушлаб кўрди.

— Яхши ҳам кийиминг қалин экан, бўлмаса...

Елкасидан жун рўмолини олиб тўрт буклади-да, бошимнинг тагига қўйди. Кейин ўзининг хонасидан қулоқли пиёлада қанд солинган иссиқ чой олиб келиб, қўярда-қўймай ичирди. Оғриқ сусайиб, анча енгиллашдим. Гавдамни кўтариб, ўтиридим. Назира опа ёнимга чўкди.

Ўн иккилар атрофида эшигимиз яқинида қадам товушлари эшитилди. Хонага одам тўла бошлади. Аввало қип-қизил буқри бурунли (айтишича, Қозоғистон қишида бурнини совуққа олдирган экан) Бердиқул Муродович кириб келди. Кейин Садриддин кирди-да, менга қарамасликка тиришиб дераза ёнга ўтди.

Ҳаммадан кейин эшикда Бахтиёр Назировнинг баҳайбат гавдасию шу гавдага умуман ярашмаган боласифат юзи кўринди.

— Ассалому алайкум, Назира опа, — Бахтиёрнинг баҳайбат гавдаси диван ёнида бесўнақайларча эгилди. Юзларида табассум пайдо бўлиб, кичкина думалоқ кўзлари пориллаб кетди.

— Қандайсиз, Мағрура?

У Бердиқул Муродовичга каттакон қоп-қора қўлини узатар экан, яна ҳам кенгроқ жилмайди. Бердиқул Муродович бошини орқага ташлаб Бахтиёрга қарди:

— Ҳа, иним, жўжалар омонми?

— Юришибди чугурлашиб!

— Ҳа, омон бўлишсин, омон бўлишсин! Жўжаларни деб юрибмиз-да!

Очиқ қолган эшикдан йўлакнинг бир қисми кўриниб турар, талабаларнинг.govури, қадам товушлари ичкарига баралла эшитилар эди. Эшикда Хуршид аканинг қораси кўринди. Мен беихтиёр диваннинг бурчагига тиқилдим.

— Яхшимисизлар?

Ҳамма оёққа қалқди.

— Ассалому алайкум, Хуршид ака!

— Ассалом, Хуршид, яхшимисиз?

— Ассалому алайкум, домла!

Хуршид ака бир-бир кўриша бошлади.

— Ассалому алайкум... — дедим мен овозим чиқар-чиқмас.

— Ваалайкум ассалом.

Хуршид ака мен томонга ўтирилди. Кўзларида кулимсираш бор эди.

— Мағрурахон, ишларингиз яхшими?

— Раҳмат... — дедим эшитилар-эшитилмас.

Назаримда Хуршид ака боя токчада ўтирганимни эслаган эди. Бошимдан совуқ сув тўкилгандек бўлди. Бир зум кўзларимни юмиб-очдим. Хуршид ака йўқ, у билан изма-из Садриддин ҳам чиқиб кетган эди.

— Хуршид ака букилиб қолибди, бечора... Фам эгиб қўяди-да одамни!

— Бир нима бўлдими? — Бахтиёрнинг думалоқ кўзлари каттайди. — Тинчликми?

Бердиқул Муродович катта янгиликни бир ўзи билганидан фахрланган мисол, ўзига ярашмаган кулгили бир виқор билан бориб эшикни ёпиб келди.

— Хуршид аканинг қизи қайтиб келибди-ку!

— Бунақа гапларни қаердан топиб юрасиз?

Бердиқул Муродович чўчиб Назира опага қаради. Опанинг катта, қоп-қора кўзлари ўйиб юборгудек қадалиб туарди.

Бердиқул Муродович шошиб қолди:

— Мен... мен ўша маҳаллада турман-ку!

— Хуршиднинг маҳалласидами?

— Йўғ-э, куда тарафда... Тўрт ҳовли нарида... Кеннойингиз келин кетиб қолибди, деб айтди-да. Йиглаб чиқиб кетганмиш!

— Энди кеннойимизнинг гапларини сиз кўтариб келдингизми?

Бердиқул Муродович ўнғайсизланиб илжайди. Йкки бетидаги буришлари дўмпайиб, пешонасидаги ажинлари тепакали томон силжиди. Назира опанинг истеҳзосидан фақатгина қочиб қутулиш мумкин эди, холос. Бердиқул Муродович ҳам шундай қилди. Чекишин баҳона қилиб, Бахтиёрни эргаштириб чиқди.

Опа куйиниб уф тортиди. Унинг силлиқ кенг пешонаси остидаги текис терилган қошлири бироз кўтарилиб, кўзларига ўйчанлик чўқди. Бу аёл шу туришда ҳайкалтарош қунт билан ўйган мармар қиёғага ўхшарди. Офтобда текис куйгандек қорамағиз юз, қирра бурун, ингичка лаб, унинг остида эҳтиётлик билан ўйиб олингандек ияк ва салгина осилган бағбақа. Силлиқ таралиб, энсага турмакланган қоп-қора соч. Кичкина қулоқлардаги кўз илғар-илғамас тилла ҳалқа.

«Мармар қиёға»нинг лаблари ҳаракатга келди:

— Хуршид куйибди-да... Тавба, кўёви ақсли йигит эди-ку! Нима жин урди?

Бирдан менинг борлигим эсига тушдию, ўзини қўлга олди:

— Энди тузукмисан?

Индамай бош силкидим.

— Эҳтиёт бўл, қизгина. Сен ҳам ўт-оловсан.

Пешонамга сочилган калта соchlаримни астагина ёнга қайирди.

— Асли ўғил бола бўлиб туғилишинг керак экан-да! Нега сочингни кесдинг? Қара, бўй бермайди-я... Исмингдек мағрур...

Назира опа қўлларини диван четларига тираб ўрнидан турди.

- Сен ўтиратур. Дарсингта ҳали эрта шекилли. Мен борай...
 Сал ўтмай, Бахтиёрни эргаштириб Бердиқул Муродович кирди.
 — Назирахон кетдими? Хайрият... Шу хотиннинг олдида нафас олишга ҳам кўрқаман-да! Кўзлари ўйиб оламан дейди. Эрига қийин... Хуршид аканинг курс-доши-да, а?
- Ҳа, эри ҳам курсдоши. Соҳибжон Пўлатовнинг хотини-да.
 — Йўғ-э, Назирахон-а? Пўлатов шунга уйланганми?
 Бахтиёр кулиб юборди.
 — Қаёқдаги икир-чикирларни исказ юрадиган одам шуни билмасмидингиз? Пўлатова эканидан ҳам сезмаганмисиз?
- Бердиқул Муродович Бахтиёрнинг киноясини илгамади:
 — Э, ким кимга уйланади, менга нима? Эсиз Пўлатов... Кўзи қаёқда экан? Йўқ, мен бунақа хотинни олмасдим.
 — Назира опадек аёл ҳам сизга тегмасди-да!
 Бахтиёр «богладим», — дегандек менга қараб кўзини қисди.
 Эшикдан Гулмира мўралаб, сўз кесилди.
 — Мағрура, салом!
- У тез юриб келганидан ҳарсиллаб қолган, қўлидаги соябонидан сув томар, узун пальтосининг этаклари ҳўл, қўллари совуқдан қизарип кеттан эди.
 — Кеч қолдим-а... Пальтомни шу ерга ечиб кетай, сезмай қўя қолишин... — пальтосини ечаркан, оғзи тинмас эди. — Ёмғир бирам эздики... Одамнинг кўчага чиққиси келмайди... Уйдаги иш ҳам тугамайди, фивир-фивир... Бир пайт қарасам, ўн бўйл деб қолибди... Югурдим... Аксига олиб...
- Пальтосини илди-да, соябонини бурчакка очиб қўйиб, шошилиб чиқиб кетди. Мен ҳам қўзғалдим. Яна икки соат дарсим бор эди. Кейин кутубхонага китобларни элтиб беришим керак...
- * * *
- Севги дилга бермас кафолат,
 Севги баҳтга, ё дардга йўллар.*
Сергей Есенин
- Кутубхонадан чиққанимда кун пешиндан оқҷан эди. Эзилиб ёғаётган ёмғир ниҳоят, қорга айланибди. Ҳўл қор соябонни ёмғир мисол тиқирлатар, оёқ остига тушгач, лойга қоришиб кетар эди. Қўлларим жазиллаб ачишиди. Изгирин кўлқоп-ларимдан ҳам ўта бошлади. Айниқса, кафтларимдаги чандиқларим кўпроқ зирқиллар эди. Осмон дараҳт учларига қадар пасайган, автолар зичлаб ёғаётган қор пардаси ортида чироқларини ёқиб, тусмоллаб сиргалар эди.
- Метро бекатига қадар чўзилган йўлка деярли бўш, акациялар қорнинг шитирлаши остида сокин турар, баргларини қиш бўйи тўкиб улгурмаган каштан дараҳтлари ўзининг яккам-дуккам япроқларини қор заррачалари ортидан ерга, оёқ остига ташлар эди.
- Мунча тез юрмасангиз, Мағрура?
 Оббо, Садриддин-ку! Теллагини бостириб, бўйинни қип-қизил шарф билан ўраб олган озғин, новча Садриддин қиз боланикидек нозик, узун-узун бармоқларини совуқда қизартириб, дийдираб турарди.
- Шошиляпман!
 — Қаерга?
 — Уйга.
 — Нега энди? Қаранг қорнинг ёфишини! Чиройли-ку!
 — Совуқ...
 — Ахир қиш...
 — Ёмон кўраман қишни. Ҳусни совуқ.
 — Сизга ўхшаб.
 — Нима?
 — Қишига ўхшайсиз деяпман.
 — Раҳмат!
 — Рост. Мағурсиз ўта. Исмингиз жисмингизга мос... Наҳот ҳеч нимани сезмай-сиз?
 — Истамайман сезишни.
 — Сизни ким хафа қилган ўзи? Ҳали ҳам аламдамисиз? Ҳатто сўзларимни эшитгингиз келмайди.
 — Садриддин, мен совқотдим. Йўлимдан қолдирманг.

Ҳақиқатан ҳам кафтларимдаги чандиқларим зирқиллай бошлаган эди.

— Мағрура, сизни яхши кўраман...

— Кўйсангиз-чи...

— Нега йиглайпсиз? Ҳафа қилдимми сизни?

— Йўқ.. Бу шунчаки, юзимда эриган қор!

Югурб кетдим. Шу топда ҳеч кимни кўришни истамасдим, бирон киши билан бир оғиз сўзлашишни хоҳламасдим. Кўнглим оғир, уни нимадир тош мисол босиб ётарди.

Тавба, Садриддин қаердан бунчалик сўзамол бўлиб қолди? Индамас, қиз болалардек уятчан Садриддин шуми? Мени қишига ўхшатдими? Ярамас! Одамнинг кўнглига нима оғир ботишини билади бу ҳам! Худди анави... шоир Музаффар... Музаффар Илҳомдек! У ҳам кўнгилга нима оғир ботишини яхши биларди. Кўнглимни оғритаверарди. Музаффар Илҳом! Бирам ёмон кўраман бу исмни!

Қўлларим совқотган сари кафтларимдаги чандиқлар кучлироқ зирқилларди. Бу чандиқлар... Музаффар Илҳомдан ёдгор эди.

* * *

*«Ҳей, мени тунлари ўлдириб,
Минг ўлдириб, бир тирилтириб
Кулган Нилюфар, гули нодир,
Нозик гулим, айтинг, ишқ надир?»*

Бу ўша, мен ёмон кўрган Музаффар Илҳомнинг шеъри. Кафтларимга чандиқ соглан шеър. Йўқ, чандиқни мен ўзим солдим. Шеърда нима гуноҳ?

Нилюфар ҳақиқатан нозик гул эди. Кичкинагина, хипчагина, юзлари оппоққина, қилиқлари ширингина... У ҳаммага ёқарди. У ҳеч кимнинг кўнглини оғритмаган, ҳеч кимнинг гапини ерда қолдирмаган, кулибгина гапиравчи, ўйлабгина иш қўлувчи қиз эди. Аёллар Нилюфар ҳақида «Гушган жойини тиндиради», — дейишарди. Йигитлар эса Нилюфар ҳақида... Ким билади нима дейишарди? Қизиқсан эмасман. Лекин унга кўплар совчи бўлмоқчи экани рост. Кимдир ўғлига, кимдир жиянига... Унинг унаштирилганини эшитиб. «Аттанг, кечиккан эканмизда», деб афсусланиб қўйишарди.

Нилюфар йигирма ўнда эди. Мен йигирма иккита. Иккимиз олдинма-кейин ишга келгандик. Музаффар Илҳом эндиғина шоир бўлиб танила бошлаган йигирма олти ёшли йигит.

Мен университетни эндиғина битирганман. Музаффар Илҳомни биринчи бор пиллапояда учратдим.

* * *

Биринчи кун ишга келишим эди. Кенг пиллапоялардан шошилиб учинчи қаватга кўтарилидим. Зинапоя майдончасида қандайдир бир йигит чекиб туарди. Мени кўриб, шошиб сигаретини бурчакдаги саватга ташлади. Кейин:

— Яхшимисиз? Мунча шошяпсиз? — деди.

Бошқа пайт бўлганда бунақангидан отган йигитни қандай боплашни ўзим билардим. Аммо ишхонада, эҳтимол, ҳамкасбимга бундай қиломасдим.

— Ишга шошиляпман, — дедим ҳазил-хузулга ўрин қолдирмайдиган жиддий оҳангда.

— Э, Мағрура сизмисиз?

— Исмимни дарров қаердан била қолдингиз?

— Бу ерда хабар тез тарқалади. Мен Музаффар Илҳомман.

— Исм-шарифингиз бошқачароқ эканми?

— Бу тахаллус. Шоирлар тахаллус танлашади-ку.

— Э... Эшитмаган эканман, — дедим.

Атайлаб ёлғон гапирдим. Чунки Музаффар Илҳом деган номни эшитмаган қиз деярли йўқ деса бўларди. Шеърини ўқимаганда ҳам ўша машхур қўшиқни билишарди.

*«Севар ёрим, алвидолар айтгани келдим,
Пешонага ёзилгани ҳижрон бўлибди...»*

Ҳа, атайлаб ёлғонладим. Аслида эса рўпарамдаги йигитга қизиқсиниб қарапдим. Назаримда, Музаффар Илҳом ўттизлардан ошган, ҳаётнинг аччиқ-чучугини татиган, басавлат одам бўлиши керак эди. Олдимда эса ўрта бўй, кенг елкали, қора қуюқ соchlари жингалак, тўгарак буғдой ранг юзларидаги одамга тик бокув-

чи кўзларида кулимсираш зоҳир, ўртacha қалинликдаги лаблари ҳатто кўзлари кулгандга ҳам табассумга очилмайдиган йигит турарди.

Бу — менинг умримдаги биринчি азобим эканлигини билармидим? Йўқ...

* * *

*Энди борар йўлм қорли, қировли,
Дарахтлар туради мармар кўйлакда.
Тўхтар манзилимда жимжит бир ҳовли,
Обтоловар мени кутар йўлакда.*

Равшан Файз

Ҳовлимизга дилдираб кириб келдим. У бўм-бўш эди. Тўрт томонга тортилган ишкомлар намдан бўккан, ўртадаги шудгор тилим-тилим бағрини қорларга очиб ётарди. Фишт терилган йўлкадан ёнга бурилдим. Айвонда кенойим шифт бўйи голланд печига оёқларини кўйиб ўтирас, тиззаларидағи қандайдир камзулга тугма қадар эди. Дераза ойналари буғдан хиралашган, бурчакдаги бўй баравар, қадимиий соат тинмай чиқиллар, полдаги палослар топ-тоза, диванга ташланган духоба теп-текис, унинг устидаги ёстиқчалар батартиб терилган, ойим айтмоқчи «Ҳаммаёк чинни-чирак» эди.

Кенойигинам ўз хаёллари билан банд, менинг кирганимни сезмади ҳам. Бахтли аёл! Атрофида чуғувлаган учта болага маҳлиё, эрининг топганига кўниб, йўғини яшириб яшашга одатланган, сандиқдаги дипломини ҳам унтушиб юборган. Ҳар оқшом қозон қайнатиб, иссиқ чойга меҳрини кўшиб йўлдошига тутадиган аёл эди у! Унинг учун бу табиий, шундоқ бўлиши керак эди!

Кенойигинам! Ҳавасим келарди унга. Шу билан бирга унга ўхшай олмаслигимни сезардим. Ахир унга ўзини иккilanмай кимгадир бағишлиб юбориш насиб этган эди. Ба у бундан баҳтиёр эди!

Ичкаридан ўн яшар жияним Лола «амма»лаб югуриб чиқди. Келасолиб соябонимни тортқилай бошлади. Унинг кетидан иккинчиси — етти яшарли Лайлочиқди. Униси сумкамга ёпиши. Шовқин, ниҳоят, кенойимнинг хаёлларини тўзитиб юборди. У бизларга бироз вақт кулимсираб қараб турди. Кейин қизчаларини кой-ий-койий қувиб юборди.

Қўлларим совуқ қотганидан ўзимга бўйсунмас, бармоқларим қовушмас эди. Кенойимнинг ўзи ичи мўйнали иссиқ курткамни очиб олди. Оёқларимни силтаблаб этиччаларимни туширдим. Қўлларимни печга тутдим. Иссиқ кафтларимдан ўтиб, қўлларимни жазиллатиб, бармоқларим игна санчилгандек симиллай бошлади. Айниқса, чандиқларим қаттиқ оғирди.

— Изигирин бирам ачитяпти-ки... — дедим пещонамни печга тираб.

— Бечора... Совуқ уринтириб қўйибди сизни. Йиғлабсиз ҳатто.

— Йўғ-э?

— Кўз ёшларингиз қотиб қолибди юзларингизда.

— Бу қор, кенойи...

Кенойим бир зум юзларимга тикилиб турди. Кейин уф тортди.

...Ярим тунга яқин, болалар ухлагандан кейин айвонда кенойимнинг акамга секингина бир нималар дёётганини сездим. Мен айвонга ёндош хонадаги бувимнинг эски диванида шарфимга ўраниб, оёқларимни узун этакларим тагига яшириб олганча дадам четларига қаламда белгилар чизиб ташлаган «Кант фалсафаси асослари»ни титкилаб ўтирадим. Бош томонимда бир вақтлар дадам Бухородан келтирган қўлбола мис чироқ ёниб турарди. Шундоқ диваннинг ёнида, мен одатда овозини паствлатиб эшитадигани магнитофон турар, Ванесса Мэйнинг мусиқаси авж пардаларга кўтарила бошлаган эди. Кенойим исмимни тилга олгандек бўлди. Куйни яна ҳам паствлатдим.

— Қизиқмисан, йиғлайман деса истаганча баҳона топиш мумкин, — бу акам, э, бир йиғлагим келди. Кўз олдимга Музаффар Илҳом, Нибуфар келди. Кейин негадир Садриддиннинг қиз боланикidek узун-узун нозик бармоқларини, қораҷиғи катта кўзларини озғин юзларига ярашмаган нозиккина қирра бурнини, шалпанг қулоқларини эсладим. Хўрлигим келди. Шу онда қораю кумуш аралаш қуюқ тўлқинсимон соchlарига қўнаётган ёмғир зарраларига бепарво ҳолда аччик тутунни ичига тортаётган Хуршид aka хотирамда жонланди. Мана, у сигаретини ташлади. Қўлларини шими чўнтакларига тиқиб осмонга, акация дараҳтларига ўйчан тикилди... Мана, менинг токчада ўтириб уни кузатаётганимни сезиб қолди... Мана, у хонадагилар билан кўришапти... Навбат менга келди. Қизариб-бўзариб ўрнимдан турдим. У кўзлари кулимсираб сўрашди...

Мана, мен зинапоя майдончасида қотиб турибман. Хуршид ака эгилиб сумкамни кўтарди... Димофимга аччиқ тамаки ҳиди урилди. Юзларимга иссиқ нафастегди... Китобни шартта ёпдим. Кўзларимдан ёш қайнаб чиқа бошлади.

Менга нима бўляпти ўзи? Нега ўз-ўзидан шашқатор ёшларим оқяпти? Кошки билолсам... Охири, ёшларим — бари тушларимга қоришиб кетди...

* * *

Кўзимни очсан, устимда кеннойимнинг тахмонидаги гулдор кўрпа, бошим тепасидаги чироқ, гилам устидаги магнитофон ўчиқ, дераза токчасида «Кант фалсафаси асослари», унинг устида Ванесса Мэйнинг аудиоальбоми ётар, ёнида эса шарфим тахлоглиқ эди.

Ховлида фира-шира тонг ёриша бошлаган, қорайган ишкомлар ортидан кўкнинг бир чети оқариб келарди.

Айвондаги соат олти марта бўғилиб занг урди. Енгил қадам товушлари эши-тилди. Эшик ёнида пол интрангандай гичирладиу, ўз овозидан хижолат бўлган каби тезда жимида.

Бу — кеннойим экани аниқ эди. Сал туриб, ошхонанинг чирофи ёни.

Кўрпани йигиб, ювиниб-тараниб ошхонага кирганимда чойгум жиғиллай бошлаган, кеннойим узунчоқ патнисга нон, пиёлалар, қошиқчаларни терар эди.

— Бошингизни китобга қўйиб ухлаб қолибсиз. Чарчабсиз-а?

— Жуда оғир кун бўлди кечача...

— Ҳа... Ўзимам ўйловдим... Нимадандир сиқилиб турувдингиз. Кимдир хафа қилдими?

— Ҳа.

— Ўйламай гапирадиганлар доим топилади. Эътибор қилманг.

Кеннойим билиб гапиряптими ё тусмоллабми, ҳар ҳолда, нишонга урган эди.

Жимгина патнисни олиб айвонга чиқдим. Кеннойим ортимдан катта коса тўла иссиқ сут, яна бир нималарни кўтариб келди. Аввал акам дастурхонга ўтириди. Кеннойим ичкарида қизчаларини эркалаб, алдаб уйгота бошлади.

Соатимиз етти марта бўғилиб занг урди. Акам занг товушининг тинишига кулоқ солиб туриб секингина деди:

— Филологлар файласуф бўлмоқчими?

— Нима қипти? — дедим мен пиёладан бош кўтармай. — Даҳам ҳам фалсафани кўп ўқирдилар.

— Ундан кўра мақолангни тугатсанг бўларди. Ё бир умр номзодликда қолиб кетмоқчимисан?

— Докторликка эрта эмасми ҳали?

— Менимча, айни вақти. Даҳам ўттиз икки ёшларида профессор Шавкат Мавлонов эдилар.

— Менимча, сиз ўттиз уч ёшдасиз.

— Ҳўш?

— Лекин ҳали ҳам номзодсиз. Ўзингиз қачон ёқлайсиз, Даврон ака?

— Тибиётнинг ўюриғи бошқа. Айниқса, синган-чиққаннинг. Энди доктор бўлан деб синган-чиққанни кўпайтираманми? Сен — бошқа гап. Оиласизда даҳамнинг ўюлидан кетган сенсан. Биз энди бобомизга тортганмиз.

— Бўлди қилинглар энди, — кеннойим қизчаларини уйғотиб чиқаркан, йўл-йўлакай гапириб келарди. — Мағрурахон, шу мақолани тугатиб қўя қолинг, худо хайрингизни берсин.

— Шундай қил, — хурсанд бўлиб кетди акам. — Кант фалсафасини тинч қўй. Уни ўқиши эркакларга ярашади.

Кулиб юбордим.

— Мана, гап қаерда экан! Ундан кўра китобни бер, десангиз бўлмайдими? Вой ака-еий... Нима қиласиз уни?

— Бошимга қўйиб ухлайман!

Шу вақт ичкаридан олдинма-кейин қизчалар чиқиб келишдиу, акам тилини тишлади.

Индамай чойига ташлаган оққанд бўлагининг эришини кутиб турди. Кейин секин-секин хўплаб битирди.

Фақат шундан сўнггина менга деди:

— Индинга мақолангни Академияга олиб борасан. Соҳибжон Пўлатов деган одамга. Иккинчи қават, йигирма саккизинчи хона, соат ўн тўрту нол-нолга. Тушунарлимис?

- Вой, сиз Пўлатовни қаердан...
- Аканг кўпларни танийди. Қандай одамнинг синглиси эканингни билмайсан-да!
- Фотиха ўқиб ўрнидан туар экан:
- Хайрон бўлиб ўтираверсанг, ишингга кеч қоласан, — деди. Кейин қизчалининг бурунларидан чимдид эркалаган бўлди-да, кийингани кириб кетди.

* * *

Акам ва мен... Бизни баъзан Ҳасан-Зуҳра деб аташарди. Ваҳоланки, акам мендан уч ёш катта эди. Мен доимо акамнинг ортидан эргашиб юардим.

Болалигимнинг ёдда қолган илк таассуроти акамнинг мактабга чиқиши эди. Тўрт яшар чоғим.

Акамнинг уч-тўрт соатлаб мактабда бўлиши ундан бир қадам айрилмаган мен учун катта зарба эди. Акам мактабга йўл олса, эргашиб дод солар, акам бечора орқа-олдига қарамасдан қочар, мен ноилож ортда қолардиму, дарвоза тагига йифлаб ўтириб олар, мени овутолмай ойимнинг эси кетарди.

Бир куни, айниқса, чидомладим. Оувунган бўлиб ҳовлига кирдиму, ойимнинг кўзини шамгалат қилиб кўчага чиқдим. Аниқ эсимда: мен акамни топмоқчи эдим. Мактаб қаердалигини эса, табиийки, билмасдим. Шунинг учун тусмоллаб акам кетадиган тўғри кўчадан кетавердим. Кўча жудаузун эди. У тугагач, чорраҳа бошланди. Ундан нарида яна кўча бор эди. У ҳам жудаузун, охири кўринмасди. Табиийки, на мактаб, на акам бор эди. Ниҳоят, чарчаб, очиқиб, йўл четида аравачада сомса сатаётган одамнинг ёнига келиб сомсаларга қўл узатдим. Ҳалиги одам битта сомса тутқизди. Кейин атрофга аланглади. Ота-онамни излади, шекилли. Ниҳоят, менинг адашиб қолганимни тушунди. Мен эса, феълим айниб, исмимни айтмай туравердим. Кейин чақириб келишганми, ялтироқ тугмали бир киши мени машинага ўтқазиб олиб кетди. Қандайдир катта хонага олиб кириб, қаерларгадир қўнғироқ қилди. Беш-олтита одамга кўрсатди. Ҳаммаси бошини чай-қаб чиқиб кетаверди. Хонада етти ё саккизта одам ўтиради. Улардан бири митти тешиккулча тутқизди. Ора-сира телефон жиринглар, одамлар кириб-чиқар эди.

Бир вақт дадам югуриб кирди. Мен хотиржам тешиккулча мужиб ўтирадим. У мени кўрдию, оёқларидан мадор кетиб, ўтириб қолди. Ҳонадагилар дадамга бир нималарни гапира бошлашди, дадам ҳам уларга нималардир деди. Кейин олдига оқ қофоз қўйиб, бир нарсаларни ёздиришди. Узлари ҳам ёзишди. Кейин дадам мени қўтариб уйга олиб кетди.

Ха, мен жуда эрка, айтганини қилдирмай қўймайдиганлар тоифасидан эдим. Фақат акам ҳамроҳлигига, ўғил болалар билан ўйнар, мабодо қиз болалар даврасига тушиб қосласам, ҳаммани ўғил болаларнинг ўйинларини ўйнашга мажбур қиласар, кўнмаганни аямай урадим. Қўлларим қаттиқ, акамнинг ўртоқларидан ёқалашиш «сирлари»ни муқаммал ўрганган эдим. Менга ҳеч кийим чидамас, доим қўл-оёқларим ё юзим тирналиб, шилиниб юардим. Сочларим калта, ойимнинг ҳавасга тикитирган кўйлакчалари қолиб, акамнинг эскисини этнимга илиб қочардим. Кечқурун, мени чанг-чунглардан тозалаб, тирналган-шилингган жойларимга ачиштириб йод суркар экан, ойим оҳ тортар, мен эса оғриганини билдиримаслик учун акамга тилимни кўрсатиб қилиқ қиласдим. Бувим ўзининг эски диванига ўтириб олиб:

— Худойимдан ўргилай... Зориқтириб-ёлвортариб нақ оловидан берди-я, — дерди.

Мен бу сўзларнинг маъносини тушунмасдим, албатта. Фақат, эсимни таниганда билдимки, биз ака-сингил ота-онамизнинг минг тавалло билан тилаб олган болалари эканмиз.

Дадам эрта — эллик икки ёшида вафот этди. Мен шунда ўн етти ёшда эдим.

У эрталаб уйдан кулиб чиқиб кетганди. Кечқурун ойим телефон гўшагини қўтариш, хушидан айрилди. Акам қаёққадир югуриб кетди...

Уч кундан сўнг уйимизга тумонат одам йиғилди. Уч кундан бери кўз юммаган ойим хуш-бехуш туар, на тили айланар, на қатра ёш тўкарди. Уч кунда қадди букилган акам тўнининг енгларини тишлаб ўтиради.

Мен катта уйимизда, дадамнинг бош томонида ўтирас, кўзимда ёшларим тўхтамас, лекин овозим чиқмас эди. Ёнимда айтиб-айтиб йиғлаётган аммаларим юракларимни қон қилиб юборар, дод солиб енгиллашиб олгим келардию, томогимни нимадир сиқиб олган, кўйиб юбормас эди. Кўз олдимда эса мени — хотиржамги на тешиккулча мужиётган қизчани қўтариб кетаётган дадам.

Мен күчага чиққанимда ҳаммаёқ намчил, оёқ ости ёпишқоқ, ҳаво рутубатли эди. Кечаги қордан асар ҳам йўқ, фақат изгирин юз-кўзларга игна санчарди.

Университет биносига кираверишда таниш оқ “Нексия”ни кўрдим. Хуршид aka қалта қора пальтосида, бошяланг, бир қўлида оғир портфели, иккинчиси билан машинаси эшигини ёпар эди. Мен Хуршид акага кўринишни истамасдим. Шу заҳоти арчанинг панасига ўтдим. Бир пайт:

— Мағрура, нега бу ерда турибсиз? — деган таниш овоз эшитилди.

Бу — Баҳтиёр эди.

Оббо, шуниси етмай турувди! Баҳтиёри тушмагурнинг меҳрибонлиги тутиб кетиб, қўлларимдан ушлаб йўлкага чиқариб қўйди. Кейин кичкина думалоқ қўзлари пориллаб, бир нималарни гапира кетди. Мен эса бир аччиқланар, бир қулгим қистарди.

Тасаввур қилинг, тўғри йўл қолиб, арчанинг панасида кимдандир яшириниб турибман. Атрофимдан эса ўнлаб одамлар шошиб ўтиб боришаётган. Кулгилими? Ҳа. Тўпифимгача лойга ботиб турганим-чи? Кулгилими? Ҳа. Ойим айтмоқчи “Шу менга зарилмиди?”

Хўп, Хуршид aka кўрса нима бўлти? Салом бериб ўтиб кетавер, сенга нима? Мана энди лойга ботиб, Баҳтиёрга кулги бўлиб, ўз-ўзингдан аччиғинг чиқиб туравер!

Ҳа-я, Баҳтиёр нима деяпти?

— Анави қайрагочнинг орқасида кран бор. Мағрура, юринг.

— Нима қиласман у ерда?

— Этикчани ювиб оласиз. Лойга ботиб кетибсиз-ку! Сумкангизни беринг, ушлаб тураман.

Жуда ажойиб томоша бўлди-да! Мен кран олдида эгилиб олиб совуқ сувда этикчамни юяпман. Баҳтиёр бир қўлида ранги ўчган портфели, бир қўлида сумкамни ушлаб тепамда қаққайиб турибди. Нарироққа борай ҳам демайди. Лоақал тескари қараса-чи! Йўқ! Албатта, томоша қилиб туриши, яна “ундоқ юв, бундоқ юв” деб маслаҳат бериши керак. Гўё Мағрура этик ювишни билмайди!

Совуқ сувдан қўлларим жазиллаб, чандиқларим оғрий бошлади. Шоша-пиша қўлимини рўмолчамга артиб, қўлқопга суқдим.

Баҳтиёр ҳамон қараб турарди.

— Совуққа йўқ экансиз-а?

— Нима?

— Совуққа чидолмас экансиз, деяпман.

— Ҳа... Сумкамни берақолинг.

— Кўяверинг.

“Халқ сўзи”ни ўқиб ўтирган қоровул чол кўзойнаклари тепасидан бизга қараб қўйди-ю, яна индамай, ўқишига машғул бўлди.

Факультетга кириб келдик. Йўлакда ердан чиқдими, тўсатдан рўпарамизда Садриддин пайдо бўлди. У кўзлари ола-кула бўлиб, бир менга, бир Баҳтиёрга қаради.

— Ҳа, жўра, қалай ишлар? Кўзларинг пахтаси чиқиб кетибди-ку! Кўзни юмай!

Садриддин бирдан қип-қизариб кетди. Шарт бурилиб жўнади. На кулишимни, на аччиқланишимни билолмай қолдим. Ҳа, бугунги кун жуда ажойиб бошланаётган эди. Бугунги ўтган дарсларим ҳам, талабаларимнинг шовқини ҳам, менинг дарс ўртасида, талабаларимнинг жавобларини тинглаган бўлиб хаёлга толиб қолганим ҳам, кейин гап мазмунини англай олмай довдираб қолганим ҳам — бари жуда ажойиб эди. Аммо энг “ажойиби” кейин, дарслар орасидаги бўш соатимда рўй берди.

Кафедра хонасига Назира опа мўралади.

— Шу ердамидинг? Гулмира йўқ экан. Хуршидга чой дамлаб берасанми?

Мен йўлакка чиққанимда Хуршид аканинг эшиги очиқ, у ердан дам Хуршид аканинг, дам яна бир кишининг овози келарди.

Тезда кўкиштоб қора пахта гули чойнакка қуюқ қилиб чой дамлаб, чойнакнинг гулига мос зарҳал пиёлаларни чайқаб кичкина патнисга қўйдим.

Хонада, девор тагидаги креслоларда Хуршид aka ва мен танимайдиган унга тентдош яна бир киши ўтирас, Назира опа уларнинг қаршисидаги катта стол

ортуда жилмайиб ўтиради. Бояги киши саломимга бепарвогина алик олиб, сўзи-ни келган жойидан давом эттириб кетаверди.

— Ҳали плёнкалар чиққани йўқ. Чиқса, биринчи бўлиб ўзинг кўрасан, ёмон-мас.

Назира опа менга қараб кафти билан столга енгилгина шапатилаб кўйди. Пат-нисни унинг олдига қўйдим.

— Баҳорда яна бир борамиз. Иложини қил, олиб кетай. Таътил бордир? Нега куласан? — у сенсираб гапиришидан Хуршид aka билан анча қалинга ўхшарди. Тезгина чиқиб кета қолдим.

Улар яна чой сўрашлари мумкин эди. Гулмира йўқ бўлса, ўзим чой қайнатиб турганим яхши. Электр чойгумга сув тўлатиб келиб, симини токка уламоқчи эдимки, қарасам, розетка деворда илиниб қолибди. Боя шошилганда чиқариб юборган бўлсан керак. Эҳтиётлик билан жойига ўрната бошладим. Тешикдан яна бояги кишининг овози эшитилди.

— Хуршид, кўй, амма-холаси қилиб юрмагин-да, Назирахонни жўната қолай-лик. Узи тинчтиб келади. Нима дединг?

— Куёвим билан гаплашдим-а...

— Хўш?

— Э, ҳаммаси аёлларнинг майда-чуйда гаплари... У ҳам нима қилсин? Бир ёқда онаси у деса, бу ёқда хотини бу деса...

— Шунинг учун Назирахон борсин деяпман-да! Хоним яхшигина дипломат. Ҳаммасини жой-жойига таҳлаб, нуқта-вергулларни қўйиб, яраш-яраш...

Хуршид aka кулиб юборди.

— Хўп-а?

— Хўп, хўп...

— Ҳа, ана! Хоним, чиройли тоғора-поғоралар билан-а? Келиштирасиз! Бугунок! Хўп... Энди бизни бир холи қўясиз!

Оббо, бу розетка нега жойига тушмайди? Ё чойгумни бошқа ёққа қўйсамми? Розетка осилиб қолаверадими?

Нариги хонадан Назира опа чиқиб кетди шекилли, эшикнинг очилиб-ёпилгани эшитилди. Ҳозир опа бу ёққа киради. Энди нима қилдим?

— Хуршид, уйлансанг бўларди... Бизда бир аёл ишлайди. Шу... 35 ёшларда бор. Таништирайми?

— Кўй, тақсирим, бош оғрийди...

Бирдан чойгум сими қўлимдан тушиб кетди. Яхши ҳам оёқ остига палос тўшалган экан. Овози чиқмади. Амаллаб уладим.

— Чой қўйяпсанми? — сўради Назира опа хонага кириб.

— Яна чой сўраб қолишса...

— Менимча керак бўлмассов... Соҳибжон “тезда кетаман”, деган эди.

— Вой, бу Соҳибжон аками?

Опа кулиб юборди.

— Танимасмидинг ҳали?

— Йўқ. Ҳеч кўрмаганман.

— Ие, мен “мақоламни олиб бораман”, деганингта танийсан деб ўтирибман.

Шу пайт йўлакдан Соҳибжон Пўлатовнинг, кейин Хуршид аканинг овозлари эшитилди. Сал ўтмай, икковлари эшикда кўринишиди.

— Соҳибжон, мен сизга қизимизни таништирамбман-ку! Бу — Мағрура. Шавкат Мавлоновнинг қизи.

— Э, шунақа денг? Ундай бўлса, нега индамай кириб-чиқяпсиз? “Мен — Мағрураман” дессангиз бўлмайдими? — Пўлатов кулди. — Қалай, акангиз яхшими? Бу ёқнинг акаси Даврон Мавлонов. Танирсан?

— Йўқ, танимас эканман.

— Қўли енгил жарроҳ. Мен бир қариндошимизни кўрсатган эдим. Аммо ниҳоятда гаплашадиган йигит. Мағрурахон, ақангизни сўраб қўйинг, индинга сизни кутаман. Назирахон, ишингиз тугадими? Йўл-йўлакай уйга ташлаб ўтаман. Хуршид, ҳали яна гаплашамиз. Кулма! Бўлдингизми, хоним? Хўп, хайр бўлмаса!

Пўлатов Хуршид аканинг қўлини маҳкам қисди, менга бошини силкиди. Кейин Назира опани ёнига олиб жўнади. Мен йўлакда кетиб бораётган бир-бирига монанд икки инсонга ҳавас билан қарадим. Хуршид aka эса негадир ўйланиб турарди.

— Хуршид aka, чойнак-пиёлаларни йиғишириб олай.

— Нима? Ҳа, бемалол, бемалол...

Патнисга чойнак-пиёлаларни терар эканман, негадир уф тортгим қелди. Назаримда кимдир кўз қири билан мени кузатаётгандай эди. Қарадим. Хуршид aka

йўлакда, эшикка орқа ўгириб турарди. Бошқа ҳеч ким йўқ. Тавба, нима бўляпти ўзи?

* * *

Академияга етиб келганимда билагимдаги соат (кечикиб юришларим фашига теккани учун акам зўрлаб тақдириб кўйган) ўн учу элликни кўрсатар эди. Бинога элтувчи зинапоя ёнида тўхтаб атрофга разм солдим.

Тошкентнинг мана шу сокин кўчасини азалдан яхши кўтардим. У авваллари — мен болалигимда, дадамнинг олдига келган пайтларимда ҳам тинч бўларди. Бу кўчадан ўтган одамлар ҳам осойишта, босиқ, гўё шаҳарнинг шошилинч ташвишлари бу ер учун бегонадай... Бино олдида машиналар қатори бўларди.

Хозир ҳам шу. Ўша-ўша сокинлик, ўша-ўша осойишталик. Фақат арчалар анча кексайган, бино кўхна тортган, машиналар қатори ўша-ўша, лекин улар бошқача кўринишдаги автомобиллар эди.

Ойим баъзан оқшомга яқин акам иккимизни шу ерга етаклаб келар, биз дадамнинг чиқишини кутар эдик. Дадам доимги ўзига яращувчи ороста кийимларида, шошилмай эшикдан чиқиб келар, ёнимизга етгунча беш-олти киши билан қисқа сўзлашиб олар, етти-саккиз кишининг саломига алиқ оларди.

Кейин дадам қаддини бироз эгиб акам иккимизни баравар кучоғига оларди. Мен шу пайтларда мактаб остонасига қадам кўйган, акам эса анчагина эсини таниб жиддий тортиб қолган, эркалик қилмас, тезроқ дадамнинг кучоғидан чиқишига ҳаракат қиласарди. Буни сезган дадам бизни тезда кўйиб юборарди. Ойим билан бир-икки оғиз сўз қотишгач, мени етаклаб, акамни олдига солиб, шаҳар марказидаги хиёбон томон йўл олар, курант орқасидаги боғда ойим билан ёнмаён бир нималарни секин-секин сўзлашиб борар, мен уларнинг суҳбатларига тушумасам ҳам қулоқ тутишни яхши кўтардим.

О, ўша даврлар! Қайтмас дамлар!

Юрагимни нимадир фижимлаб юборди. Ўйларимни ҳайдаб юборгим келди. Соатта қарадим. Ўн учу эллик беш. Рухсатномалар бўлимига кириб қўнгироқ қилдим. Гўшакни Пўлатовнинг ўзи кўтарди.

— Рухсатнома буютириб кўйганман, кираверинг, — деди тетик товуши билан.

Беш дақиқа ўтар-ўтмас, Пўлатовнинг хонасига кириб келдим. У мени кўрибоқ ўрнидан кўзғалди. Бир-икки оғиз сўз билан акам, ишларим ҳақида аҳвол сўрашди-да, қофозларимни кўздан кечира бошлади. Мен эса ўзгача қизиқиш билан уни кузатардим.

Пўлатов Назира опадек аёлга йўлдош бўлган киши эди. Шу сабаб, мен у нимаси билан опага ёққанини билгим келарди. Пўлатов қофозларни кўтар экан, қоп-қора тийрак кўзлари сатрлар устида илдам сирғалар, кўзлари ёнидан чаккалари томон тараалган майда ажинлари, кенг пешонасини кесиб ўтган икки қатор чизиқ, қошлари тепасидаги ажин чукурлари унинг қорамагиз юзларига (ажаб!) ярашарди. Силлиқ, сийрак соchlари пешона ва чаккалари ёнидан оқарган, қора костюмининг енглари ичидан чиқиб турган бақувват қўлларида кўкимтири томирлар бўртиб кўринарди.

Пўлатов қофозларимни тахлаб, столи бурчагидаги яшил папкага солиб, менга қаради. Кўзлари кулимсираб турарди.

— Мағрурахон, биз мақолангизни икки-уч кишига тақризга топширамиз. Биласиз-а?

Бош силкидим.

— Ҳали ўзим ҳам ўқийман. Бир-икки жойига кўз югуртиридим. Анча қизиқча ўхшайди. Умуман, 19-аср адабиёти ажойиб давр. Айтганча, дадангизнинг тадқиқотларини давом эттиրмайсизми? Ўрта асрларга ҳам қизиқсангиз, баҳорда Ҳиротга экспедициямиз бор. Рўйхатга киритиб кўярдим. Мана, деканинглар боряпти.

— Маҳаллий фольклорни ҳам ўрганасизларми?

— Бир жиҳатдан, ҳа. Бир ўқ билан икки қўённи ургандек. Қолаверса, Хуршид мутмоз адабиётдан ҳам яхшигина мутахассис.

— Йўғ-Э...

— Нима, деканингларни билмайсизларми? — Пўлатов кулди. — Буни қаранглар-а! Фольклорчи достонлардан бошқа нарсани билмайди деб ўйларканлизлар-да! Хўш, ўйлаб кўрасизми? Эски ўзбек ёзувини жуда яхши биларканлиз. Тилдан қалайсиз?

— Араб тилини яхши биламан. Классик араб тилини ҳам.

— Тағин?

— Форс тилини. Инглиз тилида бемалол муомала қила оламан. Рус тили...

— Ҳа, бу энди табиий. Бўлдими?

— Ҳа...

Пўлатов кулиб юборди.

— 19-асрда нима қилиб юрибсиз, синглим? Ўрта асрлардан бемалол илм қилсангиз бўлар экан-ку!

— Мен кўпроқ 19-асрга қизиқаман-да!

— Майли, майли... Ҳамма юрагига яқин ишни қиласди. Тўғрими? Хўш... Акангизни сўраб қўйинг. Ҳа, мақолангизнинг натижасини Назира опангиздан айттириб юбораман. Хўпми?

Пўлатов мени эшиккача кузатиб чиқди. Ажойиб одам! Мен бу одам нимаси билан Назира опани мафтун қылганини тушуна бошлаган эдим.

Лифтдан тушиб ўнгга бурилдим. Кенг зинали фойедан пастга тушарканман, ёнимда Садриддин пайдо бўлди.

— Кўришган жойимизни қаранг, — тортиниб кулимсиради у. — Кеча ҳам сизни кўрмовдим, бугун ҳам...

— Ишга келсангиз кўрасиз-да!

— Дарсим ийӯқ эди-да. Кейин... Ўзингиз доим қувсангиз... Энди бўлса, келмайсан, дейсиз...

— Мен унақа деганим ийӯқ!

— Мунча зарда қиласиз? Шошманг, ахир...

— Нима дейсиз?

— Кузатиб қўяман...

— Раҳмат!

Қадамимни илдам ташлаб кўчага чиқдим. Садриддин новча қадди одатдагидек букилиб, ортимдан эргаши.

— Жон Садриддин, ўз ҳолимга қўйинг.

— Хўп, майли... Яхши боринг.

Бурилдиму жадал жўнадим. Ўн қадамча юргач, беихтиёр ортимга ўгирилдим. У ҳамон қотиб турар, кўзларини мендан узмас эди. Бечора...

Нега хафа қилдим уни? Зарда қилишнинг ўрни эмасди-ку! Қон билан кирган, жон билан чиқаркан-да!

* * *

*Тунлари ўйларим шуъладай оқиб,
Тонг бўлиб отаман сенинг ёдингда.
Кунлари зафардан чамбарлар тақиб,
Солланиб ўтаман атай ёнинедан.*

Мукаррама Муродова

Илгаридан шундай эдим. Ялинчоқ оҳантни жиним сўймасди. Бир кишига ёқаман деб минг турланадиган одамлар ғазабимни кўзғар эди.

Ошиқларимга муносабатим ҳам шунга ўхшаш. Феълим ёмонлигига қарамай, мени деб хўрсинадиганлар талайгина эди. Аммо мен уларнинг ҳаммасини ётқизиб-турғизар, сувга олиб бориб суформай қайтарардим. Ўз-ўзимга ишонч, бу қадар ҳудбинлик менга қаердан шунчалик ўрнашган, билмайман. Назаримда, йигит киши ўз номига яраша “йигит” бўлиши керак эди-да! Ҳатто “севаман” деган сўзни ҳам бошини мағрур тутиб айтиши керакмиди? Лекин бошни мағрур тутиб “севаман” дейиш қандай бўлишини тасаввур қилолсам кошки!

Ким билсин, балки уларнинг биронтаси юрагимни жазиллатмагани учун ҳам йигитларни шунчалар қийнагандирман?

Ҳар ҳолда биринчи севги азобларини ҳам тенгдошларимга нисбатан анча кеч — йигирма икки ёшимда тотидим.

Оҳ, ёмон бўлар экан бу азоб! Бир вақтлар ўзим азоблаган йигитларнинг аҳволини шундагина тушундим.

Музаффар Илҳомнинг мени кўрганда кўзлари чақнаб кетиши аввалига хуш ёқди. Лекин мен шу пайтгача дуч келган ошиқларимга ўхшаб хўрсинмай, титрамай, дадил боққани жаҳлимни чиқарди. Баззан мени менсимагандай ўтишлари ҳайрон қолдирди.

Ярамас! Ахир унга мафтун бўлган қизлар кўп эди! Мени ҳам мафтун бўлади, осонгина енгилади, деб ўйлади, шекилди. Дадиллиги менимча, шундан эди. “Овора бўлади, — ўйлардим мен. — Кўрамиз, ким кимга эгиларкин!” Барibir енгилишига кўзим етарди. Чунки мени севишига ишонардим. Ахир жуда чиройли қиз эдим. Ҳа, буни ҳар қадамда ҳис этардим. Кўчада йигитларнинг беихтиёр кўз

ташлаганидан, уйимиздан совчи аримаганидан билардим. Ахир кўзгу ҳам алдамас эди!

Лекин ҳаммаси чилпарчин бўлди. Нилуфар сабабли. Йўқ, бунга учаламиз бара-вар айбдор эдик. Мен, Музаффар Илҳом ва Нилуфар... Буни тан олиш бирам оғир... Айниқса, ўзимнинг айбимни...

Нилуфар Музаффар Илҳомни кўрганда яшнаб кетарди. Бечора! Буни яширишга минг уринмасин, удаломасди. Менинг Нилуфарга бир раҳмим келса, бир ачифим чиқарди. Айниқса, у Музаффар Илҳомнинг олдида қизариб турганда, овози товланиб унинг исмими тилга олганда.

Мен рашк қиласдим! Буни яшира, Нилуфарга минг азоблар ичидаги кулиб боқар, Музаффар Илҳомга бепарво қараш учун бор иродамни сарфлар эдим. Бу каби қийноқларни ҳали бирон марта тотган эмасдим.

Бир кун келиб бу азоблар барҳам топишига ишонардим. Аммо қай тарзда, билолмасдим.

* * *

Ҳаммаси ўз-ўзидан содир бўлди-қўйди. Эрта кузнинг илиқ куни поёнига ета бошлаган пайт. Кундуз серқатнов бўлган узун йўлак жимиб қолган. Мен кетиш олдидан столим устидаги қофозларни тартибга келтирадим. Йўлакда қадам товуши эшитилди. Эшик ёнида қадамлар тинди-ю, Музаффар Илҳомнинг овози келди:

— Ие, ҳали ҳам шу ердамисиз?

Кутимаган овоздан чўчиб тушдим, қўлимдаги қофозлар полга сочилиб кетди. Бошимни кўтариб қарасам, оstonада Музаффар Илҳом турибди. Узун енгли кулранг кўйлакда, қуюқ жингалак соchlари деразадан тушган шуълада қоп-қора товланади, кулимсираган кўzlари тик боқади, кенг елкалари гўё эшикни тўсib тургандай, қиёфаси ҳозиргина навбатдаги жангдан ғалаба қозониб қайтган саркарда мисол магрур эди.

— Мунча чўчимассангиз?

— Киришдан аввал тақиллатиш керак.

— Эшик очиқ экан. Кейин... Нега кетмаяпсиз?

— Кетяпман.

— Нега кеч?

— Терговчимисиз?

— Йўғ-э, сизни тергаб бўлармиди?

Музаффар Илҳом сочилган қофозлардан бирини қўлига олиб ўқий бошлади:

“Бу унинг биринчи азоби эди. Биринчи аччик азоби. У рашик қиласди. Кундуз бор аламини ичга ютиб рақибасига кулиб қарап, тунлар бу аламлар қайноқ қўз ёши бўлиб ёстигини хўллар эди. О, рашик! Сен...”

— Беринг бу ёққа, — деб қофозни қўлидан олиб қўйдим.

— Кимники бу?

— Анора Турсуннинг қиссаси.

— Яхшига ўҳшайди.

— Қайдам, ҳали ўқиб бўлганим йўқ.

— Биринчи таассуротлар бўлиши керак-ку, ахир!

— Таассурот охирида айтилади.

— Шунақами? — Музаффар Илҳомнинг кўzlарида шўх кулги кўринди. —

Унда келинг, охиригача ўқиймиз.

— Бошқа сафар.

Музаффар Илҳом стoldан бошқа бир қофозни қўлига олди:

“Наҳот менинг журъатим йўқ? — ўйларди қиз. — Бир оғиз сўз. Бор-йўғи бир оғиз...”

— Беринг бу ёққа!

— Манг! Қани, манави нима? “Япроқлар чиртиллаб узилиб тушаётган салқин куз оқшоми. Кимсасиз кекса боғ гўё ўтган умрнинг дардларидан чарчаган мисол жим. Фақат заъфар япроқлар товуши хукмрон: “чирт-чирт”...

— Беринг деяпман!

Музаффар Илҳом кулиб юборди.

— Жаҳлингиз бурнингизнинг учидаги туради-я!

Қўлини астагина бурнимга теккизди. Қўлини силтаб ташладим. Энди менинг ростмана жаҳлим чиқа бошлади.

— Баджаҳл қиз! Жаҳлингиз ҳам чиройли! Бўлди, бўлди, бошқа ҳазил қўлмайман...

Музаффар Илҳом чўнқайиб ерга сочилган қоғозларни тера бошлади. Мен стол устини йиғиштиарканман, ўгринча унга қараб қўярдим. Музаффар Илҳом бирдан жиддий тортиб қолган, қоғозларни авайлаб ердан кўтарар, бир кур уларга кўз югуртириб иккинчи кўлига тўплар эди. У шу туришида жуда кўркам эди. Юрагим гупиллаб кетди.

Музаффар Илҳом яна бир варақни ўқий бошлади:

“Гулим, дунёда сендан ўзга азизам йўқ. Йиглама, рашк азоби қийнамасин сени. Кўзингда қатра ёш кўрмай, жоним!”

— Чиройли ёзилган экан.

У ўрнидан туриб қоғозни менга узатди.

— Номи нима экан қиссанинг?

— “Биринчи азоб”.

— Ҳа... Анора опа яхши ёзади.

— Менга ҳам ёқди.

Музаффар Илҳом юзимга диққат билан қаради. Кўзларида мулойим табассум кўринди.

— Шунинг учун кечикдингизми?

— Ҳа. Охиригача ўқигим келди.

— Худди кўнглингизни билгандай ёзилгандир?

— Бу нима деганингиз? — Бунинг сизга нима қизиги бор? — дедим.

У тап тортмай кулди.

— Қизиқ-да!

— Чиқинг, мен эшикни ёпишим керак, — дедим эътиrozга ўрин қолдирмайдиган оҳангда.

Музаффар Илҳом бирдан жиддий тортиди.

— Қувламанг, — деди негадир ўксик оҳангда. — Ҳатто нима гапинг бор демай-сиз ҳам-а?

— Гапингизни индамай эшитяпман, шекилли?

— Йўқ, эшитмаяпсиз... Мағрура, мен... эшитмаяпсиз.

— Нима дейсиз?

— Мен яхши кўраман сизни.

Кўлларим титрай бошлади. Шу ондаёқ уларни орқамга яширдим. Бу гапни қанчалик орзиқиб кутган бўлмай, мени шунчалик титратиб юборади деб ўйламагандим. Лекин Музаффар Илҳом буни сезиб қолишини истамасдим. Бемаъни мағрурлигим бош кўтараётган эди.

Сумкамни елкамга ташладиму, эшикка йўналдим. Музаффар Илҳом эса бир ҳатлашда ёнимда пайдо бўлди. Қолгани бир зумда рўй берди. Узимни унинг кучоғида кўрдим. Юз-кўзимга қайноқ бўсалар ёғилди. Мен жон-жаҳдим билан юзимни у ён-бу ёнга буриб унинг ўпичларидан ўзимни тортишга интилар, аммо ҳаракатларим беҳуда эди.

Охири унинг бўсаси лабларимни куйдирди. Бир зум, атиги бир зумгина бўшашибим, кўксига бошимни қўйгим келди. “Музаффар aka, мен ҳам сизни...” — дегим келди. Бироқ мен Мағрура эдим. Исми жисмига мос Мағрура!

Бир силтанища унинг кучоғидан қутулдиму, қандай кўзим қиди, билмайман, юзига тарсакилаб юбордим. Кейин йўлакка отилдим.

...Шу куни тонгтacha тўлғониб чиқдим. Кўз олдимда Музаффар Илҳомнинг мағрур қиёфаси, кулоғимда унинг овози, юзларим, лабларим ёнар, тун менга Музаффар Илҳом овози билан “севаман!” — дер, мен эса кимсасиз қоронгуликка боққанча “Музаффар aka, мен ҳам сизни...” — дердим.

* * *

— Назира опа бетоб экан. Ўрнига Бердиқул Муродович кирадилар.

Гулмира бу хабарни айтганда биз аудиторияларга тарқалиш ҳаракатида эдик.

Шу пайт шляпасини бошида кўнқайтириб Бердиқул Муродович кириб келди. Қип-қизил букри бурни остидаги оғзи сариқ тишлари кўринар даражада очик, икки бетидаги буришлари дўмпайтан. Негадир кайфи чоғ.

— Ваалайкум ассалом, синглим. Мана, келдик.

Бердиқул Муродович Гулмиранинг саломидан аввал алик олиб ҳаммамизга бир-бир қараб чиқди.

— Ҳўш... Ҳа, иним, жўжалар омонми?

— Юришибди чугурлашиб.

— Ҳа, омон бўлишсин, омон бўлишсин. Шу жўжаларни деб юрибмиз-да! Ҳа, Мағрурахон, ваалайкум ассалом! Хўш... Кетдик эса!

Бердиқул Муродович ўзининг керакли эканлигини ҳис қилган одамларга хос туур билин пальтосини ечиб илгичга илди, устига шляпасини қўндириди-да, кулагили бир викор-ла чиқиб кетди.

— Гулмира, Назира опа қаерда туради?

Гулмира одатича ўнг қошини хиёл кўтарди.

— Ҳозир кўргани бормоқчимисан?

— Иўғ-э, дарсдан кейин.

— Унда дарсдан кейин кел, қандоқ топишни тушунтираман. Шу пайтгача бормаганимидинг уйига?

— Йўқ.

— Тавба, гапингларни эшитганлар сизларни она-бола деб ўйлайди-ю, уйига бормаган бўлсанг.

— Ишонмайсанми?

— Дарсдан кейин дедим-ку! Бор, талабаларинг кутиб қолишиди.

* * *

*Биз барчамиз гўдакмиз бир оз,
Гоҳ кўзда ёш, гоҳ лабда кулгу.
Бўлмиш ушбу дунёда мерос
Барчамизга шодлик ва қайгу.*

Сергей Есенин

Гулмира айтган уй Юнусободнинг тинч, узоқ даҳасида экан. У баланд яланғоч дараҳтлар орқасидаги беш қаватли гиштин иморат бўлиб, дараҳтлар олдида катта йўл, йўлнинг у ёғида эса далалару чала қурилган ҳовлилар бор эди.

Назира опа узун гиштин уйнинг қоқ ўртасида, учинчи қаватда турар экан.

Кўнгироқ тугмасини босган эдимки, ичкаридан опанинг:

— Кираверинг, эшик очиқ, — деган ўқтам товуши эшитилди. Кирдим.

Даҳлиз тор, узун эди. Ўнг кўлда катта кўзгу, унинг ёнидаги баланд таглиқда қора телефон, кўзгу тепасида юмалоқ сарғимтири шиша остида чироқ ёнади. Чап кўлдаги эшикда Назира опа кўринди. Узун ҳаво ранг ҳалат устидан тивит рўмол билан белини боғлаган, бош яланг, силлиқ таралган сочлари энсасига оддийгина қилиб думалоқланган, оёғида енгил қора шиппак. Уй кийимида ҳам салобати бор эди унинг.

— Сенмидинг? Келақол, қийналмай топдингми? Ваалайкум ассалом. Тинчмисан? Кийимингни менга беракол. Совқотмадингми? Изифирин бор, шекилли. Бу ёққа кир.

Назира опа мени кенг танобий хонага олиб кириб диванга ўтқазди. Фотиҳадан сўнг дастурхон ёзишга тутинди.

— Назира опа, уринманг. Бетоб бўлсангиз, ахир. Мен сизни бирров кўргани кирдим.

— Э, касалинг нимаси? Баъзан изгиринда белим оғриб туради, холос. Кунлар исиса ўтиб кетади.

Опа чой қайнаттани чиқди. Мен эса атрофга қизиқсиниб қарадим. Хона жиҳозларида оддийлик ва нозикликнинг ажаб уйғунлиги сезиларди. Ўнг қўлдаги жавон оддий қора ёғочдан ҳеч бир жимжимасиз ясалган, ичидаги чиннилар ҳам ҳеч бир ҳашамсиз, лекин уларнинг бир-бирига монанд терилишида нозик дид сезиларди. Деразалардаги узун оқ тўр пардаларнинг гуллари ҳам оддий, қалампирнусха шакллардан. Девордаги, ердаги Хива гиламларида нақшларнинг яхлитлиги бор эди. Жавоннинг тепасида қандайдир сурат. Булар кимлар бўлди?

Разм солиб қарадим. Суратда ҳозир мен ўтирган диван устида тўрт киши қатор тизилган эди. Иккиси ёнда Соҳибжон Пўлатов ва Хуршид ака, ўртада эса Назира опа билан қорамагиз бир аёл. Бу ким бўлди? Хуршид аканинг хотинимикин? Тўлагина, боқишлиари сокин, ўртадан фарқ очилиб, икки ёнга оддийгина қилиб таралган, чаккаларидан оқара бошлаган қора сочли, қалин лаблари устида билин-бар-билинмас қора туклар ўсган, қулоқларида Самарқанд балдоғи...

— Бу тўрт йил аввалги сурат, — тушунтириди кириб келган Назира опа.

— Бу... ким?

— Робияхон. Хуршиднинг хотини.

- Ислим қадимий экан.
— Ҳа... Ӯзи ҳам яхши аёл эди. Ёш кетди бечора.
— Анча бўлдими?
— Нимага?
— Робияхон... Робияхон опанинг...
— Ҳа... Уч йилдан ошди. Сенга нима бўлди?
— Ҳеч гап...
Назира опа менга қараб ўйланиб қолди.
— Ҳаёт шу, қизигина... — деди секин. — Онанг ҳам ёш кетган эди-а? Қанча бўлди?
— Беш йилдан ошди.

Назира опа яна ўйланиб турди. Кейин:

- Юр, ошхонага. Мен таом тайёрлайман, сен ёнимда турасан, — деди.
— Қарашиб юбора қолай.
— Ҳа, майли.

Опага эргашиб ошхонага чиқдим. Кўпчилик ўзбек оиласаридағи каби бу ерда ҳам ошхона айвончага кўчирилган эди. Оппоқ плита, оқ столча, оппоқ музлатгич, соддагина оқ жавон, деворлар оқ рангда сирланган, полда яшил поёндоз, деразаларда оппоқ калта пардалар... Бари уй бекасининг саришталигидан гувоҳлик берарди.

Назира опа музлатгичдан сирли тогорачада гўшт, елим халтада кўкат, қизил сабзи олиб қўйди. Жавон ичидаги картон қутилардан пиёз, картошкалар чиқарди.

- Кел, бир ажабсанда пиширамиз. Эшитганмисан шундай таомни?
— Ҳа.

— Ундей бўлса пиёзу сабзиларни тозалаб тур-чи!

Ўзи столга таҳтача қўйиб гўштни майдалай бошлади.

— Ажабсанда тайёрлашни Тошкентда ўргандим. Келинчаклик пайтим ётоқходан бизга жой беришгунча Соҳибжон билан ижарада яшаганмиз. Шунда уй эгаси, тавба, исмийн ҳеч эслолмайман, менга анча нарса ўргатгган. Тузламалар-у, пишириқлар-у, тошкентча овқатлар-у... Мен-ку унга ўргатинг демагандим-у, беканинг ўзи мени ошхонага чақириб олиб ўргатаверарди. Менинг эпсизлигимни сезган, шекилли... Ажойиб аёл эди! Ҳар қадамда худди шунчаки айтгандек баъзи фалати-галати гапларни, насиҳатларни тилга оларди. Мана, вақт ўтиб, ўша аёлнинг қанчалик оқила бўлганлигини тушуняпман. Соҳибжон билан тиниб-тинчиб кетишимизда ўша аёлнинг кўп фалати насиҳатлари иш берган.

— Нимаси фалати насиҳатларининг?

— Масалан, Соҳибжон билан аді-бади айтишиб қолсак: “Тилингни эмас, бошингни ишлат”, — дерди. Бирон бир нарса пиширишни ўргатаётib: “Тўйгача йигитнинг юрагини, тўйдан кейин ошқозонини, болалик бўлгандан кейин ҳамёнини эгалла, аммо бошини тинч қўй”, — дерди. Қолганларини айттолмайман, қиз боласан ҳали.

Кулиб юбордим. Менга Назира опа кўшилди.

— Шу насиҳатлардан баъзиларини мен ҳам ўрни билан қизларимга айтиб турман. Худога шукур, тўғри тушунишади. Аввал куни ҳам Хуршиднинг қизига ўша насиҳатлардан уч-тўрттасини айтдим. Кўз тегмасин, дарров тушунди. Зийрак-да!

— Ярашиб олишдими?

— Ҳа.

— Яхши иш бўлибди.

— Нимасини айтасан... Кеча икки ўртоқ шу баҳонада роса яйрашган. Қўқонча ош қилиб бердим. Алламаҳалгача чақчақлашиб ўтиришди. Уларга қарайман деб оёқдан қолиб, оғриган белим баттар бўлди-да... Ҳа, майли, ҳар нечук Хуршид тинчиди-ку...

— Хуршид аканинг бошқа болалари ҳам борми?

— Ҳа. Хуршиднинг ўғли йўғ-у, учта қизи бор. Каттасини Самарқандга узатишган, ўртанча қизи куёви билан икки йилдан бери Дехлида ишлайди. Бу — кенжаси. Хуршид бизга ишга келмасидан сал аввал узатган эди. Бечора, онаси йўқлиги сезилади-да! Анча-мунча дардлари тўпланиб қолибди қиз шўрликнинг!

Назира опа гўштни тўғраб бўлиб, қўй ёғини майдалай бошлади.

— Энди Хуршиднинг қизини ҳам тушуниш мумкин. Нима қилсин шўрлик? Бир ёқда ёлғиз қолган отаси, бир ёқда эрию қайноаси. Опалари йироқда бўлса... Ҳали отасининг кир-чирларини ювиб, уйларини тозалаб кетади, ҳали бирда ошкор, бирда яширин ўқишдан бир соат-икки соат ортириб отасига иссиқ овқат пишириб кетади. У ёқда яна эрининг кўнгли-ю, қайноасининг қош-қовоғи. Вой, эркакнинг ёлғиз қолгани оғир экан... Баъзан туриб-туриб Хуршидга ичим ачиб

кетади. Тансиқ овқат қылсақ, күпинча Соҳибжон чақириб келади, баъзан олдига бориб гаплашиб ўтиради. Лекин булар кам-да! Эркак кишига бир ҳамдард, ҳамфир, дилдош одам керак. Уйлан, деймиз, Хуршид кўл силтайди-кўяди.

— Балки... Балки Робияхон... опани... унугомаёттандир?

— Ким билади? Хуршид ичидагини ҳеч қачон бировга очмаган. Ҳатто Соҳибжонга ҳам... Пиёс аччиқ эканми?

— Ҳа...

— Шунақа. Назира опангнинг пиёзлари йиглатади. Нега куласан?

— Ўзим...

— Айтганча, нега нуқул шимда юрасан?

— Қулай, кейин болалигимда ҳам кўпинча ўғил болача кийиниб юрардим.

Ўрганиб қолибман...

— Энди, қулагиқка қуладир, болалигинг бўлса ўтиб кетди, кўйлак ҳам кийгин, ойдек қизсан. Нега ўзингни хунук кўрсатасан?

— Шунақа хунук кўринамани?

— Йўқ. Юзинг-ку чиройлиг-а, фақат шим ўлгур хунук. Ҳафа бўлма тағин!

— Йўғ-э, нега ҳафа бўлай?

— Хўш.. Энди сабзиларни паррак қилиб тўғрайсан, картошкаларни майдалайсан.

Опа каттакон қозонга яримлатиб сув солиб, қопқоғини ёпиб кўйди.

— Сув қайнагунча бўёғини тўғрилаб турайлик-чи? Хўп, гўшт-ёғ тайёр... Ў, яхши, чаққонгина экансан. Ўғил бола феълингни кўрганда ошхонага қалай экан, деб ўйлардим. Ўзим нўноқ эдим-да! — кулди у.

— Назира опа, Соҳибжон акани биринчи марта кўрганингизни айтиб беринг.

— Нимасини айтай? Бирга ўқиганмиз-ку!

— Йўқ, биринчи марта кўрган пайтингиз...

Опа кулиб юборди.

— Қани, кўкатни тўғраб юбор-чи!

— Назира опа...

— Хўп дедим-ку! Сен тўғра, мен айтиб тураман. Соҳибжон билан Хуршид бизга иккинчи курсдан қўшилишган. Ўқиш бошланишига икки кун қолган. Етоқхонада гап тарқалди. “Курсимизга ҳарбий хизматдан келган иккита йигит қўшилармиш. Бири — андижонлик, бири — самарқандлик”. Қизлар билан бир зумда йигитларни ғойибона тақсимлаб олдик. Ўзларини ҳали кўрмаганмиз. Водийлик қизларга, табиийки, менга ҳам Соҳибжон “насиб қилди”. Хуршидни Самарқанду бухоролик қизлар “эгаллашди”. Кулма! Ё талабалик давринг эсдан чиқдими?

Хуллас, менинг ошхонада навбатчи бўлган пайтим. Ҳаммаёқни тозалаб ювиб чиқдим. Бир пайт қандайdir йигит кранда чойнак чайиб, шамасини мен тозалаған таглиқка тўкиб кетяпти. Чидаб бўладими бунга? Гапирсам, таъсир қилмайди дегин. Жаҳлим чиқиб кетди. У бўлса нуқул жаҳдимни ҳазилга олиб, бир гапимга ўнтасини қўндириб турибди-да. Чидолмадим. Сочиқ билан ура кетдим. У кула-кула қочди. Тавба, ҳеч ўйламабманки, бу йигит киши бўлса, мен нега кўл қўтарман?

Кечкурун йигитларимиз янги курсдошларимизни бизга таништиргани бошлаб келишиди. Қарасам, андижонлик Соҳибжон деганлари мендан калтак еган йигит экан-да! Соҳибжон шунча қизларнинг ичди мени таниб, қулоқ қилиб ҳол-аҳвол сўрашиб кетса де! Қизлар ҳайрон, мен мағур!

Опа бир хўрсиниб кўйди. Кейин кичикроқ қозонни олиб, тагига картошка солди-да, устидан жиндек туз ва кўкат сепди, ҳалқа қилиб тўғралган пиёзни солиб, яна кўкат сепди, парракланган қизил сабзи устидан яна кўкат ва ниҳоят, энг юқори қатлам қилиб гўшт ва ёғ бўлакларини солди. Туз, зира сепди. Сўнгра қозонни қайнаб турган катта қозон ичига ўрнатиб, қопқоғини зичлаб ёпиб, оловни паастлатди. Бу ишларнинг барини сукут ичиди, жиддийлик билан бажарди.

— Қани энди юр, чой ичиб гаплашиб ўтирамиз. Таом ўзи буғ ичиди туриб етилаверади, — деди.

Катта қизил чойнакка чой дамлаб, икковлашиб идишларни ювиб олгач, бояги танобий хонага кириб жойлашдик. Мен жавондаги суратга орқа ўгириб ўтирдим. Бу — беадаблик эди. Лекин нима қилай, ўзимга раҳмим кела бошлаган, қийналишини ҳоҳламасдим.

— Назира опа, — дедим тетик овозда. — Давомини айтиб беринг.

— Давоми... Нима бўларди? Учинчи курсда тўйимиз бўлди.

— Унгача?

Опа кулиб юборди.

— Жуда қизиқиб қолдинг-да! Мен ҳатто қизларимга уялиб айтмаганман, сен бўлсанг...

— Назира опа, шунчасини айтдингиз-ку, энди қолганини ҳам айтаверинг-да!

Опа бир дам тўхтаб тин олди. Кейин жавондан картон қути олиб, ичидан суратчиқарди. Оқ-қора тасвирдаги бу суратда қора костюм-шим кийиб, бошига андижон дўлписини кўндирган күёв келинчакнинг бармогига узук тақарди. Танидим. Бу — Соҳибжон ака билан Назира опа эди. Опа йиллар ўтиб ўзгарган бўлса-да, барибир танидим. Тўғри бичимдаги узун оқ кўйлак, баланд соч турмаги устидан ташланган соддагина оқ тўр ва оддийгина оқ гулчамбар — булар 70-йиллар келинларининг одатий қиёфаси эди. Соҳибжон Пўлатов ёш, адл қадли, қотма, сийрак-кина соchlари қоп-қора, қорамағиз йигит.

Назира опа иккинчи суратни кўрсатди. Унда ойнабанд айвон тагида турган келин-кўёв — Пўлатов ва Назира опа (уша пайтларда оддийгина — Соҳибжон ва Назирахон), уларнинг атрофида бир тўп йигит-қизлар — қариндошлари ва синфдош, курсдошлари. Куёвнинг ёнида Хуршид ака. Уни дарров танидим. Ўрта бўй, миқти, қуюқ жингалак сочли, қошлари қовоқлари устидан кескин паства қайрилган, ўртача қалинликдаги лаблари бир-бирига жисп ёпишган, уша йиллари ёшлар орасида кенг урф бўлган катақ кўйлақда.

Опа суратларни авайлаб қутига солиб жавонга қўйди.

— Соҳибжон билан фақат пахтадагина яқиндан гаплашадиган бўлганмиз. Биз Сирдарёдаги аллақайси қўриқ совхозда, дала йўлининг чеккасидаги бостиurmaga ўхшаш баракда яшардик. Барак дегани бу — икки қаватли темир каравот. Резен этик, дағал бўз этак ва эгатлар, эгатлар...

— Биз ҳам боргандимиз пахтага. Ҳозир боришмайди.

— Ҳа... — Назира опа бўшаган пиёласининг гирдига кафтини босди. — Ёшли...

— Чой қуяйми?

— Ҳа, озгина. Пахтада байрамлар ҳам бошқача бўларди. Романтика аралаш реаллик... Мабодо туғилган кунлар пахтага тўғри келиб қолса нима бўлишини тасаввур қўлгин-а...

— Бизда бутун баракнинг олдида туғилган кун эгасига атаб ҳазил аралаш қасида ўқиларди. Шоирларимиз бор эди-да!

— Шоирлар бизда ҳам бор эди. Менинг туғилган куним ҳам уша иккинчи курснинг пахта пайтида ниҳоятда бошқача ўтган эди. Нимадир бўлиб, бир куни «Киевча тортни яхши кўраман», — дебман-да. Туғилган куним эрталаб Соҳибжон бирров кўриниб саломлашган бўлди-ю, ғойиб бўлди-қолди. Бир ҳайрон бўлсам, бир аччиғим чиқади дегин. Доим ёнимдаги эгатга тушиб олиб ҳазил-хузул билан қизларни кулдириб юрадиган Соҳибжон ҳе йўқ-бе йўқ изсиз ғойиб. Унинг ўрнида индамас Хуршид жимгина пахтасини териб юрибди-да. Чидаб бўладими бунга? Хуршид оғзига сув согландай жим.

Тушлик ўтди, кеч тушди. Бир вақт қарасам, Хуршид барак ортидаги бак олдида кўлларини ювяпти. Билаклари тилиниб, тарам-тарам бўлиб кетибди, кўллари ёрилиб, кафтлари шилиниб тушибди. Бечора! Чарчаганидан оёқда зўрга турибдида. Бирам ачиндимки...

Тошкентдан олиб келган малҳамни қўярда-қўймай қўлларига суркаб қўйдим. Боёқиши тишини тишига босиб тураверди.

Бир пайт оғзи кулогида, Соҳибжон пайдо бўлди. Қўлида катта картон қути. Қизлар бир Соҳибжонга, бир менга қарашади. Қути ичида нима бор экан. Тасаввур қўлоласанми?

— Ҳа. Киевча торт бўлса керак.

Опа кулиб юборди.

— Рост. Менинг ўрнимда бошқа қиз бўлса, хурсандлигидан боши кўкка етарди. Дарвоқе, бошқа пайт мен ҳам қувонган бўлардим-а!

— Ҳурсанд бўлмадингизми?

— Йўғ-а! Аччиғим чиқди. Тортидан бир тишлам еганим йўқ. Ҳузурини қизлар кўришиди.

— Нега энди?

— Тасаввур қўлгин-а, жанобим эрталабдан менга торт излаб кетибдилар. Хуршид бўлса, дўстининг йўқлигини билдирумайин деб уч ҳисса пахта териб, бўлари бўлибди-да!

— Нега энди уч ҳисса?

— Чунки мен ҳеч қачон қанорни тўлатолмасдим-да. Соҳибжон менинг ҳисобимга ҳам пахта терарди. Шу куни Хуршид ўзига, Соҳибжонга ва менга қўшиб пахта терган экан.

— Энди тушуняпман.

Опа совий бошлаган чойидан хўплаб бир оз тин олди.

— Соҳибжонга бор жаҳлимни кўрсатдим. У аввал кулди, кейин ҳайрон бўлди. Ниҳоят, унинг ҳам аччиғи чиқди. «Мен сизга деб Гулистонгача бориб торт топиб келсан-у, оқибат шуми?» — деди. Кейин «Хуршидга ачиниб қолибсиз. Биз мабодо ортиқча эмасмизми?» — деди. Энди бунга тоқат қилиб бўлмасди-да! Мен ҳам айтадиганимни айтдим. Хуллас, чарс-чурс уришдик-қолдик.

Эргасига эрталаб Соҳибжон этагини кўтариб даланинг нариги бурчига кетди. Хуршид бир менга, бир Соҳибжонга ҳайрон бўлиб қаради-ю, яна индамай пахтасини тераверди. Соҳибжон эса бир тўп қизларнинг орасига тушиб олиб, бир кулиб, бир атрофдагиларни кулдириб кунни кеч қилди. Энди менинг азобимни кўрсав!

Кеч тушиб, барак тинчиган пайт Хуршид қизлар осиб қўйган адёлнинг бир чеккасини кўтариб, қий-чувга парво қилмай «бўлмамиз»га бостириб кириб келди-да, индамай қўлимдан ушлаб етаклаб кетди. Ҳамма ҳайрон. Менинг жаҳлим чиқкан. Хуршидинг киприги ҳам қилт этмайди. Шу қадар қатъий, жиддий эди у. Ташқарига чиқдик. Хуршид йўл четидаги толларга ишора қилди:

— Анави ерга боринг. Соҳибжон кутиб турибди сизни, — деди.

Кейин қовоғи солиқ, жаҳл билан:

— Бунақа жиннилик қилманглар. Ёш боламисизлар? — деди.

Мен ҳайронлиқдан нима қиласаримни билмай туравердим.

— Боринг, боринг, — деди зарда аралаш яна Хуршид. — Ё ўша ёқса ҳам етаклаб олиб борайми?

Кейин шартта бурилиб кетди.

Нима қилай? Тол ёнига бордим. Соҳибжон кутиб турган экан. Одатда дил изҳорини йигитлар қилишади. Бизда тескариси бўлди. Мен айтдим.

— Йўғ-э?

— Ха. «Соҳибжон, мен сизни яхши кўраман», — дедим. Соҳибжон «Мен жинни бўлиб қолишимга сал қолди», — деди. Хуллас, яна анча гаплар... Ўша пайтгача биз бу ҳақда бир-биримизга бир сўз демагандик. Лекин Соҳибжон, менимча, сезарди, мен ҳам шубҳа қиласадим. Туғилган кун баҳона, торт сабаб, бемаъни гумон туфайли... Тавба, мунча ҳам тентак бўлган эканмиз дейман. Қисқаси, учинчи курсда тўйимиз бўлди. Биздан олти ой кейин Хуршид уйланди.

— Робияхон... опа ҳам... сизлар билан ўқиганми?

— Йўқ. Хуршид ойлада ёлғиз ўғил эди. Отадан эрта қолган, онаси бир қўл билан катта қилган эди. Онасининг орзу-ҳавасларига индамай йўл қўйиб берди. Онаси танлаган қизга уйланди. Уни хафа қилгиси келмади, шекиlli. Йўқса, Хуршид келишган йигит эди, уни анча-мунча қизлар яхши кўришарди. Ким билади, балки кўнглида биронтаси бўлгандир? Хуршид ичидагини кўп ҳам ташига чиқаравермас эди. Тўғри, курсимиздаги Нурия деган қиз билан анча очилиб гаплашарди. Лекин унга кўнгли борми ё шунчаки дўстона қарайдими, билиб бўлмасди. Айтдим-ку, Хуршид доимо ортиқча бирон сўз айтишдан тийилиб турарди.

— Нурия-чи?

— О, Нурия... У ҳам Хуршидга ўхшаб ичидагини ташига чиқаравермайдиганлар тоифасидан эди. Билолмаганмиз, у Хуршидин яхши кўрадими ё унга дўстона қарайдими?

— Чиройлимиди?

— Ким?

— Нурия-да!

— Билмасам... Ҳамма қатори қиз эди. Нимайди?

Шу заҳоти тилимни тишладим. Тентак! Нега сўраяпман? Менга нима?

Назира опа ажабланиб менга бир қаради-қўйди-ю, ҳеч нима демади.

— Қани юр, бир қозонга қарайлик-чи, пишдимикин?

Чиқсак, бутун ошхонани ёқимли ҳид тутиб кетган, ҳавода кўкатлару зираворлар иси анқирди.

— Вой, ҳидини қаранг, — деб юбордим беихтиёр.

— Пишган шекиlli...

Опа қопқоқни кўтарди. Шу заҳоти қопқоқ ичидан «дув» этиб томчилар тўкилди.

— Тошкентнинг таомлари бошқача-да! Қани, анави товоқчани олиб бер-чи!

Йўқ, у — товоқ эмас, анавиниси товоқ.

— Лаган-ку бу!

— Ҳа-я, — опа кулди. — Тошкентта келганимга йигирма беш йилдан ошибди-
ку, ҳамон лаганни товоқ дейман.

Назира опа оловни ўчириб, таомни лаганга сола бошлади.

Кейин мен лагани, опа ликопчалару қошиқларни күтариб хонага кирдик.

Таом вақти ортиқча сўзлар бўлмади. Опа гўё ичидагини тўкиб енгиллаб олган-
дек, чехраси очик, у ёқ-бу ёқдан, аҳамиятсиз нарсаларни гапириб ўтиради.

Лаган бироз саёзлангач, Назира опа пиёлаларга чой қуя бошлади.

— Очиги, яқин ўргада бунақа яйраб ўтирумандим, — опа ўйчан кулимсиради.

— Сени неча йилдан бери танийман-у, ҳеч ёзилиб гаплашмаган эканман. Ниҳоят-
да сұхбатлашадиган қиз экансан.

Кулдим.

— Ахир, мен кўпроқ эшийтдим-ку!

— Шуниси ҳам катта гап. Тавба, қизларимга айтмаган воқеаларни сенга айт-
сан... Нега шу пайтгача сени уйимга чақирмаган эканман?

— Энди кўпроқ чақира қолинг, — ҳазиллашган бўлдим мен.

— Шунақа қиласман ҳам. Яна бирон тансиқ таом пиширамиз-у, ўтирамиз. Қиз-
ларимни узатгандан бери ёзилиб гаплашадиган, насиҳатларимни берилиб тинг-
лайдиганлар топилмай қийналиб қолувдим.

— Соҳибжон ака-чи? Ўглингиз-чи?

— Э, уларнинг йўриғи бошқа. Яна бир келсанг, қўконча ош қилишни ўргата-
ман. Ёки ўзингга бирон нарса пиширитираман. Би-ир катталик қилиб қўяй...

— Майли, — дедим мен. Назира опанинг шаҳди менга ёқа бошлаган эди. —
Мен хоразмча тухумбарак пишириб бераман.

— Хоразмча, дединги? — опа ҳайрон бўлди. — Тухумбаракни Самарқандда
пиширишарди-ку!

— Самарқандни билмадим-у, лекин Хоразмда уни жуда антиқа усулда тайёр-
лашади.

— Каердан ўргангансан уни?

— Хоразмлик бир курсдошим ўргатган.

— Ҳа... — опа бир зум жим қолди. Кейин:

— Индинга бўшмисан? — деб сўради.

— Ҳа. Якшанба-ку!

— Бизнигига тушдан кейин келасанми? Тухумбарак пишириб берардинг. Ҳўпми?
Кечагина Соҳибжон «Уч йилдан ошди, тухумбарак еганим йўқ», — девди. Бир
хурсанд қиласми.

— Ҳўп.

...Уйга келганимда гира-шира қоронгилек чўка бошлаган, қашнинг сўнгти,
қисқара бошлаган тунд оқшоми ёйилаётган эди. Оқшом доимгидек осойишта,
Лола ва Лайлонинг қақажонликларию, бир яшар Шавкатжоннинг ширин қилиқ-
лари билан ўтди.

Тун эса... У ҳам осойишта эди. Мен уйқуга кетгунча.

Менинг уйқумда эса тун безовталана бошлади. Бир вақт келинчак Назира опа
ва баҳтиёр Соҳибжон Пўлатов тушларимда кўриниб ўтди. Кейин Хуршид ака —
қуюқ жингалак соч миқти йигит, катак кўйлакда, қандайдир бир қиз билан
(Нурия шекилли) очилиб гаплашди. Тонгта яқин яна ўша қуюқ жингалак сочли
миқти йигит — Хуршид ака, эгнида Самарқанд зар чопони, ёшгина келинчак-
нинг юзидағи ҳарир рўмолни авайлаб кўтарди...

Кўзимни очганимда ёстиғим хўл, юзларим ачишар эди. Уйқумда нимадир бўлди-
ми? Нега юрагим гупиллаяпти? Чаккаларим нега санчяпти? Ўзим тушунолмасдим.

Анчагача тиззаларимни кучоқлаб ўтириб қолдим. Фақат айвондаги соат бўғи-
либ олти марта занг урганда бир сескандим. Совқотиб қолибман. Қўлим билан
каравотим тепасини пайпасладим. Иссиқ паҳмоқ ҳалатим шу ерда турарди. Олиб
ўрандим. Танамга иссиқ югуриб, сал жон киргандай бўлди.

«Туриш керак, — ўйладим мен. — Йўқса, кечикаман».

* * *

Барibir кечикдим. «Талабаларим шовқин солиб юборишмаса бўлгани», — ўйлар-
дим мен акация ва қаштанлар ўртасидаги йўлкадан шошиб келарканман.

Қуёш қоп-қора булуллар йиртиғидан беҳолгина мўралар, ярим-ёрти чириган
хазон устида қиров хира ярқирав, қотган лой парчалари пошна тагида қирсиллар
эли.

Тез юрганимдан қизиб, совуқни ҳам унугтандим.

Арчалар ортидан университетнинг узун ойнабанд биноси қўринди. Бинонинг йирик-йирик арра тишларисимон томи остидаги каттакон соатнинг узун мили «үн дақиқа ўтди» деб кўрсатарди.

Бинога элтувчи тўрт қаторли узун зиналардан икки сакрашда ўтиб, чопқиллаб фойега кирдим. Кимсасиз фойе ҳар кунгидек совуқ, шифт бўйи шаффоф ойналардан арчалар, парча-пурча қора булутлар қўринар эди.

Қоровул доимидек ўз постида, одатдагидек қўлида «Халқ сўзи» газетаси, хўмрайиб бошдан-оёқ назар солди.

— Ассалому алайкум.

— Ваалайкум. Дарс бошланганига ўн дақиқа бўлди, домлахон.

— Узр.

Қоровул ортимдан пўнгиллади:

— Узрингизни пиширамизми? Ёш авлодга ўрнак кўрсатганингиз қоляпти...

У ёғини эшитиб ҳам ўтирадим. Кенг бетон зиналардан иккинчи қаватга югуриб чиқдим. Хайрият, талабаларимнинг шовқини эшитилмасди.

Ярим қоронги йўлак бошида Хуршид аканинг товуши эшитилди. Оббо, яна кўзига қўринарканман-да!

Тўхтаб, эътиёткорлик билан атрофга қарадим. Йўқ, Хуршид ака қўринмасди. Хайрият! Унинг овози эшиги ёпиқ аудиториядан келарди. Афтидан, у маъруза ўқирди. Яқинроқ келдим.

— Давлат қуши қўнса чивин бошига,
Семурглар салом берар қошида.

Кўрдингизми, икки сатрга бир олам маънони жойлашни! Бу соддалик орқали мураккабликка чиқиб боришидир. Бундай сатрларни «Гўрўгли» достонида жуда кўп учратиш мумкин. Бу достончилик поэтикасининг қиёфаси.

Эшикка яқинлашиб, калит ўрнидан мўраладим. Хуршид ака қора кўйлагу қора пиджакда, доска олдида у ёқ-бу ёққа юрар, дераза ёнидаги кафедра устида қофозлари турар, лекин қофозга қарамасди. У достонлардан катта-катта парчаларни ёд ўқирди. Сўзлари ўз-ўзидан куюлиб келарди. Аудитория сув қуйгандек жим, ёшларнинг унга қараган кўзларида ҳайрат, баъзилар шоша-шоша дафттар қоралашарди. Хуршид ака тўхтамас, сўзларини қайтартмас, айтуб туриб ёздирмасди.

— Бирининг тушибдир сочи белига,
Бири район тутиб келмиш қўлига.
Олов ёқар боқиб одам дилига,
Бири шамсу, бири қамар қўринди.

Ёки:

Кўксимда ишқнинг ханжари
Мехрибоним, хуш қол энди.

Кўярпизларми, буларнинг барида оҳангдорлик нақадар кучли. Шунинг учун ҳам у такрорлаган сари ёдда қолаверади...

Бу ёғини эшитолмадим. Мен ҳамон Хуршид акадан кўзимни узолмасдим. У менинг рўпарамда, доска ёнида у ёқ-бу ёққа бориб келар, овози товланиб ёд ўқир, кўзларида ўт ёнарди. У шу туришида жуда, жуда ҳам кўркам эди!

Ортимда шип-шип қадам товуши эшитилди. Узимни кескин орқага ташладим. Бу — Бердикул Муродович эди. Қип-қизил букри бурни сўррайиб, сийрак қошлиари кўтарилиганидан пешонасидаги ажинлари тепакалигача кўтарилиган, лаблари титрар эди. Мени кўриб тўхтади:

— Дарсингиз йўқмиди, Магрурахон? Турибсиз?

— Йўғ-э... — ўнгайсизландим мен. Ахир, эшикдан мўралаб турганимни кўрувди-ку! Нима деб ўйладийкин?

— Ўзингиз-чи? — сўрадим ўзим ҳам кутилмаганда.

— Дарсим бор эди... Шу... Келсан, аудитория бўш, талабаларим ҳеч ерда йўқ.

— Йўғ-э, бўлиши мумкин эмас-ку!

— Энди нима дейсиз? Йўқ-да!

Эшикка ишора қилди:

— Дарс ўтяттиларми?

— Ха.

— Майли, безовта қилмай... Танаффусни кута қолай...

— Бердикул Муродович, нима, сиз...

— Ҳа! Усмоновга айтаман! Улар дарсга келишмаган! Қочишган!

— Секин!

Бердиқул Муродовичнинг енгидан тортиб зинапоя майдончасига олиб чиқдим. У бечора бирданнага чўкиб қолган эди. Чеккадаги ўриндиққа беҳол ўтириди. Қадди буқчайиб, менга довдираб қаради.

Мен қолишимни ҳам, кетишимни ҳам билмасдим. Бир муддат жим қолдик. Биринчи бўлиб Бердиқул Муродович тилга кирди:

— Магрурахон, майли, дарсингизга боринг. Мени деб қолиб кетманг.

У билагидаги каттакон эски соатига қаради.

— Йигирма беш дақиқадан кейин танаффус бўлади. Тағин кечикканингизни Усмонов билиб қолмасин.

Бердиқул Муродовични қолдириб йўлак адофига бордим. Ўнг қўлдаги аудитория негадир жим эди. Менинг талабаларим ҳам дарсдан қочган бўлса-я... Ҳадик билан эшик тутқичини ушлаб секин ўзимга тортдим. Кафедрада Садриддин турарди. Талабаларим баравар оёққа қалқишиди. Садриддин эса мени кўриб қоғозларини йига бошлади.

— Яхшимисиз, Садриддин? — дедим кўлимни узатиб.

— Раҳмат. Яхши келдингизми? — Садриддин чандиқ кафтимни қисар экан, қизларникidek узун киприкли кўзлари майнин кулимсиради.

Кейин өзгин елкаларида ҳалпиллаган пиджагининг чўнтағига ручкасини солиб, қоғозларини кўтариб кета бошлади.

— Раҳмат сизга, — дедим ортидан.

У индамай бошини иргаб қўйди.

— Қаерда тўхтадик? — сўрадим курткамни еча туриб.

— Фурқатнинг хориждаги ижодида. «Бир қамар сиймони кўрдим...» ғазалининг таҳлилида, — бидирлади олд партада ўтирган талабам.

— Яхши. Давом этамиз.

...Тўртинчи курсларнинг тил бириктириб дарсдан қочгани бутун факультетда шов-шув бўлиб кетди. Танаффусда, айниқса, талабалар орасида муҳокама авжида эди. Ўқитувчилар орасида ҳам ғовур-ғувур.

Воқеани эшитган Бахтиёр баҳайбат гавдасини силкитиб кулиб олди. Садриддин эса воқеани хотиржам эштиди.

Хуршид ака эса хонасида у ёқ-бу ёққа юрап, курс сардорини кутарди.

Ниҳоят, курс сардори — кўзойнакли новча йигит Хуршид аканинг хонасига кирди.

— Эшикни ёпиб кир, — деди Хуршид ака унга кескин. — Ундан кейин гаплашамиз.

Менинг кейинги дарсим айнан шу тўртинчи курсда эди. Талабалар ҳали йўқ, аудиторияга бориш бефойда эди. Мен дераза олдида тик туриб ҳовлини кузата бошладим.

Бир вақт оstonада Хуршид ака кўринди.

— Магрурахон, дарсга бормайсизми? — сўради зардали оҳангда.

— Тўртинчи курслар йўқ-ку.

— Улар келишибди.

— А?

— Сизнинг дарсингизга келишибди, — таъкидлагандек деди у. — Боринг тез.

...Аудитория тўла эди. Мен талабаларга бир-бир қараб чиқдим. Ҳамма жим. Олдиларида дафтарлари очиқ, қўлларида ручкалари, менга тикилиб ўтиришибди.

— Хўп, бошладик, — дедим мен. — Мавзуни ёзинг. «Жадидлар адабиётининг илк даври».

— Опа, нега дарсдан қочганимиз сабабини сўрамаяпсиз? Уришмаяпсиз бизни?

Ахир, ҳамма шундай қиляпти-ку! — сўради курснинг сардори.

— Нега сўрай? — дедим мен. — Койиб нима қиласман? Ёш бола эмассизлар-ку!

— Нега сизнинг дарсингизга келдик? Билишни ҳоҳламайсизми? — деди у яна.

— Сўрашимга ҳожат йўқ, — жилмайдим мен. — Раҳмат сизларга.

— Нега?

— Қочмаганингиз учун.

— Сизга ҳам раҳмат.

— Нима учун?

— Қочириб юбормаганингиз учун.

Аудиторияда кулги кўтарилди.

* * *

— Ярим соатдан бери жавон титасиз. Тинчликми?

Кеннойим бир менга, бир каравотим устига олиб ташланган кийимларга ҳайрон бўлиб қаради.

— Кўйлак қидирияпман, — дедим мен.

— Кўйлак?

— Ҳа. Ҳеч пичноққа илинадиган кўйлагим йўғ-а! Уф...

— Манави нима? Бу-чи?

Кеннойим кийимларимни титкилаб, тагидан иккита кўйлак чиқарди. Бири майда сариқ гулли қора кўйлак (ўтган иили янги йилга атаб кеннойимнинг қистови билан тикитирганим), иккинчиси ҳаво ранг кечки кўйлак (акамнинг совфаси).

— Кечки кўйлак тўғри келмайди. Манавиниси эгнимда ҳалпиллаб қолибди. Тавба, шунчалик оздимми?

— Қаерга отланяпсиз ўзи? Бирдан кўйлак қидириб қолдингиз?

— Нега куласиз? Назира опа «кўйлак кий» деяпти. Опаникига кетяпман, ахир.

— Ҳа... Қани, кўйлакни кийиб кўринг-чи? Лола, қизим, бор, нина-ип олиб кел.

Кеннойим менга кўйлакни кийгазиб, икки ёнидан ип билан енгилча чатиб қўйди.

— Ечаверинг энди. Айтганча, ёқасини ҳам олиб ташлаш керак. Бунақаси урфдан чиқди. Үрнини баҳя қўйиб тикамиз. Тамом-вассалом!

— Қанча вақтни олади бу? — сўрадим бўшашиб.

— Агар ёқасини сўтиб берсангиз, ярим соатда.

Оҳ, кеннойигинам! Шартта қучоқладим-у юзидан ўпиб олдим.

— Хўп бўлади, — дедим суюна-суюна.

...Ярим соатдан кейин мен тошойна қаршисида кўйлакни кийиб турардим. Кеннойим эса қутидан ойимнинг қадими мавваридини олиб келиб, қўярда-қўймай тақдирди.

Мен кўзгуга боқиб, кўзларимга ишонмасдим. Рўпарамда қўнғир соchlари елка-ларидан шаршара мисол оқиб белига тушган, юмaloқ юзлари оппоқ, узун кип-риклири ҳимоясидаги қўнғир қорачиқлари қуёш шуъласида қорамтири олов бўлиб ёнган ўрта бўй, нозик қадли қиз турарди. Бир вақт қизнинг қошлири ҳайратдан хиёл кўтарили.

Наҳот бу мен?

Кизни бироз кузатгач, жилмайдим. Шу заҳоти қизнинг кичкина лаблари та-бассумга очилди, икки бетида кулгичлар кўринди.

«Чиройлисан», — дедим қизга. Кейин:

«Садриддин сенга бекорга ошиқмас», — дедим. Охири:

«Кошкийди Ӯша ҳам сенга...» — дедим-у...

Тавба, бу нимаси? Эсим борми ўзи? Баъзан қаёқдаги тентакона хаёллар кела-ди! Бўлди, хаёллар, бас! Йўлга тушиш керак.

Қиши бошидан бери киймаган узун қўнғир пальтомни эгнимга илиб, бошимни ингичка бинафшаранг шарфим билан ўраб, учларини энсамдан, соchlарим остидан боғладим. Оёғимга этикчамни кийиб, ҳовлига тушдим. Шу онда икки қўли тўла щаффоғ халталар, акам кириб келди.

— Йўл бўлсин? — деди у. — Менга шўрва пишириб бермайсанми?

— Назира опаникига, — дедим кичкина қора сумкамни елкага ила туриб. — Халталарингизни беринг, бўшатиб қўяй.

— Оғир, кўтаролмайсан.

Акам халталарни ерга қўйиб, қаддини тиклади.

— Нима бор экан, Назира опаникида?

— Тухумбарак пишириб бераман.

— Хоразмча.

— Хоразмча?

— Шу Гулчеҳранг яхши нарса ўргатибида сенга! Ҳой, Лобар, манавини қара, акасига шўрва пиширишдан қочиб, Назира опасига тухумбарак қилиб бермоқчи.

— Кўйсангиз-чи, — деди зиналардан тушиб келаётib кеннойим. — Ўзим пишираман шўрвани. Халталарни беринг.

— Оғир, кўтаролмайсан... Хўп, хоним қиз, яхши бориб кел. Шўрва олиб қўяйликми сенга? Бир косагина!

— Нега?

— Мабодо тухумбаракларинг мазали чиқиб қолиб, ўзингга қолдирмай еб қўйишса, дейман-да!

Кулиб юбордим. Менга кеннойим қўшилди.

- Ҳа, майли. Фақат кеч қолма.
— Хўп бўлади!

* * *

Эшикни Назира опанинг ўзи очди. Опа тунов кунгидек одми, лекин виқорли эди.

— Келдингми? Ваалайкүм ассалом! Кел, пальтонгни менга бера қол! Вой-бўй... Ўзингмисан? Қани, бир кўрай-чи? Ё худо, таниб бўлмайди сени! Қўй ўша шимларингни! Мана шундай юргин, хўпми? Қани, юрақол...

Опа мени ўша таниш танобий хонага бошлаб кирди. Яна жавонга орқа ўгириб ўтиришга шайландим. Ва тамоман беихтиёр жавон тепасига қўзим тушди. Ажаб! Сурат йўқ эди!

Назира опа эса мен билан у ёқ-бу ёқдан йўлакай сўзлашиб дастурхон ёзарди.

— Назира опа, мен ҳашарга келганман, ахир, кўп уринманг, — дедим.

— Э, ҳашарнинг ҳам вақти келади. Ўзим ҳам чой ичганим йўқ. Соҳибжон эрта билан ишга кетувди...

— Якшанбада-я?

— Нима дейсан энди? Ўғлим уйғонгунча уй ичиди ғивир-ғивир қилиб юраверди, нонушта ҳам ёдда йўқ. Яқиндагина ўғлимни едириб-ичириб бозорга жўнатдим. Бир ўзим дастурхонга ўтиришни истамай, яна шу уй ичиди юмуш... Мана энди сен билан бир йўла ҳам нонушта, ҳам тушлик қилиб олмоқчиман.

Опа иккита тақсимчада юмaloқ сомсалар келтирди, кичкина ликопча устидағи пиёллада олча мураббоси, япалоқ чинни идишларда майиз, ёнгок қўйди. Кейин ўша таниш қизил чойнакда фамил чойи...

Чой ичиш асноси мен унга Бердиқул Муродович ҳангомасини айтиб бердим. Опа қотиб кулди. Кейин бирдан жиддий тортди.

— Бечора Бердиқул Муродович. Раҳмимни келтиради у. Истеъодд кам, иқтидор ўртамиёна, қизиқишлар паст, талаблари оз... Одамзод кимгадир кераклигини ҳис этиб туриши керак-да. Оиласига кераклиги-ку ўз йўлига-я, бошқаларга ҳам керак эканлигини сезиши лозим экан. Токи одамлар унинг сўзларига, билимига, ўзига ҳам доимо эҳтиёж сезиб турсин. Бердиқул Муродовичда худди шу нарса етишмайди, биласанми? Кел, қўй, Бердиқул Муродовичнинг қулоғини қиздирмай қўя қолайлик. Айтганча, мақолангни тақризга беришибди. Кимларга, билмадим. Соҳибжон бунақа нарсаларни айтмайди. Тавба, сен билан кўп гапларимиз мос келади-ю, лекин ишларимиз бошқа-бошқа йўналишда, ҳайрон қоламан. Уйимга ҳам мана энди иккинчи марта келишинг.

— Сиз бизнисига борганингиз йўқ.

— Насиб қисла бир кун борарман. Соҳибжон акангни ниҳоятда мақтайди. Нега дадангнинг изидан бормаганига ҳайрон бўлади баъзан.

— Акам бобомнинг касбларини тутган.

— Ҳа... Талъат Мавлонов! Айтганча, Иnobat Mавлонова сенинг бувинг эмасми?

— Йўқ. У бобомнинг синглиси. Бувим Фарида Mавлонова.

— Билмас эканман.

— Бувим олима эмасдилар. Улар бир умр оддийгина шифокор бўлиб ўтганлар. Ойим: «Бобонгга тенглашиш қийин эди. Бувинг шунинг учун ҳам илм йўлидан кетмагандир?» — дердилар. Ойим ўзларидан келиб чиқиб шундай хulosага келган бўлсалар керак. Чунки болалигимда «Нега дадамдек профессор эмассиз?» — деб сўраганимда, ойим: «Дадангга тенглашиб бўладими?» — деганди-да! Ойим бир умр оддийгина терапевт бўлиб ўтган эди.

— Ойинг ҳам шифокормиди?

— Ҳа. Иккала бувим бирга ўқишиган. Аввалдан дугона бўлишган.

— Кейин қуда бўлишган, де?

Мен кулдим.

— Ҳа... — опа ўйланиб қолди.

Кейин:

— Қизиғ-а, авлодингларнинг бари тиббиётчилар-у, даданг шарқшунос.

— Мен ҳам ҳайрон бўламан. Лекин дадамдан буни сўраганимда у катта бобом Бекларбеги мадрасасида мударрислик қилганини айтган эди. У «Мулла Mавлон» бўлиб танилган экан. Кўплар «Mавлоно» деб ҳам хурматлашаркан.

— Нега шарқ филологиясига кирмадинг?

— Акам ҳам шундай деб сўраган эди. Мен «Ўзбек филологиясига кўпроқ қизиқаман», — деганман.

— Аслида-чи?

— Аслида ҳам шу. Фақат...

— Айтавер.

— Ойимга ҳам айтмаганман буни. Ноқулай эди айтиш.

Ола кулди.

— Майли, унда айтмай қўя қол.

— Йўқ, нега? Сизга айтсан бўлади. Ахир неча йиллар ўтиб кетди бунга... Ойимнинг тақинчоқлари турадиган нақшдор ёғоч кутичаси бўларди. Ойим ўша кутичасида, тақинчоқларининг тагида бир варақ хитойи қофозни оппоқ шойига ўраб эҳтиётлаб асрар эди. Буни бир-икки марта, ойим ясанаётганда кўриб қолгандим. «Бу нима?» — деб сўрасам, айтмаган. Кутичасини эса доим яшириб юрарди. Бир куни ойим йўғида қутичани топиб, очиб кўрдим. Қарасам, шеър.

— Шеър?

— Ҳа.

*Хажр ила тинмай кўзимдин кўрмасам ашким келур,
Ғайр ила кўрсан мабодо, худ-баҳуд рашким келур.*

*Ўзга сўз сиғмас хаёлимға ва лекин субҳу шом,
Айлашиб улфатчилик ҳар ерда гаплашким келур.*

— У ёғи-чи?

— У ёғи:

*Бўлмасун деб ошкоро рози диллар ҳалқ аро,
Айлабон рамзу ишорат маҳфи имлашким келур.*

*Навбаҳор айёми чиқса боғларни сайр этиб,
Нозлар бирла хиром эткач, қўл ушлашким келур.*

— Чиройли фазал экан.

— Ҳа.

— Үқи, ўқи.

*Муддаосиз бошда савдолар билурман шунчаким,
Кўчада сан бирла ҳар соатда учрашким келур.*

*Арз қил, қосид, Муқимий ҳастадин, кўрсанг агар:
Мақдамиға садқа жоним ул париваш ким келур.*

Мен шунда тўққиз ёшларда бўлсан керак. Варақни олиб тезгина яширдим. Кечқурун варақни дадамга каттакон топилмадек кўрсатдим. Дадам варақни ўқиб фалати қилиб кулиб қўйди. Мен бўлсан, «Муқимий ким?» — деб сўрадим.

— Шундай шоир бўлган, — деди дадам.

Мен яна тинчимадим.

— Муқимий ойимни қаердан танийди?

— Муқимий ойингни танимайди.

— Унда нега ойимга шеър ёзади?

Дадам кулиб юборди.

— Муқимий шеърни ойингта ёзмаган.

— Унда нега ойимнинг қутичасида турибди? Бирорвга ёзган шеъри ойимда турса, Муқимий хафа бўлмайдими?

Дадам яна кулди.

— Йўқ, қизим, Муқимий фақат хурсанд бўлади. Қани юр-чи, қутичани қаердан олувдинг, менга кўрсат!

Дадам мени ҳайрон қолдириб, варақни яна ўз жойига солиб қўйди. Кейин «Буни ойингта айтмай қўя қоламиз, хўпми? Чунки бирорвларнинг кутичасини титиш яхши иш эмас. Қайтиб бундай қила кўрма», — деб тайинлади. Мен, албатта, «хўп» дедим. Лекин барибир тинчимадим. Дадамнинг китоб жавонларини уч кун титиб, ниҳоят, Муқимийнинг китобини топдим. Қарасам, ўша фазал бор экан. У пайтларда кўп сўзларни тушунмасдим. Аммо, барибир, ёд олдим. Менга фазалнинг оҳангни ёқиб қолган эди.

Фақат тўрт-беш йилдан кейингина, сал эсимни танигач, ўша варақни яширинча яна олдим. Дадамнинг гапи эсимда эди-ю, нима қилай, тинчимадим-да! Хуллас, фазал қаймоқранг силлиқ хитойи қофозга кирил алифбосида ёзилган, фазал остида чиройли, жимжимадор нақш. Диққат билан қарасам, у сулсда битилган сўзлар. Ҳижжалаб ўқидим. «Камина қулингиз Шавкат Мавлон» деб ёзилган экан.

— Э-э... энди тушундим.

- Ҳа. Мана шунинг учун ўзбек филологиясига кирдим, 19-аср адабиётидан илмий иш қилдим. Раҳматли Воҳидов ҳам “Нега ўрта асрлардан илмий иш қилмайсиз, қизим”, — деб ҳайрон бўлиб кўп сўраган, аммо унга айтиб бўлармиди?!
- Айтганча, Мағрура, варақ ҳозир кимда?
- Менда. Ойим вафотидан сал аввал, касал ётган пайтида қутичаси билан менга берган. Уни асраб юрибман.
- Ҳа... Ие, чой совуб қолибди-ку. Чойнакни ҳам ёпмаган эканмиз.
- Ҳечқиси йўқ, мен ичавераман.
- Лекин мен ичолмайман да. Чойни иссиқ ичиб ўрганганман. Ҳозир! Йўқ, сен кўзғалма, қизим. Ҳали ошхонада анча уринасан.

Опа чойнакни олиб чиқиб кетди. Мен яна жавонга қарадим. Боя янгишмадим-микан? Йўқ, жавон усти бўм-бўш эди. Сурат нега йўқ? Уни ким олиб қўйди? Назира опамикин? Нега? Узи шунчаки олиб қўйдими ё менинг ортиқча савол беришимни хоҳламадими? Балки сурат мени қийнаганини сезиб қолгандир? Йўғ-э, бўлиши мумкин эмас. Қаердан ҳам пайқасин?

Бир қўлида чойнак, иккинчи қўлида бир ликопча варақи, опа кириб келди.

- Буни қара-я, варақи бор эди, эсимдан чиқиби. Кеча Нозима келган эди. Бир тогора варақи пишириб келибди. “Нима қилардинг уриниб, шусиз келсанг бўлмайдими”, — десам, “Ойим қуруқ борманг, дедилар”, — дейди. Кейин мен тогорасига сомса солиб юбордим. Соҳибжонга култига баҳона топилди да! «Кудачилик — минг йилгача тогорачилик», — дейди.

Мен кулдим. Опа ҳам қўшилишиб кулди.

- Нима қилай? Гап шу сомсада ҳам эмас. Гап одамнинг кўнглида. Шу сомса ҳам, варақи ҳам ейилади-кетади. Фақат яхши-ёмон гапга восита бўлгани қолади, холос. Эркаклар буни қаердан билсин? Ол, еб кўр! Бу — ҳақиқий кўқонча варақи.

— Гармдориси бор экан...

- Қўқончаси шунаقا бўлади да! Тағинам қалампирни камроқ қўшиби. Соҳибжон аччиқни ниҳоятда кўп ейди. Шу варақига ҳам қалампир сепиб еди.

Варақилар ҳақиқатан мазали эди.

- Тишлаганда жилдининг енгилгина қирсиллаши ҳам, юмшоққина қиймасининг бироз аччиқлиги ҳам хуш ёқарлик эди. Мен ойимнинг юмшоқ, кичкина, чучук қиймали варақисини эсладим. Кўнглим тўлиб, кўзларимга ёш келди. Назира опа сезмасин учун узун сўлиш олдим.

— Мазали экан жудаям, — дедим ютиниб.

— Ёқдими? Ол, ош бўлсин, — опа ликопчани мен томонга сурди.

- Шу пайт телефон жиринглаб, жонга оро кирди. Опа илдам ўрнидан туриб ўйлакка чиқди. Тезда кўзларимни артиб олдим.

- Соҳибжон уйга меҳмон олиб келармиш, — деди Назира опа хонага кирапкан. — Комилов келармиш.

— Содиқ Комилов-а?

- Худди ўзи. Аммо ниҳоятда ихлосманд одам. Қўйиб берсанг, соатлаб Хайёму Лутфидан ёд ўқийди. Үғлимни бозорга жўнатганим яхши бўлган экан.

— Тайёргарликни бошлайверайлик.

— Тушликни охирига етказайлик, ахир. Улгурамиз.

- Назира опа мени дастурхонга қистаб, ўзи ҳам сомсадан тишлиди, чой ҳўплади. Кейин тезгина дастурхонни йиғиб, ошхона юмушларига шўнгидик.

Опа музлатгичдан қовоқнинг каттагина бўлагини чиқарди.

- Комилов қовоқ сомсани хуш кўради. Тўғраб юборасанми? У ҳам қариб қолди. Ганимат одам. Бир хурсанд қиласилик. Ҳозир Алишер келса, мева-чеваларни ҳам идишларга солиб қўяверамиз. Билгандек жўнатганимни қара-я! Айтгандек, пиёзларни ҳам арчасан, а? Мен хамирга уринаверай.

- Опа лола гуллик пешбандни олиб менга боғлатди. Кейин ўзи ҳам пешбанд боғлаб, енгини шимариб олди-ю, ун элашга кириши. Унинг қуймаланишини томоша қилиш мароқли эди. Опа шу пайтда мен университетда кўриб ўрганган ўқтам, эркакча шаҳд аёлга умуман ўҳшамасди. Бошини чапга бироз эгиг, икки кафтига тап-тап этказиб элак гардишини урар, супра ва элак орасидан юпқа ун пардаси тўқилиб, супра ўртаси дўмпайиб бораради.

- Назира опа шу топда тамом бошқа одам эди! Аёл эди у! Кўлларининг чаққон харакатлари, тирсакларининг тез букилиб-ёзилишлари, гавдасининг эпчил бурилишлари — бари умри ошхонада ўтган аёлларники мисол эди.

- Тухумбаракка ҳам бир йўла ун элаб қўя қолдим. Уриниб ўтирумайсан, — деди элакдаги ун юқини катта япалоқ сопол идишга қоқаркан.

— Комилов тухумбарак ермикин?

— Ейди деб ўйлайман. Аввал-бошдан чиройли бир шўрва соламиз. Кейин тухумбарак торгамиз. Қовоқ тайёрми? Ҳа, яхши.

Опанинг ўғли шаффоф сариқ халталарни кўтариб кирганда биз сомсаларни газ патнисига тера бошлаган эдик.

Алишер отаси ва онасининг қиёфасини ўзида ажаб бир тарзда уйғунлаштирган эдики, икки кишининг бир инсон вужудига бу қадар сингишгани ҳайрон бўлишлик эди. Мен билан саломлашар экан, кўзларида қизиқсениш учқунлари «йилт» этди. Шу топда у отасига жуда ўхшаб кетди. Оғир халталарни ўзи ошхона бурчагига қўйди. Унинг ҳаракатларидаши шаҳдлик онасига ўхшарди.

Мен негадир бу оилани акамники билан таққослай бошладим. Иккала оила ҳам талабалик даврида бунёд бўлган, ўша даврнинг бор қирраларини ўтаган, ширину тахирларини татиган эди. Лекин бир-бирига ўхшамасди. Бу уй бекаларида, айниқса, кўзга ташланарди. Назира опа билан кеннойимнинг жуда кўп ўхшаш томонларини кўрсам-да, барибир улар иккови икки олам эди.

Кеннойим акам ва болалари йўлида олти йиллик заҳматлари меваси — касбина унутаётган ва бундан умуман афсус қиласди.

Назаримда опа ҳам Пўлатовни нозик бир сезги билан ҳамон ардоқларди. Лекин бу уни ўз йўлидан қайтармаганди.

Акам кеннойимни қадрлашига шубҳа йўқ эди, аммо кеннойим ҳар жиҳатдан эридан бир-икки поғона пастроқ турарди ва буни табиий деб билар, акам ҳам бунга кўнишиб ултурган эди.

Назира опа ва Соҳибжон акаларнинг муносабатларида эса ажаб бир тентглик хукм сурар, баъзан оила бошлиғи ким бўлди экан деган савол ҳам туғилар эди.

Мен кеннойимга ҳавас қиласдим. Лекин унга ўхшай олмаслигимни билардим.

Мен Назира опага ҳам ҳавас қиласдим. Бироқ (ажабо) унга ҳам ўхшай олмаслигимни сезардим.

Кеннойимга ўзини ҳеч иккиланмай бировга фидо этиб юборишдек тақдир насиб қиласди.

Назира опага эса ўз йўлдоши билан бир умр ҳамқадам яшащдек ҳаёт буюрганди.

Иккови ҳам шундай умрдан рози эди.

Икки оламдаги туйгуларнинг ўхшашлиги ҳайрон қоларли эмасми, ахир?

* * *

...Оқшом дарагига яқин Пўлатов Комилов билан бирга кириб келишди. Эшик ёнида Соҳибжон aka тавозе билан Комиловнинг пальтосини ечишга ёрдамлашар экан, мен қизиқиши билан меҳмонни кузатардим. Комилов зиналардан чиққунча ҳарсиллаб қолган, ажинлар чуқур ботган пешонасида тер томчилари ярқирап, қорранги мўл кўнган қуюқ соchlари икки чаккасини ёпиб, юзларини ажаб тарзда ўраб турарди.

У саломимга алиқ оларкан, мени бир зум кузатди.

— Соҳибжон, бу қизингизни аввал кўрмаган эканман. Тўнғичингиз шуми?

Пўлатов бепарвогина жавоб қилди:

— Ҳа, бу Назирахоннинг қизи!

— Лаббай?

Пўлатов кулди:

— Назирахоннинг университетдаги қизларидан. Мағрурахон.

— Шундай денг... Яхши-яхши... Мағрура! Чиройли исм экан. Ота-онангиз исмни синчиклаб танлаган кўринишиади.

— Албатта-да. Ахир, қизимиз Шавкат Мавлоновнинг кенжা фарзандлари бўлга...

— Йўғ-э, йўғ-э... — Комилов негадир шошиб қолди. — Шавкатнинг қизими-сиз? Давроннинг синглиси, а? Акангиз соғми, қизим? Ишлари бўляптими?

— Қани, домла, ичкарига! — Соҳибжон aka Комиловнинг обёқ устида туриб қолганидан хижолатдек, унга шошиб манзират қилди. Комилов оғир гавдасини у ён-бу ён ташлаб меҳмонхонага кирди. Унинг оёқлари оғирди, шекилли.

Бу одамнинг вужудидан ҳорғин салобат ёғиларди. Овозидаги йўғонлик, қарашларидағи тийраклик, ҳаракатларидағи босиқдик ва қадамларидағи оғирлик — бари унга савлатли бир кўрк берарди. Бундай кўрк ҳаёт сўқмогининг сўнгигига этиб қолган, ортидаги тиканлару тошларга хотиржам бокা оладиган одамларда бўлади.

Мен Комиловнинг дадамнинг номини эшитиб шошиб қолганидан ҳайрон эдим. Комилов дадамни яхши билишига шубҳа йўқ эди. Лекин нега уни уйимизда кўрмаганман? Ахир, дадамнинг шогирдлари, ҳамкаслари, дўстлари, танишлари уйимизга кўп келишарди.

Комилов ўша катта танобий хонада, тўрда савлат тўкиб ўтирас, Соҳибжон ака узатган чойни аввал пиёлани сал чайқатиб, бироз совутиб майда-майда хўплар, бошини билинг-билинмас силкиб уй эгасининг гапларини эшитарди. Ўзи гапирганда, унинг салобатли йўғон овози ошхонага эшитилар, лекин сўзларини англаб бўлмас эди.

Алишер ошхона билан меҳмонхона орасида қатнаб, ҳали чой, ҳали қовоқ сомсаларни таширди.

Назира опа шўрвани қиёмига келтириб, кўкатлар тўғраб, косаларни тайёрлар экан, менинг сирланган тогорачадаги хамирдан зувала ясашимга қизиқсиниб қараб кўярди.

— Ая, шўрвадан уч кося қусиз, — деди бир вақт Алишер. — Хуршид амаким келди.

— Хуршидни чақирдиларингми? Яхши бўлиби. У тухумбаракни яхши кўради. Бир хурсанд бўларкан-да! Қани, Алишер, косаларни узатиб юбор!

Алишер онаси сузуб берган шўрвани косаси билан менга тутди, юзига кўкат сепиб, қошиқ кўйиб берганимдан сўнг ичкарига олиб кирди.

Назира опа иккимиз иккисига шўрва куйиб айвончага ясалган тахта супага, хонтахта атрофига жойлашдик.

Шўрвадан сўнг мен тухумбаракнинг хамирини ёйишга тутиндим. Назира опа ичкаридан чиқсан косаларни юва бошлади. Кейин менинг ярим ойсимон хамир «халтacha»ларга ийланган тухум ва сариёf солиб, учини чимдиб ёпишимни қизиқиб томоша қилди.

Тайёр «халтacha»ларни қайнаб турган қозонга солиб пишира бошлаганимда эса опа тезгина лаганни тайёрлаб ёнимга кўтариб келди.

— Товоқда чиройли кўринади, а? — деди кулиб.

Кейин иккита кичик косачаларда қаймоқ ҳозирлади.

— Кўкат тўғрайми, йўқми? — деб сўради. Тасдиқ жавобини олгач, уни ҳам бир зумда бажарди.

Хуллас, опа ёнимда ҳозир, у тухумбарак пиширишни кузатяптими, ё меними, билиб бўлмасди.

Таом тайёр бўлгач, Алишер икки қатнашда косачалару лаганларни ташиб битказди. Опа иккимиз яна бояги жойга ўрнашдик.

Ичкарида бироз вақт жимлик ҳукм сурди. Кейин Комилов нимадир деди. Унга Соҳибжон ака жавоб қилди. Яна жимлик чўқди.

Парда «ёриғи»дан меҳмонхонадаги қандилнинг ёруғи сизиб чиқар, меҳмонлар жим, негадир опа ҳам индамас эди.

Салдан сўнг бўшаган лаганларни кўтариб Алишер чиқди.

— Домла сизларни кирсан деяпти, — деди у.

Олдинда Назира опа, унинг ортидан мен хонага кирганимизда кўйлакчан бўлиб олган Соҳибжон ака олдидаги пиёлага чой қуярди. Комилов гўё ўзига ўзи гапиргандек паст товуцда бир нималар дер, Хуршид ака ўзининг одатдаги қора кўйлагида, пиёласини икки кафти орасига тутганча ўйга чўмниб ўтиради. Бизни кўриб Комилов кўзғалиб кўиди. Хуршид ака бошини буриб қаради. Мен Назира опанинг панасида эдим. Дастурхон ёнига яқинлашганимда Хуршид аканинг менга кўзи тушди-ю, аввалига ҳайрон бўлди. Кейин хаёли паришон, қўлидаги бўш пиёлани оғзига олиб борди.

Мен кулиб юборай дедим. Хуршид аканинг бирдан қовоғи солинди. У менинг кулимсираганимни сезиб қолган эди.

— Келинглар, — деди Комилов.

Менинг ўтиришимни кутиб турди. Кейин сўз бошлади:

— Мағрурахон, қизим, тухумбарак жуда мазали чиқибди, Раҳмат, барака то-пинг.

— Ош бўлсин, — дедим эшитилар-эшитилмас.

— Соҳибжон сизни Назирахоннинг қизи деганда ҳайрон бўлувдим. Сиз пазандаликда Назирахондан ўтибсиз.

Соҳибжон ака хушнуд илжайди:

— Шунинг учун таомни Назирахоннинг қизи пишириди, дедим-да!

Комилов оғир бошини силкиди.

— Қизим, мен отангизнинг изидан кетганингизни эшитиб жуда хурсанд бўлдим. Шавкат «Ўғлим бобосининг изидан кетди» — дер эди. Мана, ўғли бўлмаса, қизи эргашибди, Яхши! Энди Даврон бобосининг изидан боргани ҳам яхши. Илло, Талъат Мавлонов ҳазилакам одам эмасди! Акангиз шундай одамнинг изидан кетгани жуда яхши. Тўрт ой бурун белим оғриб қолди. У ёққа бордим, бу ёққа бордим, бўлмайди-да. Шунда бирор «Курувчиликнинг касалхонасида Мавлонов

дегани бор. Шуни топинг», — деди. Ўша пайтда хаёлимга келмабдики, шу Шавкатнинг ўғли эмасми деб. Йўқса, Шавкат раҳматли айтган эди-ку! Бордим. Топдим. Қарасам, худди Шавкатнинг ўзи-да! Раҳматли ўттиз ёшларида худди шундай адл, гайратли эди...

Бу эзма чол буларни нега гапиряпти, деманг, қизим.

— Йўғ-Э...

— Сизни кўриб отангизни эслаб кетдим-да... Мени хотирлай олмассиз...

— Йўқ...

— Ҳа, албатта... У пайтлар кичкина эдингиз. Акангизнинг ортидан югуриб юрардингиз. Бир сафар борганимда пешонангизда каттакон фурра, бувингиз раҳматли бир эркалаб, бир яниб турган экан. “Э, той бола, пешонани нима қилдингиз?” — десам, Шавкат кулибина: “Бу менинг қизим”, — деганди. Умрнинг ўтишини қаранг... Мен ўша совуқ хабар келганда Мисрда эдим... Эш кетди Шавкат... Шу ёлғон олимлар билан курашавериб умрини кесди-да! Айтардим, «Жон Шавкат, укам, ёлғон олимлар дунё яралгандан бери бор. Худо хайрингни берсин, қўй шуларни, асабингни чарчатганинга арзимайди». Йўқ! Курашмаса бўлмасдида! Этак силкиб бор-эй деб кетиш унинг одати эмасди... А, Хуршид?

— Кўйинг, домла...

— Кўймасам нима қиласан? А? Кимга аччиқ қилдинг? Курашишдан чарчадингми? Сен-ку кетдинг-кутулдинг, институт кимнинг қўлида қолди?

— Домла, кўйинг энди...

— Ҳафа бўлдингми?

— Йўқ...

— Йўқ, Хуршид хафа бўлмади, домла.

— Ундай бўлса, ҳали ҳам кеч эмас, институтга қайт. Ёшлар кетиб қолаётганниш у ердан. Ҳалимов чала муллаларни кўпайтириб юборибди. Кенг даргоҳ ўзига қолди-да! Эртага биз ўлиб кетсан, ортимизда ким қолади? Уйладингми?

Ҳамма сукутга толди. Ер остидан Хуршид акага қарадим. У ҳамон пиёласи қўлида, ўйга чўмиб ўтиради. Ўргада анча жиддий гаплар ўтгани аён эди. Ниҳоят, телефон жиринглади.

— Бу ўғлим шекилли, — деди Комилов. — Олиб кетгани келмоқчи эди.

Эшикда Алишер кўринди.

— Домла, ўғлингиз келаётганниш. Беш дақиқада шу ерда бўлар экан.

— Қани, сизларники омонат, — Комилов фотиҳага кафтини очди.

— Домла, шошилманг, ўғлингиз ҳам тамадди қилиб кетсин, — Назира опа манзират қила бошлиди.

— Йўқ, ўғлим ўта замонавийлардан. Вақтни ўлчаб юради, — Комилов кулимсиради. Шунда лаблари четида иккита чуқур чизик тортилиб, бақбақаси сал осилди. Унинг табассумида ҳам салобат бор эди.

Домла оғир қўзгалиб йўлакка юрди.

Ортидан эргашганларга йўл-йўлакай нималардир деб қадамларини салмоқ билан ташлаб зиналардан туша бошлиди.

Биз пастта тушишимиз билан муюлишдан бурилиб келаётган машина чироқлари кўринди.

— Ана, айтмадимми? — деди Комилов.

Оқ «Тико» ёнимиздан ўтиб ортига бурилиб келгач, тўхтади.

Машинадан тушган ўттиз беш ёшлардаги йигит ҳаммага баравар салом берди. Кейин Соҳибжон аканинг, кетидан Хуршид аканинг қўлини қисди. Назира опа иккимизга қараб қўлини кўксига кўйди. Кейин отасини машинага ўтқазиб жўнади.

Ҳамма қандайдир оғир тортиб қолган эди. Гёё Комилов кетатуриб салобатини қолдирib кетгандай.

Ичкари кириб меҳмонхонада дастурхон атрофида бироз ўтирдик. Хуршид ака жим, Соҳибжон ака индамай чой хўплар, Назира опа чойнакнинг устидаги сочиқчани ўнинчи мартадир тўғрилар эди.

Бир вақт Хуршид ака соатига қаради:

— Саккиздан ошиб қолибди. Энди менга рухсат, — деди секин.

— Дарров-а! — Назира опа ишонмагандай ортига, жавон устидаги соатга қараб қўйди.

Соҳибжон ака ўтирган жойида бир қимирлаб олди.

— Қизимизни уйига олиб бориб қўясан-а? Таксига бир ўзини солиб юборишга одам қўрқади.

Хуршид ака ялт этиб менга қаради.

— Ҳа, албатта, — деди.

Йўлакда ортиқча гап-сўзларсиз кийиндик. Зиналардан ҳам жимгина тушдик.

Хуршид ака чеккага қўйиб келган «Нексия»си томон кетди.

Кечки изгирин турган, оёқ остида қатқалоқлар қирсиллар эди. Бармоқларимга яна совуқ игналар санчилди. Тезда қўлқопларимни кийиб олдим.

Машина олдимиизга келиб тўхтади. Соҳибжон аканинг ўзи менга орқа эшикни очиб берди. Назира опа елкаларимдан кучиб қўйди.

Хайрлашиб, пальтомнинг узун этакларини йигиштириб орқа ўриндиқча ўтиредим.

Хуршид ака машина моторини юргизаркан, чеккада турган Соҳибжон ака ва Назира опаларга бош силкиди. Соҳибжон ака кулимсиради, Назира опа менга кўлини кўтариб «хайр» деган каби силкиди.

«Нексия» ўткир чироқлари билан қоронгиликда кўз илғамайдиган ўнқир-чўнқирларни пайпаслаб, ниҳоят, катта йўлга чиқди.

Шундагина Хуршид ака:

— Каерда турасиз, Мағрура? — деб сўради.

— Дўмбирабодда.

Бироз сукутдан кейин Хуршид ака яна сўради:

— Дўмбирабоднинг қаерида?

— Конқуснинг орқасидаги маҳалла, — жавоб бердим мен овозимдаги титроқни босишига уриниб.

— Э, ўша машҳур Конқусми? — деди-ю, жим бўлди.

Қайтиб миқ этмади. Мен орқа ўриндиқча жимгина ўтирадим. Машина ичи ярим қоронги, фақат тўғридан келувчи машиналар чироғи ярқ этиб ичкарини ёритиб ўтар, шунда рўпарамдаги тор кўзгучада Хуршид аканинг кўзлари, пешонаси кўриниб қоларди. Унинг кўллари рул устида хотиржам сирғалар, гавдаси қилт этмасди.

Шаҳарда оқшом ҳаёти авж пардада, йўлларда қатнов зич эди. Катта яшил автобуслар тўла, кичик оқ «Отайўл»лар лиқ, одамлар шошган, ҳаёт қайнар эди.

Машина Чилонзор кўпригининг устига чиқди. «Нега кўприк ёнидан бурилмадик?» — ўйладим мен.

— Фарҳод кўчасидан қайриламиз, — деди Хуршид ака хаёлимни ўқигандай.

Кўприк устидан атрофга разм солдим. Иироқларда чироқлар милт-милт қиласди. Йўлларда жуфт чироқлар икки қатордан бўлиб қарама-қарши томонга оқарди. Булар — машиналар оқими эди. Бир вақт ён томондаги кўприкка узун-узун ёруг чироқлар шодаси отилиб чиқди. Бу — метро поезди эди.

Бу манзара бирам мафтункор эдикি...

Лекин Хуршид ака, менимча, буларни сезмасди ҳам. У ҳамон миқ этмай ўтирап, кўллари рул устида хотиржам сирғаларди.

Фарҳод кўчасида қатнов ўта зич эди. Машиналар оқими иккала томонда ҳам уч қатордан бўлиб ҳаракатланарди.

Мен кўчамиз бошида тушиб қолганим маъқул эди, фақат бурилиш жойини айтиб кўя колай деб турардим. Оғиз очиб улгурмасимдан «Нексия» кўча бошидан бурилиб, метро бекатининг ёнидан шувиллаб ўтди-да, Конқус устидаги кўприкка чиқди. Кўприкдан тушгач ўнгга бурилиш керак эди. Мана шу ўнгдаги кўча тўппа-тўғри ҳовлимизга олиб бораарди.

Хуршид ака ўнгга бурилди-ю, тормозни босди. «Тавба, ичимдагини қаёқдан билди-я», — ўйладим мен.

Хуршид ака машинадан тушди. Мен ҳайрон эдим. Чироқ ёругида унинг машина олдидан кесиб ўтгани кўринди. Шундагина йўл четида турган одамни кўрдим. У тўхтаган «Нексия»га диққат билан разм соларди. Хуршид акани кўриб унга пешвоз юрди. Бу — акам эди. Иккови кўл бериб кўришишди.

Енгил тин олдим. Пальтом этакларига ўралашиб машинадан тушдим.

— Хуршид ака, раҳмат, овора бўлибсиз, — деярди акам қўлини кўкси устига кўйиб.

— Йўғ-э, энди қиз бола, қоронгида ёлғиз кетмасин дедик, — Хуршид ака қўли кўксида, акамга такаллуф қиласди.

Мен Хуршид акани таний олмай қолгандим. Ахир, акам ундан анча кичик.

Хуршид аканинг такаллуфига ҳожат ҳам йўқ эди. Акамнинг мулозамати ҳам кам эмасди. Ким кимни кўпроқ ҳурматляяпти, тушуниб бўлмасди.

Ниҳоят, Хуршид ака жўнаб кетди. Акам иккимиз узоқлашиб бораётган «Нексия»га қараб қолдик. Юрагимда тушунарсиз паришонлик, вужудимда чарчоқ, киприкларим оғир тортиб бораарди.

— Нега Усмоновни қаердан танийсиз деб сўрамаяпсан? — сўради акам қувлик билан.

— Менинг акамни кўплар танийди. Мен қандай одамнинг синглиси эканимни билмайман, холос, — дедим ҳафсаласизгина.

Акам ҳаҳолаб юборди.

— Лекин яхши одам экан.

— Дарров хулоса чиқара қолдингизми?

— Нега ҳайрон бўласан? Кеча Пўлатов уччовимиз бир чойнак чойни майдалағанмиз.

— Усмонов билан ҳамми?

— Ҳа-да! Мен билан танишмоқчи бўлган экан, Пўлатов олиб келди, ўтиридик. Ажойиб одам экан! Аллақаерлари дадамга ўхшаб кетаркан...

— Йўғ-э?

* * *

Тиззадан салгина пастга тушувчи оқ кўйлак кийган нозиккина келинчак. Унинг оппоққина юмaloқ юзларида кулгич излари. Баланд соч турмаги устидан соддагина оқ тўр ташланган. Боши ибо билан салгина эгилган... Бу — менинг ойим.

Кенг елкали, қора костюм-шимда бир қадар улуғвор кўринувчи куёв. Тўлқин-симон қуюқ қора соchlари чуст дўппи тагидан тошиб чиқсан. Келинчакка боқишида майин бир хуррамлик зоҳир... Бу — менинг дадам.

Бу каби оқ-қора тасвири тўй суратлари 60-йилларнинг боши учун одатий.

Мен Назира опаникода кўрган суратни эсладим. Жингалак сочли миқти йигит. Кишига очиқ боқувчи кўзларида босиқ шижоат. Ўша йиллари ёшлар орасида урф бўлган катак кўйлак...

Йўқ, улар ўхшашмайди.

Мана, бу ҳам дадам. Оқ финча кўйлакда, тўқима креслода ўтирибди. Сочлари чаккасидан оқара бошлаган. Жиддий кўзларида қатъийлик кўринади. Ёнида 7 ёшлардаги қуюқ соchlари қулоқларини ёпган бола — акам.

Йўқ, дадам билан Хуршид аканинг ўхшашлиги йўқ. Акамга шундай туолган, холос.

Мана, яна бир сурат. Бир тўп салобатли кишилар. Бу — Абдуллаев, буниси — Юсупов, манавиниси — Азимов. Улар ҳали анча ёш. Дадам улардан ҳам ёш.

Мана, дадамнинг юбилейида тушган сурати. У 50 ёшда эди. Қора-ю кумуш аралаш қуюқ соchlари тўлқинсифат, ўткир кўзларида ҳорфинлик, ёшига муносиб тўлиша бошлаган гавдасига қора костюм-шими қуйиб кўйгандек ўтирган, катта тугунили қора бўйинбоги ёқаларини маҳкам тутган, томирлар бўртган суяқдор кўлларида кўзойнак гилофи.

Суратларни бирин-кетин альбомдан чиқаравердим. Кейин барини қатор териб чиқдим.

Мана, дадам мени — тўрт яшар қизалоқни ёнида олиб ўтирибди.

Дадам — Хумсонда, бургут ҳайкали тагида. Ёнида ойим.

Дадам — кекса бувимнинг ёнида. Атрофида учала аммам.

Дадам — хонасида, кўйлакчан, бўйинбоги бўш боғланган, қандайdir қофозларни тахляяпти. Ёнида кўзойнакли ёш йигит — Фуломов. Бу суратни газетада, кейинчалик Гуломовнинг китобида кўрганман.

Дадам — кутубхонада, қандайdir қўллэзма китобни лупа ёрдамида ўқияпти. Бу сурат дадамнинг китобида ҳам бор.

Хуршид aka билан қандай ўхшашликлари бор? Нега буни бир қарашда акам сезди-ю, мен илғамадим? Нима у?

Тун ярмидан ошган, уй жим-жит, фақат хонамдаги соатнинг чиқиллаши эши-тилади, холос. Ҳаёлимда Комиловнинг сўзлари, кўз олдимда Хуршид аканинг иккала кафти орасида пиёлани тутиб ўтириши, мен ҳамон бошимни қотирадим.

Бир вақт ичкари хонадан Шавкатжоннинг йиғиси эшитилди. Сал туриб, онаси бағрига олдими, тинчиди.

Мен хўрсиниб суратларни йиға бошладим. Кейин халатим устидан эски камзулмини елкамга ташлаб хонадан чиқдим. Ҳовлидан қайтишда айвоннинг чап қанотидаги, бувимнинг эски дивани-ю, дадамнинг китоб жавонлари турадиган хонанинг эшиги очиқ қолганини кўрдим. Назаримда хонада қандайdir шарпа «лип» этгандай бўлди. Юрғим гурсиллай бошлади.

Нима қилиш керак? Акамни уйғотсамми? Йўқ, акам уйғоқлигимдан койинади.

Қадамимни авайлаб босиб хонага кирдим-у шартта чироқни ёқдим. Хона кимсасиз эди. Кўксимдан узун сўлиш отилиб чиқди. Диванга чўкиб гўё биринчи бор киргандай хонага разм солдим. Хона тўрида китобларга лиқ тўлган одам бўйи жавонлар. Деразада 70-йилларнинг нилуфар нақшли, шокиладор узун оқ ипак

пардалари, диван бошида дадам Бухородан олиб келган қўлбола мис чироқ, диваннынг оёқ томонида бувимнинг бел бўйи келадиган, комод деб аталадиган, бир томони ёрилган фаладонли қора жавончаси, унинг устида янгигина кулранг магнитофон, ёнида аудиокассеталар тахлами. Оёқ остида ойимнинг келинлик сепидан қолган, оқаринқираган туркман гилами.

Китоб жавонлари устида катта бувимнинг қадим мис кашкули, катта бобомнинг силлиқланиб кетган нақшдор лавҳи, бобомнинг қизил хоч ва ярим ой шакли туширилган эски чарм сумкаси, ойимнинг мўъжазгина электр самовари. Жавон тепасида дадамнинг жигарранг ёғоч рамкага солинган яна бир сурати осиғлиқ турарди. Бу — дадамнинг қирқ беш ёшидаги сурати эди.

Қора кўйлакда, оқ оралаган қуюқ соchlари чапдан ўнгга тараалган, кўзларида ҳорғин ўткирлик, қатъийлик билан қимтилган лабларининг икки ёнида чуқур чизиқ, ўргача қалинликдаги қошлари қовоқлари устидан пастга кескин қайрилган...

Юрагим гупиллай бошлади. Улар ўхшашар эди! Уларнинг кўзларидағи ифода, юзларидаги йилларнинг чизиқлари ўхшар эди. Акам ҳақ! Улар ўхшайди!

Мана, нима учун унинг кўзларига тик қаролмас эканман! Шунинг учун ҳам унга рўпара келганда юрагим қинидан чиқай дер экан!

Ундай бўлса, нега Робияхон опа ёдимга келганда юракларим фижимлангандай оғриди? Назира опа Нурияни тилга олганда вужудим симиллади? Нега?

Йўқ, бу каби азобни бир бора бошидан кечирган одам ўз туйгуларига баҳо берга олади. Бунинг шунчаки бир дард эмаслигини билардим. Лекин буни иқрор этишдан чўчирдим. Ахир, Хуршид ақа мендан ўн етти ёш катта эди. Унинг ортида каттагина ўтмиши ва бу ўтмишидан ёдгорлари бор эди. Мен заррача умид қилолмасдим. Оҳ, бу азоб!

«Нега сен азобдан ўлмайсан, дилим?»¹

Юзимни чандиқ кафтларимга босиб унсиз йиглай бошладим. Кўз ёшларим бирам қайноқ... Кафтларимни куидирав, чандиқларим жазиллаб ачишарди...

* * *

*“Атиргулим, озорли гулим,
Озоридан йиглар бу дилим.
Исминг мосдир жисмингга, нетай?
Сени севдим, тиканли гулим!
Мағрур гулим, о, мағрур гулим,
Озоридан масрур бу гулим!”*

Бу ҳам Музаффар Илҳомнинг шеъри. Менга аталган шеъри. У қўшиқ бўлиб учди. Ёшу қарининг тилида шу қўшиқ эди. Мен ҳар кун эрталаб троллейбусда ҳайдовчилар варанглатиб қўяётган шу қўшиқни тинглаганча ишга келардим. Кўча-кўйларда ёш-ялангнинг қўлидаги магнитофонлар «Мағрур гулим» деб куйларди, тўйларда, ёшларнинг йигинларида «Мағрур гулим»га рақс тушишарди.

Мен эса Музаффар Илҳомни кўрдим дегунча бурилиб кетардим. Овозини эшитганда, исми тилга олинганда юрагим бир орзиқар, лекин бўйин эгиг иқрор этишни истамасдим. Чунки мен унинг навбатдаги фалабаси бўлиб қолишни истамасдим. Мен голиба бўлгандим. Аммо, назаримда, бу голибалик омонат эди.

Мен Музаффар Илҳомни яна ҳам кўпроқ қийнагим, голибаликни яна ҳам мустаҳкамлагим келарди. Аммо Музаффар Илҳом яна бир бор «Севаман», деса енгилишимга, бош эгишими кўзим етарди. Лекин, ажабо, у келишга, яна бир бор иқрор бўлишга шошилмасди. Ҳамон ёнимдан бепарво ўтарди. Мен ҳам қолишмасдим.

Фақат Нилюфар... Нилюфаргина қуралай кўзлари порлаб унинг исмини тилга оларди. Узоқдан уни кўриб қолса ҳам юзлари лов-лов ёнарди. Бечора, ўз туйгуларини яширишга ҳарчанд уринарди-ю, эплолмасди.

Бир куни ўртамиизда шундай суҳбат ҳам бўлган эди. Бу сўзлашув тушлик пайти, навбатдаги «талабларга биноан» концертни тинглаб ўтирганимизда бўлди. Яна ўша «Мағрур гулим».

— Чиройли қўшиғ-а?
— Ёмонмас.
— Нега унақа дейсиз? Яхши-ку!

¹ Усмон Азим сатри

- Мен «ёмон эмас» дедим. «Ёмон» демадим.
- Мағрура опа, нега унақасиз?
- Қанақа «унақа»?
- Мағурсиз жуда...
- Кулиб юбордим.
- Ахир, Мағрураман-да! Ундан кейин: «Кеккайганга кеккайтум бошим кўкка •
етгунча...»¹ Эшитганмисиз?
- Сиз ҳаммага кеккаясиз-ку.
- Кимга «ҳаммага»?
- Музaffer акага...
- Музaffer ака «ҳамма» эмас. Қолаверса, у билан ишим йўқ, бор-йўғи шу!
- Йўқ, у яхши одам. Мен билан яхши гаплашади, кейин...
- Яхши гаплашса, гаплашаверинг! Faқат эҳтиёт бўлинг, куёв боланинг раши-
ки келиб қолмасин.

Шу билан сұхбат тугади. Лекин ундан қолган ёқимсиз из кўнглимни кир
қилиб юборди. Шоир жаноблари бизга кеккайб, Нилуфарга эгилибди-да! Яра-
мас!

Рашк мени қийнай бошлади. Аммо кўнглимнинг бир чеккасида илинж илиниб
туради. Ахир Нилуфар унаштирилган қиз. Бирон воқеа рўй бериши эҳтимолдан
жуда йироқ. Яна ким билади? Музaffer Илҳом кимлигини биламан-ку! Нилу-
фарнинг кўзларидағи ёлқиндан ҳам кўрқулик эди. Музaffer Илҳом енгил фала-
ба қозониб ўрганган, очиғи, қизлар унга маҳлиё, кўп қизларнинг ўзи унга оси-
лар эди!

Мен келиб-келиб мана шундай йигитни танлайман деб ўлабмишдим?

* * *

Ёдимда: кузнинг салқин қунларидан бири. Бўлимимиздаги Диљфузда опа айтиб
қолди. Музaffer Илҳом Нилуфарга хушомадлар қилаётганмиш. Ўзи кўрганмиш.

- Кўйсангиз-чи, — деди Ҳафиза опа зарда аралаш, — Музaffer Илҳом
шўҳроқ йигит, тўғри. Лекин Нилуфар эслик қиз. Жиннилик қилмайди у.
- «Эслик» қизингиз гўр ҳали. Уртага олиб бир тушунтириш керак. Музaffer-
нинг янги шеърини ўқимадингизми ҳали? «Адабиёт-санъат»да босилибди-ку! Мана,

*Хей, мени тунлари ўлдириб,
Минг ўлдириб, бир тирилтириб
Кулган Нилуфар, гули нодир,
Нозик гулум, айтингиз, ишқ надир?*

- Вой ўлай, — ёқасини тутамлади Сурайёхон. — Кўнимисиз бўлмай ўлсин!
- У шоир-ку! Кўйинглар энди, нашриётда ишлабки шунақа десанглар, бош-
қалардан нима кутиш керак? Ундан кўра ишинингизга қаранг, Диљфузахон! Мудда-
тингиз ўтиб кетяпти-ю, ҳали ярим ишни бажарганингиз йўқ.

— Вой, Ҳафиза опа, тўғри-да, Нилуфарга тушунтириш керак. Музaffer Ил-
ҳомни кўрса ўзгариб кетяпти. Унаштирилган қиз бўлса, ахир. Йигит хушомад
килса, индамай тураверадими? Бир-икки таъзирини берса, тилини тияди у ҳам.
Мана, нега Мағрурага хушомад қилотмайди? Чунки Мағрура унча-мунчага парво
қилмайди-да! Тўғрими?

Вужудимга олов теккандай бўлди. Бошқа ҳеч нимани эшитмадим. Аёллар ҳамон
бир кулиб, бир куйиниб нималарнидир гапиришарди.

Охири туриб чиқиб кетдим. Ўланиб йўлак адогига қараб юрдим. Оёқ остига
ташланган узун алвон гилам пояндоз устига аввал пойафзалим учини, кейин
пошинасини босиб, ҳар қадамда қаёқдандир хаёлимга келиб қолган сўзларни так-
рорлардим: «Бўри... ўз... уяси... атрофида... ов... қилмайди...»

Ва шу асно кимнингдир назарини сезиб қолдим. Бошимни кўтардим. Рўпарам-
да Музaffer Илҳом кулимсираб туради.

- Жуда хаёлга берилиб кетибсиз. Сезмайсиз ҳам. Нималарни ўйлаб келяпсиз?
- Ҳеч нимани.
- Йўғ-э! Бир нималар деб шивирлаб келаётувдингиз.
- Ҳа... Айтарлик ҳеч нима. Жуҳудларнинг бир мақоли эсимга тушиб қолувди.
- Шу, холос.
- Қани?
- Бўри ўз уяси атрофида ов қилмайди.

¹ Мираиз Аъзам сатри

- Шуми?
— Ҳа.
— Ғалати мақол экан. Энди эшитишим. Нечук хаёлингизга келиб қолди?
— Билмайман.
- Музаффар Илҳом кўзлари ғалати ёниб менга қаради.
— Мағрура, бугун ишдан кейин кетиб қолманг.
— Йўк...
— Хўп денг, Ўрдада кутаман сизни.
— Кутманг.
— Мағрура!
- Менга яқин келиб шартта билагимдан қисди. Юзимга унинг иссиқ нафаси урилди. Силталаниб қўлимни торта бошладим.
— Кўйвормайман, овора бўласиз. Менга ҳали ҳеч ким тарсаки туширган эмас эди. Индамадим. Ҳеч ким йўқ деган эмас.
— Мен айтаман.
Кўлимни тортиб олдим.
— Мағрура! — деди у. — Мағрур гулим, хўп денг...
Мен жилмайдим.
— Йўк...
Бормадим. Эртасига ишга келсан зинапоя майдончасида Музаффар Илҳом туриди:
— Ёлғончи қиз...
— Нега энди «ёлғончи»? Йўқ дегандим-ку!
— Ёлғончи! «Хўп» дегансиз!
— Демадим.
— Дедингиз... Кўзингиз айтди...
— Ёлғон!
— Мағрура!
- Кетиб қолдим. У яна чақирди. Яна бормадим. Кўнглим тўла фурур, уни қийнаётганимдан роҳатланардим. Бир жиҳатдан, боргим ҳам келарди. Бир томондан, Нилуфарга атаган шеърини эсласам аччиғим чиқарди. Мунча қўнимсиз бўлмаса? Мунча ҳам нодон бўлмасам? Келиб-келиб танлаганим шуми? Фақат ихтиёрим қўлимда эмас, кўнглимда эди. Фақат Нилуфар... Нилуфар кўнглимни алағда қиласарди. Ахир, у ҳам Музаффар Илҳомга маҳлий эди. Билардим. Сезардим. Ҳаммасини кўриб турардим.
- Балки ўшанда борганим маъқулмиди? Балки воқеалар тамом бошқача тус олармиди?
- Ҳаммаси кутилмагандა рўй берди. Дилемфа опа билан Сурайёҳон ҳақиқатан ҳам Нилуфарни «ўртага олишибди». Бечора, юм-юм йиглаб, «Ҳеч нима бўлганий йўқ. Музаффар aka менга ҳеч нима демаган» дерди. Лекин «маънавият ва ахлоқ пособонлари» барибир тинчишмади. Улар энди Музаффар Илҳомни «тартибга чақиришибди». Нима гаплар бўлди, билмайман, лекин Дилемфа опа аламидан қип-қизарив, Сурайёҳон эса йиглаб йўлакка отилиб чиқишибди. Орқаларидан Музаффар Илҳомнинг қораси бир кўринди-ю, эшик тараққиб ёпилди.
- Ярамас! Нима ишининглар бор, дейди-я? Биз ишхонамизга доғ тушмасин, ёмон иш бўлмасин, десак, тартибга чақирысан...
- Воқеадан хабар топган Ҳафиза опа иккала «пособон»га боғлаб танбех берди. Лекин фишт қолипидан кўчиб бўлган, бўлажак қуёв бу можародан хабар топган эди. Кимдир «холислик» қилган шекилли. Нилуфарнинг тўйи тўхтатилди.
- Бечоранинг ўша пайтдаги аҳволи...
- Ундан ҳам ёмони кейин бўлди. Музаффар Илҳомни ўрта ёшлардаги семиз бир киши излаб келди.
- Мен деразадан пастга, кўчага қараб турардим. Кузнинг илк салқин ёмғири шивалар эди. Дераза ортидаги каштанлар қизиши япроқларини ёмғирга чўмилтирганча жим қотган, автолар томчилар ялтиратган асфальтдан сирғалиб учар эди. Бино олдидаги йўлка адогида турган икки киши — Музаффар Илҳом ва ўрта ёшлардаги семиз киши ярим соатки, ёмғирга парвосиз, бир нималарни сўзлашишар, Музаффар Илҳом, кўли кўксига, бир нималарни қўйналиб гапиради. Семиз киши эса қовоги солик, уни тингларди. Кейин у жаҳл билан бир нарсалар дея бошлади. Музаффар Илҳомнинг ҳам жаҳли чиқди. Охири семиз киши ерга тупуриб, кетиб қолди. Кейин маълум бўлдики, у Нилуфарнинг отаси экан.
- Эртаси кун йўлак адогидаги торгина нимқоронги хонада, тахлам-тахлам этиб боғланган қофозларни ажратардим. Бир пайт девор ортидан икки кишининг овози келди. Орқа томон зинапоя майдончаси эди.

— Укам, шўхлигингизни-ку биламан, лекин бу энди ҳаддан ошиш, биласизми?

Бу — Ҳафиза опанинг овози эди.

— Жуда оғзи қон бўри қилиб юбордингиз-ку, мени, опажон!

Бу — шубҳасиз, Музаффар Илҳом эди. Афтидан, уларнинг суҳбатлари анча аввал, бошқа ерда бошланган, энди бу ерда, зинапоя майдончасида, ҳеч ким йўқ, бирор эшитмайди, деган хаёлда давом этаётган эди.

— Орада ҳеч гап бўлмаган.

— Шамол бўлмаса...

— Опа... Мен жуда яхши кўраман сизни. Йўқ, тўғри маънода айтяпман буни. Худди катта опамни яхши кўргандек яхши кўраман. Очигини айтиб қўя қолай. Нилуфар жуда ҳаёли қиз. Рост! Нилуфар яхши хотин бўлади, яхши она бўлади, унақа қизга уйлансанг, ўйингдан кўнглинг тўқ юрасан.

— Ўйланинг бўлмаса! Нега кулласиз?

— Шунча гапдан кейин-а? Отасининг менга нималар деганини билмайсиз-да!

— Энди унга ҳам алам қилган-да! Үн беш кун қолганда тўйнинг бузилишини тасаввур қила оласизми? Аслида-ку, тўй сиз сабабли бузилди.

— Мен нима қилдим?

— Ахир, Нилуфар яхши кўрарди сизни. Сезмасмидингиз?

— Сезганман...

«Ха, — ўйладим мен, — буни мен ҳам сезгандим».

— Дилфузахон «Ўзим кўрдим», — девди. Нимани кўрган у?

— Қаердан билай нимани кўрган?

— Нилуфарга ҳеч нима демаганмисиз?

— Ҳеч нима!

— Одатдаги хушомадларингиздан ҳам айтмаганмисиз?

— Қанақа хушомад?

— «Чиройлисиз, ажойиб қизсиз-да»! Яна нимайди?

— Опажон!.. Бунинг нимаси хушомад? Битта қизга «чиройлисан», десам, албатта, унга уйланишим керак экан-да!

— Музаффар, укажон! Шоирсиз-у, сўзнинг аҳамиятига баҳо бермаганингиз галати. Қиз учун баъзан биргина сўзнинг аҳамияти юзта гапдан каттароқ бўлади. Буни сиз яхши кўрган опангиз — Ҳафиза айтяпти. Уф... Хўп, бўлар иш бўлди. Энди бу ёғини нима қиласиз?

— «Бу ёғини? «Уйлан», демоқчимисиз?

— Шундай қилсангиз тўғри бўларди, укам.

Бироннинг гапини эштиб турганим ўзимга таъсир қилиб, кулгим келди. Хона тор, қофоз чангига ўпкани ачитар эди. Нафасим тиқилиб, тоқатим тоқ бўла бошлади. Эшикни қиялаб очдим. Орқа ўтириб турган Ҳафиза опанинг тўла гавдаси-ю, бу гавдада тўқилиб турган ҳаво ранг кенг кўйлаги кўринарди, холос.

— Ҳамма гапни қўзғаган анави иккита хотин-у, мен... — деди Музаффар Илҳом секингина.

— Шундай гап чиқмаслиги ҳам мумкин эди, агар сиз...

— Агар Нилуфар...

— Нилуфарни қўя туринг! Қиз бечора сизни яхши қўриб қолганда ҳам сиз агар ақёллироқ иш туттанингизда эди, енгилтак бўлмаганингизда эди, бечора жимгина тақдирга тан бериб турмушга чиқиб кетаверарди!

— Мен нима қилдим, ахир?

— Шеърга бало бормиди? Столига гуллар қўйишга бало бормиди? Одам деган ҳам шунақа бўладими? Бир қизнинг ҳаётини синдиридингиз-ку, шоири олам!

Шу пайт қофозларнинг таҳламлари ағдарилиб кетди. Бири оёғимни босиб тушди. Оғиргина экан. Мувозанатни йўқотиб ерга ўтириб қолдим. Ўз-ўзидан ўйглай бошладим. Оёқларим оғрир эди. Ундан ҳам кўпроқ кўнглим оғририди. Билолмасдим, мен Нилуфарга ачиняпманми, ё ўзимгами?

* * *

— Мағрура, сизга кўйлак ярашибди...

— Раҳмат!

— Бошқачасиз бугун...

— Ростдан-а?

Мен эски диваннинг бурчагида ўтирадим. Садриддин дераза ёнида туарди.

Бугун душанба. Соат ўн иккигача дарсим йўқ. Кафедра хонаси ҳам бўш.

— Ҳеч кўйлак киймасдингиз. Нечук?

— Нима бўпти?

— Кулманг...
Садриддин жим қолди. Мен эса уни мароқланиб кузатардим. Лабимда табасум, руҳим енгил, мен энди тунда қайноқ күз ёши тўккан Магрура эмасдим.
— Кечакишилоқдан келувдим...
— Қалай, уйингиздагилар тинч эканми?
— Ҳа... Келаси ҳафта онам Тошкентга келмоқчи.
— Тошкентни томоша қилдирар экансиз-да!
— Ҳа. Маҳаллангизга ҳам олиб бормоқчиман.
— Нима учун?
— Ўзингизни билмасликка солманг. Тушуниб турибсиз-ку!
Садриддин яна жим қолди.
Мен кулиб юбордим.
— Нега куласиз?
— Нега кулмай? Бунақа гаплар келишиб қўйганлар ўртасида бўлади. Биз келишмаганмиз.
— Келишиб қўя қолайлик эса!
Яна кулдим. Унинг оёқтираб олиши кулгимни қистарди. Нима сабабдан, нимага ишониб менга шунчалик... Ё ўзим билиб-бilmай умид туғдирдимми? Қачон?
— Қандайсизлар? — Баҳтиёр аввал менинг, кейин Садриддиннинг қулини қисди. Унинг кетидан Бердикул Муродович кириб келди. Доимгидек: «Ҳа, иним, жўжалар...» жумласи...
Менинг яна икки соат дарсим бор эди. Ўрнимдан қўзғалдим.

* * *

... Катта танаффус пайтлари биномизнинг уч томони гавжум бўлади. Бири учинчи қават, ўнг қанотдаги арzon ошхона. У ерда асосан талабалар ва стипендиyaси тугаш арафасидаги аспирантлар овқатланишиади. Иккинчи нуқта эса бу — фойе ўртасидаги буфет. Бу ерга фақат талабалар киришади. Учинчи гавжумлик эса фойенинг чап қанотида кузатилади. Бу ошхонага ўқитувчилар, чўнтағи бақувватроқ аспирантлар киришади. Баъзан «бойиб» қолганда магистрантлар ҳам мўралаб қўйишади. Бунда нариги ошхонадаги пластмасса стол-стуллар ўрнида ярим юмшоқ стуллар ва оқ дастурхон ёзилган столлар, у ерда алюминий қошиқлар бўлса, бу ерда зангламас пўлат қошиқлар, енгил оппоқ чинни коса-ю пиёлалар... Хуллас, нархлар ҳам от ва тия оралигига.

Гулмира иккимиз бел бўйи тортилган йўғон пўлат тагликка қўйилган патнисларимизни ёнламаси суриб бораардик. Оқ қалпоқ кийиб олган ошпазлардан бири суюқ овқатларга қарап, яна бири чой ё қаҳва дамлаб тутар, бошқаси эса нон кесарди. Пўлат таглик — йўл сўнгиди оқ ҳалат кийган татар аёл пул олиб, қайтим қайтарарди.

Менинг патнисимда ярим коса қиймали шўрва, ликогчада қайнатилган лавлаги. Гулмиранинг парҳезимдан кулишига парвосиз олдинга сильжирдим. Бир вақт димогимга аччиқ тамаки иси урилди. Ёнимга кўз қишимни ташладим. Ҳа, мен янглишганим йўқ, бу — Хуршид aka эди. «Якшанбадан бери кўрмай, учратган жойимни қара-я», — ўйладим мен беихтиёр.

Саломлашиш керак эди.
Овозим чиқдими ё йўқми, билмайман, Хуршид aka бош силкиди.
— Сен ҳам чой ичсанми? — сўради Гулмира.
— Ҳа... Йўқ...
— «Ҳа»ми, «йўқ»ми, довдир? — хиринглади у.
Шу пайтда бу кулонғич қиз бирам ёмон кўриниб кетдики...
— Қаҳва беринг, — дедим қалпоғини нақ пешонаси устига қўндирган йигитчага.

— Қанақасидан бўлсин? — деди у ҳам. — Сутлими, оддий қорасими?
— Баривир, — дедим мен.
— Нескафе бор, Нексвелл хауз, Маккофе...
— Баривир, — дедим кўзимни чирт юмиб. Йашқилиб тезроқ кетсам эди...
Тамаки ҳидидан бошим айланиб бораарди. Хуршид aka эса индамай йигитчанинг бўшашини кутарди. Йигитча бираам имиллардики...

Гулмира аллақачон пулинин тўлаб кетиб бўлган, ивисиқ йигитчанинг олдида мен-у Хуршид aka турардик. Мен ёнимга ўгирилмасам ҳам унинг қирра бурнини, қимтилган лаблари четини, ияги остидаги чуқур ажин чизигини, кўзларининг босиқ қарашларини сезиб турардим. У ҳам менга қарамасди. Эҳтимол, борлигимни сезмасди ҳам.

Ниҳоят, қаҳва ҳам қўлга тегди. Тезгина пул тўлаб Гулмиранинг ёнига бориб ўтиридим.

Сал туриб Хуршид ака келди. Келди-ю, бошқа жой қуриб кетгандек рўпарамиздаги столга ўтириди. Ва жимгина мантисини ея бошлади. Назаримда унинг чоратроф билан иши йўқ, тезда қорнини тўйғизса-ю, кетаверса эди...

— Нега ҳеч нарса емаяпсан? — деб сўради Гулмира.

Дарвоҳе, нега?

— Совусин, — дедим мен.

— Қаҳва ҳам совусинми? — ҳайрон бўлди у. — Ундан кўра яхна буюриб қўяқолмайсанми?

Истеҳзосини қаранг бу хонимнинг!

Қаҳвадан хўгладим. Шу заҳоти юзларим тортиша бошлади.

— Ҳа?

— Қаҳва сутли экан...

— Нима қипти?

— Ёмон кўраман сутли қаҳвани!

— Ўзинг барибир дединг-ку!

— Йўғ-э?

— Нима деганинг эсингда йўқми? — Гулмира кулиб юборди. — Сен ҳардамхалёл бўлиб қолибсан. Севиб қолмадингми мабодо?

Оёғимда титрок турди.

— Кимни? — дедим жонҳолатда.

Ярамас кулонгич! Баттар кулса-я! Ҳатто атрофдагилар қайрилиб қарашди-я!

Хуршид ака ҳам чўчиб бошини кўтарди. Менга, кейин Гулмирага ҳайрон бўлиб қаради-ю, яна индамай ўз ишига машғул бўлди.

— Мен қаердан билай кимни? — деди у маза қилиб кулиб олгач. — Факультетда пичноқда илинарлик эркак зоти бўлмас...

Шу пайт Хуршид ака чойига ҳам қарамай туриб кетди. Гапимизни эшитиб қолмадимикин? Ё Гулмиранинг кулгисини бошқача тушундими? Ёки шошдими? Нега? Қаерга?

Тушлик ҳам ўтмади. Совуган шўрвани ташлаб туриб кетдим. Шу топда Гулмирага қарагим ҳам келмасди.

— Феълинг курсин, — деди у. — Ҳазиллашувдим.

— Ҳазил бунақа бўлмайди, — жавоб бердим мен.

Шу тариқа ажralишдик.

* * *

Танаффус пайти хонамизга қорамагиз бир қиз мўралади. Назира опани кўриши билан чопқиллаб келиб қучоқлаб олди.

— Раҳима, ўзим ўргилай, бормисан? — деди опа унинг елкаларини силаб.

— Дадам йўқ эканлар-а? — қиз бошини опанинг елкасидан олиб бир ёнга эгиб қаради.

— Ректоратга кетган бўлса керак. Гулмира айтмадими?

— Айтди.

Ҳа, бу — Хуршид аканинг қизи эди. Мен уни даррров танидим. Биринчи бор кўраётган бўлсам ҳам. Чунки Раҳима онасига жуда ўхшарди.

Қорамагиз юз, думалоқ қоп-қора кўзлар, қалин лаблари устидаги билинрабилинмас қора туклар, елкаларига ёйилган ипакдек майин қоп-қора соchlар... Гўё Робияхон опа ўшарид қайтгандай...

Оёқ учida юриб хонадан чиқдим-у, секингина эшикни ёпдим.

Рўпарадан Баҳтиёр келарди. Баҳайбат гавдасида калта қора чарм пальтоси тептекис тортилиб турар, тикандай диккайган қоп-қора соchlарида томчилар ялтилар эди.

— Ёмғир бошляяпти, — деди у ўттиз икки тишини кўрсатар даражада илжаяркан. Тавба, бу нимадан хурсанд?

— Ҳа, нимадан хафасиз? — сўради Баҳтиёр илжая-илжая.

— Сиз нимадан хурсандсиз?

— Ҳеч нимадан. Ёмғир ёғялти. Шу, холос.

— Мен ҳам ҳеч нимадан.

Баҳтиёр декан хонасига мўралади.

— Бу ёқ йўқми?

— Йўқ.

- Эсиз. Атайлаб танаффус пайти айтиб қолай деб шошиб келувдим.
- Тинчликми?
- Эртага, ниҳоят, Кенгаш бўлади.
- Хайрият, ниҳоят-а! Шунинг учун хурсанд экансиз-да!
- Бўймаса-чи! Тўрт ой кутдим, ахир!

Бахтиёр чўнгатидан сигаретини чиқариб фойе бурчагига қараб кетди. У ердаги бир тўп йигитларга қўшилиб сигарет тутата бошлади. Бахти одам! Шошилиб ишга келади, ишдан кейин уйига чопади. Оиласидан кўнгли тўқ. Бирон бир юпқа китобча ёзиб қўяди-да, Кенгаш кўриб чиқишини кутиб, дарсини ўтиб юраверади. Кенгашдан ўтгандан кейин уч-тўрт кун хурсандчиликдан ёш боладай иргишлийди-ю, нақ икки ой илҳом кутиб, кейин яна навбатдаги китобчасини бошлайди. Эгнида доим бир хилдаги “молтопар” майдада катакли кулранг костюм, кўлида эски портфель. Ўнга бу ҳаётда ортиқ ҳеч нима керак эмасдай... Балки шундай яшаҳ ҳам маъқулдир?

Хаёлимни аллақандай шовқин бузди. Қоровул чол бор овозини қўйиб бир нималар дерди. Йигитлар тўзиб қолишиди. Ким аланглаб сигаретини ташлашга жой қидирган, ким чақа бошлаган гугуртини шошиб ўчирган... Йигитлардан бири қоровулга нимадир деб эътиroz қилувди, чолни жазава тутди. Фойеда чекиш мумкин эмас эди. Қоидапарааст қоровул кашандаларни ёмғирда ташқарига ҳайдарди. Шу машмаша устига Хуршид ака келиб қолди. У икки бармоғи орасига олган сигаретини оғзига тутиб, йигитлар олдига олов истаб келаётган эди. Қоровулнинг бақиригини эшитиб тўхтади-ю, тезгина бурилиб йигитлар ортидан ташқарига чиқиб кетди.

Ич-ичимдан кулги тошиб кела бошлади. Кафтим билан оғзимни ёпиб олдим. Қоровул ўз ишидан ўзи шод, қўлидаги газетасини ёзиб, йўл-йўла-кай фижимларини кафти билан текислай бошлади. “Халқ сўзи” бўлса кепрак”, — ўйладим беихтиёр. Қизиқсиниб разм солдим. Газета “Халқ сўзи” эди.

Шу пайт йўлакдан Раҳима чиқиб келди. Кўзлари ерда, бир кўлини иккинчиси билан дам-бадам сиқимлайди, лаблари хиёл очиқ, ҳеч ёққа қарамай фойени кесиб ўта бошлади.

— Раҳимахон, — дедим секингина.

Раҳима тўхтаб, менга ўтирилди. Киприкларини тез-тез пирпиратиб, кўзларининг намини қувган бўлди.

— Дадангиз келдилар, — дедим.

— Қаердалар?

Мен жимгина ташқарига олиб чиқувчи эшикни кўрсатдим.

— Раҳмат, опа, — деди у.

Кейин эшикни итариб ташқарига қаради. Астагина:

— Дада! — деб овоз берди.

Сўнг эшикни ёпиб ортига қайтди. Шу заҳоти Хуршид ака ичкари кирди. Қизини кўриб кўзларида нимадир “йилт” этди. Раҳима қўлларини кўтариб, отасининг елкасига қокиб кўришиди. Мен тезгина бурилиб кета қолдим.

... — Нега чиқиб кетдинг? — Назира опа мени шу сўзлар билан қарши олди. — Мен сезмай ҳам қолибман.

— Ҳалақит бермай қўя қолай, девдим.

— Йўғ-а, ҳалақит берадиган гапнинг ўзи йўқ эди-ку! Бу — Хуршиднинг қизи.

— Танидим.

— Қаердан танийсан уни?

— Онасига ўхшаркан.

— Онасини... Ҳа-я, суратини кўргандинг-ку! Бечора, “ён кун бўлди, дадамни кўрганим йўқ, қандай юрганийкин?” — дебди-да!

Опа дафтар-китобларини тахтай бошлади. Ҳаракатлари босик, қарашлари паришон...

— Опа, Раҳиманинг уйи тинчми ишқилиб?

— Тинч...

— Худога шукур...

Назира опа ялт этиб менга қаради.

— Уйи тинч, — деди яна. — Фақат ўзи нотинч. Дехлидан хат олибди. Кеча Самарқанддаги опаси кўнгироқ қилган экан. Иккала опа-сингил ўзаро келишган, шекилли. “Биз розимиз, дадам уйлансин” деётганмиш. Раҳима опаларидан хафа. Бироз насиҳат қилдим. Тушундими, йўқми, билмадим.

Эҳ, қизигина, ҳаёт курсин...

Худди шунақа ёмғир шивалаб турган оқшом эди. Япроқларини тўкиб улгурмаган шаҳар энди совуқ ёмғир остида жунжикар, ўзини соябонлар остига тортар эди. Кўчалар тўла соябонлар оқими.

Мен ён-атрофи очиқ айвончада ўтирадим. Шундоққина ёнимда кекса ўрик шоҳларидағи сўнгги баргларини ёмғирларга узатиб қисирлар эди. Бўйнимдаги оқ ишак рўмолни бошимга тортдим.

— Кўлларинг музлаб кетибди, — деди Музаффар Илҳом уларни кафтлари орасига олиб. Кейин нафаси билан кўлларимни исита бошлади. Нафаси совуқ эди унинг! Кўлларим баттар совқотди.

— Совуққа йўқроқ экансан-а?

— Эмон кўраман совуқни. Кошкийди доим ёз бўлса, ёки баҳор...

— Кошкийди! Лекин иложи йўқ.

Бу — бизнинг иккинчи учрашувимиз эди.

Уша мен бехос эшитган сұхбатдан сўнг ўтган икки ҳафта жуда кўп нарсаларни ўзгартириб юборганди. Нилюфар ишдан бўшаб кетди. Азоблар эндигина чандик торта бошлаган жароҳат мисол бир-бир симиллаб қўярди. Музаффар Илҳом Ҳафиза опанинг гапига, барибир, кирмади. Нилюфарга уйланмади. Лекин ҳамон бурчак-бурчакда, ими-жими гаплар кўтарилиб қолар, мен истамасам-да, тешик қулоқ, барибир, эшитарди.

Тунов куни яна бир хабар эшитдик. Нилюфарнинг тўйи бўлаётганмиш. Бу хабарни бизга Ҳафиза опа айтди. Йўқ, куёв ўша йигит эмас экан. Гап-сўз бўлган қизга уйланмасмиш... Бугун Нилюфарнинг никоҳи бўлиши керак. Бечора, Нилюфар... куёв ўзидан ўн ёш катта, икки боласи билан бева қолган йигит, ўзларининг узоқ қариндошлари эмиш... Отаси майда-чўйда гапларга тоқат қилолмаган шекили... Ё аччиқ устида кўзини чирт юмиб... О, номус нималар қилмайди одамни!

Фақат Нилюфарни эслаганда юрагим зирқ-зирқ этарди.

Кеча Ўрдада, Анҳор бўйида узоқ юрдик. Музаффар Илҳом жим, юзларимга қараб-қараб қўярди. Ёйсимон кўпприк устидан ўтаётib қўлларимдан тутди. Индамадим. Тераклар панасида астагина елкамдан кучди. Каршилик қилмадим. Унинг кўллари залворли, елкаларимни эзар эди. Кейин кўлларини елкамдан олмай зиналардан тепага олиб чиқди. Яна аллақаёққа бошлади. Бир вақт қўзларимни ердан кўтариб қарасам, “Баҳор” концерт залининг ёнида, сувга қаратиб солинган айвончада, йўғон қарағай панасида турибмиз. Музаффар Илҳомнинг қўллари елкаларимдан сирғалиб, белимга тушди. Енгилгина силтаб, ўзига қаратди.

— Хаёл қаёқда, қизалоқ?

Жавобимни ҳам кутмай юз-кўзларимдан ўпа бошлади. Мен эса жим, бўсаларига на қаршилик кўрсатар ва на жавоб қиласадим.

— Гулум, — шивирлади у. — Тиканли гулум... Кўл чўзсанг, тиканларини санчиб-санчиб олади. Кўлларингни қонатиб ушласанг, мана бунақа — жимгина бўйини яшириб тураверади...

Сочларимни тузатиб, узоқ ҳидлади. Мен беихтиёр бўйнимни қисдим.

— Сочларингга барг ҳиди ўрнашиб қолибди. Сендан худди кузнинг иси келаётгандай. Мағрурамга ҳатто куз ҳам ошиқ шекили... Нега индамайсан?

Мен унинг кўксига бошимни кўйганча қимир этмасдим. Музаффар Илҳом астагина ўзига қаратди. Лабларимга унинг нафаси урилди. Мен қалтирай бошладим. Вужудимда совуқ ўрмалар эди.

— Музаффар ака...

— Гулум... Нега қалтирайсан?

— Совуқ...

Музаффар Илҳом эгнидаги жун костюмининг барини очиб, мени ўраб олди.

— Исиб қолдингми? — деди сал туриб.

Мен баттар қалтирай бошладим. Унинг ҳатто кийими ҳам совуқ, гўё эгнимга илон пўстї ташлангандай, баданимда ёқимсиз титроқ қўзгалди.

У эса менинг белларимдан қаттиқ қисди. Кейин яна лабларимда ўша совуқ нафас...

Икки ой аввал, кузнинг илиқ куни поёнида, Музаффар Илҳомнинг бўсалари қайнок эди, ўшанда бир зумгина бўшашгим, кўксига бошимни кўйгим, “Музаффар ака, мен ҳам сизни...” — дегим келганди. Мана энди, унинг кўксига бошимни кўйиб турибман, лекин нега “Музаффар ака, мен ҳам сизни...” деёл-маяпман, нега вужудимда муз ўрмалаяпти, бўсалари мунча совуқ унинг? Кўллари соchlарим устида илон танасидай сирғалади. Товуши гўё ўлжасини авраётгандай бир текис пасайиб боради.

Юрагимдан узун хўрсиниқ отилиб чиқди. Кўлларини астагина четга сурдим.

Ўзимни унинг кучоғидан күтқазиб худди соchlаримга ўрнашган бир нимани тушириб юбормоқчидай, қўлларим билан соchlаримни силкитиб ташладим.

— Сенга нима бўлди?

— Совқотдим...

— Кел менга...

— Йўқ. Кетдим мен.

— Қаёққа?

— Уйимга.

— Шошма. Эрта-ку ҳали. Қуёш ботгани йўқ.

Индамай бош чайқадим. Айвончадан чиқиб чапга юрдим. Кейин баланд ҳайкалнинг қизғиши мармар қопланган таглиги бўйлаб тўргира кетдим. Ёнимга қара масдим. Лекин Музаффар Илҳом ёнимда келаётганини сезардим. Майдонни кесиб ўтиб, метрога тушдим. Бутун йўл давомида бир-биримизга бир оғиз сўз айтмадик. Музаффар Илҳом менга қараб-қараб қўяр, негадир сўзлашишга уринмасди. У маҳалламиз бошида қолди...

...Мана, бутун унинг рўпарасида ўтирибман. Ҳамон вужудимда совуқ ўрмалайди. Қўлларим унинг кафтлари орасида, нафаси иситмас, баттар совқотардим. Бир вақт у кафтларимни юзларига босди. Шу заҳоти кафтларимга совуқ игналар санчилди. Қўлларимни тортиб олдим.

— Соқолим ботдими? — кулимсиради у. — Кечгача тикан бўлиб қолади бу.

Бармоқларини иягига теккизиб:

— Тикан, — деди бепарвогина.

Мен олдимдаги қадаҳнинг гирдига кафтларимни босдим. Кейин бармоқларим учи билан қадаҳ четларини пайпасланиб силай бошладим.

— Бугун Нилуфарнинг тўйи... — шивирладим мен.

— Қўйсанг-чи...

Музаффар Илҳом тундланди.

— Эслама уни. Бунда на менинг, на Нилуфарнинг айби бор. Ҳаммаси ўша иккита “маънавият посбони”нинг иши.

Мен бехос эштиб қолганим ўша суҳбатни, Музаффар Илҳомни излаб келган семиз кишини эсладим. Кейин Нилуфарнинг ёш ювган юzlари кўз олдимга келди. Ҳаммаси бир бўлиб мени эза бошлади. Бир вақтлар рашик сабаб қийналганларим энди ортга чекинган, лекин (ажабо) бутунги баҳтим (баҳтиммикин) мени баттарроқ қийнарди.

Хаёл билан қўлини яна қадаҳ устига қўйдим. Қадаҳнинг силлиқ гирди бармоқларим остида текис сирғала бошлади.

Бирдан қаттиқ сескандим. Шамол бир неча совуқ томчини мен томон учирган эди.

Музаффар Илҳом қўлини узатиб, юзимга теккан томчиларни кафти билан артиб ташлади. Юзимга игна теккандек сапчишим. Қўллари бирам совуқ эдики... У эса ҳайрон бўлиб қўзларимга қаради.

— Сенга нима бўлди?

— Совуқ...

— Юр, кетамиз.

Музаффар Илҳом имо қилиб оқ пешбанд тутган нозиккинаmallasoch қизни чақириди. Қиз унинг олдига бир парча қофоз қўйди. Кейин Музаффар Илҳом қўйган пулларни санаб чўнтагига тиқди.

— Қадаҳни тинч қўй, — деди ҳазиллашиб.

Мен шундагина қадаҳ кафтларим орасида турганини пайқадим. Ўзим сезмаган ҳолда совуқ шишани қиса бошлаган эдим.

— Синиб кетмасин тағин, — кулди у.

Мен қадаҳни қаттиқроқ қисдим.

— Синса синар, — дедим мен. — Қадаҳнинг жони йўқ. У одамнинг кўнгли эмас.

— Шунақа де?

— Шунақа...

Қадаҳ қирсиллай бошлади.

— Мағрура, бу нима жиннилик?

Кафтларим орасида шиша чирсиллади. Шу заҳоти кафтларим жазиллаб, қўлларим исий бошлади. Қўлларимни ёзib юбордим. Стол устига жаранглаб шиша синиқлари тўкилди. Музаффар Илҳомнинг юзи бирдан оқарди. Шошиб билагимдан тутди. Дастурхон устига қип-қизил томчилар тушди. Шундагина кафтларим қонаётганини сездим.

Бошимдаги рўмолни олиб кафтларимга босдим. Оппоқ ипакда алвон доғлар кўринди.

Ўрнимдан туриб кетдим.

— Тўхта, — деди Музаффар Илҳом. — Кўлларингни боғлаб қўяй...

— Йўқ.

— Тўхтасанг-чи!

— Йўқ!

— Қайсар қиз! Шошма, ахир!

Эшикка отилдим. Қайрилма зиналардан чопқиллаб пастга туша бошладим. Ортимдан Музаффар Илҳом югуриб келарди.

Кўчага чиқишим биланоқ:

— Такси керакми? — деб сўради ёнгинамда кимдир.

— Керак.

— Манавинга чиқинг.

Кўрсатилган машинага ўтиришим билан ҳайдовчи моторни юргизиб юборди. Музаффар Илҳом кўчага чиқиб у ён-бу ёнга қараб тараддуланиб қолди. Мени излади. Ниҳоят, такси ичига ўтирганимни кўриб мен томонга отилди. Лекин машина ўрнидан қўзғалган эди. Кўча четига турган одам уни тўхтатиб, бир нималар деди. Музаффар Илҳом кўл силтаб юборди.

Мен жимгина юзимни ўтиридим. Кафтларим жазиллар, кўлларимни тиззала-римга кўйганимдан кўйлагимга қон юқиб борар эди.

Үйимизга этиб келганимда қўлларим увишиб қолганди. Сумкамнинг занжири-ни қийнала-қийнала тортдим. Ҳайдовчига пул тутқизиб рўмолимни кафтларимда ҳовучлаганча ҳовлига кирдим.

Ойим мени кўриб кўрқиб кетди.

— Кўлимни кесиб олдим, — деда олдим аранг.

Кеннойим қўлларимни оппоқ докага ўрай кетди. Лекин қўлларим ўралгани сайин дока юзида алвон доғлар кўринаверарди.

— Ойижон, қон тўхтамаяпти, — деди кеннойим.

— Билагидан боғланг.

Кеннойим билакларимга боғлов солди.

— Ойижон, тўхтамаяпти-ку! Нимада бунчалик кесдингиз, ахир?

— Шишада.

— Тирсак тепасидан боғлов солай, йўқса тўхтамайди, ойижон!

— Боғланг! Болалигида фурраларини санардим. Катта бўлганда қўлларини кесиб келса... Э худо, бу қиз ҳеч тинчийдими, а?

— Энди тинчийди қизингиз, ойи...

Ойим уф тортди. Қон барибир тўхтамади. Кеннойим мени машинада касалхонага олиб келди. Кираверишдаги телефондан қаёққадир кўнғироқ қилди. Сал ўтмай, оппоқ халати этакларини ҳилпиратиб акам югуриб келди. Мени деворлари оппоқ этиб сирланган хонага олиб кирди. Жигарранг дермантин қопланган катта ўтқизиб, ўзи кимгадир кўнғироқ қилди. Кўп ўтмай, бурунлари бургутникидай эгри, қоп-қора кўзларининг боқишилари тешиб юборгудай ўткир ўрта яшар бир киши кириб келди. Унинг ортидан қолищдан қўрқандай қадамба-қадам чопқиллаб ҳамшира кирди. Қўлларимдан докаларни ечиб олишди. Қонин ювиги ташлаб, кўра бошлашди. Бургутбурун акамга паст овозда нимадир деди. Акам бош силкиди.

Мени аравачага ўтқизиб узун йўлаклардан олиб кетишиди. Яна бир оппоқ сирланган хонага олиб киришди. Шифтда катта доира ичига айлана бўйлаб ўткир чироқлар ёнарди. Билакларимни икки ёнга ёзиб боғлашди. Оғзи-бурнини боғлаб олган бояги бургутбурун кириб, атрофимдагиларга мен тушунмайдиган қандайдир сўзларни айта бошлади. Үнг билагимни тирсак тепасидан резина билан боғлаб қандайдир дори юборишиди. Қўлларим музлаб қолди.

Кейин кафтларимда бир нималар изгий бошлади. Терининг тортилишини ҳис қилдим. Аммо оғриқ йўқ эди. Охирида кафтларимга қандайдир совук суюқликни суртишди. Қўлларим акашак бўлиб қолганди. Мен ҳеч нимани ҳис қилмасдим. Фақат совуқнигина сезар, вужудим қалтириб бораарди. Қалтираётганимни кўриб ёнимга баланд темир илгични олиб келишди. Бир четига қон тўла шиша идишни ўрнатиши-ю, томиримга игна санчиб, унга ингичка шаффоф ичакни улашди. Кимдир оёқларимга иссиқ сув тўлатилган резина идишни кўйиб устидан ўраб кўйди. Бургутбурун ҳамон кафтларимга бир нималарни санчар эди. Баъзан терим тортилиб-тортилиб қолар, шунда у бошини кўтариб менга бир қараб қўярди-да яна индамай ишига машгул бўларди.

Ниҳоят, бу азоб ҳам тугади. Мени яна аравачага солишиди. Торгина хонага олиб кириб каравотга ётқизиши.

Акам кирди. Докаларга ўраб ташланган қўлларимни ушлаб кўрди.

— Оғримаяпти, — дедим мен.

— Чунки уколнинг таъсири тугаганий йўқ. Ҳали тунда оғрийди. Томирни тилиб юборган экансан. Шунинг учун қон тўхтамаган.

Акам кафтларини бир-бирига уриб ўтириб қолди. Унинг ўйланиб қолганда шундай қиласиган одати бор эди.

— Қўлингни нимада кесдинг?

— Шишада.

— Аникроғи?

— Қадаҳа.

— Қаерда?

Индамадим.

— Гапир, қаерда?

— Қаҳвахонада.

— Нима қилаётувдинг у ерда?

— Ўтирувдим.

— Ким билан?

— Ака...

— Жавоб бер!

Йиғлаб юбордим.

Акам жим бўлиб қолди.

— Мен бехосдан кесиб олдим. Ака, ўлай агар!

— Ҳа, яхши. Ишондим. Бир гап бўлса... Феълимни биласан, а?

Акам ўрнидан турди.

— Ҳали уч-тўрт кун бўласан шу ерда. Мен ойимни хотиржам қилиб қўяй. Хавотирга тушиб ўтиргандир.

Акам тўғри айтган экан. Ярим тунга яқин дорининг таъсири йўқолгач мен оғриқдан ўзимни қўярга жой тополмай қолдим. Кафтларимни кўксимга босганча лабларимни тишлиб йўлакнинг у бошидан бу бошига бориб кела бошладим. Менинг бир маромдаги бориб-келишларимдан чарчаган ҳамшира охири навбатчини чақириб бир нималарни тушунтира кетди. Кейин мени каравотимга ётқизишиб мушакларим орасига дори юборишиди.

— Билиб қўй, дорининг таъсири икки соатга етади, холос. Бироз мизгиб ол. У ёғига тонг отгунча “худо – пошшо”, чидайсан. Бошқа дори бермайман. Чунки бу дорининг кўпчи зиён қилади. Тушундингми? – деди навбатчи. Кейин “гап тамом” дегандай қўлларимга енгилгина шапатилаб қўйди-да, оғир гавдасини аранг кўтариб ўрнидан турди. Сал ўтмай оғриқ пасайиб, уйку босди.

Уйку қандай тез келган бўлса, худди шундай тез йўқолди. Симиллаган оғриқдан кўзларим очилиб кетди. Оғриқ борган сари кучайиб, охири мени ўрнимдан турғизиб юборди. Кафтларимга гўё саноқсиз бигизлар суқилар, қўлларимнинг териси жизиллаб, томирларим тортишиб борарди. Тишимни тишимга босиб яна кимсасиз йўлакда изғий бошладим. Йўлак ёруғ, ўргадаги оқ стол устида телефон, қалин дафтарлар. Стол ёнидаги узун дермантин катта омонатгина ташланган тўшакда бояги ҳамшира ухляяпти. Бечора, чарчаганидан бошидаги қалпоқчасини ечиб шундоққина стулга ташлабди. Қўллари икки ёнга беҳол ташланган, эгнидаги оқ халатининг этаги катдан ергача осилиб турибди. Полда бир-бирининг устига чиқиб кетган латта шиппаклар. Стол тепасидаги думалоқ осма соат мили учни кўрсатар эди.

Кўлларимни осилтириб силкита бошладим. Оғриқ сал пасайди. Худди шу ҳолда йўлакнинг бошига бордим. Эшиклардаги ёзувларни ўқий бошладим. “Муолажа хонаси”. “Хуқна қилиш хонаси”, “Тиббиёт фанлари номзоди Б. Багдасаров”, “Тиббиёт фанлари номзоди И. Илёсов”, “Тиббиёт фанлари номзоди...” Мунча ҳам номзодлар кўп экан?

Яна оғриқ кучайди. Йўлакнинг боши-адогига бориб келишларимни санай кетдим. Бир... уч... саккиз... ўн етти... йигирма тўққиз... ўттиз олти... Охири чарчоқ енгди. Каравотимгача судралгудек бўлиб аранг етиб келдим-у ўзимни тўшакка ташладим.

...Кўзимни очганимда тонг отган, деразадан тушиб турган узун шуъла полдан эшикка томон чўзилганди. Оғриқ йўқ, фақат қўлларим қаттиқ боғлаб ташланганидан увишганди.

Кейин ойим келди. Мендан ортиқча бирон нарса сўрамади. Мен ойимнинг феълини билардим. У ўзим ёрilmagunча тоқат қилиб тура олар, кейин сўзларимни бўлмай жимгина эшитар, шундан сўнггина бирон нима дер эди.

— Ишхонангдан кўнғироқ қилишиди. Сени касалхонада дедим.

- Ким сўради?
 - Бир аёл. Ислим Ҳафизахон экан. Кўринмаганингта хавотир бўлишибди-да!
 - Ҳа... Бошқа ҳеч ким сўрамадими?
 - Йўқ.
- Ойим кетди. Кейин... Музаффар Илҳом келди. Йўлакда уни кўришим билан ортимга бурилиб кетдим. Чунки уни кўришим билан вужудимда муз ўрмалайдиган бўлиб қолган эди. Нима қилай? Ахир қийналишни истамасдим.

- Кечки пайт акам кирди.
- Хўш, ваҳима, ишлар қалай?
 - Соатига қараб томир уришимни текшира бошлади.
 - Дуруст. Кечаси додламадингми?
 - Йўқ.
 - Яхши, тоқатли экансан. Кўплар оғриқча чидолмай додлашади.
 - Ўрнидан туриб хонада у ёқ-бу ёққа юра бошлади.
 - Қани, энди ҳақиқий Мавлонова бўлиб менга ростини айт-чи, анави йигит бу ерда нима қилиб юрибди?
 - Ким?
 - Кимлигини сендан сўраш керак. Ана, ўтирибди пастда. Жингалаксоч йигит. Тунов куни маҳалламизнинг бошида ҳам кўрувдим уни. Бекоргамасдир, а? Нега индамайсан?
 - Мен... уни танимайман...
 - Ростдан-а? Ҳай, майли... Уйга борарсан-ку...
 - Мен ҳиқиллай кетдим.
 - Билиб кўй, агар кўча-кўйда ҳалигиндай юришларингни билсам...
 - Кейин қадамларини катта-катта ташлаб чиқиб кетди.
 - Эртаси куни яна ойим келди. Деразани очаркан:
 - Тавба, анави йигитни қаерда кўрувдим-а? — деб юборди. — Нега дераза тагидан кетмайди? Бир соатдан бери ўтирибди.

Ойим кетгач, тушга яқин ҳамшира менга тўрт букланган қоғоз келтириди. Қоғоз қатларини қўлларим қовушмай оча бошладим. Бу — Музаффар Илҳомдан бўлиши мумкин эди. Ўқидим:

*Пушаймонга чўкиб бормоқда
Қадаҳ тилган қонли юрагим.
Тушунмади сени бу дилим,
Кечир мени, тиканли гулим.*

- Бирон нарса ёзиб бермайсизми? Ё айтиб турсангиз, ўзим ёзиб бераман, — деди ҳамшира.

- Йўғ-а, ўзим ёзаман.
- Ўйланиб қолдим. Нима дей? Назаримда биттага сўз кам, иккитаси ортиқча эди. Ручкани бесўнақай ушлаб шеър тагига қийшиқ ҳарфларда “Кечирдим” деб ёздим. Эртаси яна акам кирди.

- Ёмон йигитга ўҳшамайди, — деди деразадан қараб.
- Индамадим. Бирон нима десам, акам яна савол ёғдириши тайин эди.
- Гаплашиб кўрдим. Оиламизга жуда ҳам муносаб эмас экан-у, лекин ёмон-мас. Хуллас, келишиб олдик.

- Нимани?
- Мана буни энди сенинг билишинг шарт эмас. Хўпми?
- Уларнинг нимага келишганларини беш кундан кейин билдим.
- Уйимизга Музаффар Илҳомнинг совчилари кириб келишди. Ҳаммасини тан олишимга тўғри келди. Тўғри, мен Музаффар Илҳом билан бирга ишлайман. Тўғри, у билан учрашганман. Тўғри, кўлимни ҳам учрашувимизда кесиб олганман. Акамнинг назарида “Розимисан?” деган саволга ҳожат ҳам йўқ эди. Хуллас, уч кун ичida ҳаммаси ҳал бўлди-кўйди. Ишхонага патир-у майиз, ҳолваларни олиб бордим.

- Кимга? — деб сўрашди патирни еб бўлиб.
- Қачон? — деб сўрашди ҳолвани сўриб бўлиб.
- “Музаффар Илҳомга, бир ойдан кейин”.
- Аёллар бир-бирларига қараб қўйиши.
- Майли, қўша қаринг, — деди Ҳафиза опа бўғзидаги патирни аранг ютиб. Бу биринчи томчи эди. Кетидан яна биттама-битта заҳарли томчилар туша бошлади. Қўшни бўлимдаги қизлар ёнимдан шивирлашиб ўтишиди. Гаплари орасида “Нилуфар...” деган сўзни эшитиб қолдим. Бизга келиб юрган талаба қизлар менга қизиқсиниб қарашди. “Музаффар аканинг танлагани” шу экан-да!

“Тешик қулоқ эшитади” деган гап рост экан. Менга йигитларнинг сўзлари ҳам етиб келди. “Музаффар бу қушчани қандай илинтиридийкан?”

— Эътибор қилма, — деди Музаффар Илҳом.

Мен-ку бу каби майда-чуйда гаплардан юқори бўла олишим мумкин-а, лекин бу майда фийбатлар заҳарли томчи мисол бирин-кетин чакиллаб томаверар, тоқатимни тоқ қилиб юборарди. Нима қилай? Ахир бу миш-мишларнинг эгаси ўз ёнимда эди-ку! Гёй асал тўла кўзасининг қоқ ўртасидан тахири чиқиб қолиб, энди нима қилишни билмай турган одам мисоли ҳайрон эдим. Мен қизларнинг наздида Музаффар Илҳомни енгган, голиба эдим. Аслида эса, голиб у эди. Унинг боқишиларида, ҳатто мени сенсирашида ҳам аллақандай фурур пайдо бўлганди. Аммо бу — мен ўйлаган, мен кутган фурур эмас, балки худбинларча фурур эди. У ниҳоят, мени енгган, бўйсундирган эди. Унинг қилиқлари ҳам совуқлашган, кўллари муздек, ҳатто сўзларидан ҳам яхнинг нафаси келарди. Нимадир қилиш керак эди. Аммо нима? Билол-масдим.

— Энди нима қилмоқчисан? — сўради акам.

Нима қилардим?

— Аспирантурага кираман. Илмий иш қиласман.

— Шунақа де? Ҳозир ноябрь ойи. Аспирантурага қабул аллақачон тугаган. Ҳатто сирткни бўлимга ҳам. Фақат тадқиқотчи бўлишинг мумкин, холос. Агар лойиқ кўришса.

— Лойиқ кўришади.

— Майли, уриниб кўр.

Бир вақтлар ёзган мақолаларим, диплом ишимнинг қўлёзмаларини қидирдим. Ҳаммаси уйда, китоб жавонининг пастида, картон қутиларда ётарди. Мана, “19-аср 50-йиллар адабиётига шарҳ”. Баҳоси — “аъло”. “Анбар отин ижоди. “Фалсафаи сиёҳон” асарининг қисқа таҳлили”. Баҳоси — “аъло”. “Муқимиий лирикаси. “Ҳажр ила...” ғазалининг таҳлили”. Баҳоси — “аъло”.

Миядан ҳамма майда-чуйдаларни қувиб ишга ўтиредим. Уч қундан сўнг реферат тайёр бўлди. Воҳидовни излаб бордим. У мени қўриб аввалига саломимга алик олиб, ҳол сўраб тураверди. Мен мақсаддага ўтгач, ҳайрон бўлди.

— Қизим, олти ой аввал аспирантурада қолинг, десам, унамагандингиз. Энди бўлса, қабул тугагандга келяпсиз. Тинчликми?

— Янглиштан эканман, домла.

— Шундай денг? Майли, “Ҳечдан кўра кеч”... Ҳўп, энди нима қиласми? Тадқиқотчилик қиласиз, холос. Бошқа йўли йўқ. Рефератнингизни илмий кенгаш кўради, тавсия қиласа, ҳўп. Дарвоқе, тавсия қиласа ҳам керак. Ишларингиз аъло эди... Қайси мавзуда ишламоқчисиз? Е мавзу танлашга маслаҳат керакми?

Мен унинг олдига рефератимни қўйдим.

Воҳидов қошлиарини хиёл керди. Кейин рефератни қўлига олди.

— Муқимиий ижоди? Ҳа... Майли, тўрт қундан кейин кенгаш. Унгача қўриб чиқаман. Яна баъзи бирорвларга ҳам кўрсатиб боқай-чи? Аслида ўрта асрлардан иш қилсангиз ҳам бўларди, қизим. Тилни билсангиз, эски ёзувлардан хабарингиз бор. А?

— Домла...

— Ҳа, майли, Муқимиийни танлаганингизнинг ҳам бир сабаби бордир.

Хуллас, мен йўлимни танлаган эдим. Бир жиҳатдан шундай қилганим ҳам маъкул эди.

Фақат бир нарсага ҳайрон эдим. Бу ёғини нима қиласман?

Тўй куни яқинлашиб келарди. Мен оқимга тушиб қолиб тақдирга тан берган одам мисол сармоларимни тикириар, ўзимнинг майда-чуйда, келинчакларга хос кам-кўстларимни тўлдириар, баъзан қийналиб бўлса-да, Музаффар Илҳом билан учрашгани чиқиб келардим. Аммо бу учрашувлар мени кувонтирмас, бильакс, азоблар эди. Вужудимдан совқотиш ҳисси кетмас, унинг кўли бехос тегиб кетса ҳам қалтириар эдим. Муҳаббатига эришиш чексиз баҳт туйғусини олиб келиши керак эди. Менда эса, йўқ. Иложи борича, Музаффар Илҳомни камроқ кўрсам, дердим. Кўпинча, мени ваҳм босарди. “Тўйдан кейин нима бўлади?” Ҳозир-ку, уни камроқ кўришнинг иложи бор. Кейин эса уни ҳар куни кўриш, ҳар соатда гапларини эштишига мажбурман. Ўнда нима қиласман?

Шундай қилиб, тўйга тўрт кун қолди. Аммаларим кўчларимни Музаффар Илҳомнинг шаҳар чеккасидан олган икки хонали уйига олиб бориб, ясатиб келишган, сармоларни қариндош хотинлар кўрсинг утун чиройли қилиб таҳлашар эди.

Кеннойим тайёр бўлган никоҳ кўйлагимни олиб келди. Оппоқ шойи этакларни шилдиратиб, менга кийгазиб кўрмоқчи бўлди. Яланғоч баданимга шойи муз-

дек бўлиб тегди-ю, сескантириб юборди. Гўё баданимдан илоннинг танаси сирғалиб ўтгандек бўлди.

— Сизга нима бўлди?

— Илон...

— Қани?

— Қўйлакда...

— Йўғ-э?

Мен рангим девор, кўрпачага ўтириб қолдим. Кеннойим шошиб қўйлакнинг ўнгу терсини текшира бошлади. Кейин менга ҳайрон бўлиб қаради.

— Сизга нима бўляпти, Мағрура? Нега ваҳима бўлиб қолдингиз?

— Билмадим... Кеннойи, кўрқиб кетяпман...

— Нимадан?

— Музаффар Илҳомдан.

— Нега?

— Билмадим...

Охири чидолмадим. Ойимга бор гапни айтдим. Ойим ўйланиб қолди.

— Нега ҳаммасини бошидаёқ очиқ айтмадинг? Ё қийналмайман, деб ўйлабмидинг? А?

— Уни яхши кўрардим...

— Ҳозир-чи?

— Ҳозир ҳам...

— Унда ҳаммасидан кўз юмиб юборолмайсанми? Ахир, аёллар нималарни ке-чиришмаган, қизим?

— Кийналиб кетяпман, ойижон! Уни кўришнинг ўзи менга азоб! Тўйдан кейин нима қиласман? У билан... Йўқ! Худди вужудимдан илон ўрмалаётгандек бўляпти... Мени қутқаринг, ойи!

— Нима қиласай? Айт!

— Уни кўришни ҳам ҳоҳламайман!

— Нима деётганингни биласанми? Тўйга тўрт кун қолди. Аканг бутун маҳалла-ни наҳорга ошга айтиб қўйган. Узоқ-яқин қариндошларнинг тўйга яраша ҳозирликлари бор. Куда томонга нима дейман?

— Ойи, мен-чи?

— Музаффар-чи?

Йиғлаб юбордим.

Азоблар ичida яна бир кун ўтди. Мени ҳамон ваҳима босарди. Ҳеч нима емай-ичмай қўйдим. Ҳеч нарса ёқмасди. Уззукун хонамда мук тушиб ётардим. Мен орзумда кўрмоқчи бўлганим қаср тўлқин ювиг кетган кум қўргон янглиг нурабарди.

Эсимда, кеч кузнинг қуёши фавқулодда илиқлик билан нур сочаётган пайт эди. Мен айвонда, бувимнинг эски диванида оёқларимни узун этакларим тагига яшириб ўтирадим. Йичкарида келин саломнинг бўғчаларини тугаётган аммам ишини тугатиб ёнимга чиқиб ўтирди.

— Мағрурагинам, намунча озиб кетдинг, болам?

Индамай халатимнинг боғичларини ўйнай бошладим. Аммам узун уф тортди.

— Одам нима қилишга ҳайрон, — деди у ўз-ўзига сўзлангандек. — Қудалар ҳам бундоқ дурустроқ гап қилишмади-еъ... Ирим-сиримлар тошкентча бўладими ё фаргоначами? У ерда бошқа одат, бу ерда бошқа. Биз келин салом қилсаг-у, улар жи-и-им қўлини бурнига тикиб тураверса...

Кулгим қистади. “Кимда нима ташвиш” деганлари шумикин?

— Ишқилиб, куёв билан гапинглар бир жойдан чиқса бўлди-да, болам. Биз кампирлар келишиб кетаверамиз.

Аммагинам! Ахир, худди шу сиз айтганингиз бўлмаяпти-ку! Куёв билан гапимиз бир жойдан чиқмаяпти-ку! Нима қиласай? Кечикдимми?

Йўқ! Ҳали ҳам кеч эмас. Музаффар Илҳомнинг олдига бориш керак. Кўзларига тик қараб, очиқасига гаплашиш керак. Кўнглида нима, билиш керак. Агар... Нима бўлибди? Аввал қийин бўлади, кейин секин-секин кўникасан. Агар... Янглишаётган бўлсам-чи? Кошкийди... Мен ҳаммасидан кўзимни юмиб юбораман. Азобларимдан ҳам, унинг саргузашларидан ҳам, барча ўтган гаплардан, кўзимни чирт юраман. Ойим тўғри айтади. Аёл нималарни кечирмаган?

Ўрнимдан тура солиб хонамга отилдим. Шоша-пиша кийиниб, ҳовлига тушдим. Айвон пастида эндиғина келган бўлса керак, кўча кийимида акам турарди. Ёнида ойим билан аммам. Бир нималарни шивирлашишпти.

Мени кўриб жимиб қолишиди.

— Қаёқقا кетяпсан? — сўради ойим.

— Ҳозир келаман.

Йўлакка отилдим. Бу троллейбус мунча секин юрмаса?

Нашриётга етиб келганимда иш куни поёнига етиб қолган, йўлак бўшай бошлиғанди. Музaffer Илҳомнинг хонаси йўлакнинг қоқ ўртасида эди. Ҳеч қаёққа алангламай, тўппа-тўғри бориб, шахт билан эшикни очдим. Хонада Музaffer Илҳом йўқ, биргина кекса мудир қофозларини таҳларди. Мени кўриб кўзойнагини кўлларига олди.

— Музaffer Илҳом йўқ-ку, Магрурахон. Икки соат бўлди, Фарғонага кетди.

— Фарғонага?

— Хабарингиз йўқми ҳали? — мудир таажжуб билан мени бошдан-оёқ кузатиб чиқди. — Унинг отаси қазо қилди-ку.

Турган жойимга михландим-қолдим. Мудир менга яна бир нималар деди. Тушунмадим.

Судралиб уйга қайтдим. Уйда мени мен аллақачон билган ўша хабар кутарди. Музaffer Илҳомнинг ўзи акамга келиб айтганмиш. Энди тўйнинг яқин ўртада бўлиши даргумон эди.

Тўй кейин ҳам бўлмади. Сиз қумни сиқимлаб кўрганмисиз? Менинг орзула-рим ҳам бармоқларим орасидан қум мисол тўқилиб тушди...

* * *

Кеча бошлаган ёмғир ҳамон эзилади. Ҳовли юзаси ҳалқоб, акацияларнинг бужур таналари хўл, ўртадаги гулзор ўрни чирик хазонлар-у, улар орасида бўртиб ётган қуп-қуруқ гул поялари... Деразадан ташқарига кўз ташлаганча хаёлга бериламан:

— Дил оғриғига энг яхши даво — вақт, деб бежиз айтишмаган экан, йиллар ўтиши билан ҳаётим яна изга тушгандай эди. Лекин... Ҳа, ҳаёт ҳам гоҳ офтобли, гоҳ чақмоқли, гоҳ ёмғирли лаҳзалар ичра ўтаркан.

Шарфимга маҳкамроқ ўрандим. Атроф жим-жит. Ташқаридан ёмғирнинг шитирлаши-ю, билагимдаги соатнинг чиқиллаши эшишилади, холос.

Дарслар аллақачон тугаган, Назира опа йўқ, Хуршид aka ва Бахтиёр кенгаш мажлисида, унинг навбатдаги китобчаси муҳокамасида.

Мен ҳам кетсам бўларди. Ёмғирнинг тинишидан умид йўқ.

— Яна токчадамисиз, Мағрура?

Тавба, бу Садриддин менинг одатимни қаердан билади, а? Эшик ёпиқ эди, қандай кира қолди?

Садриддин пардани бир чеккага сурib менга қаради.

— Токчада қизиқроқми, дейман?

— Буни токчада ўтирган одам билади.

— Шундай дент?

Садриддин бир сакраб токчага чиқди-да, рўпарамга чордона қурди.

— Қалай? — деди кейин.

— Зўр!

У озғин бўйинни чўзиб ҳовлини кузата бошлади.

— Ҳақиқатан ҳам ҳовли бошқача кўринаркан бу ердан. Ҳаммаёқ ҳалқоб, хўл...

Нимаси томоша қилишлик? Баҳор бўлса бошқа гап эди. Ҳар ҳолда кўз яйрайди.

— Баҳоргача шуниси ҳам яраб тураверади.

Садриддин кулиб юборди. Унинг яйраб кулишини биринчи бор кўришим. Шу топда у тамом бошқача бўлиб кетди. Кўзлари худди ёш боланикidek чарақлаб, озғин юзларида кулгичлар ўйнади. Рўпарамда шалпангқулоқ, пешонаси устидаги бир тутам соchlари қошларини тўсган ёқимтойгина йигит ўтиради.

— Борига шукур денг, — деди у кула-кула. — Шукур қилиш яхши. Фақат одамзод доимо шукур қиласвермайди-да!

Оҳирги сўзларни у жиддий тортиб гапирди.

— Курсимида Матлуба деган бир қиз бор эди. Шу Матлуба деразадан қарашни яхши кўрарди. Биз ётоқхонада тўққизинчи қаватда турардик. Тўққизинчи қаватнинг деразасидан нима кўриниши мумкин? Фақат осмон. Матлуба деразасининг олдидаги столга чиқиб олиб осмонни томоша қилиб ўтиради.

— Нега энди столга чиқиб?

— Нима қилсан? Ҳозирги биноларда токча йўқ, курси пастлик қилади, стол кулагай-да!

— Кейин-чи?

— Нима “кейин”?

— Матлубага нима қилди?

— Ҳеч нима. Ўқиши битирди. Кетди. Бошқа кўрмадим. Балки эрга теккандир, болаларини эргаштириб юргандир.

Садриддин кулимсираб менга қаради.

— Балки ҳозир ҳам токчада ўтиргандир.

Кулиб юбордим. Менга Садриддин кўшилди.

— Кайфият зўр-у!

Иккимиз ялт этиб қарадик. Остонада қоровул чол турарди.

— Токча қалай? — деди у кўзларини ола-кула қилиб.

— Зўр! — жавоб қилди Садриддин.

— Курсидан яхшими? Ё ҳар қалай курси дурустми?

Юзимга олов теккандай бўлди. Сакраб токчадан тушдим. Кетимдан Садриддин сакради.

— Кўйсангиз-чи? — Садриддин қип-қизариб кетди. — Қаерда ўтиришимиз билан нима ишингиз бор?

— Сен билан-ку ишим йўғ-а...

У ёғини эшитмадим. Хонадан чиқиб кетдим. Пальтомни йўл-йўлакай эгнимга илдим-у, тумгалирни қадашга сабрим чидамай, кўчага отилдим.

Шу заҳоти изифирин юз-кўзларимни чақиб олди. Кўлқопимни қолдириб чиқибман. Соябон ҳам йўқ. Орқага қайтишни истамасдим. Бошяланг кетавердим.

Ортимдан Садриддин қувиб етди. У ҳам бошяланг, қип-қизил шарфи бўйнида узун-қисқа бўлиб осилиб ётарди. Кўлида соябоним билан кўлқопларим.

— Мағрура, нима бўлди, чақирсам ҳам эшитмайсиз-а?

Жимгина кўлқопларимни олиб кия бошладим. Садриддин соябонимни ёйиб бошим узра тутди.

— Қоровулдан хафа бўлдингизми? — деди у. — Қўяверинг, нима деса деяверсин. Истеъфодаги зиёли! “Нега курсида ўтирмайсан”миш! Ха-ха-ха!

Мен ҳам кулиб юбордим. Бир пайт Садриддин кўлимдан ушлаб бир четга тортди. Чунки орқадан машина келарди. Оқ “Нексия” йўлдаги халқобдан астасекинлик билан ўта бошлади. Ёнимизга келганда тўсатдан тезлаб кетди. Рулда Хуршид ака ўтиради.

* * *

— Ҳайронман, кенгашга четдан шунча одам чақиришнинг нима кераги бор экан? Ҳаммаси ўқиб чиққунча вақт ўтади, холос. Шу тўрт ой ичидаги яна битта китобчанинг материалини тўплаб олса бўларди.

— Тўплаб олавермайсизми?

— Э, кўл борашибди? Муҳокама бўлмагунча ишга ўтиrolмайман мен.

Бахтиёр билан метро бекати ёнида кўришиб қолгандик. Энди у йўл-йўлакай кечаги муҳокама тафсилотларини гапириб келарди. Дарс бошланишига эрта, биз бемалол, шошилмасдан келардик.

Ёмғир тинган, ҳавода чирик ҳазонлар ҳиди анқир, булутларнинг бир чети йиртилиб, осмон ранги кўрина бошлаган эди.

— Хуршид ака мени анча ҳимоя қўйди. Яхши одам-да... Ҳайронман, шундай одам ҳалигача ёлғиз яшаса! Аёлларнинг кўзи қаерда ўзи?

“Хуршид ака-чи? — истеъзо билан ўладим мен. — Унинг кўзи қаерда?”

Фойеда қоровул чол мени ўқрайиб кутиб олди. Кечаги воқеа эсимга тушиб кулиб юборай дедим.

Танаффусда Хуршид аканинг хонаси ёнидан ўтаётуб у ердан қаттиқ-қаттиқ овозлар чиқаётганини эшитиб қолдим. Кимдир жаҳл билан гапиради. Унга жавобан Садриддин нимадир деди. Охирида Хуршид аканинг босиқ овози келди. Кейин яна бояги жаҳлдор овоз... Бу — қоровул чолнинг товуши эди.

Сал ўтмай эшик зарб билан очилди. Йўлакка аввал қоровулнинг овози учиги чиқди. Сўнг ўзи кўринди.

— Буни Университет деб қўйибди. Масхараҳона эмас! Ёш авлодга тарбия берувчиларнинг ҳоли шу бўлгандан кейин... — деярди у.

Мен тезгина кафедра хонасига кириб олдим. Чол Хуршид аканинг олдига жанжал қилиб киргани аниқ эди.

Йўлакда нималар бўлаётганини тасаввур қилиб кўрдим. Қоровул кета-кеттунча гапириниб кетади. Гулмира пиқиллаб кулади. Талабалар елка қисишиади. Садриддин бечора қип-қизариб тураверади. Фақат Хуршид ака... Нима деб ўйладийкин? У кеча ҳам бизни кўчада, битта соябон остида турганимизни кўриб қолган эди.

Садриддин менинг қўлимдан ушлаб четга тортганини ҳам, турган гапки, кўрган.
Энди нима деб ўйлади?

* * *

- Сенга нима?

- Вой-бўй... Сўрадим-да... Садриддин...

- Нима Садриддин?

- Ёқадими сенга?

- Эсинг жойидами?

Мен беихтиёр ўриндиқ тепасига осилиб тушган наъматак шохларини тортқилай бошладим. Гулмира юзимга диққат билан тикилди. Кейин енгил тин олди.

- Хайрият-эй... Унда нега ўзингни гап-сўзга қўйиб юрибсан?

- Нима дединг?

- Коровулнинг жанжалидан кейин... Ҳар қандоқ одам ҳам бир гап бўлгандир ахир, деб ўйлади-да!

- Сен ҳам шундай деб ўйладингми?

- Қўйсанг-чи... Уртоғингман, ахир... Фақат...

Гулмира бир зум жим қолди. Секингина юзимга қараб қўйди.

- Садриддин яхши кўради сени. Сезасанми?

- Бас қил... Истамайман сезишни!

- Лекин факультетда кўпчилик сезади-да буни! Шунинг учун қоровулнинг жанжали бошқача таъсир қилди, шекилли. Чол нима деган, билмадим, лекин... Ҳатто Хуршид aka ҳам анчагача асабийлашиб юрди! Ахир, унга унча-мунча нарса таъсир қўлмайди-да!

Бутун вужудимда титроқ туриб, кўзларимдан ёш қайнаб чиқа бошлади.

- Ҳеч нарса бўлгани йўқ эди... Биз фақат гаплашиб ўтирувдик, холос. Ҳеч гап бўлгани йўқ! Бўлгани йўқ! Эй, Худойим-е, тўйиб кетдим ҳаммасидан, мени тинч қўй! Ҳеч ким мени тушунмайди. Тушунишни истамайди. Нега бунақаман? Ўзимни ўзим тушунмайман. Чарчадим Гулмир, чарчадим...

Мен ўқсиб-ўқсиб, вужудим титраб-қақшаб йиғлардим. Ичимдаги фарёд сел каби тошиб келарди, аммо бу селнинг бўғзимдан чиқиши тобора қийинлашиб, нафасим тиқилиб, кўз олдим қоронгулаша бошлади. Охири томогим гиппа бўғилиб, нафасим ичимга тушиб кетди...

* * *

Кўз олдим қоп-қоронги, зулмат ичра элас-элас акамнинг овози эшитилди:

- Тер чиқяпти. Йиситма энди тушади.

- Хайрият!

Бу – кеннойимнинг товуши эди.

“Нима бўлди? – ўйлай бошладим мен, - бетобманми? Қачон уйга келдим?
Қандай келдим?”

- Қимирлади...

- Ҳали уйғонгани йўқ. Бор, болаларга қара, шовқин солишимасин.

“Қандай бетоб бўлиб қолдим? – яна ўйлай бошладим мен, - Гулмира билан наъматак тагида ўтирувдик. Анави гапни эшитдим. Йиғладим... Кейин-чи?”

Минг уринмай, эслай олмадим. Гүё хотирамнинг худди шу ерини бирор ўйиб олгандай, миям бўй-бўй, танам ҳолсиз эди. Ич-ичимдан кучли хўрсиниқ келди. Уйкуга кетдим...

... Кўзимни очганимда тонг отган, дарпардаси четга тортиб қўйилган деразадан ичкарига кўш нури ёғиларди. Палосда Шавкатжон ўйнаб ўтирас, кеннойим каравот ёнида елим шприцга дори тортарди.

Руҳим анча енгил, чор-атрофни идрок қиласадим. Қимирлаганимни сезиб, кеннойим ўтирилди.

- Уйғондингизми? Хайрият...

- Мени ким олиб келди?

- Гулмира.

- Қўп иситмаладимми?

- Уч кун. Келинг, уколингизни қилиб қўяй...

Уколдан сўнг кеннойим олиб келган ёвғон маставани ичиб уйга толдим. Қандай қилиб бир зумда бетобланиб қолганимни тушунолмасдим. Яна қовоқларим оғирлаша бошлади...

Энди ўнгим ва тушим қоришиб кетди. Ажаб, бу қандай ҳол эканини англаб етолмасдим. Мен бир вақтнинг ўзида ҳам туш кўрар, ҳам ўнгимни идрок этардим.

Ўнгимда акам тепамга келганини сездим. “Ўйғондими ҳеч?” - деб сўради. “Ўйғонди, овқатланди”, - жавоб берди кеннойим. “Дозани камайтири”, - буюрди акам. “Бир кубикка туширсам бўладими?” “Бўлади”.

Кейин овозлар узоқлашиб, англаб бўлмас шовқинга айланди. Шовқин машина фиддиракларининг кўлмақдан кечиб ўтганда чиқарган товушининг худди ўзи эди. “Машинами? – ўйладим мен, - қаердан келиб қолди? Ахир бу менинг тушимку!” Бир вақт Хуршид ака менга қарамай, машинасини шитоб билан ҳайдаб ўтиб кетди...

Мен йиглаб юбордим.

- Йиглайти... Э, худо, нима бўлди?
- Жим!
- Даврон aka! Қаранг, у кимни чақирияпти?
- Нима дединг?

... Оҳ, уйқу бирам яхшики... Мен яна туш кўра бошладим.

Дадам... Дадам мени – тўрт яшар қизалоқни кўлларида кўтариб кета бошлади. Қизалоқ унинг кўлида тешиккулча еб борарди. Тўсатдан дадамнинг кўлида кетаётганимдан ўнгайсизлана бошладим. Мен – катта қиз, дадасининг кўлида... Дадам эса яккаш: “Ёлғиз қийналмадингми, болам? Йўл олис...” - дерди.

Бир вақт яна олислардан акамнинг овози эшитилди:

- Лола, қизим, амманг ухляяпти. Чиқ бу ердан!
- Вуй, шунақа ҳам узоқ ухлайдиларми?

Овозлар узоқлашиб, эштилмай қолди. “Ухляяпман, - ўйладим мен, - ухляяпман...”

Энди тушларим ҳам бир-бирига уланиб, биринчиси кетидан иккинчиси кела бошлади. Кейинги тушларимга узуқ-юлуқ хотираларим кирди. Аммо хотираларимнинг бу узуқ бўлаклари ҳайратланарли тарзда бир-бирига боғланиб келарди.

Тушимга Музаффар Илҳом кирди. Кўлларимга боғланган оқ ипак рўмолни еча бошлади. Кафтларимдан иссиқ қон томарди...

Шу пайт ёнимда онам пайдо бўлди. Кафтларимга ачиштириб йод суркади. “Яраларинг мунча кўп, болам?” - деди йиглаб.

Онамнинг йиглаган товуши оралаб кеннойимнинг овозини эшитдим:

- Алаҳляяпти...

Унга жавобан акамнинг товуши келди:

- Иўқ, босинқирияпти. Бу иситма эмас, кучли руҳий чарчоқ натижаси...

Ўтиб кетади...

Чалқанчасига узоқ ётиб қолган бўлсам керак, энсам оғрий бошлади. Ёнбошламоқчи эдим, кучим етмади. Шу онда кимдир менинг ёстиғимни тўғрилади. Кейин елкаларимдан ушлаб, ўнг ёнимга афдарди. Бирам енгил тортдимки...

Тушимда ёмғирнинг щитирлаганини эшитдим. Ва тамоман ихтиёrsиз, шивирлай бошладим: “Япроқлар чиртиллаб узилиб тушаётган салқин куз оқшоми. Кимсасиз кекса боғ гўё ўтган умрнинг дардларидан чарчаган мисол жим. Фақат зъяфар япроқлар товуши ҳукмрон: “чирт-чирт”... Бу жумлаларни қайси китобдан ўқигандим? Эслолмадим. Гўё хотирлашим жуда зарурдай, зўр бериб ўйлай бошладим. Ва... ўйғониб кетдим.

Ташқарида ҳақиқатан ҳам ёмғир ёғар эди. Деразалар юм-юм йиглаган мисол, ёмғир сувларини юзидан жимгина оқизиб туширас, тарновдан тушаётган сув ҳовли сахнiga тарақлаб уриларди.

Мен ёнбошлаганча дeraзадан қорайиб кўринаётган ишкомларга қараб ётардим. Бош томонимда ёниқ турган тунчироқдан юзимга иссиқ нур тушар эди.

Айвондаги соат бўғилиб беш марта занг урди...

* * *

*Жудолик устида
Жудодан бошқа,
Менда не қолди
Худодан бошқа?*

Шукур Жаббор

Бундан беш йил аввал ҳам худди шунга ўхшаш, айвондаги соат беш марта

занг урган эди. Ёник тунчироқдан юзга иссиқ нур тушар эди. Ойим ёнбошлаганча дeraзадан ҳовлига қараб ётарди. Кузнинг сўнгги кунлари...

Ойим бир ойдан бери тушакдан турмас эди.

- Умид кам, - деганди акам.

- Умид қилиш қийин, - дейишган эди ойимни кўрганлар.

Буни ўзим ҳам сезардим. Бечора кун сайин сўниб борарди. Ўзи ҳам аллақачон тақдирга тан берган, фақат менга қараган кўзларида армон филтиллар эди. Онагина! Менинг тўйимни кўрмаганидан йифларди. Менинг ҳамроҳсиз, ёлғиз қолаётганимдан хавотирда эди у!

Мен эса унинг бошида ўтирас, ичимни аlam кемирар эди. Не қилайки, уни кўйдирган мен эдим, балки умрининг неча йилини кесиб, қисқартиб юборган ҳам мен эдим. О, шу қадар худбин бўламанми?

Наҳот онамнинг орзу-ҳаваслари учун ён беролмадим? Кечиримли бўла олмадими? Нега? Ўтган ишдан кўзимни юмшиб юборишим мумкин эди-ку! Ойим айтган эди-ку! "Кўзингни юмшиб юбор!" — деб. "Аёл нималарни кечирмайди?" — деганди-ку! Ахир, унинг кимлигини билмасмидим? У қизларнинг мафтунлигидан маст, осон галабалардан боши айланниб қолган шуҳратпараст эди-ку! Билардим-ку! Ё унинг сўнгги пайтлардаги худбинона мағрурлиги аlam қилдими? Ё Нилюфарнинг олдида виждан қўйнадими? Нима бўлди?

Кейин-чи? Музаффар Илҳомни кечиролмаган эканман, нега онамга ёқсан совчилардан бирига "хўп" дея қолмадим? Ўзимга қарши боролмадимми?

О, отажон! Мен нега сизга ўҳшадим? Нега мағрут, тутган жойини кесадиган, йўлидан қайтмас бўлиб ўсадим? Ахир, мен ўғил бола эмасдим-ку!

Менинг худди мана шу феълим бугун онамни армон билан жўнатяпти...

Ойимнинг бошида ўтираканман, аламдан юрагим куяр эди.

Ойим ёнбошлаганча дeraзадан ҳовлига қараб ётарди. Кўксидан хирилдоқ нафас чиқар, бир ой ичида озиб, суяг-у томирлари бўртиб қолган қўллари кўрпа устига беҳол ташланган эди.

Онам кузнинг сўнгти тонгиди, айвондаги соат беш марта жаранглаб занг урган пайтда узилди.

Кейин... Кейин уйимизга одамлар йигилди. Мен кеннойим, аммаларим ёнида, ойимнинг бош томонида ўтирадим. Кўзларим қуруқ, овозим йўқ, ҳеч нимани идрок этолмасдим.

Фақат тўн кийиб, белини боғлаган акам, тоғаларим кириб келгандагина бир сескандим. Орқада келаётган катта поччам қолганларга қандайдир ишора қилди-ю, тоғаларим баравар эгилишиб, сариқ мато ёпилган кутини кўтаришибди. Ва дод-у фарёдга қарамай ҳовлидан олиб чиқишибди. Дарвоза ёнида сариқ мато ташланиб, мунсаг-у паранжи ёпилган тобут турарди. Кутини тезда тобутга қўйишибди-ю, елкалирига олиб орқаларига қарамай йўлга тушишибди.

Улар онамни олиб кетишар эди! Онам энди қайтмас бўлиб кетар эди!

Томогимдан фарёд отилиб чиқди. Нималар дедим, билмайман. Мени аёллар кўтаргудай бўлиб уйга олиб кириб, кўрпачага ётқизиб қўйишибди. Шу ётганча кўз ёшимга гарқ бўлдим. Ва аста-секин ухлаб қолдим...

Мен уйғонганимда қаердандир Куръон тиловати эшитиларди. Суралар ажиб оҳанг янглиғ юрагимни илитар эди. Мен ҳам беихтиёр унинг ортидан сураларни тақрорлай бошладим. Тақрорлаганим сари идроким тиниқлашар, қадим араб тилидаги оҳангдор жумлаларнинг мазмуни тобора ойдинлаша борарди-ю, мен уларни яна ва яна қайтарар эдим:

"Эй, Муҳаммад, биз сиздан аввал бирор одамзотга мангу ҳаёт берган эмасмиз. Сиз ўладиган-у, улар мангу қолувчиларми?"

Миямда нимадир «ярқ» этди. Ажаб, кўнглимга таскин кела бошлади. Яна шивирладим:

"Ҳар бир жон ўлимни тутувчиидир. Биз сизларни ёмонлик билан ҳам, яхшилик билан ҳам синаб, имтиҳон қўлтурмиз. Фақат бизгагина қайтариурсизлар". (1)

Ҳа, бу — инсонга хос қисмат эди. Ва ёзфиришга ҳақим йўқ эди. Бу — ҳаёт, яшащ керак эди!

Ўрнимдан туриб, ҳовлига тушдим. Қариндош аёллар бир-бирлари билан хўшлашар эди. Кузнинг сўнгти куни ҳам поёнига етиб борарди.

Мен ҳам, ниҳоят, таскин топиб, ўртанмай қўйдим. Энди буларнинг бари хотира эди...

1 "Куръони Карим", Анбиё сураси

* * *

Ишкомлар ораси ёриша бошлади. Ҳолсиз қўлимни узатиб, тунчироқни ўчирдим. Айвондаги соат бўғилиб олти марта занг урди.

Ажаб, тун қисқара бошлабдими? Ҳали эрта-ку! Ё менга шундай туюяптими?

Айвон поли аста гичирлади. Бу — кеннойим эди. Эшик очилиб, оёқ учидагонага кирди. Ўчиқ тунчироқни кўриб, ҳайронликда тўхтади. Кейин чироқнинг симларини ушлаб текшириб кўрди. Охири кафтини пешонамга теккизди. Сўнгра яна оёқ учидаги юриб чиқиб кетди.

Сал туриб ошхонада чироқ ёнди.

Мен енгилча хўрсиниб олиб, яна мудрай кетдим. Фақат акам тепамга келганда-гина кўзимни очдим.

Акам кийиниб олган, ишига жўнаш арафасида эди, чамаси.

— Ҳа, ваҳима, дурустмисан? — У кулимсираб томир уришини текшира бошлади.

— Тузук, — деди сўнг. — Энди сал қад ростлаб ўтиранг бўлади. Қоринни тўқлаб, кайфиятни яхши қилиб, а? Кечқурун кўришамиз.

Бир оздан кейин Лола-ю, Лайлолар мактабга кетишди. Мен иссиқ сутни ичиб, бир-икки бурда нон едим-у, иссиқ шарфимга ўраниб айвондаги диванга чиқиб олдим. Бир мунча вақт ўтиб Гулмира қўнғироқ қилди. Факультетда ишлар “о, кей”, қўнғилни тўқ қилиб соғайиб чиқаверар эмишман.

Ёмғир тинди. Яшаш бирам яхши, ҳаёт ширин эдики...

* * *

Кун пешиндан оққандаги Назира опа кириб келди. Мен Лола билан Лайлонинг орасида ўтириб мультфильм кўрардим.

— Ҳа, дуруст, анча тузуксан, — деди у мулозаматлар тугагач. — Гулмира айтса, ҳайрон бўлувдим. Соппа-соғ юрган одам тўсатдан...

— Биз ҳам ҳайрон бўлдик. Эрталаб бинойидек чиқиб кетиб, пешинда Гулмира машинада олиб келса... — деярди кеннойим ҳам ўз навбатида.

Кеннойим куймаланиб дастурхон ёзаркан, Назира опа факультетдаги янгиликларни бир-бир айти бошлади. Менинг ўрнимига Садриддин дарс бераётганмиш. Баҳтиёрни докторантурага тавсия қилишганмиш. Бердиқул Муродович ўғлини унаштирганмиш. Гулмира нимагадир (сабабини айтмабдимиш) Хуршид акадан даққи эшитиб роса үйлаганмиш. Яна бир бор шунга ўхашаш “айб иш” қилса, (тавба, шунчалик катта гуноҳмикин?) Хуршид ака ишдан ҳайдайдиган бўлганмиш. Назира опа орага тушгани ботинмаганмиш.

— Айтганча, яна бир гап.

Опа сумкасидан карнайча қилиб ўралган қофозларни олиб кафти билан текислади.

— Мақоланг Академия тўпламида босиладиган бўлиби. Тақризчилар яхши баҳо беришибди. Кеча Соҳибжон шундай деди. Мана бу мақолангнинг иккинчи нусхаси.

Мақолам қора сиёҳда чизилган турли белгиларга тўла, бир жойида мен беихтиёр ўтказиб юборган имло хатоси тўғрилаб қўйилган эди. Қофозларни варақлаганим сайин ҳайратим ошарди. Мен Хуршид аканинг дастхатини таниган эдим. Назира опа изоҳ бера бошлади.

— Буни Хуршидга Соҳибжон ўқишига берган экан. Нега ҳайрон бўласан? Хуршид эски ўзбек ёзувини ҳам, араб тилини ҳам яхши билади. Ё сен уни фольклордан бошқа нарсага қизиқмаган деб ўйлабмидинг?

— Йўғ-э, араб тилини билишини-ку, эшитганман-а...

— Ҳа, ахир, унинг отаси бахши бўлган-ку!

— Ростдан-а? Билмас эканман.

Назира опа менга ҳайрон бўлиб қаради.

— Хуршид Усмон бахши деган одамнинг ўғли. Эшитганмисан шундай бахши бўлганини?

— Йўқ.

— Ҳоди Зарифни биласанми?

— Ҳа.

— Ҳудди шу Ҳоди Зариф Гўрўғлининг тўртта достонини Комил бахшидан ёзиб олган. Комил бахши эса Усмон бахшининг отаси, Хуршиднинг бобоси бўлади. Хуршид бахши бўлмади-ю, лекин фольклорчи олим бўлди. Тавба, деканинглар кимлигини билмасаларинг...

* * *

*Нималар бўлмоқда, англай олмас дил,
Бу не синоатдир, ҳис этмас юрак,
Фақат билганим шул, бу ночор кўнгил—
Шунча оғир юкни кўттармоги шарт.*

Саодат Умрзоқова

Кечқурун навбатдаги уколни олиб мудраб ётардим. Кеннойимнинг айтишича, акам бугун кеч қайтарди. Касалхонасида янги бўлим очиларкан. Нишонлашармиш.

Бир вақт айвондаги қандайдир фивир-фивир мудроғимни қувиб юборди. Акам хуррам товушда бир нималар дер, кеннойим пастроқ овозда унга жавоб қиласади.

— Мағрура! — қичқирди акам бирдан. — Бу ёқса чиқ, ўғил бола!

— Кўйсангиз-чи! — жонсаракланди кеннойим. — Ҳозиргина укол олди. Ухласин, ахир!

— Ўйқуга бало борми? Мағрура! Чиқ деяпман!

— Секин! Болаларни уйготиб юборасиз. Э худо, ана Шавкатжон уйғонди...

Айвонга чиқиб келганимда стол устида шаффофф халта тўла мева-чева турар, акам ипак бўйинбогини бўшшатар эди. Мени кўриб юзларига кулги ёйилди.

— Қара, сен яхши кўрадиган ноклардан олиб келдим, — деди у.

Акамга яқинлашишим билан димогимга “гуп” этиб ичкилик ҳиди урилди.

— Ҳайрон бўлма, жигар, озгина татидим, холос. Хурсандчиликда “олмасак” бўлмайди...

— Нима бўлди ўзи?

— Катта воқеа бўлди. Кат-та! Рўпарапнгда “умуртқа шикастланишлари” бўлимининг мудири, тибиёт фанлари номзоди Даврон Мавлонов турибди... Қалай?

— Э, очиладиган бўлим шумиди?

— Шу эди! Ниҳоят, орзуларим ушалди! Германиядан ускуналар келди. Ҳаммаси янги! Янги бино, операция блоки, реанимация, ҳаммаси бор! Штатни ўзим ийғдим. Ажойиб одамларни тўпладим. Воҳ! Бунақаси ҳеч ерда йўқ! Энди қанчалаб илм қилса бўлади! Тадқиқотлар, операциялар!

— Шунча иш бўлибди-ю, биз билмасак...

— Атайлаб айтмовдим. Ўзим ҳам ишонмагандим. Охирги дақиқагача бу тушими, ўнгимми деб ўзимни чимчилаб турдим.

Акам кулиб юборди. Кейин бирдан жиддий тортди. Диванга чўкли. Кўзларида ҳасрат йилтиллади.

— Дадам ўттиз икки ёшида профессор Мавлонов эди. Бобомни ўттиз беш ёшида билмаган одам йўқ эди. Тунов кун сен тўғри гапирдинг. Мен ўттиз уч ёшга кирдим. Қачон ёқлайман? Билмайман. Тўғри, мен Тальят Мавлоновнинг неварасиман. Лекин Тальят Мавлонов бирорни мансабга миндиролмайди, кимнингдир боласини яхшироқ ишга жойлай олмайди... Тушуняпсанми мени?

Мана нима учун Даврон номдор клиникадан кетиб, қурувчиликнинг касалхонасида ишлаб юрибди. Тўғри, одамларни даволаш учун қаерда ишлашнинг аҳамияти ўйқ. Лекин одамларда шундай нуқтаи назар борки, энг яхши шифокорлар, албатта, номдор клиникада ишлайди... У ерда эса амаллаб ўқишини битириб олган отасининг эркатоий амал курсисида ўтирибди... Ҳақиқий ишлайдиганлар ўшаларга қарам... Худога шукур, одамлар мени шу кичкинагина касалхонага ҳам қидириб келишяпти... Демак, бекорга ўқимаган эканман...

— Нега бирдан сизларда шундай катта бўлим очилди?

— Бу энди янги раҳбаримизнинг саъй-ҳаракати. Бир куни мен билан бир чойнак чойни ўртага қўйиб икки соатча гаплашди. Мени қидириб келганлардан иккитасининг йўлакда кутиб ўтирганини кўриб қолган экан. Югурдаклар (биласанку, бунақалар ҳар жойда топилади) мени роса таърифлашган экан-да! Хуллас, гаплашдик. “Умуртқа шикастланишларини ўрганганман, илмий ишим мавзуси шу”, — дедим. “Бунақа касалларни маҳсус даволайдиган бўлим ҳеч қаерда йўқ”, — дедим. “Аввалги ишлаган жойимда бор эди, ёпиб юборишиди. Шунинг учун шу ерда юрибман”, — дедим. “Бунақа касаллар қурувчиликнинг орасида ҳам кўп учрайди”, — дедим. Бир тўп касаллик варақаларини кўрсатдим. Индамади. Бир-икки ҳафтадан кейин чақириб олиб: “Бўлимни ўзимиз очмаймизми”, — деб қолди. Қарасам, бутун ҳисоб-китобларини чиқариб ҳам қўйибди. Энди қурувчиларда пул бор, у қилиб-бу қилиб пул ундирибди-да! Бошида мени кўриб “Шу йигит бош бўладими, тажрибалироги йўқмиди?” — дейишибди. Йўқ, мана, ҳам маси бўлди.

Акам ҳоргин жилмайди.

— Эҳ, одамлар... Бўлим очиляпти, хурсандчилик... Бирор нима дейди? “Э, бу Мавлоновми? “Қайси Мавлонов?” “Талъат Мавлоновнинг невараси!” Қалай? Лекин... Келганларнинг орасида Фаламис ҳам бор экан...

— Фаламис?

— Э, — акам қўлини силтади. — Унинг исми йўқ, ҳамма Фаламис дейди... “Охири ниятингта етибсан-да, шуҳратпараст?” — деса... Мен — шуҳратпараст эканман...

— Қўйинг, ака, эътибор қилманг.

— Эҳ, жигарим-а... Лобар, — деди у ичкаридан чиқиб келган кеннойимга. — Манави меваларни чиройли идишга сол, бир ўтиришайлик, а? Ўғил бола, нима дейсан?

* * *

Бунча хурсанд кўзингдаги ёш...

Рауф Парфи

Беморлик — ҳаётнинг қадрини англатувчи бир синов. Кўзгу қаршисида туриб ўз аксимга тикилардим. Анча озибман, кийимларим эгнимда ҳалпиллааб қолибди...

Сочларимни ёйиб тарай бошладим. Ташқарида ҳаво очик, қуёш чараклаб туриди. Теваракдан ҳаёт нафаси уфуради.

Ҳаёт бирам ширинки...

Эртага ишга чиқаман. Юрагим ўз-ўзидан шошади... Кўзимдаги ёшми? Кўнглим тўла севинч...

...Факультетда мени яна бир хабар кутарди. Уни Гулмирадан эшитдим.

Мен пальтом қўлимда, ёзув столига суюниб турардим. Гулмира келган хатларни саралаб девордаги катакчаларга бўлинган қўлбola жавончага тахларди. Булар — талабаларга, факультет манзилига келган хатлар эди.

— Қоровул яна ўзича одоб-ахлоққа посбонлик қилмоқчи бўлибди-да. Маҳкамов силиққина қилиб ариза ёздириб, кетказиб юбориби, — деярди Гулмира, Бунга қувонишини ҳам билмасдим, ачинишни ҳам.

Хуллас, воқеа бундай бўлибди. Қоровул география факультетида ўқидиган бир йигит билан қизнинг панада кучоқлашиб туришганини кўриб қолиб шовқин солибди. Деканнинг олдига кириб жанжал қилибди. Бунинг овозаси Маҳкамовнинг қулогига етиб бориби. Холис одамлар кўп-да! Қиз унинг кенжаси экан...

— Йигитта нима бўлибди, билмадингми?

Гулмира пиқиллааб кулди.

— Маҳкамов ўзи бош бўлиб уларнинг тўйини қилиб берди.

— Мунча тез?

— Ҳайронман. Ўн кунда тўй қилиб юборди. Бир гап бордир-да! Тағин ким билади...

— Айтганча, нима айб иш қилувдинг? - сўрадим мен гапни бошқа ёқقا буриш учун. — Усмонов йиглатганиш сени...

— Ўлай агар, айбим нима, билмайман. Сенинг касал бўлиб қолганингни айттани кирувдим. Чап ёни билан турган эканми, тавба! “Мағрура касал бўлиб қолди. Ўрнига Садриддинни қўяверайми?” — деганимни биламан, бирданига тутоқиб кетди. Хонада жаҳл билан у ёқقا боради, бу ёқقا келади, бир пайт стулларни тепа бошлади. Мен бўлсам, кўрқанимдан бурчакка тиқилиб олиб дағ-дағ титрайман... Нега куласан, жинни?

— Тасавур қиляпман, — дедим кула-кула.

— Тавба, оғир-вазмин одам деб юрсам, яхшигина жаҳли бор экан. Энди кўришим. Тўсатдан “Яна шунақа ўйламай иш қилсанг, ҳайдайман”, — дейди. Яна сенсираб! Қайси ишимни айтяпти, ҳайронман. Ўрнингга Садриддинни қўйганимми? Соҳаларинг бир бўлгандан кейин, ўрнингни босса, нима қипти? Бошқа кимни қўяман? Хуршид акага титраб-қалтираб шуни айтувдим, газабдан кўкариб кетди. Хонадан қочиб чиқдим. Ҳайтовур, бироздан кейин Бердиқул Муродовичдан “Садриддин кираверсин”, деб айттириб юбориби... Кул, ўртоқ, кул! Бу ердагилар сени деб деканнинг жаҳлига учрасин-да, сен маза қилиб кул, хўпми?

Гулмира аччиқланганидан қўлларини силкиб ортига ўгирилиб олди. Кейин бирдан қўлимдан ушлади.

— Жим! — деди у. — Усмонов келяпти. Қадам товушини эшитяпсанми?

— Жонингни олиб қўйибди-да! — кулдим мен.

— Сенга ҳам бир жаҳлини тўксин, кўрамиз аҳволингни! — деди у ҳам.

Эшикда Хуршид ака кўринди.

— Мағрурахон, яхшимисиз, — деди у саломимга алик олгач. — Ишга тушдингизми?

— Ҳа, бугундан, — жавоб қилдим мен.

Хуршид ака “Яхши, соғ бўлинг”, — деб хонасига кириб кетди.

...Шу куни мени кўрган барчанинг юзида табассум кўрдим. Ҳамма мени кўрганидан хурсанд эди.

“Ҳаёт мунча чиройли!” — ўйладим мен.

* * *

— Мағрурахон шу кунларда бошқача бўлиб кетяптими?

Бердиқул Муродович шляпаси қўлида, кийим илгич ёнида илжайиб турарди.

— Баҳор келяпти-да, — Бахтиёр боласифат юзига ёйилган табассум билан менга қаради.

— Йўқ, бу бошқача баҳор, — яна илжайди Бердиқул Муродович. — Бу — умрнинг баҳори.

— Ёшлик — баҳор эмасми, ахир?

Ҳамма эшикка қаради. Остонада Садриддин турарди.

— Йўқ, бундай баҳор эллик ёшда ҳам келаверади. Фақат бир марта келади у!

— Шоир бўлиб кетибсизми?

Бу гал Бахтиёр ростмана кулиб юборди.

— Э, укам, бу ҳаётда шоирликка бало борми? Энди... бир кайфият туғилиб қолди-да!

Бердиқул Муродович чуқур хўрсинди:

— Майли, қизим, баҳтли бўлинг. Илойим, пешонаси ярқирагани насиб қилсин...

— Айтганингиз келсин, — деди боядан бери жим ўтирган Назира опа. — Фақат қизимизни уялтирунган!

— Йўғ-э, йўғ-э... — Бердиқул Муродович менга қараб ўнгайсизланиб илжайди.

Мен эса юзларим ловуллаб ўзимнинг доимги жойимда, диваннинг бурчагида ўтирадим.

Наҳот шу қадар ўзгардим? Хонада ёлғиз қолгач, бурчакдаги кўзгуга дикқат билан қарай бошладим.

Ё шим кийишни ташлаганим учун атрофдагилар кўзига бошқача кўриндимми?

Кўзгуда узун бинафшаранг кўйлақли, нозиккина, қўнғир соchlари елкаларидан тўкилиб, белига тушган, оппоқ юмaloқ юзларига кулгичлар из соглан қиз турарди. Бу — мен эдим. Шу билан бирга, бу — бегона қиз ҳам эди. Йўқ, бу ўша Мағрура эмасди!

Йўлакда, ўтган-кетганинг нигоҳларида, аудиториядаги талабаларимнинг қарашларида ҳам ўзгачаликни сезардим. Кайфиятим ҳам ўзгача, руҳим ҳам ўзгача. Аслида ҳаётим ўша-ўша эди. Уша-ўша дарслар, ўша-ўша одамлар, ўша-ўша... Хуллас, ҳеч нарса ўзгармаганди. Лекин нимадир бошқача эди. Нима? Билмадим.

Баъзан йўлакда, баъзан фойе ё деканатда Хуршид ақага дуч келиб қолсан, у шошиб саломимга алик оларди-ю, юзимга қарамай ўтиб кетарди. Мабодо ишим тушиб хонасига кириб қолсан ҳам кўзимга қарамай сўзимни эшитар, бир-икки оғиз жавоб билан кифояланар эди. Энди мен ҳам унинг қаршисида сўзимни йўқотиб турмас, руҳимда қандайдир хотиржамлик сезардим.

Шундай кунларнинг бирида...

* * *

Үйга келсан, Лола дарвоза олдида бир тўп тенгдошлари билан бир оёқда ҳаккалаб сакраб ўйнаяпти. Мени кўриб югуриб келди.

— Амма, үйга кирмай туринг, хўпми?

— Нега?

— Сизга совчи қелди. Узокдан!

Кулдим. Бу қақажоннинг совчининг нима эканлигига ақли етганини қаранг!

Кенновим билан йўл-йўлакай гаплашиб ичкаридан чиқиб келаётган иккита аёлга кўзим тушди-ю, кўчамиз бошига қараб югрдим. Мен учун совчиларнинг кўзига кўриниш, уларнинг синовчан қарашларига дош бериш қийин эди.

Қонқус кўпригининг бошида тўхтаб нафас ростладим. Бироздан сўнг бояги аёллар кўчамиздан чиқиб келишди. Сўзлаша-сўзлаша катта йўл томонга бурилиб

кетишиди. Бошларидағи гулдор рўмоллари уларнинг тошкентлик эмасликларини яққол билдириб турарди. Улар ким? Қаердан келишиди?

Бу ерда тургандан фойда йўқ. Кечки изғирин тура бошлади. Қўлларим совук қотди. Қалин жун кўлқопларимни кийдиму, уйга судралдим. Янгиликни эшишига тоқатим йўқ эди.

Уйда Лайло мени қовоғини солиб кутиб олди. Ҳар кунги эркалик йўқ, қўлларимга осилиб чуғурлаш йўқ, айвоннинг бурчагида туриб терсаяр эди. Мен чўнқайиб қучогимни очдим:

— Кел, Лайло!

Лайло қылт этмади.

Охири ўзим бориб уни қучоқладим. Шуни кутиб турган эканми, бечора, йифлаб юборди.

— Нима бўлди, асалим? Ким хафа қилди сени?

Қизалоқ индамас, ўксиниб йиғлар эди. Йиғлай-йиғлай чарчагач, ниҳоят, хўрси-ниб жимиди. Меҳмонхонага кириб-чиқиб, индамай дастурхон йигаёттан кенной-им бизга бир қараб кўйди-ю, яна жимгина ишига машғул бўлди.

Лайлони етаклаб хонамга олиб кирдим. Йиғлоқигинам каравотимга ўтириб олиб менинг кийим-бош алмаштиришимни, ёйиқ соchlаримни текислаб йиғиши-ришимни томоша қиласарди.

— Қани энди айт-чи, миттигина, сени ким хафа қилди, а?

Лайло лабларини чўччайтириб жим қолди. Унинг феъли келса, индамай тура-верадиган одати бор эди. Кейин эса кутилмагандан ёриларди. Бу сафар ҳам шундай бўлди. Опаси хонамга кириб келди-да, янги тиктирилаётган узун этакли оқ кўйлаги тўғрисида бижирлай бошлади.

— Сиз келин бўлсангиз, мен ҳам оқ кўйлагимни кияман, рўмолингизни кўта-риб юраман, — деб бўйнимга осилди.

Лайло шуни кутиб турган эканми:

— Куёв сизни олиб кетадими? — деб йиғини қолга жойидан давом эттира кетди.

Менинг бир кулгим қистар, бир аччифим чиқарди.

Ниҳоят, кечқурун ҳаммаси ойдин бўлди. Совчилар Садриддиннинг уйидан экан. Буни менга кеннойим айтди.

* * *

...Оқшом акам айвонга ёндош ўша хонага кириб келганда, мен Поль Мориа аудиоальбомини тинглаганча, бувимнинг эски диванида иккинчи бора “Сўғдиёна”ни¹ ўқиб ўтирадим. Акам кеннойимдан бор гапни эшитган, энди менинг жавобимга изоҳ кутарди.

— Ёқмайди дегин? — акам ўйланиб қолди. — Нега? Хунукми?

— Йўқ, хунук дейиш қийин...

— Ундаи бўлса, гаплари пойинтар-сойинтар экан-да?

— Йўғ-э, гап-сўзлари жойида...

— Унда нимаси ёқмайди?

Нима дейишимни билмай қолдим. Дарвоҷе, унинг қаери, нимаси менга ёқмайди?

Кўз олдимда унинг қип-қизил шарф билан бўйнини ўраб, қизларникидек узун, нозик бармоқларини совуқдан қизартириб дийдира буриши жонланди. Кейин Ҳуршид аканинг икки кафти орасида пиёласини тутганча ўйга чўумиб ўтириши кўзимга кўриниб кетди.

— Нега индамайсан?

Нима дей?

— Шу... Қиз болага ўхшайди...

Акам бир зум жим қолди. Кейин ўз-ўзига гапиргандек сўзланди:

— Нега унақа дейсан? Балки... Соғлиғи жойидадир?

— Бу нима деганингиз?

Акам пешонасини қашиб ўйланиб қолди. Кейин ўнғайсизланиб:

— Шу... Қиз болага ўхшайди деганингга айтаман-да, — деди.

Пешонамдан олов чиқиб кетгандай бўлди. Кўзларимни қўлларим билан тўсиб олдим. Акам ҳам индамас эди. Шу аҳволда қанча ўтирик, билмайман.

* * *

¹ “Сўғдиёна” — Явдат Илёсов романи

— Ўттизга кирдингиз, ахир. Инжиқликнинг ўрни эмас-ку!

Кеннойим дераза ёнида, гилам устида ўтиради. Тирсаги дераза токчасида, бир четга сурйлган шокиладор тўр парда ортидан ҳовлимиздаги ишкомлар қорайиб қўринарди.

Мен диванда қўлларимни тиззаларимга ташлаб ўтирадим.

— Кеннойи, — дедим мен. — Сиз акамни яхши кўрасиз-а?

— Мен сизни ҳам яхши кўраман.

— Мен у маънода айтиётганим йўқ. Сиз акамни яхши кўрасиз, тўғрими?

Кеннойим бир зум жим қолди. Кейин бошини билинар-билинмас силкиди.

— Нега Садриддинга тегишимни ҳоҳлаяпсиз? У менга ёқмайди-ку!

Кеннойим хўрсинди.

— Эҳ, Мағрура... Севса ҳам эркак севсин! Аёлнинг бошига жавобсиз муҳаббат тушишидан ёмон нарса йўқ. Севгинг учун марҳамат кутгандан кўра, ўзинг севмаган эъзакка севилганинг-у, шунинг ҳурматини қилиб яшаганинг осонроқ.

— Сиз шуни осон деб ўйлайсизми?

Кеннойим яна хўрсинди.

— Мен яхши кўраман акангизни. Уни биринчи марта кўрганимда ёқ эс-ҳушими ни йўқотганман. Лекин акангиз бошқа қизни — Иродани севарди. Буни ҳаммамиз билардик. Ирода эса акангизга ҳукмини ўтказмоқчи бўларди. У кўп йигитларни овора-ю сарсон қилган, сувга олиб бориб суғормай қайтарган айёр қиз эди. Акангизни ҳам шуларнинг кўйига солмоқчи бўлганди, шекилли. Аммо Даврон акам ўз қадрини ерга урдириб қўядиган йигитлардан эмас эди. Иродага Даврон акамнинг бўй бермагани алам қиласди, чоғи. Бир куни бутун курснинг олдида Даврон акамнинг гашини келтирадиган қилиқ қилди-да!

— Нима қилди у?

— Кўйинг, — кеннойим қўлини силтади. — Эслашни ҳам ҳоҳламайман. Хуллас, Даврон акам менга: “уйланаман”, — деди.

— Тўғридан-тўғри-я?

— Ҳа! Дарсдан кейин олдимга келди-да, “Уйингга кузатиб қўяман”, — деди.

Маҳалламизнинг бошига келганда: “Уйингта ойимни юбораман, йўқ дема”, — деди. Мен: “Иродага аччиқ қиляпсизми?” — деб кўнмадим. Даврон акам: “Менга фақат сен кераксан”, — деб туриб олди. Эртасига ёқ раҳматли оижоним бизникига кириб келдилар. Ота-онам кўп ҳам ўйлаб ўтирмай рози бўлиб қўя қолишиди. Бир ой ичиди тўйимиз ҳам бўлиб кетди. Ҳамма ҳайрон. Айниқса, Ирода...

Кеннойим яна жим қолди.

— Мана шунқақа, — деди у бир хўрсишиб олгач. — Мен ҳақиқатан акангизни яхши кўраман. Уша пайтда Иродага аччиқ қилгани учун менга ўйланаётгани алам қилган эди. Лекин бир томондан ўзим севган йигитга турмушга чиқаётганим севинтирган ҳам эди. Ироданинг аламини келтиришни ҳам ҳоҳлагандим.

— Ҳозир-чи?

— Ҳозирми? Ҳозир... Қийналиб кетаман бальзида. Назаримда акангиздан марҳамат кутиб яшаётгандек бўлиб қўринаман. Шунда ўзимни қўярга жой тополмай қоламан, билсангиз. Севмасангиз ҳам севилиб яшаш балки осонроқдир?

— Йўқ, осон эмас. Бу ҳам азоб.

— Анави шоир йигитни кечирсангиз бўлмасмиди?

Тунов куни аммам айтдилар. Иккинчи турмуши ҳам бузилибди.

— Йўқ, бўлмасди.

— Айби шунчалик каттамиди?

— Ҳа.

— Лекин сиз...

— Ҳа, яхши кўрардим.

— Фалатисиз...

Кеннойим бир оздан кейин уйга кириб кетди.

Ташқарида тун чодраси қуюқлашиб борар, мен қилт этмай ўтирадим.

* * *

Етти қизил тез сўлар.
Хоразм мақоли

Музаффар Илҳом! Наҳотки, сени яхши кўрган бўлсан? Ҳа, ўшандаги узил-кесил унга рад жавобини айтиш менга осон бўлмаганди. У билан боғлиқ хотира-ларни қанчалар қувишга ҳаракат қилмай сўнгги воқеалар кино тасмадай кўз олдимдан ўта бошлади...

Ўшанда кеч кузнинг тунд куни эди. Икки кундан бери йиғлай олмай қийналаётган булутлар, ниҳоят, дараҳт учларига қадалиб тўхтаган, жимжит қекса боғхазонлар шитири остида мудроқ, аллақаерда дараҳт танасининг зорланиб гийқиллагани эшитиларди.

Мен ечилиб қолаёзган шафтоли гуллик рўмолимни бўйнимга маҳкамроқ боғладим. Қаршимда Музаффар Илҳом турарди:

— Нега бирдан шу қарорга келганингиз сабабини билайлик? Агар мумкин бўлса!

Музаффар Илҳом оёқларини чалиштириб менга ёnlама қаради. Мен кафтларимни ўриндиқ қиррасига ишқай бошладим. Иккала кафтимдаги чандиқ торта бошлаган жароҳат ўрни бироз симишлиб турди-ю, аста-секин босилди. Қўлларимни кўтариб, тиззаларим устида қовуштиридим. Музаффар Илҳом ҳамон ўриндиқнинг баланд суюнчиgi тепасида узала ётар, жингалак соchlари пешонаси устидан тошиб, қошлари тепасини ёпган, бир-бирига жипс ёпишган лаблари четида иккита ўткир чизик, қўзларида қайсар ўт ёнар, унинг бу важоҳати ишонч билан навбатдаги галабаси сари отланган саркарда мисол мағрур эди. Ҳатто мени сизлай бошлашида ҳам қандайдир совуқ гуур, беписандлик сезиларди.

— Индамайсиз? — сўради у товушини сал кўтариб.

— Бу қарорга бирданига келганим йўқ, — дедим мен хотиржам.

— Шунақа дент?

Музаффар Илҳом юзимга диққат билан тикилди.

— Ҳаммасини йўққа чиқаришга кеч эмасми?

— Менимча, йўқ,

— Ҳайрон қолятман сенга, —у бирдан сенсиради. — Нима қилаётганингни тушуняпсанми ўзи?

— Ҳа.

— Йўқ, тушунмаяпсан. Менга-ку, барибир, йигит кишиман, ўзингга оғир бўлади.

Музаффар Илҳом ўрнидан туриб, рўпарамда тўхтади. Қўлларини костюми чўнтакларига тиқди.

— Фалатисан... Уйланяпман-ку сенга! Яна нима керак?

Ростдан ҳам, менга яна нима керак?

Мен ўша олис эрта куз кунини эсладим:

“Мағрура, мен яхши қўраман сизни!”

О, бир бор, яна бир бор ўша икрорни эшигтганимда нималар бўлмасди? Ўша сўзлар чин бўлса, нималар қўлмасдим? Мен барини унтишга, барча азобларимдан кўз юмишга тайёр эдим. Йўқ, шубҳаларим мени алдамаган эди. У мени севмаган. Мен шунчаки унинг йўлида учраган забт этиш қўйинроқ бўлган қалъя эдим, холос.

Совуқдан қалтирай бошладим.

— Аям тўйни отамнинг йигирмасидан кейин ўтказаверамиз, деяпти. Аканга ҳам айтдим.

— Тўй... бўлмайди!

— Лаббай?

— Тўй бўлмайди! Тамом!

Музаффар Илҳом бир зум эсанкираб қолди. Кейин кўзлари қисила бошлади, лаблари ингичка чизиққа айланиб, юзлари тортишиди.

— Бу ҷархи кажрафткор гаройиб рафиқа ато этибди-да бизга! Бир ўзлари тақдирларни ҳал қилиб юбораверадилар!

Кейин тўсатдан кулди.

— Сен бу гапингни аканга айтиб кўр! Қани, нима деркин? Уринишлари зое кетади-ю, “Майли, сингилжон, тўй бўлмаса-бўлмас”, — дермикин?

Юзларим ловулаб кетди. Нафасим ичимга тушиб, овозим бўғила бошлади.

— Бас қилинг! — шивирладим мен.

— Ҳа, ёқмадими?

Музаффар Илҳом чўнтакларини қўллари билан пайпаслай бошлади. Ниҳоят, чап чўнтағидан сигарет кутисини чиқарди. Лабига сигаретини қистирди-ю, кичкина ялтироқ зажигалкасини олифталик билан “чирқ” этказиб ёқди. Оғзи атрофига тўпланган кўкимтири дудни кўли билан ҳайдаган бўлди. Кейин икки-уч бор узун-узун қилиб тутун ютди. Ёнимга ўтириб, оёқларини чалиштириди. Сигаретини оғзидан олиб, кўрсаткич бармоғи билан чертиб кулини оёқлари остига тушириди. Унинг сигаретидан қандайдир дудмал ис келарди. Беихтиёр йўталиб юбордим.

— Шунақа, хоним... Музаффар Илҳом ўзини калака қилдириб қўймайди...

Акангга ён бердими? Ён берди, тамом! Бу биринчи ва охирги марта ён бериш! Музаффар Илҳом сенга эрмакмидики, ҳали ундоқ дейсан, ҳали бундоқ!

Индамай ўрнимдан турдим. Музаффар Илҳом қамирламади. Мен гүё биринчи бор кўраётгандай уни бошдан-оёқ кузатиб чиқдим. Эгнидаги кўк кўйлаги, тим қора костюми уни бир қадар каттароқ кўрсатар, иккала қоши орасига тушган чуқур тугун, лаблари четидаги иккита ўткир чизиқ юзларига кескинлик бағишлаган, пешона ва қулоқлари устида кўпиррган жингалак соchlари қиёфасига алла-нечук ёввойи бир шиддат бахш этганди.

Юрагимни нимадир фижимлаб юборди. Ич-ичимдан алам тошиб бўғзимга кўта-рилди. Шу онда Музаффар Илҳомни тарсакилагим, бор аламимни тўкиб, хумор-дан чиққунча йиғлагим келди. “Ҳозир йиғлаб юбораман”, — беихтиёр ўладим мен. Лекин кўзимга ёш келмади. Агар шу пайтда йиғлаганимда нима бўларди? Балки Музаффар Илҳом мени юпатармиди? Мен ҳам унинг аччиқ сўзларини худбинона магрурлигига йўйиб, бор аламларимни унугтган, кўксига бошимни этган бўлармидим?

Кўксимдан чуқур “оҳ” отилиб чиқди. Шу билан бўғзимга тиқилган тош фойиб бўлди. Кўксимда гимирилай бошлаган иккиланиш бирдан йўқ бўлди. Ҳа, шубҳа йўқ, орта қайтмасам, бир умр азобда ўтишим тайин эди. О, унинг совуқ қарашларини ҳис этиш бирам оғир эдик...

Қўлларим совқота бошлади. Кафтларимдаги жароҳатларим ўрнига муздек ни-мадир тегиб, зирқириатиб юборди. Сесканиб кипприкларимни кўтардим. Музаффар Илҳом лабида сигарет, қўллари билан кафтларимни тутиб турарди.

— Хўш, хоним, келишдикми? Аразлар битди, а? Акангни хафа қилма, мен ҳам аямни куйдирмай қўя қолай...

Сигаретини тили билан туртиб оёқ остига туширди. Ўтирган кўйи қўлларимдан тортди. Лаблари лабларимга талпинди... Тамакининг дудмал иси нафасимни қайта-риб юборди. Силтаниб қўлларимни бўшатдим.

Музаффар Илҳом сапчиб ўрнидан турди. Тўсатдан қўлларимни қайриб, куч билан ўзига тортди.

— Қўйворинг, — қичқирдим жон ҳолатда. — Қўлим оғрияпти.

— Оғридими? — кулди у. — Менинг фурурим ҳам ҳудди шунаقا оғриди! Аканг сикувга олганда, кейин эса сен инжиқ маликадай “Йўқ!” — деганингда!

— Қўйворинг! — кўз ёши аралаш дедим мен. — Нима қиляпсиз?

Музаффар Илҳомнинг тошдек қаттиқ қўллари куракларимдан маҳкам сиқди. Суякларим эштилар-эштилмас “қирс” этди-ю, ихраб юбордим.

— Музаффар Илҳомни ташлаб кетмоқчимисан? Сен-а? Уни яхши кўрасан-ку! Тўгрими? А? Нега индамайсан?

Кўз ўшларим юзларимни куйдира бошлади. Лабларимга шўртак томчилар томди.

— Музаффар Илҳомни ҳеч ким ташлаб кетолмаган! Лекин Музаффар Илҳом зор-зор йиғлатиб ташлаб кетган! Сен ҳам йиғлайсан ҳали! Нилуфардан баттар йиғлайсан!

— Нилуфар... Нилуфарга нима қилувдингиз?

— Ҳозир биласан!

Нимадир орқамга гурсиллаб тегди. Елкаларим ёнида шох-шаббалар қирсиллади. Музаффар Илҳом мени дараҳтга қисиб қўйди-ю, юз-кўзларимдан ўпа бошлади.

— Ҳар киз... Ҳали мени овора қилмоқчимисан?

Жон ҳалпида типирчилай бошладим.

— Жим тур! Йўқса қўйлагинг йиртилади... — унинг қўллари бежо гимирилай бошлади. — Тўйдан кейин барибир шу иш бўлади... Қимирлама! Аввалроқ шундай қилишим керак эди! Кейин ўзинг ялинардинг... Нилуфарга ўхшаб... Бир кўрадим ҳолингни, Мағрут гулим! Нодон қиз... Жим!

— Қўйвор! — дедим-у кучим борича юлқиниб, уни итариб юбордим. Шу онда қўйлагимнинг олди “шир-р” этиб йиртилиб тушди. Шоша-пиша йиртиқни қўлларим билан туташтириб, жемперимнинг бари билан яширдим.

Ҳансираган Музаффар Илҳомга қарашга ҳам қўрқиб, орқа-олдимга боқмай югуриб кетдим. Кўз олдимда дараҳтлар лип-лип этар, оёқларим остида ер чайқалар эди. Охири дараҳтзор тугаб текис асфалт йўл кўринди. Йўл чети бўйлаб кетавердим. Ниҳоят, бурчакда кўргазмалар биносининг нақшдор, арксимон ботик пештоқлари кўринди. Шундагина тўхтаб, нафас ростлаган бўлдим.

“Нодон қиз! Ўз қадрини билмаган тентак! — беихтиёр шивирлай бошладим мен. — Нега ўшанда анҳор бўйига бординг? Нега ўшанда “кечирдим” дединг? Нега акангта “йўқ” демадинг? Музаффар Илҳомни билардинг-ку! Келиб-келиб шуни танладингми?”

Юзларим аламдан ёнар эди.

— Шу куниёқ ойимга узил-кесил қилиб “Музаффар Илҳомга тегмайман”, — дедим.

Ойим узоқ жим қолди.

— Уни ёмон кўриб қолдингми? — секингина сўради у.

— Йўқ...

— Унда нима жин урди сени?

— Истамайман.

— Биргина истак билан иш битмайди-да! Дунёда масъулият деган нарса ҳам бор! Тўйинг учун қанча одамнинг меҳнати сингтан, болам. Энди сенинг биргина истагинг билан шунча меҳнатни йўқقا чиқариш тўғри бўлармикин? Балки Музаффарнинг феълига кўниб, ёмонини кечириб, яхшисини кўз-кўз қилиб кўя қолганинг маъқул эмасми? Ё унинг хулқ-авторини аввал билмасмидинг?

— Билардим...

— Ҳа, ана! Уни шу феъл-хуйи билан ёқтиргансан, ахир. Тўғрими?

— Тўғри...

— Доимо бир томон камроқ, иккинчи томон кўпроқ севади. Тушундингми?

— Ҳа...

— Энди ҳам Музаффарга тегмайсанми?

— Ҳа! Ўзига ҳам шундай дедим.

Ойим “оҳ” тортиб юборди. Уйнинг у бурчидан бу бурчига бориб кела бошлади.

— Бу ўзбилармон қизни нима қилсам, а? Бошингда онант, аканг бор, ўзўзингча ҳукм чиқариб юбораверасанми, ярамас? Қани, аканг келсин, сен билан ўғил болачасига гаплашмаса бўлмайди, шекилли...

...Аммо акам билан “ўғил болача” гаплашиш мен куттандан тамом бошқача бўлди.

Акам кирганда мен тиззамда “Чолиқуши”¹, кўзларим сатрларда, хаёлга чўмиб ўтирадим.

Акам китобни олиб шартта ёпди-ю, комоднинг устига ташлади.

— Қани, келин хоним, хаёлдан кўзни очинг-чи!

Мен даставвал гап нимадалигини англолмай анграйиб қарадим. Англагач, юрагим увишди.

— Ҳўш, не сабаб оламушук ўтмиш орадан, а? Буюк шоир хафа қилдими ё хафа бўлдими?

Мен беихтиёр жилмайдим:

— Униси ҳам, буниси ҳам.

— Ҳа...

Акам ёнимга чўқди.

— Мен ойимдан гапнинг бир учини эшитдим.

Кулогимдан астагина тортқилади. “Вой” деб юбордим ихтиёрсиз.

— Бу ойимни хафа қилганинг учун, — деди у.

Кейин кафтларини бир-бирига уриб, ўтириб қолди.

— Ҳўш, хоним афанди, бу ёғини нима қиласиз?

Мен елка қисдим.

— Билмайсанми? Мен ҳам билмайман... Қани, бир чекқадан айт-чи, нега энди бу тўхтамга келдинг? Ёки ёмон кўриб қолдингми?

— Йўқ...

— Демак, шоири даврон бошқа бир гўзалига қасидалар бита бошлабди-да?

— Йўғ-э, бунақа воқеани сезмадим...

— Ундаи бўлса, сенга қасида атамай қўйибди-да!

— Ака...

Йиғлаб юбордим.

— Гапир бўлмаса!

Нимани гапирай? Кўнглимдаги ваҳиманими? Музаффар Илҳомнинг совуқ қилилариними? Ё сўнгти гаплариними? Қайси юзим билан айтаман?

Кафтларимни юзларимга босдим.

— Ака, Музаффар Илҳомга нималар дегандингиз?

— Қачон?

— Ҳов ўшанда, касалхонада?

— Тинчликми?

— Нима кераги бор эди, ака?

— Э-э, ҳа... Бу шоири олам ҳақиқатни севгувчилардан эмас, шекилли?

¹Рашод Нури Гунтегин асари

Акам “үх” тортди.

— Кўнимсизлигини кўриб “Бу йигитни қаттиқроқ ушламаса бўлмайди”, — деб ўйловдим. Янглишибман, уни қаттиқроқ тепиш керак экан. Паттасини қўлига тутқазиб... Узр!

— Ака... Қийналиб кетдим...

— Нега?

— Бўйнидан боғлаган овга ярамайди-ку!

— Ҳа, албатта, Музaffer Илҳом...

— Иўқ, мен ҳам!

Акам оқариб кетди:

— Мен уни яхши кўрасан, деб ишонувдим.

— Яхши кўраман, — шивирладим эшитилар-эшитилмас.

— Ўжаргинам, — бошимни енгилгина силади у. — Максималист! Ўзбошимча...

— Ака, эсингиздами, дадам: “Агар иккита ёмон нарсадан бирини танлаш лозим бўлса, ёмон томони камроқ бўлганини танла”, — дердилар...

— Тушундим...

Икковимиз жим қолдик. Ташқарида шитирлаб ёмғир ёға бошлади. Биз дераза ойнасида эгри-буғри из қолдириб тирқираётган томчиларга қараб ўтирадик.

— Мени кечира оласанми, митти? — секингина сўради акам. — Шошқалоқлик қилдим. Юрта ош бериб, кўкрак кермоқчи бўлибман... Энди қийин бўлади сенга...

Акам бошини эгиб қолди. Кейин елкалари титраб... йиғелаб юборди.

* * *

— Эй, Худойим-э, ҳаёт деганлари бунчалар муракқаб-а? Бу кўнгил одамни не кўйларга солмайди... Қаёққа қарама озор, озор!

Рўпарамда менга умид билан тикилиб турган Садриддиннинг кўзларига қаролмадим.

— Иўқ, денг...

Садриддин ўша — наъматак остидаги, мен йифидан бўғилиб қолган ўриндида кўлларини икки ёнга осилтириб ўтиради.

— Мен бўлсан, охирги пайтлар муомалантиз илиқлашганига ўйлабманки...

— Ахир, доим ҳам заҳарханда бўлавермайман-ку!

— Ҳа-я... Шу эсимга келмабди.

Садриддин хўрсисини жим қолди. Мен рўпарадаги акациянинг шохida чайқалиб турган қарғага қараб ўтирадим. Қарға қотиб туарар, на пати, на тумшуғи қимирлар эди. Бир пайт қанотларини ёзib типирчилади-да, учди-кетди. Акация шохлари орасидан нимадир ярақлаб ерга тушди-ю, тошга урилиб жаранглади. Бу — танга эди.

— Кўрқманг, мен отдим, — деди Садриддин бепарвогина. — Қарғанинг ўтириши ёқмади. Умуман, қарға — хосиятсиз күш.

Кейин уф тортди. Гўё ўз-ўзига гапираётгандек сўзланди:

— Тентак бўлмасам, умид қилармидим? Ахир, сезувдим-ку!

— Нимани?

Садриддин кескин менга ўтирилди. Унинг кўзлари фалати тарзда чақнарди.

— Сиз Хуршид акани севасиз, а? Тўғрими?

Юзларим ёниб кетди. Қизариб кеттанимни ўзим ҳам сезардим.

— Баҳти одам экан! Фақат ўзи билмайди шуни... Чунки бефарқ одам у! Йўқса, аллақачон сезиб, дўпписини осмонга отган бўларди. Ахир, бепарво бўлмаса, мен сезган нарсани у сезмасмиди?

Иккимиз ҳам жим қолдик. Менимча, иккимиз ҳам битта одамни ўйлардик. Иккимиз ҳам алам билан ўйлардик уни.

Изгирин турди. Яна қўлларим совқотиб, кафтларимдаги чандиклар зирқиллай бошлади...

* * *

Икки кундан бери факультет ғовур-ғувур. Гўё чўп суқилган арининг уяси. Марказий газетада тўртингич курсдаги талабанинг мақоласи босилган, унда университетнинг кутубхонаси танқид қилинган эди.

Кечаки Хуршид акани ректоратга чақиришган эди. У ердан юзлари қорайиб, алланечук чўкиб қайтди. Орқаваротдан Маҳкамов билан тўқнашуви тафсилотлари рост-ёлғон аралаш етиб келди. Гўёким Маҳкамов мақола ёзган талабанинг ўқиши

ларини текширганмиш. “Уч”ларини кўриб заҳарханда қилганмиш. “Мақола ёзгандан кўра ўқишини эпласа бўлмайдими?” — деганмиш. Бу — ростга ўхшарди. Ҳақиқатан ўша йигитнинг “уч” лари кўп эди.

Мақола ёзган йигит — Хайрулла мана шу икки кун ичида талабалар қаҳрамонига айланди-қолди. “Камолот”чилар унинг ўқишини муҳокамага қўйишармиш, Маҳкамов шундай буюрганмиш” деган миш-мишлар тарқалди. Лекин муҳокама бўлмади. Гўёким Хуршид ака факультет сардорини чақириб: “Ундан қилманглар”, — деганмиш.

Бугун яна бир миш-миш тарқалди. “Хуршид ака кетармиш”. Гўёким Хуршид ака Маҳкамовга “Кутубхонанинг аҳволи маълум эди-ку. Талабамни тафтиш қилгандан кўра кутубхонани таъмиrlаган маъқул эмасми?” — деганмиш (Бу гапни Гулмира ректоратдаги таниш дугоналари орқали топиб келди). Гўёким Маҳкамов Хуршид акага ариза ёздириб олганмиш...

Хуршид ака эса ҳамон индамай ишга келиб-кетарди. Ҳеч гап бўлмагандай лекцияларини ўқирди.

Бугун эса катта танаффусда фалати суҳбатни эшитиб қолдим. Деканатда Хайрулла, рўпарасида Баҳтиёр. Баҳтиёр унга:

— Куруқ фактларни айтавериш билан иш битмайди, ука, далиллаш керак, — дерди.

— Далил бундан ортиқ бўлмайди, домла, — жавоб қилди Хайрулла. Кейин мени кўриб деди:

— Мана, ноҳақ бўлсам, опа айтсинлар, талабаларнинг етмиш фоизи шартнома билан ўқийди, кутубхонанинг аҳволи ҳалиғинданай, спортзални айтмаса ҳам бўлади. Шартнома нима учун ўйлаб топилган? Уша пуллар қаёққа кетяпти?

Баҳтиёр донг қотиб қолди.

— Укам, — деди секин. — Бу катта айблов. Тушуняпсанми? Агар фактларинг тасдиқланмаса, ҳолинг нима кечишини биласанми?

— Биламан.

— Билмайсан. Маҳкамов кутубхонани тўғрилаб қўйиб, киши билмас ўтираве-риши ҳам мумкин.

— Ўлгурмайди, — дедим мен. — Кутубхона уч-тўрт кунда эпақага келадиган эмас.

— Маҳкамов ноҳақ тергаяпти. Ундан кўра...

— Маҳкамов бир томондан ҳақ. — Аввал ўқишини қойил қилиш керак.

Бу — Хуршид аканинг товуши эди.

Хайрулла, гапи оғзида, Хуршид акага қараб қолди.

— Домла, — деди у ниҳоят. — Агар Маҳкамов ҳақ бўлса, мени нега ҳимоя қилдингиз? Ахир, мени жазолашмоқчи эди-ку ёмон ўқиганим учун!

— Қаламинг яхши экан. Асли журфакда ўқисанг бўларкан, — Хайрулланинг саволини эшитмагандай деди Хуршид ака.

Шу билан баҳс ҳам ўз-ўзидан тўхтади.

Лекин воқеанинг ечими кўринмасди.

Бир келса, кўшалоқ келади, дегандай, университет яна бир қайнаб олди. Чап қанотдаги арzon ошхонадаги тушликдан сўнг бирварақай уч талаба касалхонага тушиб қолди. Муддати тугаган консерваларни ишлатиб юборишган экан.

Ошхонани оқ ҳалатли одамлар босиб кетди.

Шу ҳам сабаб бўлдими, ҳайтовур, Хайруллани тинч қўйишиди. Энди “Хуршид ака кетармиш”, — деган миш-мишлар ҳам босилди-қолди.

* * *

— Жаннати одам экан-да, раҳматли!

Бердиқул Муродович, кўлида “Халқ сўзи”, ҳаммага бир-бир қараб чиқди. Мен эса кўз олдимда Комиловнинг салобатли қиёфаси, диван бурчагида бўшашиб ўтирадим.

— Кундузи Академия мажлисида қатнашибди, сўзга чиқибди. Уйга келиб, китобининг корректурасини кўрибди, Насриддиновнинг диссертациясига тақриз ёзибди. Кейин “Чарчадим”, — деб дам олгани ётиби-ю, уйқусида узилибди-да!

Садриддин газетани олиб, қайтадан овоз чиқарип ўқий бошлади:

— Ўзбек фани оғир жудоликка учради. Файласуф олим, Ўзбекистон Фанлар Академиясининг академиги Содиқ Комилов 72 ёшида тўсатдан...

...Пешинда, жанозадан қайтиб қелган Хуршид аканинг чаккаларидаги сочларидан бир тутами оқарганини сезиб қолдим...

* * *

Бу тонг отсин... **КАЙФУ** учади,
Учар, учар – чекинар узлат.
...Деразасин қатыйи чертади,
Келдим, дейди, МЕН – ШОДЛИК, МЕН – АХД!
Азим Суюн

Туғилган кун! Мен ёришиб келаётган осмонга қараб турардим. Күнгилда севинч ва ўқинч оралиғидаги ғалати ҳиссиёт... Бугун ўн саккизинчи март. Ойим раҳматли айтардилар, мен осмон ёриша бошлаган чоғи туғилган эканман. Мана, яна осмонга тикилиб турибман. Ўттиз ёшни тұлдириб, ўттиз бириңчисига қадам қўйган тонгдаман. Ҳайронман: хафа бўлайми ё хурсанд?

Одамзот ҳар туғилган куніда негадир бир ўқиниб олади. Бу ҳаётда нима ютдим-у, нима ютқиздим деб ўйланиб қолади.

Мен-чи? Мен нима ютдим-у, нима ютқаздим? Ютуғим кўпми, ютқизифим?

Ўўқамни тўлдириб нафас олдим. Ҳаводан қор иси келарди. Ажаб, Наврўзга уч кун қолибдику, ҳамон илиқлиқдан дарак йўқ. Иссик нафас ҳовур бўлиб юқорига ўрлайди. Калишдан зах ўтиб оёқни симиллатади. Юзга кўринмас майда игналар санчилади.

Шарфимни елкаларимга маҳкамроқ ўрадим. Ҳар қишини шунаقا дийдираф ўтка-зардим. Изғиринга тобим, қор-қировга тоқатим йўқ, қишиш кечаларига сабрим чи-дамас эди.

Ҳар йили Наврўзга базўр етиб олардим. Бодомнинг бириңчи гуллари билан вужудидаги дийдираш ўз-ўзидан йўқолар, олчалар гулга кирганда танам яйрай бошлар, шафтоли гуллаганда эса юрагим сув ичгандай тинчирди.

Мен шафтоли гулини яхши кўраман. Йилгарилари шафтоли тули рангидаги либосларни кўпроқ киярдим. Назаримда улар мен севган гуллар исини йил бўйи асрайдигандек эди.

Фақат... Сўнгги йиллар ҳафсалам йўқ, қишиш бўйи шим, кенг-мўл шарфу қалин жун кўлқоп билан кун кечирадиган бўлиб қолдим. Улар ҳам қишиш кайфиятидек кул ва кўмир рангиди...

Бугун эса ғалати бир ҳис билан кийим жавони ёнига келдим. Йилгариги либосларимдан биронтаси йўқ, шимларимни кийищдан эса оғринардим. Сўнгги пайтларда тикирган иккита сипо кўйлагим-у, тухумбарак шарофати билан қайта тикилган ўша майда сариқ гули қора либос бор эди, холос. Мен нима қилишни, қандай қиёфада ишга боришни билмасдим. Ниманидир кутаётгандек, нимадандир айрилишни истамагандек... Ажаб, келмайдиган ненидир кутмоқдан нима фойда?

Акам аллақачон ишига жўнаган, Лола ва Лайло мактабига кетган, биргина мен хона бурчагида ҳайрон турардим. Ниҳоят, кўзимни чирт юмиб, ўша кундалик кўйлак, Назира опанинг уйидаги тухумбарак муносабати билан қайта тикилган майда сариқ гули қора кўйлакни кийдим. Яна ўша узун пальто, ёйилган сочларимни тангиган ингичка бинафша тусли шарф...

Аудиторияга кирганимда кўрганим – кафедра устидаги оқ чиннигуллар-у, талабаларимнинг кулиб турган кўзлари бўлди. Йўқ, мен ютқизикларим ҳақида ўйлай олмасдим. Ахир, мана бу оқ чиннигуллар ҳаётимнинг маҳзун йиллари учун мукофот эмасми? Дунё нимадандир камситса, нимадандир тўлатади, деганлари шу эмасми?

Шу кунги Бердиқул Муродовичнинг илжайиб қўлимни қисгани, Баҳтиёрнинг бесўнақай эгилиши, Садриддиннинг тортинибгина берган тухфаси, Назира опанинг елкаларимни оналарча силаб, яхши кунларим учун кийимлик мато тутқизганини эсласам орзиқар эдим.

Хуршид аканинг бир оғиз: “Табриклайман, Мағрурахон”, деган сўзининг ўзи кўнгилга жазиллаб тегарди. Гёё энг азиз сўзлардек...

Ташқарида эса қор ҳиди уфуран, изғирин изиллаб кезарди...

Бу йилги туғилган куним бир умр ёдимдан чиқмаса керак.

...Охирги дарсга кирап олдимиз Гулмира янги бир хабарни тарқатди. Дарсдан кейин ҳамма 416-аудиторияга йиғилсин эмиш. Ректоратдан одам келармиш. Мажлис ўтказармиш.

Бу хабарни эшитган ҳамма бир қалқиб олди. Наҳотки миш-мишлар рост бўлса? Хуршид ака кетадими? Демак, Маҳкамов барибир тинчимабди-да!

Ректорат вакиллари — проректор Мўминова — қўнғир тусли соchlарига чиройли оро берилган, сипо кийимларида ҳам салобатли кўринувчи баланд бўйли, тўлароқ гавдасини енгил кўтариб юрувчи аёл, яна бир проректор — Фозиев, жиккак, соchlари файритабий оппоқ, кичкина юзларидаги қийиқ кўzlари тийрак киши кириб келишди. Улар ортида эса негадир Султонов келарди. Султонов мен тадқиқотчиликка қабул қилинган йилим аспираントурани битирган, шу пайтгача журналистика факультетида ишлаб келарди. Ёш бўлса-да, қорин солиб юборган, тароққа бўйсунмаган соchlари патила-патила, қоп-қора юзларининг икки четида билинار-билинмас яра излари, каттакон бўйинбоги оппоқ ёқаларини бўғиб ташлаганидан бўғриқиб кеттан...

Ҳаммадан кейин Хуршид ака кирди. У негадир хотиржам эди.

Мен Назира опанинг ёнида ўтирадим. Опа ҳам бўлаётган ишдан ҳайрон, асабийлашиб гоҳ ўнг, гоҳ чап қўли бармоқларидағи узукларини айлантиради.

Кирганлар доска ёнидаги узун стол ортида қатор ўтиришди. Мўминова тўлагина гавдасига гоҳ-гоҳ ёпишиб қолаётган жигарранг сипо кўйлагини торта-торта бир нималар дерди.

Мен аудиторияда ўтирганларга бирма-бир разм сола бошладим. Бердиқул Муродович бўйинини чўзиб, гоҳ Мўминовага, гоҳ Хуршид акага қарайди. Баҳтиёрнинг боласифат юзи қулгили даражада тунд, каттакон қўлларини парта устида қовуштирган, Садриддин паришонхотирлик билан гоҳ Султоновга, гоҳ Хуршид акага назар ташлайди. Баъзан худди шундай паришонлик билан мен томонга қараб қўяётганини сезаман.

Мўминова ҳамон гапираварди:

— Бу воқеани ишдан бўшатилиш деб тушунманглар. Фақат мана шу икки воқеа кетма-кет бўлиб қолди, холос. Усмонов катта тажрибага эга раҳбар. У факультетни бошқарган даврда анча яхши ишларни амалга ошириди...

Мен яна Хуршид акага қарадим. У ҳамон хотиржам, Мўминованинг сўзларига бепарво, ўтирганларга бир-бир қарап эди. Бир вақт кўзларимиз тўқнашиб қолди. Ва шу ондаёқ у бирдан оқариб кетди.

Мўминова эса ҳамон бир нималарни сўзларди. Хуршид ака эса қўлларини сикимлаб ўтирас, кўзлари стол устида, гўё ниманидир дикқат билан кузатар эди.

Кейин Фозиев гапираварди:

— Усмонов бу ерга келгунча беш йил Тил-адабиёт институтини бошқарган, биласизлар. Ҳозир уни яна институтга чақиришапти. Раҳматли Комилов Академия ҳайъатида институтдаги аҳвол масаласини кўтарган экан. Академия маҳсус қарор чиқарибди. Усмоновга рухсат беришга мажбурмиз. Буни тўғри тушунинглар. Энди анави мақола баҳона анча шов-шуввлар бўлди. Кейин ошхонадаги воқеа... Хуллас, оғир-енгил гаплар ўтди. Комиссия бу ишларни текшириди, аҳвол яхшиланяпти, энди иш бор жойда хатолар бўлади... Маҳкамов ҳам қаттиқ ҳайфсан олдилар...

Охирида Султонов сўз олди. Унинг шамоллагандек бўғиқ овози қулоғимга кирса-да, ҳеч бир сўзини англамасдим. Миямда фақат “Кетяпти”, — деган овоз жаранглайверар, мен эса карахт эдим.

Мажлис тугаб, ҳамма ўрнидан турди. Мен ҳам кўзгалдим.

Йўлакда талабалар йўқ, мажлисдан чиқсанлар ҳар ер-ҳар ерда икки-уч кишидан бўлиб бир нималарни гаплашишар эди. Назира опа бир сўз демай, хонасига қараб кетди. Фозиев Мўминова билан узун-қисқа бўлиб кетиб бўлишган, Хуршид ака Султоновнинг ёнида, иккови бир нималарни сўзлашиб деканат томон кетишинар эди. Садриддин қўлидаги думалоқланган газетани ияги остига тираб девор ёнида ёлғиз ўзи гарангсиб турарди.

Мен ҳам хонамизга йўл олдим. Пальтомни олишим керак эди...

Эгнимга пальтомни илиб, шарфимни апил-тапил бошимга танғидим. Бу ердан тезроқ, кетгим келарди.

Тутқичга кўл юбормасимдан эшик очилди-ю, остоноада Садриддин кўринди.

— Кетяпсизми? — сўради у.

— Кетяпман.

— Совфаларингиз қолиб кетибди-ку, — деди диван устида турган кўк елим халтани кўрсатиб. — Гулларингиз ҳам эсингиздан чиқиби...

— Совғалар?

— Туғилган кунингиз эди-ку бугун. Буни ҳам унутдингизми?

Айтганча, бугун туғилган куним эди-ку! Унугибман...

Сумкамни елкамга илдим, бир қўлимга халтани, иккинчисига гулдастани олдим. Эшикка етдим-у, олов чиққандай орқага тисландим. Йўлакда Хуршид ака Султонов билан сўзлашиб келарди.

— Хуршид ака ўтятпими? — деди Садриддин секингина.

— Сизга нима?

Садриддин бирдан чўкиб қолди. Нега зарда қилдим-а? Феълим қурсин...

Хуршид ака кетса, Садриддинда нима айб? Узр сўраш керак эди...

Садриддин диванда озғин қўлларини икки ёнга осилтириб менга қараб ўтиради. Менинг оғиз жуфтлаганимни кўриб, шоша-пиша:

— Йўқ, узр сўраманг, ҳожати йўқ, — деди.

Нега унинг руҳи бу қадар сўнік? Мен яна уни танимай қолгандим.

— Мағрура, — деди у алланечук синиқ овозда. — Қийнаб қўйдим сизни... Бир кун келиб мени тушуна олармикинисиз?

Мен ҳамон қўлларимда гулдастам-у совғаларим билан қотиб турардим.

— Мен яхши кўраман сизни... Шунинг учун ҳам худбинлик қилдим, шекили... Менга алам қиласарди... Тушуняпсизми? Қаттиқ алам қиласарди... Ахир Хуршид ака сиздан деярли йигирма ёш катта! Унинг катта-катта болалари, ҳатто неварали-ри бор. У оила кўрган, аёл меҳрини татиган одам! Сиз эса нозиккина қиз...

— Бас қилинг, — дедим инграниб. — Жон Садриддин, бас қилинг!

— Мағрура, илтимос сиздан, охирги марта сўзимни эшитинг. Кейин сизни ҳеч қачон безовта қилмайман... Балки айтмаганим дурустмиди? Лекин ичим ёниб кетяпти... Қийналиб кетяпман, Мағрура... Умримда бунчалик худбинлик қилмагандим... Кўнглимда бир илинж бор эди, биласизми? Хуршид ака ундан анча катта, Мағрура бир кун келиб менга розилик бериб қолар, деб ўйлардим... Қорувул жанжал қилган кун эсингиздами? Хуршид ака қорувулни ҳайдаб юборган эди. Кейин мени... Болоҳонадор қилиб... Шу... Қиз болани гап-сўзга қўйдинг, деди-да!

— Ахир, биз айб иш қилганимиз йўқ эди-ку!

— Мен ҳам айтдим. Назаримда, Хуршид ака ишонмади...

— Бўлиши мумкин эмас! Йўқ! Хуршид ака оққўнгил одам!

— Сиз уни яхши билмайсиз-ку, Мағрура! Одамнинг кўнгли — қалин девор ортидаги нозик гул. Бу деворни кўтариб ташлаб бўлармиди? Мен ҳам ўша куни тушунолмадим. Хуршид аканинг кўнглида нима гаплар бор эди? У мендан: “Мағрурани яхши кўрасанми?” — деб сўради. “Ҳа, яхши кўраман”, — дедим. “Унда тезроқ ўйлан. Мағрурани гап-сўзга қўйма”, — деди.

Мен йиғлаб юбордим. Садриддин шошиб ўрнидан турди. Тирсакларимдан тутиб диванга ўтқазди. Ҳали ҳам қўлларимда турган гулимни, совғамни олиб ёнимга қўйди. Мен овоз чиқармаслик учун кучим борича лабларимни тишлилардим. Кўз ёшларим юзларимдан оқиб кулгичларимни куйдирар, кейин иягимга томчилар эди.

Садриддин рўпарамда тиз букиб, чўнтагидан рўмолча чиқарди.

— Кечиринг мени, — деди ва аста, титроқ қўллари билан ёшларимни арта бошлади. — Хуршид акага “Яхши кўрмайман”, — десам бўларкан... Мени бешбатар қилиб сўкарди-ю, лекин сизга енгилроқ бўларди... Қийнаб қўйдим сизни...

— Унақа деманг... Сиздан гинам йўқ, Садриддин...

— Ростми?

— Рост!

— Унда бўлса, кўз ёшларингизни қуритиб олинг, хўпми? Бугун туғилган кунингиз. Уйда сизни кутишаётгандир?

Садриддин кўзларим қуригунча кутиб турди. Кейин совғали халтани кўтариб ортимдан йўлакка чиқди.

Ташқарида оқшом туша бошлаган, йўлларни қўкимтири туман қоплаган эди.

Мен Садриддин тўхтатган таксига ўтирдим. У совғаларимни ёнимга қўйди-да, ҳайдовчига пул тутқизиб, хайрлашиб эшикни ёпди.

“Тико” енгилгина қўзғалди. Мен ойнадан шаҳарни кузата бошладим.

Кўчаларда машиналар тифиз, симёғочлар учиди чироқлар ёниқ, йўл чеккала-ридаги бинолар деразаларидан нур куйилар эди. Шаҳар гўё милтиллаган минглаб чироқлар устига қўкимтири парда ташлаган, энди ўзи худди шу қуюқлашиб бора-ётган чодра остида тусмолланар эди. Ҳа, бу шаҳар ўз ташвиши билан банд, такси-

¹ Муҳаммад Али сатри

нинг орқа ўриндиғида, тиззасида каттакон гулдаста, кўнгли тўла алам билан кетаётган қизга эътибор ҳам бермасди. Ахир, Тошкенти азим бағридаги уч миллион одамнинг дардига баробар куя олармиди?

«Минг қилса ҳам шаҳар бағри тор...»¹

* * *

Шодлик қайдан келар экан, ажабо,
Қайғу эса қаердадир яширин.
Бир-бирларин кўролмаслар доимо,
Гоҳ иккисин қилолмайман ажирим.

Муҳаммад Али

— Лобар, азизам, нима десам ишонасан?
...Мен ўз хонамда, кўзларимга уйқу чакириб ётардим.
Айвондаги соат ўн икки марта бўғилиб занг урди.
Мен бошимни кўрпага буркаб олдим. Диққинафас қоронгиликдан дамим қайтиб, бошимни очдим.

Яна кеннойимнинг пастгина овози уй сукутида баралла эшитилди.

— Иродани ишга олибсиз-ку!

— Нима бўпти?

— Ахир, у эри билан ажрашиб кетибди!

— Рашқ қиляпсанми?

— Йўқ!

— Бўлмаса нима? Йиғлама, гапир!

— Даврон ака, сиз ўша пайтда Иродага аччиқ қилгандингиз-а?

— Ие, ана холос... Сен ҳали...

— Ахир, касалхонадан бери келмаяпсиз. Қарамай қўйдингиз менга!

— Лобар...

— Рост! Сиз Иродани яхши кўрардингиз-ку! У сизни менсимаганига. фурурингизга текканига жаҳлингиз чиққан. Тўғрими? Ирода ҳали ҳам кўнглингизнинг бир чеккасида бор-а?

— Лобар! Мехрибоним! Сенга уйланганимдан бирон марта бўлсин афсус чекканим йўқ. Ишонасанми? Тўғри, сенга қарамай қўйдим... Ахир, бўлимим янги, кўп ишдарни йўлга қўйишим керак. Иродани ишга олган бўлсам, яхши жарроҳ бўлгани учун олдим. Бор-йўғи шу! Кўй, йиғлама...

— Даврон ака!

— Бўлди, жонгинам, қара, мени ҳўл қилиб юбординг...

— Кулманг...

— Нега кулай? Лобар! Мен севгимни эъзозлайдиган, мени чин дилдан, ҳеч бир иddaосиз севадиган қизни орзу қилганман. Тушуняпсанми? Шундай қиз учраса, бир умр ёнидан кетмайман, бору йўғимни бағишлайман, деганман. Балки Ирода-дан ўзим истаган сифатларни қидириб кўргандирман. Сени кейинроқ пайқадим. Айбим шу, холос.

— Мен ўйлабманки...

— Нотўғри ўйлабсан! Ширин-шакар болаларимнинг онаисан, менинг ягонасан! Сени ташлаб қаерга кетаман? Лобартинам! Йсминг бирам чиройлики... Ҳақиқий Лобарсан!

— Вуй, Даврон ака, нима қиляпсиз? Айвондамиз, ахир! Уйга кирайлик!

— Жонгинам! Ахир, ҳамма ухляяпти...

Мен оғзимни кафтим билан ёпдим. Кўзимдан ёш қайнаб чиқди. Руҳим бирам енгил, кўнглимда зарра фашлик йўқ, ҳаёт бирам ширин эдики...

Айвондан саноқсиз бўсалар товуши эшитилди. Бошимга кўрпани тортдим.

* * *

Дарвозамиз ёнидаги бодом шоҳларида фунчаларнинг учлари кўриниб қолибди. Нечук? Ахир, совуқнинг шахти ҳали баланд-ку! Шошқалоқ бодом! Кечаги туманга аччиқма-аччиқ фунчалаган қайсар бодом! Бечора бодом... Совуқ уриб кетади энди...

Жун кўлқопларимни қўлларимга тортдим. Изгирин кафтларимни чақар эди. Бошимдаги шарфимни тузатиб қўйдим-да, кўча бошига қараб кетдим. Ишқилиб, дарсга кечикмасам бўлгани...

* * *

— Сенга нима бўлди, қизгина? Кўзларинг киртайиб кетибди-ку!

Назира опа рўпарамда менга синчков кўзларини қадаб ўтиради. Опанинг нигоҳига бардош бериш қийин, қорачиқлари ичингиздаги бутун сирингизни ёритиб юборадигандек туюларди.

Кўзларимни ярим юмиб, кафтларимдаги чандиқларимни стол қиррасига ишқай бошладим.

— Мазанг йўқми?

— Йўғ-э, соғман...

— Шунақа де...

Опа қошлигини хиёл кўтарди. Лекин индамади.

Шу пайт ташқарида қадам товушлари эшилтилди. Бу қадамни мен бошқа ўнлаб қадам товушлари орасидан бехато таний олардим. Бу каби бир маромда қаттиқ босилган оёқдан чиқадиган товуш факат Хуршид аканинг одимидан чиқарди.

Сал ўтмай, қадам тинди. Эшикда Хуршид aka кўринди.

Биз тезгина ўрнимиздан турдик.

У менинг саломимга енгилгина бошини иргаб қўйди-да, Назира опага юзланди:

— Қандайсиз, Назирахон? Соҳибжон яхшими?

— Шукур. Узингиз?

— Раҳмат. Сал қоғозларимни тартибга солиб олай... Янаги ҳафтадан янги иш...

— Шунча гап бўлган экан-у, айтмасангиз-а? Соҳибжонга айтсан, “билмасмидингиз” деб кулади...

Хуршид aka индамай кулимсиради-да, чиқиб кетди.

Опа бошини чайқаб қўйди. Кейин бориб эшикни зичлаб ёпиб келди. Мен ҳамон қотиб турардим. Опа менга ҳайрон бўлиб қаради. Кейин қўлларимдан тутиб диванга ўтқазди. Қўллари билан иягимдан кўтариб ўзига қаратди.

— Рангингда ранг йўқ. Нима бўлди?

Беихтиёр кўксимдан оғир хўрсиниқ отилиб чиқди. Алам юрагимни гижимлар эди. Кимнингдир елкасига бошимни қўйиб тўйиб ийфлагим, дардимни тўкким келарди. Шунда худди енгиллайдигандек, дилимга муздек малҳам босиладигандек. Лекин бу кўзим қургур қатра ёш тўкмасди.

Охири опанинг тоқати тоқ бўлди.

— Ерілсанг-чи! — деди у. — Ё бошқа дардкашинг борми? Бўлса, айт, олиб борай, енгил тортасан.

Дарвоқе, менинг даркашим борми ўзи? Мен бечоранинг на яқин дугонам, на опам ё синглим, на онам бор. Юрагимни ҳатто кенноҳимга ҳам очолган эмасман. Акамдан эса уялман... Ким у — ҳамдard, ҳамдам? Йўқ!

Бошимни чайқадим. Опа бир зум ачиниш билан боқди-ю, секин бошимни бағрига олди. Сочларимни, елкаларимни силай бошлади. Бир вақтлар онам мени худди шундай эркаларди...

— Қизалофим, — шивирлади опа. — Мунча ёлғиз бўлмасан...

Мен яна хўрсиндим.

— Опажон, қийналиб кетдим...

— Қим қийнади сени?

— Ўзим...

— Нега?

— ...

— Нега жимсан, қизим?

Мен отилиб келаётган оғир хўрсиниқ аралаш шивирладим:

— У... кетяпти... Энди нима қиламан, опажон?

Назира опа жим қолди. Кейин елкаларимдан маҳкам қучди:

— Ким “У”? А? Хуршид эмасми?

— Ҳа...

Опанинг қўллари бир муддат бўшаши. Кейин аввалгидан ҳам қаттиқроқ кучоқлади.

— Бечорагинам... — деди у. — Сезувдим-а... Хуршидга ҳамроҳ бўлиш қийин... Тавба, шу индамаснинг нимасини яхши қўрасан? А? Пойингга не-не йигитлар йиқилса арзийдиган қизсан, ахир!

Опа юзларимдан тутиб ўзига қаратди.

— Қани, менга қара-чи! Э худо, энди нима қилдик! Куйма, йиглама, керак бўлса, сенинг кўйингда Хуршид куйсин, тушундингми? Сен — Мағрурасан!

— Мағрура бўлиши истамайман!

— Нега, жиннивой?

— Истамайман, тамом!

Опа астагина кулди.

— Менинг қизиммисан? А? — деб сўради.

— Ҳа.

— Журъатинг етадими?

— Нимага?

— Хуршидга ўзинг айт!

Чўчиб тушдим.

— Йўқ, — дедим жон ҳолатда. — Айтотмайман... Ундан кўра, кетаверсин, садқа сар!

Назира опа кулиб юборди. Кейин пешонамга сочилган калта соchlаримни қўллари билан авайлаб четга қайирди.

— Соchlаринг мунча мағрур? Қара, бўй бермайди-я...

Бир қанча вақт қолгандан кейин:

— Яна дарсинг борми? — деб сўради.

— Ҳа. Тўртинчи курсларда, бир соатгина.

— Майли, дарсингга борақол. Фақат йиглама. Хўп-а?

Мен бош силкидим.

* * *

*«Эй кўнгул, бу йўлда не гамдур санга,
Ким, хаёли ёр байрамдур санга.
Севдунг ўз ҳаддингдин ортуқ ёрни,
Гар сени куйдурсалар, камдур санга».*

— Нега Лутфийдан ўқияпсан? Биз Завқийни ўрганяпмиз-ку!

Хайрула энгагини қашиди.

— Қиёсламоқчи эдим-да...

— Лутфий билан Завқийними?

— Йўғ-э...

Хайрула довдираб қолди.

— Утири, Хайрула. Сен бир нарсани унутиб қўяётганга ўхшаяпсан.

Лутфий билан Завқийнинг орасида беш юз йилдан ортиқ давр бор. Завқий яшаган давр Лутфий замонасига умуман ўхшамайди. Завқийнинг ҳеч кимга ўхшамайдиган шижаотлари бор.

*«Нетай, Завқий, шавқинг бўлсин зиёда,
Жоним ол, деб ханжаримни излайман...»*

Кўряпсанми, Хайрула, бундай сатрларни ёзиш учун фақат Завқий бўлиш керак. Сен уни Лутфий билан таққослама! Яна нима дейсан? — сўрадим Хайрулланинг кўл кўтарганини кўриб.

— Опа, боя сўзимни охиригача эшитмадингиз-ку!

— Шунақа де? Майли, айта қол бўлмаса.

Хайрула ўрнидан турди. Китобини парта устига тикка тираб қиррасига кафтларини босди.

— Лутфийнинг ғазалларида майнинлик, шу билан бирга хоксорлик бор. Унинг буюклиги ҳам камтар. Яъни, у камтарона буюк шоир.

— Буни қара-я, — ажабландим мен. — Қани, давом эт-чи!

— Завқий ҳақиқатан шижаатли шоир. Лекин унинг шижаоти камтарона. Завқий ҳам жуда хокисор одам. Қани, айтинг-чи, ўхшамайдими улар?

Бутун аудитория жимиб қолди. Ҳамма менинг жавобимни кутар эди. Мен эса нима дейишга ҳайрон эдим. Хайрула ҳеч қачон хаёлимга келмаган фикрни айтган эди. Гапи тўғрими, ё нотўғрими, бир нима дейиш қийин, чунки бу қайсар йигитча барибир сўзидан қайтмас, етти ухлаб тушга кирмайдиган далилларни топа билар эди.

— Хайрула, — дедим ниҳоят. — Мабодо ўзинг шеър ёзмайсанми?

— Мен шоирлик даъво қилмайман, опа.

- Унинг амакиси шоир, — деди курс сардори.
 - Ким? — сўрадим мен. — Балки танирман?
 - Танимасангиз керак.
 - Лекин исми-шарифини айтишинг мумкинди?
 - Унинг исми-шарифидан эмас, тахаллусидан танишади. Музаффар Илҳом деган шоир.
- Ажаб, бу исмни мен хотиржамлик билан қаршиладим.
- Ҳа. Танимас эканман.

* * *

- Усмонов яна аввалги ишига қайтибдими?
- Акам чойига оққанд бўлагини солар экан, менга бирров қаради.
- Ҳа. Қаердан эшита қолдингиз? Ҳа-я... Менинг акамни қўплар танийди...
- Акам бу сафар негадир кулмади. Синчков кўзларини мендан узмай чой ҳўплади.
- Мабодо, Тил-адабиёт институтига ўтмайсанми?
- Нима қиласман у ерда?
- Ишлайсан!
- Мабодо, — дедим шу сўзга ургу бериб, — у ерда ишлагим келса, ўзим ҳам айтаверардим... Ўша Усмоновга!
- Нега энди бунақа оҳангда гапиряптилар, хўжоним? Усмонов хафа қилдими?
- Оҳангим туппа-тузук!
- Ҳа, жаҳл аралаш туппа-тузук оҳанг! Яна бу жаҳлоимни менга мақташади денг!
- Ким? Усмоновми?
- Йўғ-а, Пўлатов!
- Йўқ, ака, менга университет дуруст!
- Ҳа, майли... Бизнинг бурч — бир оғиз айтиб ўтиш... Ҳоҳланг, қулоқ солинг, ҳоҳланг йўқ. Эсиз... Пўлатов жуда мақтоворди-да сени!

Айвонга олдинма-кейин кириб келган қизчаларини кўриб акам шу заҳоти жим бўлди. Кейин бир оз вақт Лоланинг ўқишини суриштириди, Лайлонинг бидир-бидирига қулоқ солди, онасининг ёнида, баланд стулчада ўтириб, бўйинсочиғига тўкиб ширгуруч еяётган Шавкатжоннинг оғзини артган бўлди.

Овқатдан сўнг ошхонада идиш-товоқларни юваётсам, кеннойим кирди. Косаларни жавонга тахлаган бўлди.

- Мағрура, — деди ўнғайсизланиб, — боя акангиз сизга айттолмади...
- Тинчликми? — дедим бошимни қўтармай.
- Пўлатов сизни келинликка сўрабди.
- Келинликка? Ўғли кичкина-ку!
- Ўглига эмас, дўстига.
- Ҳа...

Индамай қозонни юва бошладим.

- У сизни яхши таниркан...
- Шунақа денг?
- Акангиз ҳам таниркан уни. Яхши одам деяпти...
- Шундайми?
- Фақат... Даврон акам нима дейишга ҳам ҳайрон. Чунки...
- Чунки менинг нима дейишмни билмайди, тўғрими? Мен ўжар бўлсам...
- Кўйсангиз-чи...

Қозонни бир ёнга қийшайтириб ювиндини тўқдим.

— Акангиз кўнмабдилар. Лекин Пўлатов қўярда-қўймай... Ишқилиб, ўзлари бир гаплашиб қўришсин, дебди-да!

— Уф... Ҳа, яхши. Эртага эрталаб саккиз яримда Беруний метро бекатидан чиқаверишда кутсин. Ва мен борарман!

- Балки бошқа вақт, бафуржа гаплашсанглар бўлармиди?

— Менимча, ярим соат етарли. Ундан кейин университет йўли дараҳтзор йўлка.

Хиёбоннинг нақ ўзи! Бўлаверади!

Қозонни газ ўчоқقا ўрнатиб, тувофини ёпдим.

Кеннойим кулди.

- Ҳатто у ким деб ҳам сўрамадингиз-а?

— Вақти келса билармиз. Мени яхши таниркан-ку! Фалончиман, дер?

Кеннойим бош чайқаб қўйди.

...Одатдагидек айвонга ёндош хонада, дадам қаламда белгилар қўйиб ташлаган

“Антик адабиёт тарихи”ни титкилаб ўтирадим. Бош томонимда дадам Бухородан олиб келган ўша мис чироқ ёниб туар, гилам устидаги магнитофондан Фаусто Папетти кўйлари тарааларди.

Айвондан акамнинг овози эшистилди. У телефонда гаплашар эди.

— Ҳа, эртага... Энди бир нарса дейишим қийин, Соҳибжон ака, ўзингиз тушнасиз... Ҳа... Синглиминг кўнглини ҳам билай-чи... Ҳўп...

Туриб эшикни зичлаб ёпдим. “Энди Пўлатовнинг дўстига келин бўлиш етмай турувди”, дедим гўё бирорга айтиётгандай...

* * *

Мен туш кўришни ёмон кўрардим. Бу ўша — мен кафтимга чандик солган кунларимдаги нотинчлигим, кейинги тунларимдаги алаҳсираш аралаш алоқ-чалоқ тушлар-у, тонг олди бедорликларимдан безиллаганим оқибати эди.

Ўша вақтлардан бери кўпинча тун оққунча ўзимни уринтириб ўтиар, охири чарчокдан фувиллай бошлаган бошим ёстиқقا етар-етмас уйқуга кетар эдим. Ва албатта, жуда кам туш кўрардим.

Мана ҳозир ҳам афсонавий Тезейнинг кекса Гекалага¹ мурожаатини ўқиб ўтирибман. Папеттининг кўйлари учинчи бор тараляпти.

Айвондаги соат икки марта бўғилиб занг урди. Китобни очиқ ҳолича ёнимга кўйиб ўрнимдан турдим.

Шу заҳоти оёқ кафтларимда гўё ўнлаб чумоли бир вақтда ўрмалаб қолди. Тиззаларим бир вақтнинг ўзида баравар букилди-ю, мен гиламга ўтириб қолдим. Тиззаларим кўзини, болдиrlаримни кафтларим билан ишқай бошладим. Қон юриши сал тезлади, шекилли, оёқ кафтларимдаги жимираш босилди. Магнитофонни ўчиридим. Кейин уни кўтариб бувимнинг комоди устига олиб қўйдим.

Китобга қўл узатишим билан сирғалиб оёқ остига “тап” этиб тушди. Олиб жавонга, ўз жойига қўя бошладим. Китоблар зич тахланган эди. Кўулларим билан улар орасини очмоқчи эдим, китобим яна ерга тушиб кетди. Чарчабман, шекилли. Китобни шундоққина жавон устига қўйиб, чироқни ўчиридим. Қўз олдимни қоплаган қоронгилиқда тусмоллаб эшикни топдим. Амаллаб хонамга етиб олдим. Чироқни ёқмай каравотимни пайласлаб топдим. Ими-жимида ечиниб кўрпага кирдим. Кўзим юмилиши биланоқ уйқуга кетдим.

Уйқум тинч эди. Туш кўрганим ҳам йўқ. Фақат тонг чофи кўзим ўз-ўзидан очилиб кетди. Нимадир мени уйғотиб юборганди. Кўзларимни катта очиб шифтга тикилдим. Фанердан “ховуз” шаклида ишланиб, тўрт чеккасига юлдуз шамоили, ўртасига қўёш рамзи қоқилган шифтнинг чап бурчидан марказга қараб ингичка нур тушиб турарди. Икки ёнга сурилган оғир дарпардалар тагидаги юпқа тўр парда ортидан ёришиб келаётган осмоннинг бир бурчи кўринади. Кўксимдан енгил хўрсиник учди-ю, яна уйқуга кетдим.

Ажаб, шу бир чимдим уйқумда дадам кўринди. Кейин ойим...

...Мен қаердандир келдим. Дадам очиқ дарвозамиз ёнида турарди. Ўша эллик ёшидаги қиёфаси. Юбилейида кийган қора костюм-шымда, катта тугунли тим қора бўйинбоги оппоқ ёқаларини маҳкам тутган, томирлар бўртган суякдор қўлларини қовуштирган...

— Мунча кечикмасанг, қизим? Онанг хавотир оляпти-ку! — деди.

Шошиб ҳовлига кирдим. Ойим айвонда кўрпа қавиб ўтиради. Ёнида янги қопланган кўрпалар тахлоғлиқ. Негадир ойим умрининг сўнгти йилларидағи қиёфасида. Ажинлар кесган пешонасида тер томчилари, озгин қўллари билан кўрпа қатини тушиб, қатимни узун тортар эди. “Тавба, ойим кўрпа қавишни билмасди-ку!” деб ўйладим мен. Ва шу заҳоти уйғониб кетдим.

Анчагача ҳеч нимани тушунолмай шифтга қараб ётдим. Бир вақт эшик очилиб, Лола кирди. Оёқ учida юриб келиб устимга эгилди.

— Уйгоқмисиз, амма?

— Уйгоқман, асалим.

— Нега турмаяпсиз?

— Ҳозир тураман.

— Халатингизни олиб берайми?

— Майли.

Кийингунимча дастёргинам ўрнимни тузатиб, ҳатто ёстиғимни қўлчалари билан уриб-уриб шишириб ҳам қўйди.

Ювиниб-тараниб келганимда ҳамма дастурхон атрофида жам эди. Акам сало-

¹ Тезей ва Гекала – Қадим юнон адабиёти эллинизм даври достонлари қаҳрамонлари

мимга алик олиб, индамай чойини ичаверди. Охири фотиҳа ўқиб ўрнидан турди. Лайлонинг бурнидан чимдиг эркалаган бўлди, Лоланинг диккайган соч ўримидан ҳазиллашиб тортқиласди. Кейин кенномий тозалаб кўйган пальтосини эгнига илиб, қақажон Лола артиб ярақлатган ботинкасини кийиб ишига кетди.

Кенномий қизчаларини мактабга жўнатиш тадоригини кўра бошлади.

Мен ҳам апил-тапил дастурхонни йигиб кийина бошладим.

Ховлига тушганимда кенномий менга бош-оёқ назар солиб елкаларини қисди:

— Нега бирдан шим кийиб олдингиз? Кўйлак кийсангиз бўлмайдими?

— Ясанишга зарурат кўрмаяпман.

— Кўйлакда бошқача кўринасиз-да...

— Бошқача кўринишни хоҳламайман, кенномий.

Кенномий уф тортди. Мен унинг елкаларидан кучиб юзларига юзимни босдим. Ундан сут иси келарди.

Кенномий ийиб кетиб, пешонамдаги калта соchlаримни тузатди.

— Бора қолинг, — деди. — Куттириб қўйманг.

Кейин яна уф тортди.

Лиқ тўла чарм сумкамни кўтариб дарвозага йўналдим. Йўлак адогига етмай, сумкамнинг тасмаси узилиб кетди. Орқага қайтдим.

Тасмани улашга вақт йўқ эди. Кичкина сумкамга майда-чуйдаларимни жойлаб, китобларимни кўлда кўтарганча йўлга тущдим.

* * *

Вагондан чиқа солиб, қоронги туннель пештоқидаги электрон соатга қарадим. Саккиздан ўттиз саккиз дақиқа ўтибди. Зиналарда одам тирбанд, йўловчилар — аксарият ёшлар тўлқин-тўлқин бўлиб юқорига ўрлашар эди. Демак, тепага чиқкунча бироз вақт ўтади.

Бечора, роса ўн дақиқа кутаркан-да! Ким бўлди экан у “Пўлатов дўстининг ўғли?”

Китобларим оғиргина эди. Кўлларим толиб кетди. Зиналардан бир маромда кўтарилаётган тўлқин билан қадамба-қадам юқорига кўтарилидим. Кейин тўхтаб, атрофга разм солдим. Қани у — “бизни кутган?”

Атроф тўла одам. Лекин қайси бири? Уз-ўзидан кулгим қистай бошлади. Афанди! Метро бекатидамиш! Бу ерда одам бир-бирини тугул, ўзини йўқотиб қўядику! Хўп, ана, келди дейлик. Мен уни танимайман. У мени танийди. Қачон таниб улгурибди? Масалан:

— Мен сизни яхши танимайман, — дейди у.

— Мен нега сизни танимайман? — дейман мен.

Агар таниш чиқса-чи? Унда нима дейман?

Бир пайт ортимдан таниш овоз эшитилди.

Шошиб ўгирилдим. Баҳтиёр, кўлтиғида ўша таниш портфели, барваста қадди бироз эгик, бир нималарни тинмай гапирав, рўпарасида эса, менга орқа ўгириб Хуршид ака турар, жимгина ҳамроҳини тинглар эди. Астагина атрофга қарадим. Мени ҳеч ким изламаяптимикин? Бир вақт Баҳтиёр мени кўриб қолди-ю, баралла:

— Мағрура! — деб чақириди.

Шу заҳоти Хуршид ака ортига ўгирилди.

Ёнларига бордим.

— Ассалому алайкум, — дедим овозим титраб.

Хуршид ака саломимга жавоб қайтариб, китобларимни қўлимдан олиб қўйди. Мен ҳатто оғиз очишга ҳам улгуролмай қолдим.

Баҳтиёр, думалоқ қўзларини катта очиб:

— Ўтиб кетаётган эканлар, кўришиб қолдик, — деб изоҳ берди.

Мен нима дейишимни билмас эдим.

Уни бу ерда учратганим галати эди. Бу бир томони менга ёқди ҳам. Ахир, уни кўрмаганимга олти кун бўлган эди.

Мен кунда йўлакдан ўтаётуб, беихтиёр унинг хонаси томон қараб қўярдим, лекин у ерда Султонов ўтирган бўларди. Ҳар кун эрталаб Султонов хонамизга бирров мўралаб Назира опага салом бериб ўтарди. Назира опа ҳам кундалик одати бўйича аввал бироз бизнинг хонада ўтириб, бир-икки оғиз сўзлашиб, кейин хонасига кириб кетарди. Лекин у менинг олдимда Хуршид ака ҳақида гапирмай қўйган эди. Энди эса Хуршид ака мени танийдиган, аммо менга номаълум йигит билан учрашиш учун келганимда рўпарамда турибди.

Хуршид ака акамни сўради, кейин яна Бахтиёрга ўзининг ишлари тўғрисида бир-икки оғиз сўз айтди.

Сўнгра соатига қаради:

— Яна ўн дақиқадан кейин дарс бошланади. Вақтингизни олдим-а? — деди-да, китобларимни кўлимга тутқизди.

Ҳа-я, вақт бўлиб қолибди-ку! “Анави”нинг келмаганини қаранг! Ё мени ўн дақиқагина кутиб, тоқати тоқ бўлиб кетиб қолдимикин?

Бахтиёр Хуршид аканинг кўлини иккала кафти орасига олиб хайрлашди. Хуршид ака эса “Нексия”сига ўтириб, жўнаб кетди. Машина ортидан қараб қолар эканмиз, Бахтиёр:

— Хуршид ака яхши одам-да, — деди. — Машинасидан тушиб келиб кўришди-я! Бўлмаса мен кимман? Мендақа фан номзодлари тўлиб ётибди. Усмонов эса битта!

* * *

Метро вагони қоронгилик кўйнида одатдаги тезлиги билан зинғиллаб бораради. Мен кўлларимни тиззамдаги китобларим устига беҳол ташлаб, кўзларимни юмдим. Шу асно поезд бекатлардан бирида тўхтади-ю, эшиклар шарақлаб очилиб-ёпилди. Олдимдан олдинма-кетин ўтган икки кишининг шарпаси сезилди-ю, сал ўтмай ёнимга кимдир енгилгина чўқди. Димоғимга нотаниш нозик бир ис урилди. Шивир-шивир эшитилди. Кимдир паст овозда, эркаланиб:

— Кўйворинг, — деди.

Кўзларим ўз-ўзидан очилиб кетди. Ихтиёrsиз тарзда қайрилиб қарадим.

Ёнгинамда йигирма ёшлардаги дўмбоқцина қизни кўрдим. Унинг елкаларига елка тираб ўтирган ўттиз беш ёшлар атрофидаги тўлагина жингалаксоч йигит қизнинг тиззасидаги сумкачасини тортқилар, қиз эса нозланиб, йигитнинг кўлларини итарар эди.

Шу вақт йигит негадир илкис бошини кўтарди. Менга қаради. Ва... оқариб кетди. У... Музаффар Илҳом эди!

Юрагимда нимадир “зирқ” этди. Музаффар Илҳом сумкачани кўйиб юборди. Қиз ҳам бошини буриб менга қаради. Думалоқ кўзларида ҳайронлик, қайрилма кипприкларини пирприратиб юзларимга тикилди. “Шўрлик қиз, — ўйладим беихтиёр. — Илойим Нилуфарнинг кўйига тушмагин-да...”

Китобларимни бағримга босиб ўрнимдан турдим. Эшикка йўналдим. Эшик ёнидаги йўловчиларнинг орасига сукилиб кирдим. Одамларнинг панасида туриб, яна бир бор Музаффар Илҳомга қарадим. Анча тўлишибди. Иккала қоши ўртасидаги кескин чизик пешонасининг ярмигача чиқиб таққа тўхтаган, иягининг остидаги териси бироз тортишган, бағбақаси салгина осилган...

Бошини ёнга бурганда саватдек соchlари чироқ ёргида ғалати бир тус — қиз-ғиштоб қорамтири бўлиб кўринди. “Бўябди! — ўйладим мен. — Соchlарини бўябди!”

Тезда юзларимни четта бурдим. Шу онда китобларимни кўлимдан олаётган Хуршид ака кўз олдимга келди. Қора-ю кумуш аралаш қуюқ тўлқинсимон соchlari шабадада билинار-билинмас тўзгийётган Хуршид ака менга дунёдаги бор эр-какларнинг энг келишгани, энг кўрками бўлиб туюлди.

Шу тобда кўнглимда ажаб бир енгиллик сездим. Мен шу йиллар ичида чеккан изтиробларимни, юрагимдаги бор аламларимни унутдим. Нафақат кафтимга, бутун умримга оғриқли чандиқ солиб кетган Музаффар Илҳомни ҳам кечирдим. Ахир, мана шу чандиқлар азоби билан Хуршид акага рўпара келган, кўнглимдаги бор дардларим билан ҳам уни сева олган эдим.

Кўксимдан чукур хўрсиник учib чиқди.

— Хуршид ака... — шивирладим беихтиёр.

* * *

*Дардим айтдим, тошлар ёрилди,
Осмонни синдириди гулдирак.
Муҳаббат кўнгулни не қилди?*

Фахриёр

— Айтган одаминглар келмади, — дедим кеннойимга.

— Йўғ-э, — кеннойим шошиб қолди.

— Ҳа! Мен уни роса кутдим.

— Вой, тавба!

Кеннойим мени бошдан-оёқ кузатиб чиқди. Кейин кафтларини юзларига босиб ўйланиб қолди.

— Ишқилиб кечикиб бормаганмидингиз?

— Бор-йўғи ўн дақиқага кечикдим. Ўн дақиқа эса кута-кута кетиб қолиш учун асос эмас.

Кеннойим яна ўйланиб қолди. Мен эса китобларимни бағримга босганча эшик кесакисига суюниб кулиб туравердим.

Кеңнойим менга синчков кўзларини қадади.

— Ўзингиз уни қанча кутдингиз?

— Ўн дақиқа.

— Бир ўзингиз?

— Нега энди? Бахтиёрни кўрдим. Собиқ деканимиз билан гаплашиб турган экан.

— Усмоновми?

— Ҳа. Мен икковлари билан гаплашиб турдим. Кейин кетдим.

Кеннойим негадир жилмайди.

— Лекин мен энди учрашувга чиқмайман.

— Нега?

— Чунки ҳеч қандай Пўлатовнинг дўстига қелин бўлмайман. Мен Хуршид акани яхши кўраман! Эртагаёқ ўзим бориб унга айтаман. “Хуршид ака, мен сизни яхши кўраман!” — дейман! Хуршид ака нима деса деяверсин! Мен фақат уни дейман!

Бу сўзлар қандай қилиб оғзимдан чиқиб кетганини ўзим ҳам билмай қолдим. Ўзимни бунчалар дадил тутишимдан ўзим ажабланар эдим.

Кеннойимнинг кўзлари ҳайратдан катта очилиб кетди.

— Шошманг... Қанақа Хуршид ака?

— Хуршид ака факат битта! У ўша сизлар билган Усмонов! Ҳа!

— Вой ўлай... Ахир, у сиздан ўн етти ёш катта-ку!

— Буни ўзим ҳам биламан, катта-катта болалари борлигини ҳам биламан, унинг бешта невараси борлигини ҳам биламан! Би-ла-ман! Ҳа! Мен ҳаммасини биламан! Лекин кўзларимни чирт юмаман! Мен яхши кўраман уни!

Овозимни йифи бўға бошлади. Китобларимни маҳкам қисиб остонога чўқдим.

Бошимни тиззаларимга кўйиб хўнграб юбордим.

Кеннойим ёнимга чўнқайиб соchlаримни узоқ силади.

— Сизни қаранг-у, — деди секингина. — Бечорагинам... Одамда дўст нечта бўлади?

...Ҳавонинг авзи тез бузилди. Бирдан шамол туриб томдаги тунукаларни тарақлата бошлади. Кеннойим сапчиб ўрнидан туриб ҳовлига югурди. Дордаги кирларни йига бошлади. Мен ҳам ярим-ёрти қуриган ёшларимни артдим-да, бағримдаги китобларимни бир чеккага қўя ҳовлига чопдим.

Шамол Шавкатжоннинг дорга қистиргичсиз ташланган иштончаларини юлқилар эди. Уларни тезгина йигиб бағримга тўплайвердим. Кеннойим ҳовлининг нариги бурчида, кучоги тўла сочиқлар, шамолда чеккалари ҳиллираётган дастурхонни ўзига тортар эди.

Қўшнининг ҳовлисида очиқ қолган дераза шарақлади.

Айвондан Шавкатжоннинг йигиси эшитилди. Иккимиз баравар уйга югурдик.

Шавкатжон дераза токчаси ёнида турар, чамаси шовқин-сурондан қўрқиб кетган эди. Онасини кўриб оғизчасини қийшайтирганча кўз ёшларидан ютоқиб кела бошлади.

Кеннойим қўлидаги кирларини шоша диванга ташлади-ю, чўнқайиб кучоги-ни очди. Бола онасининг бўйнига кўлчаларини ташлаб, жимит оёқларининг дам бирини, дам иккинчисини кўтарганча кеннойимнинг бағрига маҳкамроқ тиқилди.

Она-болага бир муддат қараб турдим. Уларнинг бу туриши меҳр аталмиш суратнинг ўзгинаси эди, назаримда.

Индамай кирларни тахладим.

Кейин остона ёнбошида, эшик чеккасида қолган сумкам билан китобларимни кўтариб, хонамга йўл олдим.

Ташқарида момакалдироқ гумбурлади. Яна Шавкатжоннинг йигиси эшитилди.

Мен момакалдироқли шаррос ёмғирни яхши кўрардим. Юрагим орзиқиб дерага яқинлашдим. Китобларимни дераза токчасига қўйдим. Бири пастга тушиб кетди. Уни кўтараётсан, ичидан тўрт буқланган қофоз тушди. Олдим. Димоғимга аччиқ тамаки иси урилди. Нафасим тиқилиб қатларини очдим.

Шойисимон оқ қоғозга чиройли настаълиқда битилган мисралар:

*Ишқ била бўлдум масал, савдо била афсона ҳам,
Шукрилилоҳ ким, яна ошиқмену девона ҳам.*

*То унутди ошнолиғ расмин ул бегонаваш,
Ошно йиглар менинг ҳолим кўруб, бегона ҳам.*

*Гам туни мендурмен оҳу ашкдин шамъим ўчуб,
Бошима емрулгали турмиш бузуғ кошона ҳам.*

*Элга меҳринг бор, бузуғ кўнглумга ҳам бир зарра боқ,
Ким қуёшнинг тобидин маҳрум эмас вайрона ҳам.*

*Эй малоҳат шамъи, ҳар соат мени куйдурмаким,
Кўп ёрумас шамъ агарчи ўртанир парвона ҳам.*

*Йўқ, бу дайр ичра берур жоми ажсал таъмини май,
Ким эрур паймона тўлмоқдин нишон паймона ҳам.*

*Эй Навоий, гар десанг ул турфа қушни сайд этай,
Риштаи жисмингни дом эт, кўз ёшингни дона ҳам.*

Мисралар остида сулсда ёзилган қандайдир сўз. Деразага яқинроқ келтирдим. Жимжима япроқ шаклида ёзилган сўзлар имзо эди. “Адои Хуршид”!

Қўзларимга ёш қалқди. Беихтиёр варакни кўксимга босдим.

Ташқарида яна момақалдириқ гумбуzlади. Шамолдан деразалар шарақлааб очилиб кетди. Тўр пардалар шишиб, учлари ер бағирлааб учиб, ниҳоят, баландлади ва бўйим баробарида ҳилпирай кетди.

Осмонда чақмоқ чақди. Кўк бағрини тилиб, бир зум ёнди-ю, кўкимтириз қолдириб ўчди. Зум ўтмай яна чақнади. Бу сафар осмон кўксига саноқсиз майда томирлар тарқади. Улар ўчиб улгурмай, қарсиллаган овоз қулоқни ёрап даражада янгради.

Кейин бирдан ёмғир шовуллади.

Яна қофозни ўқий бошладим:

*“... бузуғ кўнглумга ҳам бир зарра боқ,
Ким қуёшнинг тобидин маҳрум эмас вайрона ҳам...”*

Мунча чиройли ғазал бўлмаса! Нега шу пайтгача кўзим тушмаган экан?
Яна:

*“... гар десанг ул турфа қушни сайд этай,
Риштаи жисмингни дом эт, кўз ёшингни дона ҳам...”*

Хуршид ака бу мисралар билан нима демоқчи?

Боя қеннойим нима деди? “Одамнинг дўсти нечта бўлади?”

Ахир!.. Битта! Одамнинг дўсти битта бўлади!

Хуршид ака! Индамас! Тошбағир...

Ёмғир кучайиб кетди. Саноқсиз томчилар шовуллааб тўкилар, ерни аямай савалар эди.

Бу — баҳор ёмғири эди. Кечиккан баҳор, ниҳоят, ҳовлиқиб келганди.



НАЗМ



Қамбар Ота

НОРДУМ НАРЛАРИН СЕИНА
БЕРГАМДАН

Ер думолок

Билолмадим, сирларингни сирли фалак,
Бошим узра кўк гумбази тубсиз — йирок.
Оёғимнинг тагидаги ер думолок,
Билолмадим, сирларингни сирли фалак.

Ўтдан олиб, ўтга солди дунё ишқи,
Гоҳ ёндириб адо қилди бойлик рашки.
Бу жонимни муҳаббатга фидо қилдим,
Аммо, севги ханжаридан нидо қилдим.

Ер айланар, айланади азиз бошим,
Эртаю кеч ҳаяжонда ичу тошим.
Қалб покиза ниятларни чамалайди,
Емонликлар тубанликда юмалайди.

Топган мулким — фақат эзгу ҳавасимдир,
Армонларим — яхшиларга ихлосимдир.
Ҳаётимда эришганим — ютуқларим,
Умрим безаб юритувчи қутлуғларим.

Минг яширманг, минг қўлламанг, гувоҳларим,
Билиб-бilmай қилиб қўйган гуноҳларим,
Чораси йўқ, кетар бир кун оҳ, думалаб,
Ер думолок, ер думолок, ер думолок...

Жаҳонларга бермас жаҳоним

Тасанно, дунёнинг саховатига,
Хадя этишил сенга неъматларини.
Таъзим бажо айла саловатига,
Жоним, азиз тутгин ҳимматларини.

Жаҳондаги барча асаларилар
Болидан саралаб тилингга бермиш.
Сулувлар сultonни мунис парилар
Гўзал хислатларни дилингга бермиш.

Табиат бисотин аямай, асло.
Кўнглинг истагини бажо айлабди.
Хусну малоҳатда бўлгин деб расо,
Зеболар ичида танҳо айлабди.

Ой ёгдуларига жисмингни белаб,
Жамолингга шайдо, сукли бокмишдир.
Сенга ўт сийналик, ёрқинлик тилаб,
Күёш юрагингда олов ёқмишдир.

Сендаги тиниқлик, юраги оқлик
Жаҳон жамолидан ягона тимсол.
Хусни мукаммаллик, мислсиз поклик
Хаёт йўлларингта таратар иқбол.

Баҳор бермиш турфа хушбўйларидан,
Лабинг гул япроги, соchlаринг сумбул.
Шаънингга таратиб хуш куйларидан,
Пойларингни ўпмишрайхону жамбил.

Қалбимнинг эркаси, дилим султони,
Етса молим ҳадя, етмаса жоним.
Сенга насиб этсин дилда армоним,
Жаҳонларга бермас тенгсиз жаҳоним.

Ишқ чақмоғи

Мұхаббатим ваъда этган гулгун баҳор,
Кўк гумбазин гумбурлатиб чақмоқ чақар.
Вужудимни яшнатиб ишқ ёлқинлари,
Юрагимни ёритади чақинлари.

Айни баҳор, ҳаётимга чечак тақиб,
Умрим юксак осмонида олов ёқиб,
Таъналарнинг ёмғирига кўмиб ташлаб.
Ўша чақмоқ қайга кетди дилим ғашлаб?

Тушларимда танҳо кўрган шўх малагим –
Кўлим етмас узокларда камалагим.
Оҳ, севгининг ўтларида куйолмадим.
Ишқнинг оташ-оловига тўйолмадим.

Айт-чи, нега, бунча шошдинг ёмғиргинам,
Сим-сим ёққин тақдиримга ғамхўргинам.
Баҳор чақсин шайдо кўнглим чақмоғини,
Топиб олай муҳаббатим сўқмоғини...

Севилиб, севиниб яша

Сулувим ҳаётда севилиб яша,
Кувончга ёр бўлгин, севиниб яша.
Мұхаббат қасрида қолиб кет мангур,
Инсоний покликка йўғрилиб яша.

Севгида бурчингни айлагин адо,
Қалбимга таратгин бир ишқли садо.
Асири эт, сеҳрингдан бўшатма асло,
Садоқат, меҳриннинг жонгинам фидо.

Шайтонлар хайлига ҳавасла бокма,
Гумонлар ўтида бағрингни ёкма.
Дил хуснинг жонимнинг дармони, эркам,
Чаккангга ҳеч соҳта чечаклар тақма.

Ҳар лаҳза қилмагин шубҳали сўрок,
Очиғин айта қол, сенга не керак?
Йўғига қарздорман, борини олгин,
Мұхаббат керакми, керакми юрак?

Севган ҳам севилган қалб мангур тоза,
Севгининг лаззати асалдан маза.
Яшамоқ нечундир, татимас ҳаёт,
Дунёда этмаса ким ёрни ризо. .

Бу боғнинг кўп қадри баланд

Бу боғнинг кўп қадри баланд,
Япроғида кулгай омад.
Чаманида тоза гулим,
Боқишилари суюқ-сўлим.

Кундузлари, кечаларда,
Турфа туман гунчаларда
Ернинг эрка ҳислари бор,
Вафосининг излари бор.

Яшиrolмай соғинчларин,
Ошкор этиб севинчларин,
Мехри яшнаб барқ уради,
Мұхаббати чарх уради.

Яйраб гулим, бағрин очиб,
Йўлларимга ифор сочиб.
Мени ҳар гал кулиб кутар,
Кувончларга тўлиб кутар.

Кўринггин

Энг ширин сўзларим атаб тераман,
Бир кун кўрингмасанг, тушда кўраман.
Юрагим дурларин сенга бераман,
Бебаҳо гавҳарим тез-тез кўринггин,
Тунларим ёритган юлдуз кўринггин!

Кунлар ўз майлича елаверади,
Юрагим соғинчга тўлаверади,
Сен билан гаплашгим келаверади,
Сўзлари ёқимли гулюз кўринггин,
Севимли дилкашим тез-тез кўринггин!

Бир лаҳза кўрмасам, дунё кўрингмас,
Юрагинг куйисиз дарё кўрингмас,
Мехрингнинг нурисиз зиё кўрингмас,
Қалбим осмонида ойим кўринггин.
Софинганим билиб дойим кўринггин!

Суратинг кўзимдан кетмагай асло,
Сенсиз қалб муродга етмагай асло,
Васлингиз кўчангдан ўтмагай асло,
Ҳамбаринг йўлида пешвоз кўринггин,
Ҳаёлламай бир дам, гулноз кўринггин!





Икром
Искандар

ЮРДИМНИНДА РАҲУМИИ КЎРДЖАКСАН ШОМЛАРДА

* * *

Субҳ.
Сизга ушбуни ёзурда
ёдингиз... сиз...
Гирдимда ел каби эсгандай бўлдингиз.
Васлингиз орзулаган озурда
кўксима ҳаводай тўлдингиз.
Титранди кўнглимнинг барглари,
тўкилди бор гарди –
кўнглим қалқиётган дардларин
шивир-шивир куйга гарқ қилиб
тонгдай тозарди...
Осмонча юксалдим мен бу дам,
бу саҳар осмонча семирдим,
мен сизнинг ёдингиз оқсан ҳаводан
симирдим, симиридим, симиридим...

* * *

I

Кишининг илиқ ўртасида тасодифан гуллаган,
бодом янглиф юрагимнинг шарорига талпинган
гулим, бодраб очилгандинг кўз ўнгимда, кўксимда,
мен ҳам туйкус шамол каби кириб бордим қалбингга.

Қаҳратонда, бир лаҳзада баҳорларни яшадик,
шу бир лаҳза умримизга етадиган жавриди
саробларнинг. Зоро, лаҳза тезда ўтди, тугади
тасодифий илиқликнинг муваққат бир мавриди.

Энди эса... Хотиралар аро тентиб кезганда,
теграмиздан «Салом»дан ҳам қисқа совуқ «Хайр»лар
эсар экан, илинамиз бир милтироқ юпанчга:
тасодифий учрашганлар-тасодифий айрилар.

II

Нечук нажиб тун эди – соchlаринг шалолоси
каби қуюқ ва қора – теграмга қуолганди.
Тутганмиди фалакни ишқимнинг оҳ-волоси,
юлдузлар ҳам яқиндай, чақиндай туолганди.

Ёнимда эдинг, жоним, чехрангда балқирди ой,
ёритарди кўзимни сим-сим оқсан шуъласи.
Нигоҳимни оқизиб борар эди бир чирой,
бир сочранг тун ва тошқин севгининг ашуласи...

Энди эса... Сенингсиз кезар эканман ҳар дам,
бул бўум-бўш кўчаларда нигоҳим сирғалади.
Ой фаромуш ҳолимга мўралар узоқлардан,
йироқларда милтиллар туннинг исирғалари...

*Майсалар назарида
биз бахтли яшяяпмиз,
Биз бахтли яшяяпмиз майсалар назарида.*

*Майсалар назарида
биздан бахтли одам йўқ,
Биздан бахтли одам йўқ майсалар назарида.*

*Масрур кездик майсаларнинг
ям-яшил назарини...
Бизга кўкламги гўша – майсаларнинг назари.*

*Тонг саҳарда юзинг ювган
кўзларимдай бедор сувга* *юрагимни чайиб олдим,
жоним бир мунғайиб олдим.*

*Тўлқинлар лол, дали-гули...
Қизғалдоғу олма гули.*

*Сўлиётган тунги гуллар чегарасида
янги, сўлим тонглар бошлаб келар расида,*

*тўзғир умр – гаройиб тарз ва гўзал таркиб,
тўклидади туйкусдан бу гулнинг бир барги,*

*фақат кўнгил осмон қадар юксалар, ўсар –
тут шохига қушдай ҳуркак қўнар илк бўса.*

*Кўзларинг ёмғирдан хўлмишми,
гулларинг очилиб сўлмишми?*

*Баногоҳ, лол этиб ул ёрни
намойиш этгали баҳорни
жисмингни қорларга кўмасан –
бир оппоқ меҳрга чўмасан.*

*Саросару сарсону саргардонлик даштида
саросима хаёллар-еллар чувалашдилар.*

*Кийиб улкан чорикдай, тинмадим бир-бир босиб –
оёғимдан ечилди ситамларнинг сахроси.*

*Дашту саҳроларни мен кездим пою пиёда,
ҳамроҳ тополмадим лек умидимдан зиёда.*

*Коронғуда бир шам ёнар ўксиниб,
ҳанжар тифи тилар туннинг кўксини.*

*«Улкан тунга бул жимитдай тиф надир» –
ジョンサラクディ қўён каби бир ҳадик,*

*ジョンサラクディ. Увиллайди, пишқирап
ташқарида туннинг қора қашқири.*

VI

Эй севиклим, севгилари — оби ҳаётим,
жоним аро шан таралган қоним-баётим,

додларимга манзил бўлган, додимга етган,
баргларининг бандларига бандилар этган,

жазира ма, қаххор чўлда ётганда караҳт
юрагимга қизил соя ташлаган дараҳт.

VII

Термуламан, нигоҳларим семирар. ул парининг гўзал ҳусну жамоли
Тоғдай улкан нигоҳларни емирав уфургувчи такаббур бир шамоли,

бу шамолга писандмасдир ҳеч бири,
йўловчилар ташлаб ўтган кўз қири.

VIII

Безовта кўзларингда нам, хавотирдалар недин,
кўлларинг кўлларимда типирчилайдилар бетин.

Бул сўнгсиз сукутларинг қайси бир қайгудан нишон,
бilmасман, не ҳадиклар бугун бунчалар паришон

ўйларинг самосида кузғунлар каби айланди?
Кафтларинг капитарлардай учиб кетмоққа шайланди.

* * *

Жавзо туни қошингнинг
қорасига қоришган,
бир дўғилда қалбингга
йўл топмоғим мураккаб.
Ўйим шую-умиддан
нимқоронғу ёришган
кўнглим кўниксин деб боз,
изн бергум юракка.

Дил. Соғинчга сайдир дил.
Майл билдирсан бас-да,
вужудимга эргашган
дил девона-да, дайди...
Ховлинг адогидаги
майсалар ўсган пастак
томга чиқиб тонггача
чиқишингни пойлайди.

Ай, ҳовлинг адогида,
айроликнинг догоида,
куйган дилим сирлари
том бошига сочилар.
Юрагимдан қон сизар
субҳи козиб чогида,
ёшдай потраб гирдимдан
қизғалдоқлар очилар.

Чиқмагайсан... Кетгайман...
Тун кулайди қора чоҳ —
кўзларингга, кўзингдай
ёришажак тонгларда.
Шабнам каби тек қотар
ўйноқ нигоҳинг ногоҳ —
Юрагимнинг рангини
куражаксан томларда.





«Гуноҳ унумилмайди, эзгулик ерда қолмайди...»

Бутун дунёнинг барча мамлакатлари ижтимоий — сиёсий ҳаётида хилмачил оммавий ахборот воситаларида энг катта ташвиш билан ўз ифодасини тошаётган муаммо — халқаро терроризм ва экстремизм эканлигига ҳеч қандай шубҳа йўқ.

Бу тасодифий ҳол эмас. Чунки инсоният янги минг йилликка қадам кўйган, ўз тараққиётининг мисли кўрилмаган чўққиларига кўтарилиган бир даврга келиб, шундай муаммога рўбарў бўлдики, унинг нафасини бутун дунё яқиндан сезмоқда.

Ҳозирги вақтда терроризмнинг тажовузидан ўзини холи хис қиласиган бирорта қитъя ёки давлатнинг ўзи йўқ. Худди вабо каби ер-юзининг кўплаб мамлакатларига ёйилиб бораётган бу бало-қазо эртага қаерни нишонга олишини ҳам олдиндан айтиш қийин.

Терроризмнинг кўлами кенгайиб, барча қитъалар ва мамлакатларни қамраб олаёттанлиги учун XX аср иккинчи ярмидан «Халқаро терроризм» деб атала бошлианди. Ҳозирги кунда халқаро терроризмнинг қўйидаги турлари мавжудлиги аниқланган:

Сиёсий терроризм — ташкилот ва шахсларнинг давлат бошқаруви, ижтимоий-иктисодий тузум ва ички сиёсатни ўзгартиришга йўналтирилган жиноий фаолият.

Иқтисодий терроризм — ташкилот ва айрим шахсларнинг стратегик аҳамиятга эга бўлган давлат мулкларини (ер, корхоналар, энергетика, сув ресурслари ва ҳ.к.) қўлга киритиш орқали иқтисодиётни вайрон қилишга йўналтирилган жиноий фаолият.

Диний терроризм — айрим диний экстремистик гуруҳларнинг турли диний широрларни илгари суриб, ҳокимиятни эталаб олишга йўналтирилган жиноий фаолият.

Этник миллый терроризм — маълум миллат вакиллари ва миллый гуруҳларнинг барча яшайдиган худуддаги бошқа миллат ва миллый гуруҳларга қарши қаратилган жиноий фаолият.

Функционал терроризм — давлат хизматчилари тартибсизлиги ва жамиятнинг куч ишлатадиган тузилмаларини издан чиқаришга йўналтирилган жиноий фаолият.

Жиноий (криминал) терроризм — турли жиноятчи элементлардан иборат босқинчи гуруҳларнинг ўғрилик, талончилик ва босқинчилик орқали ҳукуматни обўрисизлантириш, жамиятда қўркув ва ишончсизлик муҳитини вужудга келтириш учун йўналтирилган жиноий фаолият.

Жаҳоннинг қатор, хусусан, АҚШ, Туркия, Покистон, Саудия Арабистони, Россия, Кавказ орти ва бошқа мамлакатларида содир этилган террорчиллик хуржалари, терроризмни қачонлардир бир мамлакат доирасидан чиқиб, халқаро терроризмга айланганини тасдиқлади.

Кейинги йилларда бизнинг юргизмизда рўй берган холатлар ҳам айнан шу халқаро террорчиллик ҳаракатлари билан бевосита боғлиқ деб айтишга барча асослар бор. 2005 йилнинг 13 май кунги Андижон воқеалари ҳам бунга исботдир.

Республикамиз мустақилликка эришганидан кейин халқимизнинг маънавий-маданий меросига, тарихига муносабат тубдан ижобий томонга ўзгарди. Мамлакатимизда диний қадриятларга эркинлик бериди. Мана шундай шароитда, мамлакатимизга ва истибододан ҳолос бўлган қатор мамлакатларга нисбатан ҳам ислом таълимоти номидан иш кўриш, ўз давлати сиёсатини дин воситасида «экспорт» қилишга уриниш, шу йўлда турли хил фитналар уюштириш, бузгунчилик ҳаракатлари кескин кучайди.

80-йилларнинг охирида Марказий Осиёга, жумладан, «фундаментализм» ва «экстремизм» юяларининг кириб келишидан кўзланган мақсад диний қадриятларни қайтадан тиклаш эмас, балки минтақада барқарорликни диний ва миллатларо низоларни вужудга келтириши, охир-оқибат эса ҳокимиятни қўлга киритиш бўйянлиги бугун барчамизга аён.

Бизнинг фикримизча, айнан, бу хатти-ҳаракатлар бутунги кунда ўз обрўисидан маҳрум бўйлан коммунистик таълимотни эслатиб туради.

Масалан: Россияда марксистларнинг энг жангари оқими — большевиклар миллати ва ирқидан қатъий назар, дунёда яшаёттан барча халқларни бирлаштириш юяларини илгари суреб, террор йўли билан ҳокимиятни қўлга киритган здилар. Бугун диний экстремизм ва фундаментализм томонидан олиб бораётган қўпорувчилик ва террорчилик ҳаракатлари ҳам ана шундай мақсад, йўл ва услубларга таянмоқда. Уларнинг фикрича, барча мусулмон динига мансуб дунё халқлари (жумладан Марказий Осиё халқлари) халифалик деб ном олган ва битта халифа бошқарадиган ягона диний давлатга бирлашишлари керак эмиш.

Ахир, биз бугун XXI асрда яшаёттанимизни эсдан чиқармаслигимиз керак. Қандай қилиб 13 аср олдинги шароитни XXI асрга олиб келиш мумкин? Тарих ғиддирагини орқага қайтариш мумкинми? Шу нуқтаи назардан қараганда, барча мусулмонлар яшайдиган давлатларни ягона халифаликка бирлаштириш мақсади ақлга сифмайдиган афсонадир. Ҳеч қайси давлат, жаҳоннинг қайси қитъасида жойлашганидан қатъий назар, бугун дунё бозори ва халқаро ҳамжамиятдан ажralган холда ва замон талаб қилаёттан қонунларга итоат қилмасдан туриб, ўз келажагини қуролмайди. Масалан: ўтган асрнинг 50-йилларида Миср давлатининг Сурия ва Ливия каби араб мамлакатлари асосида ягона давлат қуриш режалари барбод бўлди. Яна бир ишончли мисолни келтирамиз. Бир вақтлар Ал Барно (терроризмнинг юявий отаси) илгари сурган бутун дунёда халифаликни ташкил этиш юясини дунёдаги 22 та араб мустақил давлатларининг ўзлари кўллаб-кувватламайди.

Мана бир неча ой бўлдики, республикамизнинг сўлим гўшаларидан бири бўйлан, шоҳ ва шоир Захириддин Муҳаммад Бобурни бутун умри давомида соғинч билан ўзига оҳанграбодек тортиб келган Андижон бутун республикамиз аҳдининг дикқат марказида. Бўлиб ўтган террорчилик ҳаракатлари, найники, Андижон аҳлида, балки ўз юрти тақдирига, ўсиб келаёттан ўғил-қизлари келажагига бефарқ бўлмаган ҳар бир ўзбекистонлик фуқарода қаҳр-ғазаб, нафрат ўйғотди.

Хозирда Республика Олий судида Андижондаги терактларни амалга оширишда иштирок этган айланувчилар устидан давом этадиган суд жараёни юртдошларимиз қаторида, биз-педагог ўқитувчиларни ҳам бефарқ қолдирмади.

Биз «Миллий истиқдол юяси: асосий тушунчалар ва тамоийлар» фанидан дарс берувчи педагог-ўқитувчилар республикамиз сиёсий ҳаётидаги ҳар бир воқеа ҳодисаларни талаба ёшларга етказишида, бошқаларга қараганда, кўпроқ масъулдирмиз. Ана шундай воқеалар қайтарилемаслиги учун талаба-ёшларимизга барча замон ва маконларда маънавияти кучли, иймон ва эътиқоди мустаҳкам халқлар, миллатлар бир жону бир тан бўлиб, жоҳиллар ёқдан оловларни маърифат суви билан учиргандарини, муаммоларни тез ва соз ечганлигини, илм-фан билан пешқадам бўйланлигини тушунтирамиз. Ўз ватанини севиши, уни кўз қорачигидек асрлаш, авайлаш ҳар бир фуқаронинг муқаддас бурчи эканлигини таъкидлашдан чарчамаймиз. Ҳадиси шарифда «Ҳуббул ватан минал иймон», яъни, «Ватанни севмоқлик иймондаңдир», дейилган. Демак, бос-қинчиларга қарши курашганлар, энг аввало, иймон учун курашганлардир, ор-номус учун жон берганлардир. Иймонсизларда ор-номус бўлмайди. Ор-номуси йўқ кимсалар ватанларини-да осонтина сотадилар.

Андижон воқеалари иштирокчиларини юрак тўла нафрат билан «иймонсизлар» деймиз. Улар ўз ватанларига хиёнат қилдилар. Яхшилик уруғи ўрнига ёмонлик уруғини сочмоқчи бўлдилар. Афсуски, улар ўз қабиҳ ниятларига етганлари йўқ. Аллома Ризоуддин ибн Фахриддиннинг қуийидаги фикрларини шу ўринда келтириш ўринлидир: «Гуноҳ унтуилмайди, эзгулик ерда қолмайди. Ҳар ким нима сепса, шуну ўради. Эзгулик қилишга шошилинг. Нафсингизнинг ҳамма истагини бажо келтиришдан чекининг. Хайрли ишлар учун саъй-ғайрат қилинг».

Маҳфуза Қорахўжаева, Рисолат Исқандарова,
Тошкент Давлат Техника Университети ўқитувчилари



Мулоҳаза, кузатув, муносабат



ГЛОБАЛЛАШУВ: ТАСАВВУР ВА ҲАЁТ

Бугунга кунда глобализм масаласи олимларнинг баҳс-мунозаралари, фикрий тортишувлари марказида турибди. Муайян масаланинг мусбат ва манфий томонлари борлигини назарда тутсак, кўпчилик мутахассислар эътироф этаётгани каби глобализмнинг ҳам ижобий ва салбий жиҳатлари намоён бўлади.

Тўғри, иқтисодий глобаллашувнинг муҳим кўринишларидан бири, яъни, хорижий инвестициялар жалб қилиш орқали янги иш ўринлари яратилиши, жамиятда ўрта табақани шакллантириш ва унинг мавқеини ушлаб туриш йўлидаги саъй ҳаракатлар, янги коммуниکация ва информация технологиялари воситасида фаннинг барча соҳаларида муайян ютуқقا эришиш, ўзаро ёрдам туйғусини шакллантириш, (масалан, табиий оғатларда –О.Т.) инсон ҳуқуқлари ва жамоатчилик масъулияти каби бир қатор омиллар глобализмнинг ижобий жиҳатларини акс эттираса, экологиядаги ҳалолатли вазиятни келтириб чиқараётган трансмиллий корпорацияларнинг фойда ортидан қувиши, ҳалқаро терроризмнинг турли шакллари (Андижон шаҳрида содир этилган хунрезликлар ва Лондон метрополитенидаги портлашларни эслайлик –О.Т.) шаклан ранг-баранг, аммо, моҳиятан миссионерлик ҳаракатлари, миллий маданиятларнинг истиқболига бўлган таҳдид глобализмни оқлашга ҳеч бир изн бермайди.

Миллий маданиятларнинг, жумладан, миллий адабиёт, санъат, фалсафанинг мутараққий сифатлари ҳосиласи ўлароқ умуминсоний маданият деган тушунча шаклланади ва ўз навбатида миллий яратилмишлар дунё ҳалқларининг маънавий бойлигига айланади. Шунингдек, маданий-тариҳий глобаллашувнинг муқаррар жараён эканлигини ҳам инкор эта олмаймиз. Аммо, шў ўринда мазкур жараён бевосита оммавий ахборот воситаларининг асосий мавзуларидан бирига айланганини, унда жамиятнинг ҳар бир онгли аъзоси, зиёлилар ўз муносабатларини билдириши лозим, деган бир фикрни айтмоқчимиз. Чунки, телевидение ва радионинг жамият ҳаётидаги ўрни ва мавқеи кундан-кун ошиб бормоқда. Мулкчилик шаклидан қатъни назар, бугун оммавий ахборот воситалари олдида бир қатор муҳим масалалар мавжуд турибди. Яъни, ўтиш жараёнида, глобаллашувнинг миллий ҳаётимизга таъсири, миллий ахлоқ ва миллий онгнинг ўзаро муносабатини мўътадил тарзда ушлаб туриш, глобаллашувнинг сунъий ривожланишига йўл қўймаслик, муҳими, жамият аъзоларида мазкур масалалар юзасидан муайян фикр ҳамда тушунчаларни қарор топтириш. Бу борада журналистларнинг профессионал билим даражасини ошириш, матбуотнинг ҳақиқий маънода «тўртинчи ҳокимият»га айланишига эришиш, матбуот соҳасига тааллуқли бўлган қонун ҳужжатларининг тўлақонли ишлшини таъминлаш сингари бир қатор жиҳатлар борки, уларни йўлга қўймасдан туриб, журналистнинг ижтимоий мавқеини кўтариб бўлмайди. Шуни ҳам унугмаслик керакки, глобализм бозоридаги етакчи давлатлар нафақат ишлаб чиқаришда, балки истеъмолчи сифатида ҳам пешқадамдирлар. Босма маҳсулотлар, мусиқий асарлар, тасвирий санъат, кинематография, фотография, радио ва телевидение маданий глобализмнинг асосий «воситалари» ҳисобланади.

Кейинги пайтда матбуот орқали Фарбий Европа мамлакатларида Америка маданияти таҳди迪 борлиги ҳақидаги турли мулоҳазаларни эшишиб қолаяпмиз. Бизда ҳам шунга яқин бир ҳолат мавжуд. Яъни, европапарастлик ва америкача маданият таъсири ва шу таъсирга берилиш яққол сезилади. Бу, айниқса, дунёқараши ва онги тўла шаклланмаган, миллий фоя ва қадриятлар моҳиятини англаб етмаган ёшлар орасида кўпроқ кузатилади. Миллий маданият асосларидан, мазмун-моҳиятидан бегона руҳиятда вояга етаётган ёшлар табиий равишда юқорида таъкидланган маданиятларга тақлид қиласидилар ва бундан мағнаат изловчи турли файри миллий кучлар қурбонига айланиб борадилар. Турли нодавлат газеталарни «безаб» турган бошқа маданиятлар вакилларининг сурат ва коллажлари, FM радиостанциялари орқали тинимсиз жаранглайтган файри миллий мусиқалар, телеканаллар орқали тўхтовсиз равишда намойиш этилаётган телесериаллар муайян маънода миллий маданиятга бўлган эътиборни сусайтиради ва қилинаётган ишларнинг самараасини йўққа чиқаради.

Оммавий ахборот воситаларининг исталган тури – телевидение, радио, газета ва журналларни кузатсангиз, албатта рекламага кўзингиз тушади. Тўғри, реклама – матбуотнинг нони. Бутун дунёда бугун шу таомил ҳукмронлик қилаётir. Аммо, рекламани миллий хусусиятларга мослаштириш вақти аллақачон етди. Сабаби, бизда «Реклама тўғрисида»ги қонунга аксарият оммавий ахборот воситалари тўла амал қилмаяпти. Филология фанлари номзоди Зухриддин Исомиддинов фикрига кўра: «Рекламада, аввало, маданият бўлиши керак. Бусиз таъсири сусайди. Хориж тажрибасига кўра буйруқ-топшириқ шаклидаги ундов реклама аллақачон оёқдан қолган, савияси паст нарса ҳисобланади» (Зухриддин Исомиддинов. «Сен» эмас, «Сиз...» «Ўзбекистон матбуоти» журнали. 2005 йил. 3 сон. 31 бет.) Энг ёмони, реклама воситасида файримиллий ғояларнинг тарқатилмаслигига ким кафолат бера олади? Ғоялар, мағкуралар зиддияти кучайган бир шароитда, инсон онги учун кураш авжга чиқсан таҳликали даврда адабий, илмий ва техникавий ҳаётнинг синтезлашуви табиий жараён ҳисобланади. Одамларнинг маданий-маиший ҳаётдан кўра кўпроқ техникавий ҳаётни афзал кўраётганининг боисларидан бири ҳам шунданда. Кузатаётган бўлсангиз, бир тоифа одамлар адабий-бадиий завқни эмас, балки информацияга бўлган эҳтиёжни қондиришни маъқул топмоқда. Бунинг ўзига яраша сабаблари ҳам бор. Очиқ айтганда, биргина уяли телефон орқали бир неча хил юмуш – сўзлашиш, хат жўнатиш ва қабул қилиш, теледастурлардан хабардор бўлиш, мусиқа тинглаш ва ҳоказоларни йўл-йўлакай бажариш мумкин. Телекоммуникация тараққиёти кишилар онига таъсир этибигина қолмасдан, балки у одамлар ҳаётининг таркибий қисмига ҳам айланиб бормоқда.

Маданий глобаллашув жараённида оммавий ахборот воситалари, хусусан, телевидение ва радио миллий анъана ҳамда қадриятларимизни шунчаки тарғиб этиб қолмаслиги, аксинча, уни ихоталаши лозим бўлади. Бу йўлда, албатта, матбуот вакиллари бир томондан Европа маданияти ютуқларини, америкача турмуш тарзининг ўзига хос томонларини чуқур таҳлил этиш орқали миллий маданиятимизнинг бугунги кун талабларига жавоб берадиган қирраларини кўрсатиши ва ташвиқ этиши керак. Мексика телесериаллари, Голливуд фильмлари, Уолт Дисней мультфильмлари руҳида тарбия топаётган ёш авлод глобализмнинг очиқ бўхронида ўзини сақлай оладими, деган савол барчамизни ўйлантириши лозим.

Дунёнинг ривожланган давлатларида, хусусан, Европа иттилоғига ки-рувчи мамлакатларда глобаллашув жараёни назарияси билан бевосита шуғулланаётган олимлар бугунда кўпчиликни ташкил этади. Жумладан, Мюнхен университети профессори, файласуф ва социолог Ульрих Бек тадқиқотлари эътиборга молик. Глобализмнинг, хусусан, маданий глобализмнинг инжа-нозик қирраларини синчиклаб ўрганганд олим кузатувларида табиийки, баҳсга чорловчи фикрлар билан бир қаторда, мунозарали ўринлар ҳам мавжуд. Олимнинг: «Минг бир истиҳола билан айтиш мумкинки, суверенитет ва глобализм моҳият эътибори билан муросасиз қарама-қаршиликдир», деган фикри (таржима бизники – О.Т.) қўйилётган масаланинг қанчалик кенг қамровли ва долзарб эканлигини кўрсатади. Аммо, жиддий мавзуда билдирилган ушбу таъкид ва холосага нисбатан

муносабатнинг деярли йўқлиги ажабланарли. Глобализм ва маданий плюрализм муаммосини ўрганган ҳамкасбимиз, "Шахс ва маданият" журнали бош мұхаррири Надежда Покровская глобализмнинг кўп тармоқли, мурракаб жараён эканлиги ҳақида тўхталиб шундай ёзди: "Телевизион янгиликлардан эшишиб қолдим. Толиблар америкалик ҳарбийларга қарши курашиш билан бир қаторда, уларнинг ўзлари америка совун ва шампунларидан ҳам фойдаланишар экан. Шу дақиқадан бошлаб, бир ҳақиқатни англадимки, глобализмнинг ютуқ ва камчиликлари ҳақида гапириш беманиликлер. Бу узлуксиз жараён ва биз уни бошдан ўтказишга маҳкуммиз". (Н.Покровская."Глобализм и культурная плюрализм"."Личност и культура"№4,2003,18-стр).

Глобаллашувни маданий муаммо сифатида ўрганган тадқиқотчилар унинг иқтисодиёт билан боғлиқ жиҳатларини, эстетик асосини ҳам тадқиқ этганлар. Халқаро ахборот инфратузилмасини яратиш ҳамда телевизион монополия қилиш истагида бўлган турли кучлар глобализмни сунъий тезлаштиришга уринаётгани ҳам сир эмас. Инсон – энг олий қадрият санаалар экан, унинг туйғулари ва эстетик идеалларини глобализм тамғаси остида ҳақоратлаш учун ҳеч кимга ваколат берилмаган. Шу маънода, Интернет тизими орқали тарқатилаётган хабарлар оқимини цензура қилиш имконияти йўқ экан, демак ҳимоя йўлларини ҳам излаш, тадбиқ этиш лозим. Сабаби, бизда бир нотўғри тушунча шаклланиб қолган: Интернет, турли хорижий теле ва радиостанциялар орқали тарқатилаётган хабарларни тўсиш, йўқ қилиш эмас, аксинча, биз ўз веб-сайтларимиз орқали, телевидение ва радиоканалларимиз орқали мавзуни атрофлича тадқиқ этиш ва холис, муқобил жавоб излаш фойдадан холи бўлмайди. Ана шунда информация хуружи камаяди ёхуд ўз таъсир кучини йўқотади. Ган олиб айтиш керакки, мамлакатимиз тарихи, санъати, адабиёти, табиати, фан – техникаси ва ҳоказо соҳалари Интернет орқали қанчалик тарғиб этилмоқда, деган саволга ҳозирча қониқарли жавоб йўқ. Информация хуружи авж олган, мафкуравий кураш кетаётган бир даврда бу ҳолга бепарво қараб туриб бўлмайди. Чунки, бугун дунё миқёсида Интернетдан фойдаланувчилар сони геометрик прогрессия асосида кўпайиб бораётгани ҳеч кимга сир эмас. Шундай экан, Интернетсиз ҳаётни тасаввур эта олмайдиган ҳар бир хорижий замондошимиз мамлакатимиз ҳақида тўлиқ маълумотга эга, деб айта оламиزمи?


Президентимиз 2005 йил 9 май – Хотира ва қадрлаш куни муносабати билан журналистлар билан ўтказган сұхбат-мулоқотларида айнан шу масала хусусида тўхталиб, Интернетни катта бир дўконга ўхшатган эдилар. Президентимизнинг таъбирлари билан айтганда, бу дўконга кирган одам ўзига керакли молни харид қиласди. Гап мана шу дўкондан нимани олишда, деган эдилар Юртбошимиз ўз сўзларида. Мулоқотда адабий-илмий сайтлар яратиш муҳимлиги алоҳида таъкидланди. Масаланинг бу тарзда очиқ ва кескин қўйилиши ҳаммамизни қувонтирди. Сабаби, дунёга кўз-кўз қилишга муносиб адабиётимиз бор. Аҳмад Яссавий, Алишер Навоий, Захириддин Муҳаммад Бобур, Бедил, Бобораҳим Машраб, Огаҳий, Фурқат, Чўлпон, Абдулла Қодирий каби улувларимиз меросини Интернетга жойлаштириш билангина иш битмайди. Биз салафларимиз ижодини қандай тарзда тақдим этаяпмиз, тарғиботимиз самараси бўляяптими, деган саволлар атрофида мониторинг ишларини ҳам йўлга қўйиш керак. Токи ўзбек маданийти ва адабиёти билан, этнографияси ва маънавий мероси билан қизиқкан ҳар бир хорижлик тўлақонли билимга эга бўлсин. Глобаллашув жараёнларининг асосий бир воситаси бўлмиш интернет тизими адабиётимизни ташвиқ этадиган минбарга айланиши лозим. Мумтоз адабиётимиз ва истиқдол даври ўзбек адабиёти вакиллари ижоди хусусида олиб борилаётган таржима ва тадқиқотлар ўз йўлига, аммо Интернетдаги маҳсус веб-сайтлар ўрни ва аҳамияти беқиёс. Ўзбек китобхони Европа, Америка, Осиё адабиёти билан ниҳоятда яхши таниш, ҳатто мухлис ҳам. Демак, ўз навбатида КАТТА АДАБИЁТ муҳиблари ўзбек адабиётини яқиндан таниши, унинг ўқувчисига айланиши керак. Мана шу улуғвор мақсад бизнинг барча саъй ҳаракатларимизга куч-куvvват баҳш этади. Лўнда қилиб айтганда, устоз адиблар ижодини Интернет орқали сифатли ва жозибадор қилиб тарғиб этиш муҳим масаладир. Бундан ташқари, адабий алоқа-


лар ривожида ҳам Интернет ўзига хос кўпrik вазифасини ўтайдики, ўзбек ижодкорининг бугун ёзган шеър ёки романни уммон ортидаги ўқувчининг кўз ўнгидан намоён бўлмоғи керак.

Кези келганда айтиш лозимки, бизда, вақтли матбуотда, телевидение ва радиода глобаллашув жараёнларини илмий асосда тушунтириб бериш, мутахассисларнинг чиқишиларини уюштириш талаб даражасида эмас. Ҳолбукни, ҳалқаро майдонда, жаҳон афкор омисаси глобализация жараёнлари ва уни келтириб чиқарувчи омиллар билан қизиқмоқда, тадқиқ этмоқда. Аҳён-аҳёнда учраб турадиган чиқишиларни ҳисобга олмагандан бу борада матбуотимизда «жимжитлик». Фаол муаллифлардан бири, социология фанлари номзоди Баҳодир Зокир «Глобаллашув зиддиятлари» мақоласида глобаллашувнинг мазмун-моҳияти ва унинг асосий белгилари, глобаллашув субъектлари ҳамда глобаллашувнинг ўзаро зиддиятли жиҳатлари ҳақида атрофлича тўхталиб шундай ёзди: «Совет Иттифоқи барбод бўлгандан кейин АҚШ дунёдаги энг қудратли давлат сифатида иқтисодий, сиёсий ҳамда маданий соҳада глобаллашув жараённинг ҳаракатлантирувчи кучи ва ўзига хос синов лабораториясига айланиб қолди»(Баҳодир Зокир. «Глобаллашув зиддиятлари». «Тафаккур» журнали. 2004 йил, 1-сон, 29-бет).

Бугун матбуотнинг, журналистларнинг ҳақиқий маънода ихтисослашувига эришиш масаласи атрофида жиддий баҳс-мунозаралар бўлмоқда. Бу фикрни ёқловчилар билан бир қаторда, унга қаршилар ҳам бор. Лекин, холисона айтганда, муайян соҳага ихтисослашув яхши самара беради. Демократик матбуот талаби ҳам аслида шундай. Мақсад — замонавий, профессионал мутахассислар тайёрлаш. Даврнинг ўзи матбуотни «тафтиш» қилиб туради ва бу жараён бир томондан табиий танланishi қонуниятини эслатади. Информация асрида журналист тезкор, ҳозиржавоб ва, албатта, билим, малакага эга бўлиши керак. Чунки, глобал дунёда миллат турмуш тарзига, тараққиётига, адабиёт ва санъатига у ёки бу маънода таъсир кўрсатмайдиган масаланинг ўзи йўқ. Шундай экан, нафақат матбуот вакиллари, балки жамиятимизнинг барча онгли аъзолари, хусусан, қалам ахли ҳам бирдек қайгурадиган, ўйлайдиган масала-муаммолар бир-бири билан чамбарчас боғлиқ. Гап мана шу узвийликни идрок этиш ва моҳиятни англашда. Зоро, ҳақиқат сари ташланган ҳар бир қадам истиқбол учун пойдевордир.

Олим Тошбоев,
филология фанлари номзоди





Атойи

ИШҚИНДА ҚАРО БОШИМ ОҚАРДИ

* * *

Жамолинг васфини қилдим чаманда,
Қизарди гул ўёттин анжуманда.
Таманно қилғали лаълингни кўнглум,
Киши билмас они ким қолди қанда.
Чу жонимдин азиз жонона сенсен,
Керакмас жон менга сенсиз баданда.
Менга ул дунёда жаннат не ҳожат,
Эшигинг туфроғи басдур кафанда.
Солиб борма мени, эй Юсуфи хусн,
Бу кун Яъкубтек байтул-ҳазанда.
Узун сочингдин узмасмен кўнгулни,
Аёғинг қанда бўлса, бошим анда.
Тилар эл мансаби олий ва, лекин,
Атойи сарви озодингға бандা.

* * *

Кон бўлди кўнгул фироқи бирла,
Куйди жоним иштиёқи бирла.
Зулфинг черики жамол мулкин
Олди кўзунг иттифоқи бирла.
Фунча севунуб тўниға сифмас,
Ўхшатсам ўқунг бошоқи бирла.
Мажлисда чоғирдин эл усурса,
Мен жоми жамоли соқи бирла.
Тўску тиламакка аҳдимиз йўқ,
Софин бори давр аёғи бирла.
Ишқинда қаро бошим оқарди,
Бир боқмади кўз қироқи бирла.
Кўз ўйнатиб ўттилар кўнгулни,
Икки қоши жуфтутоқи бирла.
Ошиқقا жафо қилинг ва, лекин,
Асрү доғи йўқ йироқи бирла.
Хўблардин Атойи лутф истар,
Ҳонларға не иш ясоқи бирла.

БУЛОҚ КҮЗ ОЧДИ



Мусаллам
Умирова

Эй күнгил,
бир дам унут
афсонага тұла дунёни.
Денгиздай ястаниб
увиллаёттан,
қип-қизил чүгдай
саҳроларға бок.
Хайратлан!
Хайратта айлан!
Хайрат бўл, күнгил!

* * *

Юрагим улғаяр дардлардан,
Сочларим рангидан айрилар.
Димиқкан, синиқкан ҳаводан
Бағримга қочади парилар.

Мен қанча озорга күмилмай
Ёмғирдек ёғмоқда сүзларим.
Демакки, бу кунлар покланар,
Умидвор боқмоқда күзларим.

* * *

Кулсам,
булоқлардай кулардим, она,
Тонгги шабнамлардай бегубор эдим.
Гулласам,
жон қадар гуллардим, она,
Исмимга бор жаҳон дўнарди.
Афсус,
ортда қолди масъум болалик,
Пасту баландидан фол очди тақдир.
Маҳзун күшиғига қулоқ тутсам гар,
Хаёт деганлари бунчалар тахир?!

* * *

Кўнглим, сенга йўлолмай қолдим,
Гўзал ҳислар мени этди тарк.
Ахир, сенга етмоғим учун
Бу ерлардан кетмоқлигим шарт.

Фира-шира туманлар каби
Тарқаб кетди «дўст»лар ҳам бу пайт.
Мен уларни кечирдим, аммо,
Сен улардан кечармисан, айт?!

* * *

Шу янтоқни севасан нега,
Тилларидан томса-да заҳар,
Кучогига отасан ўзни,
Кон исини туди дийдор.

Нега уни севасан, нега
Сигинасан сахро-чўлига?
Куёш мисол қарши оласан
Шўрлар босган тап-тақир юзни.

Нега?!
Уртайверма куйган жонимни,
Сўровларинг бас қил, эй дўстим.
Неки берса, муҳаббат берсин,
Бу дунёда муҳаббат устун.

* * *

* * *

У кунлари боғда хотиржам,
Тўйиб-тўйиб ўқир эдик шеър.
Хижрон дардин кўришиб баҳам,
Кўнгил ичра кетар эдик хур.

Бугун эса дараҳтлар маҳзун,
Япроқларда болта сояси.
Кўркув босар узундан-узун,
Умид берар тонгнинг нафаси.

Қурбақанинг майин-майин қуриллаши
Беихтиёр болаликка бошлаб кетар.
Юрагимда хотиралар шовуллашиб
Қашқадарё бўйларига ташлаб кетар.

Дарё кечиб, тентирайман бўзлаб-бўзлаб,
Қоғоз кемам сузуб кетган аро йўлда.
Оқиб кетган болалигим излаб-излаб,
Гулхайридек гулляяпман армонзорда.

* * *

Сендан кетсам
ҳамма нарса ўзгарар,
ҳатто ўзгаради
юриш-туришим,
ҳатто боқмай
кўяди энди,
эртадан умидвор
бу кунлар.

Ортингдан кетади
кўзларим,
кетади бир бора
қайрилмай.
Сенсиз ҳеч кимлигим
таъкидлайверар,
кўксимда бегона
юракнинг уриши...

* * *

Минг йиллар ўзимни алдадим,
Сенсиз, юраксиз, бир дардсиз.
Магарки, бир нафас яшаган бўлсам,
Ибтидом, интиҳом ўзингсан – Ишқ...

* * *

Фурсат оёғимдан тортқилай бошлар,
Бахтнинг йўлларида типирчилар жон:
Бойўғли ин қурган кўҳна оғочга
Сигинган қумурсқа кўтарар исён.

Нураган деворлар, кесилган боғлар.
Тириклик ҳақида туш кўрар ўлим.
Юлдузлар ўшадир, кеча ўшадир,
Тонгнинг ҳижронида оқарар кўнглим!



ҲИКОЯЛАР ҲАЗИНАСИДАН

Иван Бунин

ҚАСДЛАШУВ

Августнинг охирларида Каннданға пансионга бордим; денгизда чўмилб, табиатдан нусха кўчириб, ижод қилмоқчи эдим. Анави ғалати аёл ҳар куни эрталаб қаҳва ичар, ўзи алоҳида столда ўтириб тамадди қилар, доим ўйчан, тунд қиёфада юрар, чор-атрофдаги одамларга эътибор бермас, қаҳвахўрликдан сўнг қайси гўрларгадир фойиб бўлар, кечгача қорасини кўрсатмас эди. Пансионда бир ҳафтадан бери яшаётган бўлсам-да, ҳамон ўша аёлни қизиқиб кузатиб юрардим: қоп-қора қалин, билакдек бир ўрим сочи орқасига ташлаб қўйилган, қадди-қомати келишган, соғлом, эгнида қора-қизил мовут қўйилак, истараси иссиқ, лекин қиёфаси тунд... Бизга ўн беш ёшлар чамасидаги элзаслик қиз ош-овқат, чой-нон келтириб берар, бажонидил хизматимизни қиласарди. Ёш бўлса-да сийналари бўлиқ, тўлишган, тўлишиб яна-да очилиб кетган, тантиқроқ, лекин ёқимтой ожиза эди. У бироннинг гапини худди хуррак оҳудек кўзларини пирпиратиб, жилмайиб тингларди. Уни бир гал йўлакда учратиб қолиб саволга тутдим:

- Одетт, айттолмайсизми, анави хоним ким?
- Тақсир қайси хонимни сўраяпсиз?
- Қорачадан келган, хув анави жойда ўтиради.
- Тақсир қайси столда ўтиради?
- Ўнинчи рақамли.
- У рус-ку, тақсир.
- Хўш-хўш?..
- Мен у ҳақда ҳеч нарсани билмайман.
- У кўпдан бери яшаяптими?
- Уч ҳафта бўлди, тақсир.
- Доим ёлгиз юрадими?
- Йўқ, тақсир. Битта жаноб бор эди...
- Ёшгина, спортчига ўхшаганми?
- Йўқ, тақсир. Жуда ўйчан, асабий эди.
- Кунларнинг бирида у фойиб бўлдими?
- Худди шундай, тақсир. (фран.)

«Гап буёқда экан-да! Энди баъзи нарсалар ойдинлашяпти. Лекин у эрта билан қайси гўрларга даф бўляпти экан? Ҳамон севгилисини изляяптими?»

Эртаси куни қаҳвахўрликдан сўнг, одатдагидек, хонамнинг очиқ дебразасидан шагал гичирлаши эшитилдио пансион боғчасига мўраладим: у одати бўйича ялангбош, кўйлаги рангидаги шамсиясини кўтариб тез-тез юриб кетиб борарди. Оёғида қизил пойабзал. Мен дарҳол ҳасса билан шамсияни олиб, унинг орқасидан эргашдим. У қўча бошига бориб Карно хиёбони томон бурилди, мен ҳам ўша муюлишдан бурилдим. Уйладимки, у ўз хаёллари билан банд бўлиб орқасига қарамайди, пойлаб бораётганимни

сезмайди. Дарҳақиқат, то вокзалга боргунча орқасига бир марта ҳам назар ташламади. Вокзалда учинчи тоифали вагонга чиқаётган чоғда ҳам орқасига ўтирилиб қарамади. Поезд Тулонга борарди. Мен ҳам ҳар эҳтимолга қарши Сен-Рафаэлгача чипта олиб, қўшни купега чиқдим. Чамаси, у олисга кетаётган йўловчига ўхшамасди. Хўш, қаёққа кетяпти?.. Напулада, Тэулада деразадан бошимни чиқариб қарадим. Ниҳоят, поезд Трэйясда бирпас тўхтаган пайт яна бошимни чиқардим-у, бекатни тарк этаётган аёлни кўриб қолдим. Вагондан сакраб тушиб яна унинг орқасидан йўл олдим. Бу сафар олис масофадан таъқиб этиб боравердим. Узоқ юрдик – денгиз ёқасидаги тик жарлик ёнидан ўтган эгри-буғри муюлишлар, ёш қарағайзор оралаб ўтган нишаб тошлоқ сўқмоқ ҳам орқада қолди. Шу сўқмоқ орқали соҳилга тик кесиб чиқилса, йўл хийла қисқаради. Үрмон билан қопланган кимсасиз серқоя кўрфазча томон тоғ қиялаб борар, соҳилга етгач тик кесилган табиий девор ҳосил бўлар эди. Вақт пешинга яқинлашиб қолган, кун иссиқ, қылт этган шабада йўқ, игна баргли арчазордан таралаётган хушбўй ҳид димоқни ёраман дерди, атрофда зоғ учмас, тиқ этган товуш эшитилмас, фақат чағалайлар сув сатҳида юзиб юрар, онда-сонда чигиллаб қўйишар эди. Денгизнинг очиқ бўлган жануб томони ялт-юлт этиб кўзни қамаштирас, йирик-йирик кумуш юлдузчалар сапчиб қирғоққа уриларди... Ниҳоят, у оғирлигини орқага ташлаб юргурганча сўқмоқ бўйлаб ям-яшил кўрфазчага тушди. Кўрфазча тўқ қизил қоялар орасида пайдо бўлган эди. Шамсиясини кўмлоққа ташлаб шоша-пиша ечина бошлади. Оёқяланг эди. Мен сертош қояга ётиб олдим, у қоя остига қорамтири гулли кўйлагини ечиб ташлади. Унга қараб, ҳойнаҳой, чўмилиш кўйлакчasi ҳам қорамтири-тунд бўлса керак деб уйладим. Бироқ, кўйлак остида ҳеч қандай чўмилиш кўйлакчasi йўқ, фақат калтагина пушти сорочка бор эди, холос. Сорочкасини ҳам ечиб ташлади; у офтобда обдон тобланган, баданлари қаҳрабо тусга кирган, соглом, бақувват эди. Қип-яланғоч ҳолда оқариниб турган тип-тиниқ сувга кириб борди; чиройли тўпикларини эгиб-тўғрилаб, орқаларини намойишкорона ўйнатиб, қуёшда қорайган белларини кўз-кўзлаб сувга шўнғиди. Сувда жимиб қолди, афтидан, сувда акс этаётган қуёш нурлари кўзларини қамаштирган эди. Кейин оёқларини ўйнатиб сувни шалоплатди, сув тубига чўнқайиб ўтириди, сувдан бошини чиқариб бир айландию оёқ-кўлларини кенг ёзib сув устига ётиб олди; аста-секин юриб кўмлоқ соҳилга чиқди, тирсагини тираб қумга бошини кўйди. Кумуш тикондек ялтираб, бир маромда сокин чайқалаётган бепоён денгиз

МУАЛЛИФ ҲАҚИДА

Иван Бунин 1870 йили Россиянинг Воронеж шаҳрида туғилиб, 1953 йили Парижда вафот этган. Биринчи жаҳон уруши, «оқ» ва «қизил» инқилоблар адабининг давлатта, давлат тимсолида ҳар хил ўйин курсатадиган каттаю кичик амалдорларга ишончини сўндиради. Тарихнинг бурилиш нуқталарида, ҳаёт-мамот масаласи ҳал бўлаётган пайтларда одамларнинг минг бир қиёфада товланиши дастлаб, Бунинни газаблантиради, сўнг ахлоқсиз жамиятда бундай ҳол одатий ходиса, яъни, тириқчилик воситаси эканини англайдиу 1920 йилда Россияндан бош олиб кетади. Одессадан Истанбулга, Истанбулдан Европага ўтиб, Франциядя муқим яшаб қолади. Муҳожирликда факирона ҳаёт кечиради, лекин ижодий ва инсоний қиёфасини йўқотмайди, ор-номусини сақлаб, бошини мағур кўтариб яшайди. 1933 йилда халқаро Нобел мукофоти билан тақдирланади. Иван Бунин мукофот пулининг катта қисмини муҳожирликда яшаётган истеъоддли қаламкашларга тақсимлаб берадиу ўзи оиласи билан яна факирона ҳаётини давом эттираверади.

Одамзот муҳожир бўлса, муҳтожликдан ўлмайди, ўлса - Ватан соғинчи ўлдиради. Аллоҳ Иван Бунинни бундай кулфатдан асрайди, унинг қалбига Ватанин - бепоён Россияни жойлаб кўяди, Россиядан ҳам улуғроқ, азизроқ бўлган ҳақиқатни /Достоевский ибораси/ жойлаб кўяди. Мальумки, ўлмас ҳақиқатлардан биттаси - муҳаббат хисобланади. Ҳижрат ва ҳижрон даврида Иван Бунин яратган асарларнинг аксарият қисми айнан муҳаббат мавзусига бағишлиланган. Албатта, бу бежиз эмас, муҳаббат гўё адабининг «нажот қалъаси» эди. Унинг ҳикоя ва киссалари, хотиралари, шеър ва таржималари синчилаб мутолаа қилинса, кишида яхлит бир китоб ўқигандек таассурот пайдо бўлади. Чунки, Бунин бир умр ўзини ёзган, қалбини қоғозга тўккан. Шу боис, унинг асарлари ҳозир ҳам қалбимизни ларзага солади, ҳаяжон билан, мароқ билан ўқилади.

Биз Иван Буниннинг иккита ҳикоясини таржима қилиб, журналхонларга тавсия эта-япмиз. Мабодо, камчиликлари бўлса маъзур тутишар.

Таржимон.

гуё уфқа сингиб кетарди. Соҳилга туташ кўрфазча ва шинамгина серқоя манзил тобора қизиб борарди. Қоядан иборат дим бўшлиқда, мўъжаз жа-нуб ўрмонида шу қадар теран сокинлик хукм сурардики, пастимдаги қум-локда кўксини қумга бериб ётган аёлнинг ялтираб турган елкаларига, кенг ёйилган оёқларининг орасига урилаётган шаффоф мавжларнинг майин чалоплаши ҳам бемалол эшитиларди. Мен харсанг орқасига яшириниб олиб яланғоч гўзлаликни зимдан кузатиб ётар эканман, борган сари бето-қатланиб, бу қилик фирт бемаънилик, сурбетлик эканини паққос эсим-дан чиқариб юбордим. Қаддимни тиклаб трубкамни тутатиб тамаки чека бошладим. Дафъатан аёл ҳам бошини кўтардию пастдан юқорига — мен томон ажабланиб тикилиб қолди. Бирок, аввал қандай ётган бўлса, ўша ҳолатда чўзилиб ётаверди. Нима қилишимни, нима дейишимни билмас-дан каловланиб ўрнимдан турдим. Аёл биринчи бўлиб тилга кирди:

- Мен йўл бўйи орқамдан бирор эргашиб келаётганини сезган эдим. Нега эргашдингиз?

- Кечирасиз, шунчаки қизиқувчанлик... — дедим гапни айлантирумас-дан.

- Ҳа, кўриниб турибди, қизиқувчан экансиз. Мен ҳақимда сўраб-су-риштирганингизни Odette айтган эди. Сизнинг рус эканингизни тасоди-фган эшитиб қолганман, шу боис ҳозир унчалик ажабланаётганим йўқ — ҳамма руслар ҳаддан зиёд қизиқувчан бўлади. Бироқ, айтинг-чи, нима учун орқамдан эргашиб келдингиз?

- Аввало, қизиқувчанлигим, қолаверса, касбим шунаقا.

- Биламан, сиз рассомсиз.

- Сиз эса расмбоп аёлсиз. Бундан ташқари, хар куни эрталаб қаёқладир ғойиб бўлардингиз. Бу ҳол кўнглимга ғулгула солди. Қаёққа? Нима учун? Ҳатто нонушта қилмасдан кетардингиз. Ваҳоланки, пансион аҳли бундай қилмайди. Боз устига, феъл-атворингиз ҳам бошқаларнидан фарқ қила-ди, доим бир нарсани ўйлаб юрасиз. Ёлғиз бўласиз, миқ этмайсиз, қан-дайдир яширин сирингиз борга ўхшайди... Энди, ечинаётганимни кўриб нима учун қайтиб кетмадингиз, деб сўрамоқчимисиз...

- Текин томошани ташлаб гўрга кетармидингиз. — Бирпас сукут сақ-лаб, қўшиб қўйди. - Ҳозир сувдан чиқаман. Бир дақиқа тескари қараб туринг, кейин бўёққа келасиз. Сиз ҳам мени қизиқтириб қолдингиз.

- Ўлсам ҳам тескари бурилмайман, - дедим. — Мен рассомман, қола-верса, биз ёш бола эмасмиз.

- Бўпти, менга бари бир,- деди у елкасини қисиб.

Сўнг борбўйи ўрнидан турди, олд тарафдан аёллик таровати рўйрост намоён бўлди. Шағални ғичирлатиб ѡшоилмасдан олға юрди, пушти со-рочкасини бошига ташлади, кейин кўйлакча бўйнидан жиддий қиёфаси кўринди, кийим ҳўл баданига ёпишиб қолди. Мен унинг ёнига югуриб тушдим, ёнма-ён ўтиридик.

- Балки, трубкадан ташқари, папиросингиз ҳам бордир? — деб сўра-ди.

- Бор.

- Менга ҳам беринг.

Папирос бериб, гугурт чақдим.

- Раҳмат.

Тутунни ичига тортиб олис-олисларга нигоҳ ташлади, оёқ бармоқлари-ни ўйнатди.

- Ҳозир ҳам сизга ёқяпманми? — деб сўради кесатиқ аралаш.

- Бўлмасам-чи! — деб хитоб қилдим. — Офатижонсиз, баданингиз, соchlарингиз, кўзларингиз... фақат тунд қиёфангиз ғалати кўринияти.

- Ростини айтсан, кўнглимга ёмон бир ниятни тугиб кўйганман.

- Узим ҳам шундай бўлса керак деб ўйлагандим. Сиз яқинда ким биландир ажрашгансиз, кимдир сизни ташлаб кетган...

- Ташлаб кетмади, итқитиб юборди. Мени ташлаб қочиб кетди. Би-лардим, у адойи тамом бўлган кимса эди, лекин унга кўнгил бердим. Кейин маълум бўлдики, қип-қизил битта абллаҳни яхши кўрган эканман. У билан бундан бир ярим ойча муқаддам Монте-Карлода учрашдик. Уша оқшом казинода қимор ўйнаб ўтирган эдим. У ҳам ёнимда туриб қимор ўйнарди, кўзларини олайтириб шарчаларни кузатарди. Омади чопиб кўп ютди, бир марта ютди, икки, уч, тўрт... Мен ҳам анча-мунча ютуқни

қўлга киритдим, у ҳаммасини кўриб турарди. Тўсатдан: «Тамом, пишти! Assez! – деб мен томонга ўгирилди-да: - N'est-ce pas madame?» - деб қўшиб қўйди. «Ха, пишти!» дедим кулиб. «Ие, русмисиз?» «Кўриб турибиз-ку». «Ундан бўлса, кетдик – кайф-сафо қиласиз!». Унга разм солдим – афтидан азоб кўрган одамга ўхшарди, лекин хийла келишган... Кейин нима бўлганини тасаввур этиш қийин эмас.

- Ха, қийин эмас. Кечки овқат пайтида апоқ-чапоқ бўлиб, тинмай гап сотгансизлар, хайрлашадиган пайт келганда ажаблангансизлар...

- Тўппа-тўғри. Биз хайрлашмадик, бир-биримизга ёпишдик-қолдик, ютиб олган пулларимизни совура бошладик. Монте-Карлода, Тюрибид, Ницца да яшадик. Канн билан Ницца оралигиди, йўл бўйларида жойлашган қовоқхоналарда нонушта, тушлик қиласдик. Сиз у жойлардаги нарх-наволар осмонда эканини билсангиз керак?! Ҳатто маълум муддат Cap d'Antibes меҳмонхонасида ҳам яшадик, ўзимизни бой-бадавлат этиб кўрсатишга ҳаракат қиласдик... Ҳамёнимизнинг таги кўриниб қолди, охириг майд-чуйдамизни тўплаб Монте-Карлога йўл олдик, лекин бу сафаримиз ҳалокат билан якунланди. У бирёқларга гум бўлиб кетиб пул топиб келар, аммо бу пуллар аввалгиларга нисбатан арзимас микдорда – эллик, юз франкдан ошмас эди... Сўнг менинг сиргаларимни, ҳатто никоҳ узугими-ни, ичдан буйнимга тақиб юрадиган тиљо хочимни, бир пайтлар мен эри бор хотин эдим, қайси гўрларгадир элтиб сотиб юборди...

- Албатта, эрта-индин бирор жуда катта қарзини тўлайди, нуфузли, сармоядор дўстларим, таниш-билишларим бор, деб ишонтирган.

- Ха, худди шундай бўлган. Унинг ўзи ким эди? Анигини ҳозир ҳам билмайман. Узининг ўтмиши тўғрисида батафсил, аниқ гафиришни истамасди, мавзуни дарҳол бошқа томонга буриб юборарди. Узим ҳам бунга унчалик эътибор бермасдим. Биласиз, кўпчилик муҳожирларнинг кечмиши бир хил бўлади: Петербург, ажойиб ҳарбий қисмда хизмат, кейин инқилоб бошланади, Истанбул... Эски оғайнилари ёрдами билан Парижда гўё яхшигина мавқега эга бўлади, истаган жойга қўли етади, ҳозирча Монте-Карлода вақтихушлик қиласди ёки Ницца бирорта обрў-эътиборли дўстининг пинжига кириб олиб... Хуллас, шунаقا гаплар билан қўйнимни пуч ёнгоқча тўлдирди. Менинг бўлса кундан кунга руҳим тушиб, ёруғ дунё қўзимга тор кўриниб борарди, у эса мийғида кулиб: «Хотиржам бўл, менга ишонавер, Парижда ҳозир биз учун елиб-югуришяпти, бопладим – нима қилганимни сенга айтиб ўтирамайман, барибири ақлинг етмайди, бу-ёни ўзимга қўйиб бер», деб таскин берарди.

- Ҳўш-хўш?

- Нима «хўш»?

У бирдан кўзларини чақнатиб менга қарадио ўчиб қолган папиросини узоққа отиб юборди.

- Сизга буларнинг ҳаммаси кулгули туюляптими?

Мен қўлидан тутиб маҳкам сиқдим.

- Шундай дейишга уялмайсизми?! Мен сизни Медуза ёки Немезида қиёфасида тасвирламоқчиман.

- Улар қасоскор санамларми?

- Ҳа, жуда ёвуз.

У маъюс жилмайди.

- Немезида! Яна қанақа Немезида?! Йўқ, сиз ёмон одамга ўхшамайсиз... Яна битта папирос беринг. У чекишниам ўргатди... Ҳамма нарсага ўргатди!

Папиросни тутатиб, яна олис-олисларга назар ташлади.

- Дарвоқеъ, чўмилиш учун шунча жойга келганингизни кўриб ниҳоятда ажабланган эдим. Ҳар куни бўзчининг мокисидек лўқииллаб юришдан зерикмасмикан деб ўйлагандим. Энди билсам, сизга ёлғизлик керак экан.

- Тўғри.

Қўёш тобора забтига олиб қиздиради, ҳовур ва хушбўй ҳид кўтарила-ётган қарағай шоҳларига қўниб олган чирилдоқлар аччиқлангандек зўр бериб чириқларди. Аёлнинг қоп-қора соchlари, очиқ елкалари, оёқлари қизиб кетганини сезиб турардим.

- Юринг, салқинга ўтайлик, кун ёндираман деяпти. Фамгин тарихингизнинг давомини ўша ерда гапириб берасиз, - дедим.

У уйқудан уйғонгандек сесканиб:

- Кетдик, - деди.

Биз ярим доира шаклидаги кўрфазчани айланиб ўтиб, қизил қоя ости-
даги салқин жойга ўтиридик. Бу ер ёп-ёруқ, лекин дим эди.

Мен яна унинг қўлинни олиб, қўйиб юбормадим. У буни сезмади.

- Энди давоми нима бўларди? – деди. – Мен ҳақиқатан ҳам жуда
хунук, шармандали ўша воқеани эслашни-да истамай қолдим. Ҳойнаҳой,
сиз мени гоҳ анави-гоҳ манави фирибгарнинг кунда-шундаги жазмани бўлса
керак деб ўйлаяпсиз. Ҳечам ундан ўтмишими ҳам бошқалар-
никидан унчалик фарқ қилмайди. Эрим дастлаб Деникиннинг, сўнг Вран-
гелнинг Кўнгилли армиясида хизмат қилган, тақдир тақозоси билан Па-
рижга келиб қолганимиздан кейин, албатта, шоферлик қилди. Лекин аста-
секин ичкиликка ўрганди, охир-оқибат ичкиликка шу қадар ружу қўйди-
ки, ишдан ҳайдалиб, ялангоёқ дайдига айланди-қолди. Энди у билан бир-
га яшай олмасдим. Уни охирги марта Монпарнасада, «Доминика» остона-
сида учратдим. Албатта, русларнинг шунақа қаҳваҳонаси борлигини бил-
сангиз керак? Тун, ёмғир, у бўлса йиртиқ этикда қўлмак кечиб юрибди,
қаддини дол қилиб ўтган-кетганинг ёнига чопиб боради, қўлларини чўзиб
садақа сўрайди, одамларга ёрдамлашмоқчи бўлади, аслида, таксидан ту-
шаётган ўйловчиларга ҳалақит берарди, холос... Мен серрайиб қолдим,
ундан кўзимни узмасдим. Аста унга яқинлашдим. Таниди, қўрқиб кетди,
хижолат бўлди. Сиз унинг қандай ажойиб, меҳрибон, хушмуомала инсон
эканини тасаввур ҳам қиломайсиз. Қотиб қолди, ўзини қўярга жой то-
полмасдан менга тикилди: «Маша, сенмисан?» Бужмайган, уст-боши бир
аҳволда, соқолига устара тегмаган, ҳаммаёфини сариқ жун қоплаган, шал-
лоббо бўлган, совуқда дир-дир қалтирайди... Ҳамёнимда бор пулимни унга
бердим, қўллари, муздек, қўлимдан ушлаб билакларимни ўпа бошлади,
елкалари силкинди, товушини чиқармасдан йифлади. Хўш, қўлимдан нима
ҳам келарди? Фақат икки-уч марта ҳар ойда юз, икки юз франқдан пул
жўнатиб турдим. Парижда менинг шляпа тикадиган устахонам бор, мўмай-
гина даромад қиласман. Бу ерга мен ҳордиқ чиқаргани, чўмилгани келган-
ман. Мана, кўрмайсизми... Эрта-индин Парижга қайтаман. Анави фириб-
гарни топиб қулоғининг остига «шавла қайнатиб» қўйсам, жанжал кўтар-
сам – жуда бемаъни иш бўлар экан. Биласизми, мен бунинг бемаънилиги-
ни қачон росмана тушуниб етдим? Ҳозир билдим, сиз туфайли билдим.
Бошимдан ўтган саргузаштни гапириб бердим-у, бирдан англаб қолдим...

- Ажаб, хушторингиз қандай қилиб жуфтакни ростлаб қолди?

- Ҳамма гап шундаки, у ниҳоятда ифлос ўйлни танлади. Биз мана шу
пансиончага жойлашдик, ҳозир сиз билан мен қўшниман. Cap d'Antibes
меҳмонхонасидан кейин бу ерда яшашни тасаввур этиб қўринг-а! Бундан
ўн кунча олдин оқшом чоғи қиморхонага чой ичгани бордик. Албатта,
мусиқа чалинаётган, йигит-қизлар жуфт-жуфт бўлиб рақсга тушаётган экан.
Бундай манзарани кўрсам беихтиёр кўнглим айнийдиган бўлиб қолган,
шу қадар меъдамга урибди. Ишқилиб, ўтирибман, пирожное еяпман, у
икковимиз учун буюртма беряпти, гоҳ-гоҳ илжайиб пичинг қиласди: «қара,
анавиларни қарагин, ҳақиқий маймунларга ўҳшайди-я, сўёкларини тапил-
латиб, башибасини буриштирганини кўрмайсанми!» дейди созандаларни
кўрсатиб. Сўнг бўй-бўй портсигарини очиб юурдакни ёнига чақирди,
инглизларнинг папиросидан олиб кел, деб буюрди. Юурдак папирос кел-
тириди. У хижолатомуз: «Мерси, чой ичиб бўлганимиздан кейин ҳақини
тўлайман», деди. Тирноқларини кўздан кечириб ўтириб: «қўлим дабдала
бўлиб кетибди-ку! Ҳозир ювиб келаман...», деди менга қараб ва ўрнидан
турдию шу кетганча...

- Кейин қайтиб келмадими?

- Йўқ. Мен бўлсан кутиб ўтирибман. Ўн дақиқа кутдим, йигирма,
ярим соат, бир соат... Қандай аҳволга тушиб қолганимни тасаввур этяп-
сизми?

- Тасаввур этяпман...

Мен ўша манзарани яққол кўз олдимга келтиридим: стол атрофида чой
иҷиб ўтирибди, ён-верига аланглайди, миқ этмайди, аҳмоқона аҳволга
тушиб қолганини ўйлади, хуноб бўлади... Йирик деразалардан тун қўйни-
даги осмон кўринади, сокин дентиз мавжланиб жилоланади, пальмалар-
нинг япроқлари қорайиб қўзга ташланади, созандалар полни тапир-тупур
этказиб тепади, асбобларини пуфлайди, темир ликопчаларни зарб билан

уради, эркаклар товоңларини бир-бирига уриштириб мусиқага мос равищда чайқалиб, рақс баҳонасида хонимларга маҳкамроқ ёпишиб, шаҳвоний нафсини қондириш ниятида бир томонларга судрайди... Қўнжи узун этик кийиб олган хизматкор кўқимтири мундирни унга узатиб, бош кийимини ечиб таъзим қилади, бир қути «High Life»...

- Қейин нима бўлди? Сиз ўтирибсиз...
- Ўтирган ўрнимда адойи тамом бўлганимни ҳис этяпман. Созандалар ҳам уйларига кетди, зал бўшаб қолди, электр чироқлари ёқилди...
- Деразалар оқаришиб турибди...

- Ҳа. Ўрнимдан турай десам, оёқларимда мадор йўқ. Нима қилсан экан, нажот борми? Ҳамёнимда бор-йўғи олти франк бор, холос. Қўлимга майда тангалар ҳам илашиб чиқди.

- У ростдан ҳам ҳожатхонага йўл олади, зарур ишни адо этади, ўзининг фирибгарлик ҳаётини ўйлайди, сўнг тумаларини қадайди ва йўлак бўйлаб оёқ учиди юриб орқа эшикдан кўчага чиқиб кетади... Худо ҳаққи, кимга кўнгил кўйган эдингиз?! Энди уни излаб топиб ўч олмоқчимисиз? Нима учун? Сиз бокира қизалоқ эмассиз, унинг кимлигини, ўзингиз қандай аҳволга тушиб қолганингизни яхши билишингиз керак эди. Яққол кўриниб турган бемаъни ҳаётни нега давом эттиридингиз?

Аёл сукут сақлади, елкаларини учирив кўйди.

- Кимга кўнгил берганимни ўзим ҳам билмайман. Айтадилар-ку, чин муҳаббатга эҳтиёж бор эди... Афсуски, ҳеч қачон ҳақиқий муҳаббатга дуч келмаганман... У эркак сифатида менга ҳеч нарса берган эмас, бериши ҳам мумкин эмасди, чунки аллақачон эркаклик қобилиятини йўқотган эди... Ҳа, унинг кимлигини, ўзим қандай аҳволга тушиб қолганимни билишим керак эди. Бироқ, мен билишни ҳам, ўйлашини ҳам истамасдим. Үмримда биринчи марта енгил-елли ҳаётга қадам кўйдим, орқа —олдимга қарамасдим яллама-ёрим қилиб юравердим, ҳузур-ҳаловатдан баҳраманд бўлдим, қандайдир васваса ичиди яшадим. Ҳўш, нима учун топиб ўч олмоқчи бўлдим? Яна васвасага учдим, хирақасқон хаёлларга қул бўлдим. Ахир, мен қабиҳ, аянчли жанжалдан бошқа ҳеч нарсага эриша олмаслигимни билмасмидим? Сиз нима учун деб сўраяпсиз. Чамамда, менга ҳам унинг касофати урди, шекилли. Паст кетдим, фирибгарнинг ҳаётига шерик бўлдим; асосийси — у мени қиморхонада шармандали аҳволда қолдириб, ўзи ҳожатхона орқали кўчага қочиб чиқиб кетгани учун қасд олмоқчи эдим. Бош-кетимни йўқотиб кўйдим, қиморхона кассасига бориб ёлғон гапирдим, ялиниб-ёлвордим, эртагача сумкачамни гаровга олиб қолинглар деб илтимос қилдим, лекин сумкачамни олишмади, ижирғаниб чой, шириналлик, инглиз папироси учун тўланадиган ҳақдан воз кечишиди. Парижга телеграмма жўнатдим, учинчи куни минг франк пул олдим, қиморхонага бордим — у ерда юзимга қарашмасдан пулимни олишиди, ҳатто ҳисоб-китоб қоғозчасини қўлимга тутқазишиди. Эҳ, азизим, мен ҳеч қандай Медуза эмасман, мен шунчаки муштипар аёлман, ожизаман. Устига устак, ниҳоятда таъсирчанман, ёлғизман, баҳтиқароман. Лекин мени тўғри тушунинг ахир, макиённинг ҳам юраги бўлади-ку! Мен ўша лаънати оқшомдан бўён гүё бедаво бир дардга чалинган эдим. Сизни менга худонинг ўзи етказди, энди кутилмаганда ўзимга келяпман... Қўлимни кўйиб юборинг, кийиниб олай, яқинда Сен-Рафаэлдан поезд ҳам қайтиб қолади...

- Садқаи сар, - дедим. - Яхшиси, чор-атрофга бир қаранг, анави қизил қояларни, ям-яшил кўрфазчани, ғадир-будуру қарағайларни кўряпсизми? Ғачир-гучур этган жаннати товушларни эшитмаяпсизми?.. Энди биз буёққа бирга-бирга келамиз. Бўптими?

- Бўпти.
- Парижга ҳам бирга-бирга кетамиз.
- Хўп.
- Қейин нима бўлишини худо билади.
- Ҳа, албатта.
- Қўлингизни ўпсам майлими?
- Майли, майли...

1944, 3 июнь

ҚҮНАЛҒА

Бу воқеа жанубий Испаниянинг тоғли депараларидан бирида рўй берди.

Июнь ойининг сўлим оқшоми эди, ойдин кечаси, тўлин ой осмон пештоқида осилиб турарди, одатан, кундузи жала қуйиб ўтган бўлса, димиқсан кечалари ой нафармон нур таратади, бинафша гуллаётган кезларда бу ҳол табиий ҳисобланади, пастак жануб ўрмонлари билан қопланган ясси тоғларнинг довонлари сутдай оқариб кўзга яққол ташланиб турарди, довон уфқа туташиб кетган.

Довонлар ўртасига жойлашган энсиз водий шимол томонга чўзилиб кетган. Водийнинг бир тарафига довоннинг кўланкаси тушиб турар, мозор сукунати ҳукм сурәттган бу оқшомда тоғ жилғаси бир маромда жилдирап, тоғ сафсрар маъдан, тоғ ёқут, тоғ тиллақўнгиз сирли шуғла сочар, оламни нурга тўлдираётган мўъжиза кўзни қамаштиради. Қарши тарафдаги адирлар водийдан чекиниб, ўрнини паст текисликларга бўшатиб берган, текислик бўйлаб эски тош ўйл ўтган. Шу пастлиқда жойлашган тошқўргон ҳам ниҳоятда кўхна кўринарди. Бемаҳалда тошқўргонга олдинги ўнг оёғи оқсаётган тўриқ айfir отини қичамасдан миниб келаётган марокашлик бир киши ташриф буюорди. У баланд бўйли, оқ жундан тўқилган кенг-мўл яктақ кийиб, бошига попукли қалпоқ қўндириб олган эди.

Тошқўргон одам зоти қирилиб кетгандек ҳувиллаб ётарди, ўз ҳолига ташлаб қўйилганга ўхшарди. Аслида ҳам шундай эди. Марокашлик киши дастлаб серсоя кўча бўйлаб тош-девор уйлар оралаб ўтди; уйларнинг дेरазалари ўрнида бўшлиқ қорайиб кўринарди, томорқадаги боғлар ёввойи-лашиб кетган эди. Кейин у ойдин майдонга чиқди; бу ерда устига шийпонча қилинган ҳовуз, пештоқига Мадоннанинг зангори ҳайкалласи ўрнатилган черков, ҳамон одамлар истиқомат қилаётган бир нечта ҳовли бор эди. Олдинда эса, майдонга кираверишда карvonсарой жойлашган. Пастки қаватдаги деразалардан фира-шира нур тараларди. Эгар устида мудраб келаётган марокашлик бирдан ҳуашер тортиб, жиловни силтади, оқсаб келаётган от ўнқир-чўнқир тош тўшалган майдон бўйлаб жадал юриб кетди, туёқ товушлари тун кўйнидан акс садо берарди. Туёқ товушини эшишиб карvonсарой бўсағасига кичрайиб, қоқ суяқ бўлиб қолган кампир чиқди, дафъатан уни тиланчига ўхшатиш мумкин эди. Сўнг кулча юзли, ўн беш ёшлар чамасидаги қизалоқ остонада пайдо бўлди; унинг жамалаги пешонасига тушиб турар, яланг оёқларига шиппакча илиб олган, эгнида оқиши печакгул тусидаги харир кўйлак. Бўсағага бошини қўйиб ётган эшакдек қоп-қора ит ҳам ўрнидан турди, унинг жунлари сип-силлиқ бўлиб, кесилган қулоқлари динг бўлиб турарди. Марокашлик киши остонага етар-етмас отдан тушди. Ит шу заҳоти кўзларини чақнатиб, тишларини хунук иржайтириб хезленди. Марокашлик киши қамчиси билан итни ҳайдашга уринди. Қизалоқ дарҳол итга танбеҳ берди:

- Негра! – деб қичқирди жарангдор товушда. – Сенга нима бўлди??

Ит бошини эгиб аста-секин орқасига қайти, тумшугуни деворга қадаб ётди.

Марокашлик киши испан тилини бузиб гапиради, салом-алиқдан сўнг шаҳарда темирчи борми деб сўради, эртага отни тақалатиш керак экан. Отни кечаси қаерда қолдириш мумкин? Отга ем топиладими? Ўзига ҳам овқат берилса, чакки бўлмасди. Қизалоқ унинг баланд бўйига, чечак излари қолган чўтири юзларига қизиқсиниб қаради. Кўноқ итга хавотирланиб назар ташлаб қўйди, ит жимгина ётиби, худди хафа бўлиб қолганга ўхшарди, қулоғи хийла оғир кампир эса товушини кўтариб шоша-пиша жавоб қайтарди: темирчи бор, хизматкор уй ёнидаги молхонада ухлаб ётиби, кампир уни ҳозир уйғотади, у отга ем беради. Овқат масаласида ҳам меҳмоннинг кўнгли тўқ бўлсин: тухум қўймоқ тайёрлаб бериш мумкин, лекин кечки овқатдан фақат оз-моз ловия бўтқа билан сабзавот қовурдок қолган, улар иситиб берилади... Доим ширакайф бўлиб юрадиган хизматкор чол меҳмоннинг отига ем бериб, эгар-жабдугини ечиб олишда ёрдамлаши.

Ярим соатдан сўнг мароқашлик киши ошхонада зўр иштача билан овқатланиб, сарғимтирик оқ мусалласни ютоқиб ичиб ўтиради...

Карvonсарой кўхна эди. Пастки қават узун-узун даҳлизлардан иборат бўлиб, йўлак охирида юқори қаватга чиқиладиган айланма зинапоя бор. Юқори қават иккига бўлинган: чап томонда кенг-мўл, лекин шифти пастак хоналар, хоналарга камбағал кўноқлар тунаши учун сўричалар қўйилган; ўнг томонда ҳам пастак шифти ошхона, шифтларию деворлари қуюқ тутундан қасмоқ бўлиб кетган емакхона, деворлари хийла қалин бўлгани боис токчадан ичкарига ўрнатилган кичик дeraзалар, бурчакда ўчоқ, устига ҳеч нарса ёпилмаган стол, ёнида ўтиргичлар, ерга ғадир-буудур тощдан тушама қилинган, у силлиқ-сирпанчиқ бўлиб кетган. Бу хонада керосин лампа миљилаб туради, у қоп-қорайиб кетган темир занжирга осиб қўйилган, хонага ачимсиқ тутун ва пиёздоқ ҳиди ўтириб қолган. Кампир ўчоққа ўт ёқиб совуб қолган қовурдоқни иситди, меҳмон сирка ва зайдун мойи аралаштирилган совуқ ловия бўтқани еб бўлгунча тухум қўймоқ ҳам тайёр бўлди. У ечинмади, якtagини ҳам ечмади, чотини кериб талтайиб ўтиради, оёқларида қалин теридан тикилган бошмоқ бор эди, оқ жундан тўқилган кенг-мўл иштонининг пойчаси бурмали бўлиб, тўпифини қисиб туради. Қизалоқ кампирга кўмаклашар, меҳмон иш буюрса сўзсиз бажо келтирас, лекин кутилмаганда еб қўйгудек ўқрайиб қарашларидан, қуруқшаган чўтириш башарасию юпқа лабларидан, кўкимтири мўйловидан қўрқар эди. Кўноқ шундоқ ҳам қўрқинчли кўринарди. Бўйи жуда баланд, кенг яктақда яна-да ваҳимали кўринади, попукли қалпоқ кийиб олган боши хумдек. Устки лабининг четларида дағал шоп мўйловининг учлари жингалак бўлиб буралиб қолган. Соқолинининг орасида ҳам яккам-дуккам жингалак тола учради. Бошини хиёл орқага ташлаб кеккайиб ўтиргани боис қўнғир тери остида ўйнаб турган кекирдак олмаси – буқоқчаси одатдагидан йирикроқ кўринарди. Қорайиб кетган ингичка бармоқларида кумуш узуклар товланиб туради. У миқ этмасдан еб-ишиб ўтириби.

Кампир қовурдоқни иситиб, қўймоқ пишириб бўлгач, оловининг тафти сўна бошлаган ўчоқ ёнига ҳолсизгина чўқди ва ундан қаёқдан қаёққа кетяпсан деб сўради бақириб. Меҳмон бўғиқ товушда:

- Узоққа, - деб гапни қисқа қилди.

Қовурдоқ билан қўймоқни пок-покиза туширгач, бўшаб қолган кўзани чайқаб кўрсатди: қовурдоққа аччиқ, қалампир кўп қўшилган экан, оғзини кўйдириб юбориби. Кампир боши билан қизалоққа ишора қилди, қизалоқ кўзани олиб емакхонанинг қия очиқ эшигидан чиқиб, тим қоронғи даҳлиз томон йўл олди – даҳлизда тиллақўнғизлар худди эртаклардагидек учқун сачратиб бир маромда парвоз этар, ажабтовур нур таратар эди.

Кўноқ қўйнидан папирос чиқариб тутатди, қизалоқ кетган томонга имоқилиб:

- Неварами? – деб сўради.

- Жияним, етимча, - деб жавоб берди кампир қичқириб. Сўнг эзмаланиб ҳикоя қилишга тушки: у марҳум акасини, яъни, қизалоқнинг отасини жуда яхши кўрар, акасини деб қариқиз бўлиб ўтириб қолган, мана шу карвонсарой акасининг хусусий мулки ҳисобланар, акасининг хотини бундан ўн икки йил муқаддам бандаликни бажо келтирган, акаси ундан олдинроқ ўлган, мол-мулкини бир умр фойдаланиш учун кампирга васият қилиб қолдирган, ҳувиллаб ётган кўрғончада яшаш ниҳоятда оғирлашиб кетган экан...

Мароқашлик киши кампирнинг дийдиёсини паришонхотирлик билан тинглади, унчалик эътибор бермади, у ўзининг ўй-хаёллари билан банд эди. Қизалоқ кўзани мусалласга тўлдириб қайтиб келди. Кўноқ унга кўзларини лўқ қилиб тикилганча папирос қолдифини шу қадар жаҳд билан ютоқиб тордики, оқибатда кирлаб кетган бармоқларининг учини кўйдириб олди. Сўнг янги папиросини шоша-пиша ўт олдириб, товушини кўтариб, кампирга – у кампирнинг қулоғи оғир эканини аллақачон сезган эди – мурожаат қилди:

- Агар жиянинг мусалласни ўз қўли билан қўйиб берса, бағоят мамнун бўлардим.

- Бу унинг иши эмас, - деди кампир чўрт кесиб. Сўнг зардали оҳангда

қичқириди: - Кеч бўлди, мусалласни ичиб, бориб ухлагин. Ҳозир жияним сенга юқори хонага ўрин тўшаб беради.

Қизалоқ кўзларини чақнатиб дик этиб ўрнидан турди, кампирни ортиқча жавратиб ўтирасдан тап-тап қадам ташлаб зинаю бўйлаб юқорига кўтарилиди.

- Ўзларинг қаерда ухлайсизлар? — деб марокашлик попукли қалпоғини терлаб кетган пешонасидан бир оз суреб қўйди. — Юқорида ётасизларми?

Кампир қичқириб гап бошлади: ёзда юқори қават жуда иссиқ бўлади, ижарачилар бўлмаган чоғларда — энди деярли келмай қўйди — улар пастки қаватнинг нариги бўлмасида, қарама-қарши томонда, хув анави хонада ётадилар. У кўли билан ўзлари ётадиган хонани кўрсатиб, сўнг яна ишлар чаппасига кетганидан шикоят қилишга тушди, ҳамма нарса қиммат бўлиб кетди, шу боис, иста-истама йўловчилардан ҳам қимматроқ ҳақ олишга туғри келади...

- Мен эртага вакъти кетаман, — деди марокашлик кампирнинг гапларига эътибор бермай. — Эрталаб фақат қаҳва берсанг, бас. Демак, ҳозироқ ҳисоб-китоб қилиб қўйишимиз мумкин. Ҳўш, қанча бўлди? Ҳозир тўлайман. Йў-ўқ, аввал майда пулларимни топай-чи, — деб у яктагининг ички чўнтағидан юмшоқ қизил теридан тикилган ҳамёнини чиқарди, бофичини бўшатиб оғзини очди, стол устига бир ҳовуч тилло тангаларни жаранглатиб тўқди. Гўё пулларини синчиклаб санаётгандек пешонасини тириштириди, кампир эса ўчоқ ёнида ўтирган ўринидигидан туриб, кўзларини ола-кула қилиб тилло тангаларга тикилди.

Юқори қават қоронғи, жуда иссиқ эди. Қизалоқ чўмилиш хонасининг эшигини очиб қўйди. Қоронғилиқдан иссиқ ҳаво гуп этиб юзига урилди, дарча тирқишлиридан ярқ этган нур кўринди, бу хонага ҳам худди пастдаги каби кичикроқ иккита дераза ўрнатилган эди. У хона ўртасидаги юмалоқ столни чаққон айланиб ўтиб деразани очди, дарча эшикчаларини итариб ташқарига очди. Ойдин кеча, бепоён осмон оқаришиб, яккам-дуккам юлдузлар кўзга ташланарди. Нафас олиш хийла енгиллашди, водийдан жилга жилдираши эшитиларди. Қизалоқ тўлин ойни томоша қилиш учун деразадан бошини чиқарди, ой ҳамон тепада бўлгани боис хонадан кўринмасди. Сўнг қизалоқ пастта қаради: ерда турган ит тумшуғини кўтариб унга қаради. Бундан беш йилча олдин битта дайди кучук қайлардандир адашиб карвонсаройга келиб қолади, у қизалоқнинг кўз ўнгида катта бўлади, қизалоқка ўрганади, у эгасига шу қадар содик эдики, бундай садоқатни фақат итлардан кутиш мумкин. Зотан, ит вафодор бўлади.

- Негра, нима учун ухламаяпсан? — деди қизалоқ товушини пасайтириб.

Ит беозоргина фингшиб, бошини бир силкитди-да даҳлизнинг очиқ эшиги томон ташланди.

- Қайт, қайт! — деб буюрди қизалоқ шошиб. — Жойингта бор!

Ит таққа тўхтади, тумшуғини кўтариб қизалоққа қаради, кўзларидан учқун сачарарди.

- Сенга нима керак ўзи? — деб сўради қизалоқ эркаловчи товушда. У доим ит билан худди одамдек гаплашарди. — Нега ухламаяпсан, эсипаст? Ё осмондаги ой хаёлингни олиб қочдими?

Ит бир нима деб жавоб бермоқчи бўлгандек яна тумшуғини юқори кўтарди, беозоргина фингшиб қўйди. Қизалоқ елкаларини қисди. Бу ит унинг сирдоши, ёргу оламдаги бирдан-бир жонли сирдоши эди. Итнинг ҳис-туйғули, ўй-хаёллари доимо қизалоққа тушунарди бўларди. Лекин ҳозир ит нима демоқчи, у нимадан хавотирланяпти — буни қизалоқ яхши англамади, шу боис қўлини арра-арра қилиб, ёлғондакам жаҳли чиққандек:

- Негра, жойингта бор! Ухла! — деб шивирлади.

Ит жойига бориб ётди. Қизалоқ дераза ёнида яна бирпас ўйланиб турди. Балки, итни анави марокашлик тасқара хавотирга солгандир? Ит карвонсарой кўноқларига деярли эътибор бермасди, ҳатто кўринишидан қароқчи ёки дордан қочган каззобга ўхшаган кимсаларга қайрилиб ҳам қарамасди. Лекин баъзан айрим кимсаларга нима учундир худди қутургандек ташланиб қоларди, момогулдурақдек вовуллаб оёқдан оларди. Бундай пайт-

ларда қизалоққина итни ҳовуридан тушириб, қайтариб коларди. Ҳозир итни безовта қилаётган бошқа нарса бўлиши мумкин: димиққан кеча, қилт этган шабада йўқ, осмонда тўлин ой чараклаб нур таратяпти – бундай ҳолат ҳар қандай тирик жонни қуюшқондан чиқариб юборади. Бу оқшом ҳукм суреётган файритабии сукунат оғушида водий тарафдан жилғанинг жиљдираши, молхонада дуп-дуп ер тепиб, шаталоқ отиб юрган эчкининг түёқ товушлари баралла эшитилиб турарди. Қўққис қари хачирми ёки марокашлик қўноқнинг айғир отими гурс этказиб эчкини тепиб юборди, эчки жонҳолатда шу қадар хунук маъраб юбордики, қулоқни тешиб юборадиган ўткир товуш узоқ-узоқларга таралиб кетди. Қизалоқ сапчиб ўзини деразадан ичкарига оди, нариги деразани ҳам очиб, дарча эшикласини итариб юборди. Хона гира-шира ёришиб қолди. Хонада столдан ташқари, эшиқдан кираверишдан ўнг томонда учта кенг каравот бор – бош тарафи деворга тираб, устига дағал чойшаб ташлаб қўйилган. Қизалоқ чойшабларни ийғишириб кираверишдаги биринчи каравотта ташлади, ёстиқ тўшаб, кўрпача ёзи. Шу пайт хона эртаклардаги мўъжиза маскани каби ёришиб, майнин кўкимтири шуълага чулғанди – тиллақўнғиз қизалоқнинг гажагига қўнган эди. Қизалоқ уни астагина силади, тиллақўнғизгоҳ ялтираб, гоҳ хира тортиб хона бўйлаб парвоз эта бошлиди. Қизалоқ димофида хиргойи қилганча сакраб-сакраб пастга тушиб кетди.

Емакхонада марокашлик киши эшикка орқа ўгириб фўдайиб турар, паст, лекин қатъий оҳангда, асабийлашиб кампирга бир нималар деяётган эди. Кампир бошини чайқаб рад маъносини билдиради. Марокашлик елкаларини учирив қўйди, хонага кириб келган қизалоққа шундай ўқрайиб қаралики, шўрлик жонҳолатда ўзини орқага ташлади.

- Жой тайёр бўлдими? – деди у бўғиқ товушда.
- Ҳаммаси тайёр, – деди қизалоқ шошиб.
- Телага қандай чиқиши билмайман, мени кузатиб қўясан.
- Сени ўзим кузатиб қўяман, – деди кампир дарғазаб бўлиб. – Орқамдан юр!

Кампир айланма зинапоядан инқиллаб-синқиллаб юқорига кўтарила бошлади, марокашлик эса бошмоқларини тап-тап этказиб унга эргащи. Қизалоқ бирпас туриб ташқарига чиқди. Остонада ётган ит сакраб турди, атрофида чир-чир айланди, думини ликиллатиб қувончини изҳор этди, сўнг эгасининг юзларини ялади.

- Нари тур, нари кет! – деб шивирлади қизалоқ ва эркалаб итни итариб юборди, остонага ўтириди.

Ит ҳам орқа оёқларига чўнқайиб ўтириди, қизалоқ унинг бўйнидан қучоқлаб олди, пешонасидан ўпди, ўтирган кўйи ит билан бирга тебрана бошлади. Юқори қаватдан марокашлик қўноқнинг оғир қадам товушлари, бўғиқ овози эшитилиб турарди. У хотиржамлик билан кампирга бир нималар дерди, лекин нима деяётганини аниқ-тиниқ англаш бўлмасди. Ниҳоят, у товушини кўтариб:

- Бўлти, бўлти! Фақат айтгин, кечқурун ичиб ётишим учун сув келтириб берсинг, – деди.

Зинапоядан эҳтиёт бўлиб тушаётган кампирнинг қадам товушлари эшитила бошлади.

Қизалоқ даҳлизга кириб кампирнинг йўлини тўсди ва:

- Мен унинг нима деганини эшитдим. Йўқ, ўлсан ҳам олдига ёлғиз чиқмайман. Ундан қўрқаман, – деди қатъиян.

- Бемаъни гапларни қўй, – деб қичқирди кампир. – Сен ўйлайсанки, мен яна-тағин мана шу маймоқ оёқларимни судраб тепага чиқиб тушамни? Ёругроқ бўлса ҳам кошкийди. Зинапоянинг сирпанчиқлигини айтмайсанми?! Унинг нимасидан қўрқасан?! Тўғри, у каллаварам, аччиғи бурнининг учидаги турар экан, лекин ёмон одам эмас. У сен ҳақингда куйибишиб гапирди, сенга раҳми келяпти, эҳ, шўрлик, сепи бўлмаса, ким ҳам уни келин қиласди деяпти. Тўғри айтятпи, сенда сеп нима қилсин! Биз аллақачон хонавайрон бўлганмиз...

- Боя мен кирган пайтда нима учун аччиғланиб турган эди? – деб сўради қизалоқ.

Кампир каловланиб қолди.

- Нима учун эмиш! – деб гулдиради кампир. – Мен унга бирорвнинг

ишига бурнингни тиқмагин дедим... Шундан кейин жаҳли чиқиб кетди... Қани, ивирсима, дарҳол унга сув элтиб бер! — деди кампир зардаси қайнаб. — Сув элтиб берсанг у сенга бир нима совға килади. Баъдаси шундай. Бор деяпман!

Қизалоқ қўзани тўлдириб юқори қаватдаги хонага сув олиб чиқди. Марокашлик қўноқ уст-бошларини ечиб каравотда алчайиб ётарди: ой ёруғида унинг митти кўзлари ялтирас, соchlари тап-тақири этиб олинган боши қорайиб, узун ички оқ кўйлаги оқаришиб кўринар эди. Сўлақмондай ялан-фоч оёқларини ўйнатиб қўярди. Қувури узун, барабанли тўппонча хона ўртасидаги столда ялтираб турарди. Устки қийим-бошларини ёнидаги каравотта уюб қўйиби... Буларнинг ҳаммаси ниҳоятда ваҳимали кўринарди. Қизалоқ югуриб бориб қўзани тақ этказиб столга қўйдию зинфиллаб орқасига қайтди, лекин марокашлик қўноқ сакраб турди-да, қизалоқнинг кўлидан ушлаб олди.

- Шошма, шошма, — деди у қизалоқни каравот томон тортиб. Уни қўйиб юбормасдан каравотта ўтириди, сўнг: - Бир дақиқа ёнимда ўтири, ўтири деяпман, ўтиранг-чи... Гап бундай, яхшилаб қулоқ сол... — деб шивирлай бошлади.

Капалаги учиб кетган қизалоқ итоатгуйлик билан унинг ёнига ўтириди. У энтикиб-энтикиб изҳори дил қила бошлади: худо ҳаққи, сени кўрдиму эс-хушим бошимдан учди, бир кўришщаёқ севиб қолдим, ёлғон гапираётган бўлсам, ана, тепамда худо туриби, бир ўпич учун ўн тилло, йигирма, бор-э, ўтгиз тилло бераман, бир халта тилло тангам бор... кейин...

Естиқнинг остидан қизил ҳамёнини олиб, қўллари қалтираб унинг бочини бўшатди, тилло тангаларни тўшакка тўкиб ташлади.

- Мана, кўрдингми, тиллоларим қўлмикан?.. Кўрдингми?.. — деб гулдиради.

Қизалоқ шаҳд билан бош чайқади, каравотдан сапчиб турди. Лекин қўноқ уни дарҳол тутиб олди, қуруқшаган, чапдаст қўли билан оғзини ёпиб каравотга ётқизди... Қизалоқ жонҳолатда типирчилаб унинг қўлини оғзидан юлқиб ташладио:


- Негра! — деб чинқириб юборди.

Энди у қизалоқнинг оғзини бурнига қўшиб маҳкам сиқиб, бўш қўли билан типирчилаеттан оёғини ушлашга ҳаракат қилди; қизалоқ эса шаталоқ отиб унинг қорнига аёвсиз тела бошлади. Шу пайт зинапоядан учиб чиқаётган итнинг ириллаши қулоқча чалинди. Марокашлик қўноқ сакраб ўрнидан турдию столда ётган тўппончасини қўлига олди, бироқ тепкини топишга ҳам улгурмасдан полга қулади — ит унга ташланиб, устидан босиб тушди. Устига миниб олган ит ҳамласидан юзини тўсиб ётган жойида иргишлир, итнинг иссиқ, нафаси юзига урилган чоғда баттар тўлонар, типирчилар, оҳ-воҳ қиласи эди, лекин беихтиёр бошини орқага ташлаб, иягини кўтарган заҳоти ит унинг томоғидан фарч этказиб тишладио ке-киратгини юлиб олди, ҳалқумидан тизиллаб қон отилиб кетди...

Рус тилидан
Олим Набизода таржималари



УЛУФИМСАН, ВАТАНИМ!



Машраб Бобоев

ЎЗБЕКИСТОН

Ўзбекистон, она-Ватан, дардингни олай,
Оз эмасдир сенинг учун фидо бўлган жон.
Лекин, улар — сенга фидо бўлмоқ учун шай
Миллионлаб фарзандингдан саноқли нишон.

Оlam узра кезиб юрап довруғинг ҳозир,
Номи машҳур фарзандларинг қиласан эъзоз.
Лекин, улар — довруғингни ёймоққа қодир
Миллионлар денгизидан бир томчи, холос.

Мен ишқимни қилмасам ҳам ошкора баён,
«Жоним фидо!» деб кўксимга муштламасам ҳам.
Ўзбекистон, она-Ватан, сўзимга ишон,
Фарзандингман, фарзандингман ҳар қачон, ҳар он.

Хаётингда бош қаҳрамон эмасман, лекин,
Йўқ ҳам эмас, мен оммавий саҳнада борман.
Гар саноқда бўлмасам ҳам, сонда борман, мен,
Сенга фидо миллионлар сафида борман.

Бошим узра ҳилпираган байроқлар номинг,
Бир умрга ўтгум баланд кўтариб уни.
Шу байроқдир — менинг умрим, менинг имоним,
Уни омон, пок сақламоқ — умрим мазмуни.

Шу байроқдан ўзга йўқдир муқаддас нарсам,
Шу байроқдан ўзга нарса эмасдир ҳавас.
Үлганда ҳам шу байроқнинг тагида ўлсам,
Үлганда ҳам шу байроқ деб ўла олсам, бас!

Ўзбекистон, она-Ватан, дардингни олай,
Оз эмасдир сенинг учун фидо бўлган жон.
Лекин, улар — сенга фидо бўлмоқ учун шай
Миллионлаб фарзандингдан саноқли нишон.



Фулом Шомурод

* * *

Қачон боқсам күкка, юлдузга,
Күқдай тоза бўлади руҳим.
Айланади кечам кундузга,
Завқум тошиб, қочар андуҳим.

Холбуки тун,
Атрофда тинмай
Чигирткалар этишар нолиш.
Аслида-чи, бу нолиш эмас,
Күкка боқиб қилмоқлик хониш.

Күкка боқиб,
Юксакда эсган
Салқин ҳаволарни қучаман.
Юлдузлардан томчилаб тушган,
Шудринглардан қониб ичаман.

Туғилгандай бўламан қайта
Тунда кўкка боққаним чоғлар.
Фикр — тиник,
Руҳим топ-тоза.
Кенг жаҳонни олгум кучоқлаб...

* * *

Лойқа сувлар тиниб, тиникиб,
Ариқларда тўлиб оқади.
Пайкаллардан дўппайиб чиқиб:
Қовун, тарвуз кулиб боқади.

Ерга томон эгиб шохларни
Дарахтларда фарқ пишган мева.
Дарахт эмас — ортиб юкларни
Қатор бўлиб турибди тева.

Кун ҳовури энди пасайиб,
Эсар майин шаббода фир-фир.
Бўлиқ кўсак тишин кўрсатиб,
Мўъжизадан очаётир сир.

Яшилликдан япроқлар тўйиб,
Зафар рангин қўмсайди муштоқ.
Табиат ҳам кутиб, энтикиб
Меҳмонига очмоқда қучоқ.

Юлдуз ёнар,
Олиб кўзларни,
Кечалари тиник осмонда.
О, сунбула не-не хисларни
Уйғотасан юракда, қонда?!

Бухоро.

Ортиқжон Жўраев

* * *

Она тилим, сенсан — ғурурим, меҳрим,
Жаҳон кишварида ўрнинг, қадринг бор.
Мусиқийлигингдан очилиб баҳрим,
Завқларим чашмадек қайнар бегубор.

Барча бойликлардан бойсан, битта сўз
Олмосдан тиникроқ жило тарайди.
Сеҳр, кудратида орттириб нуфуз,
Баъзан бир сўз оғир дардга ярайди.

Жилвангдан лол қолур ҳатто камалак,
Сўзлар бор, ақлда уйготар ҳайрат.
Фақатгина жило бермоғи керак:
Чексиз меҳр билан тенгсиз маҳорат.

Жавҳар кутисида меҳмон бўлмаган,
Дурларнинг хили мўл сандиқларингда.
Оlam майдонида яшнаб, кулмаған,
Чечаклар учрайди чандиқларингда.

Жаҳонда тенги йўқ, дейилган тиллар
Борлиги буржингга бўлмайди ямоқ.
Сафларда бораётган беҳисоб эллар
Атамаси чексиз — бамисли ирмоқ...

Кўз ўйнатиб, лол этгувчи сирингдан
Симирганим сайин очилар баҳрим.
Тарғунчадек яйрас дилим меҳрингдан,
Она тилим, сен-ла ортади қадрим.

* * *

Нафис навбаргнинг учида зарра
Оlamни яратмоқ бўлар ўзида.
Кенг осмон жойлашган тор бағир ичра
Куёш нур тарайди — зиё юзида.

Фоятда бегубор, софликдан зарра,
Борликни ўзида кашф этмиш, одам —
Қалби тоза эрса, руҳи соф эрса,
Хисобланар экан мукаммал олам.

Фузор.

Озода Жабборова

* * *

Йиллар бўйи ахтариб ўтдим,
Сени ҳамон кўмсайди юрак.
Соғинчларнинг баридан тутдим,
Соғинчларга айлансан керак.

Йўлларингга ниғорон боқиб,
Кўзларимдан ҳижронни кувдим.
Кел, висолнинг маржонин тақиб,
Юрагимнинг армони — севгим.

Нетай, сени соғинар,
Хисларимнинг тили лол?
Қалбим ғамгин, доғинар,
Гулоҳдир маъюс ҳилол.

Сабрнинг бор саботин
Мендан олган мажнунтол.
Ишқнинг азобли тотин
Қалбга жойламиш хаёл

Toшкент.

**Саломжон Менгнор
Термизий**

* * *

Йўқликни Коф кезиб, анқодан топдик,
Беҳислик фурурин юходан топдик.
Қоқ тупроқ эканмиз, ёмғиру кўклам,
Узликнинг мағзини танҳодан топдик.

* * *

Ишқ мояси-поклик, дилга тушса гар,
Бу дилни у кўзгу қилур мунаvvар.
Ишқ ишққа, дил дилга тимсол, кўзгуда,
Бир-бирин васлига бўлса мұяссар.

* * *

Ким синов йўлида ўзидан огох,
Кўнглига эгаю сўзидан огох.
Чекмас озор, асло, гар бўлса ҳар дам
Нафсига хушёру кўзидан огох.

* * *

Ҳақиқат излаб сен кезмагил жаҳон,
Қалбингга разм сол, қулоқ тут бир он.
Не наво эшиитдинг, неларни кўрдинг,
Ҳақиқат шулардир, соғ бўлса чунон.

* * *

Яҳши ҳам, ёмон ҳам таҳлилга мухтоҷ,
Истак ҳам, имкон ҳам таҳлилга мухтоҷ.
Ҳақиқат кўзини кул босган маҳал,
Даврон ҳам, замон ҳам таҳлилга мухтоҷ.

* * *

Ёр васлин ваъда айлар, дам-бадам ёр излари,
Қолдирмай дилда не ғам, не алам ёр излари.
Югуртириб изидан, оқибат унутиб лафзин,
Кўймас қайтиб мен сари, бир қадам ёр излари.

Термиз.

Сотиволди Содиков

* * *

Ҳамма билган учқур тулпорсан умр,
Сўрамайсан ҳеч бир жонзотдан изн.
Қайси бир вужудга баҳш этиб сурур,
Кимнингдир булууга буркаб юлдузин –
Сен кетиб борарсан.

Ҳар бир соғлом жоннинг қалбида шавқинг,
Учиб кетаётган қушдек фараҳли.
Оқиб ўтаётган сувдай сершовқин,
Кўқдаги қуёшдай ярақ-ярақли —
Нур ютиб борасан.

Бирор кулфат сабаб тушиб кетса рух,
Далда бериб ўзинг-ўзингга минг бор —
Вужуд-вужудингдан қюлса-да «ух»,
Олдда баҳтли кунлар бор деб, умидвор —
Кўз тутиб борасан.

Беайб Оллоҳ. Биз-чи, бандай ожиз —
Бехуда мақтовчи матоларини,
Ёлғонлар ишлатдим кўплардек, афсус,
Сўровим: шояд, шу хатоларимни
Йўқ этиб борасан.

* * *

Юмшатиб тош қатин
Тош орасидан
Милт-милт соф томчилар чак-чак томади.
Хайрон қотиб турдим рўпарасид,
Номи ҳам шунга мос: «Чакка томари»

Бу тоғда кўзлари юлдуз бир сулув
Йўқотиб севгани берган узугин,
Ноилож,
Тош ичра беркинибдию
Йиглаб ўтиармиш энди уззукун.

Кизалоқлар сахар юз чаяр, бунда,
Чехралари яшнаб ёнади ял-ял.
Тоғликлар керилар: «Шунинг учун-да
Биз ёқнинг қизлари гоятда гўзал!»

Бовар этмаса-да, бунга гоҳ ақл,
Аммо, пари нусха хурларин кўриб,
Менга ростдай бўлиб туюлар нақл,
Асли, бу маъвога ҳусну кўрк бериб,
Яшнатган табиат сехри-ку, ахир!

Рўпарамда эса, чакка томардан
Соф қатралар чак-чак томиб турибди.
Қай бир сулув келиб бугун саҳарда
Сувга кўйиб кетган жоми тўлибди.

Кува.

Баҳодир Раҳмонов

* * *

Ҳеч ким ўз нафсига бўлмасин асир,
Одамзоднинг кўзи — фанойи, ахир,
Хохиш-истакларинг майли бўлсин сир,
Дўстим, яхшилигинг яхши барибир!

Ҳаёт неъматида йўғу боримиз,
Бегонадан эмас қилган зоримиз,
Эзгуликка элтсин барча коримиз,
Дўстим, яхшилигинг яхши барибир!

Сўнгги манзилимиз бўлса-да чукур,
Рухимиз осмонда, топмаймиз ҳузур,
Адоват кўксидা ханжардир шуур,
Дўстим, яхшилигинг яхши барибир!

Эзгулик йўлида бўлибон посбон,
Севиб севилганга пойдормиз ҳар он,
Элу юрting учун бўлгин фидожон,
Дўстим, яхшилигинг яхши барибир!

Мансаб талашмагин мухтарам инсон,
Шамолдай ўткинчи ҳар шуҳрату шон.
Ўзгарса ҳам ҳатто ҳар қанча замон,
Дўстим, яхшилигинг яхши барибир!

* * *

Умримиз ганимат, биламиз буни,
Бу аён бўлса-да, қиласман такрор,
Чунки, ўтган кунинг келмайди қайта,
Чунки, дунёга келамиз бир бор.

Ҳаёт жуда қисқа. Биламиз буни.
Қайта эслатмок қилмагай зиён.
Ўткинчи умрнинг узайиши шу:
Биздаги яхшилик қолар жовидон..

Самарқанд.

Мунаввара Ойматова

* * *

«Қаро отлик, қаро тўнлик
Мани кўрголи келдингми?»
Бу манзил не, кетар кунлик
Савол сўрголи келдингми?

Адо бўлдим фаразларга,
Сазо бўлдим маразларга,
Физо бўлдим аразларга,
Шуни кўрголи келдингми?

Қарошингда ойим ботди,
Берарсанми жавоб-додни.
Йўлларингга хижрон боддир,
Қарор этголи келдингми?

Ё дўст, десам садо қайтмас,
Арши узра нидо қайтмас,
Гадолигим гадо айтмас,
Санам кулголи келдингми?

Гиёхларда ибодатим,
Саёҳларда ижобатим,
Сабоҳларда саловатим,
Санам билголи келдингми?

Қаро отлик, қаро тўнлик,
Бошим узра ою кунлик,
Сабоҳларда йиғлаб мунглик,
Садом бўлголи келдингми?!

* * *

Субҳа тошим ўйнайди панжам,
Санаб гўё ишқсиз онимни.
Мен тугатсан, айтинг, ким элтар,
Ишқ юрагига хаста жонимни?

Ишқ гулханин оташларида
Ибодатим этаман адо.
Парвонадек куйган жисмимда
Мингга Қақнус беради садо:
«Элтинг кулим ишқ тамуғига!»

Хўжанд.

¹ Халқ қўшиғидан.

* * *

Истиқболнинг ишқ сардафтарин
Очган давр қадами илдам.
Элнинг ҳар бир буюк зафарин
Тарих битар зар ҳарфлар билан.

Чиниктириб, курашда тоблар,
Ватан-да кенг, тиник осмоним.
Хис этаман азиз, мўътабар,
Муқаддас хур зотлар эҳсонин.

Ёмон кўздан асралгай олам,
Хавотирлик қамрар вужудин.
Тандирдан чўғ узади онам,
Үрмалайди исириқ дуди.

* * *

Мен сизни танидим,
Тўхтанг бир нафас,
Хотирда тикланди ҳазрати инсон,
У ёқ-бу ёқлардан юритайлик баҳс.
Юрак ўз меҳрини этади эҳсон.

Мен сизни танидим,
Куёш-кучаниб
Уфқни ёндирап ол майин ичиб.
Сиз мени кутдингиз бир дам шунчалик,
Иўлимини чўрт кесиб ўтмаслик учун.

Мен сизни танидим,
Чинор урап барқ,
Ёнимдан беларво ўтар ёш, қартанг.
Тўхтанг, эй ҳазратим, бу кўнгил илҳақ,
Иўлингиздан қолмай кетаяпсиз, аттанг.

Мен сизни танидим,
Толларнинг маҳкам
Кўллари чирмашиб кетган нарида.
Кўзлар чақнаб кетди биз учратган дам,
Келинг, дўстим, бир зум босай бағримга.

Сирдарё.

Яҳшибой Шарипов

* * *

Чархи гардун тиним билмай айланади,
Кимни сийлаб, кимни синааб айланади,
Менга эса, насиб этмиш ситамлари,
Билмам, қачон бошим силаб айланади!?

* * *

Ботиндаги гуноҳимдан кўзларимда нам,
Зохирдаги нуқсонларим ундан эмас кам.
Холим нима·кечар, маҳшар тонгида
Узинг қўллаб авф этмасанг ё қодир эгам!

* * *

Дунё иши зап ғаройиб ҳамда қизик,
Бизнинг ўтар вақт ҳам ўлчов билан қизик.
Шу қисқа вақт ичиди разм солсам,
Кимда ютуқ, кимларга насиб ютқизик.

* * *

Дунё деганлари — кошинли айвон,
Хар куни, ҳар турли ўйин намоён.
Одамзод неларни орзу қилмади,
Топганлари бўлди афсус-пушаймон.

Нурота.

Абдугани Сулаймон

* * *

Менга ёр бўлгин десам, ул шўхи дилдор истамас,
Бўлмаса ёнимда ул, дил сайригулзор истамас.

Махлиёман хуснига, ул ёр атиргул ошиғи,
Гулга боқсам неча бор, боқмоқни зинҳор истамас,

Икки зулфи — сунбули, жонимгаки, дом ташлагай,
Тим қора кокиллари бўйнимдаги дор, истамас.

Нола қилсан мен унинг ҳажри ила тун-кечалар,
Тингламас зоримни ул, келмакни бир бор истамас.

Менга бепарво бўлиб, бағрим аро чўф ташлагай,
Во ажаб, бул париваш ишқига маккор, истамас.

Қошларини ёй этар, мужгонларин пайкон этар,
Ё мани қурбон этар, ул чашми хунхор, истамас.

Истамас, Абдугани ишқда Сулаймон тахтини,
Ичгали ҳижрон майини соғу бемор истамас.

* * *

Етти иқлим кезсам ҳам сенга талпиндим Ватан,
Умрим бори ўқидим ҳаёт китобларини.
Аждодларни қадрлаш муносиб ворисга тан,
Ёш авлод тинглар сергак давр хитобларини.

Руҳият озиғидир боғларинг сархуш иси,
Узбекистон деганда таралгай хуш ифори.
Дилга ғурур баҳш этгай юртимнинг ҳурлик ҳисси,
Сенга олам маҳлиё Шарқнинг сўлим диёри.

Ўзбекона хулқ-одоб оламга ўrnak бўлур,
Кўёш янглиғ чароғон дилбандларинг орзуси.
Саховат, савоб, поклик — жонларга жондош ҳузур,
Инсоғу ҳалолликда тенг ҳалқим тарозуси.

Улусдан фахрланиб, шукрим айтдим юрақдан,
Бахти бутун элимнинг, зотан, ёрқин иқболи.
Истиқболнинг юкини елкалаган, эй Ватан,
Сен — зўр манзил кўзлаган катта карвон тимсоли.

Пахтанг-ку, кўнглингдай ок, конларинг қайнар булоқ,
Бир-биридан шукуҳли сара олтининг бисёр.
Миллатим қадрияти бебаҳо бойлик бироқ,
Ўзлигига бек бўлган буюк ўзбек ҳалқим бор.

Тошкент.



КЕЧАДАН БУГУННИ ИСТАБ...

Эркин Самандар ижодига бир назар

Таниқли шоир, қатор йирик эпик полотноларнинг муаллифи, бир қанча саҳна асарлари билан тилга тушган драматург Эркин Самандар деярли бутун ижодини ўтмишни бадиий тадқиқ этишга, аждодлар руҳиятидаги ҳиссий тўлғамларни акс эттиришга бағишилади. Адид учун мозийни тасвирлашнинг ўзигина мақсад эмас, у ўтмишнинг пучмоқларидан ҳалқимиз табиатидаги улуғлик ва майдаликнинг илдизларини қидиради, кечадан бугунни топишга, ҳозирни ўтмиш орқали изоҳлашга уринади. Ҳатто Эркин Самандарнинг лирик асарлари ҳам кечанинг руҳи билан тўйинтирилгандай туюлади.

Биз ушбу мақолада бутун умрини жиддий изланишлар билан ўтказаётган Эркин Самандар ижодининг шоирлик, носирлик ва драматурглик сингари қирраларига назар ташлашни ният қилдик.

ЮРАКЛАРГА СОЛИНГАН ЙЎЛ

Кўпчилик адиллар сингари Эркин Самандар ҳам ижодини шеър ёзишдан бошлаган. Унинг шеърлари худди шахсияти сингари сокинлиги, равонлиги, кутилмаган долғалардан холи эканлиги билан ажralиб туради. Шоир ифода йўсуннда шаклий бетакрорликка, ифодавий тажрибалар қилишга интилмайди. Унинг аксарият шеърларига самимийлик, туйгулар ҳаққонийлиги, сезимлар бетакрорлиги хосдир. Уларда энг ичкин ҳиссиётлар назокат билан ифода этилади. Буни шоирнинг “Юракка йўл” шеъридан олинган қўйидаги сатрлари мисолида ҳам кўриш мумкин:

*Энди йўл қураман ўзим сиз томон
Тамомий ўйлардан бўлакча бўлур.
Ингичка бир сўқмоқ қўзлардан пинҳон,
У тўғри юракдан юракка бўлур.*

Шоир симобдай ўзгарувчан руҳий ҳолатларни, инсоннинг муҳим бўлмаган ижтимоий-ҳиссий рутбасини тасвир этганда ҳам ўз ифода йўсуннинг содик қолади. Шунинг учун ҳам кечагина суйгулисининг энг яқин маҳрами бўлиб, бутун унинг меҳридан маҳрум бўлган кишининг ҳолати ортиқча эмоционал долғаларсиз тасвир қилинади. Ифода сиртдан сокин, шеърда ўтли оҳ-воҳлар, кескин холосалар йўқ, лекин шоир руҳий ҳолати пўртанали:

*Кечагина сиз-ла сарафroz
Ишқ боғида мен адҳам бўлдим.
Кеча эдим сиз ила ҳамроz
Бугун эса номаҳрам бўлдим.*

Шоир ўқувчини ҳаётий вазият, руҳий манзара билан юзма-юз қиласи. Ундан таъсирланиш, муносабат билдириш ва холоса чиқаришини шеърхоннинг ўзига қолдиради. Лирикада холис тасвир шеърнинг таъсир кучини, ҳиссиётлар ҳароратини пасайтириши мумкин. Фақат туйгулар чинлиги, ҳолатнинг самимийлиги, кечинмалар табиийлиги мисраларга жозиба баҳш этади:

⁹Шарқ юлдузи. Тўртинчи фасл

*Бугун мен йўлларда паришон,
Кимсасиз кўчанинг маҳрами.
Кечаги ҳамхона қадрдоң,
Кечаги кунларнинг адҳами.*

Шоир ўқувчига ўз ҳиссиётини тикиштириб, уни туйғудошлиқка, ҳамдардликка чорламайди. У гўё ўз руҳиятини ўзи ташқаридан кузатаётгандай бўлади. Бу ҳол ўқувчига шеърдан ўзига ўртоқ сезимларни туйиш имконини беради.

Эркин Самандар лирикасида кўпинча инсонга, жамиятга хос хусусиятлар табиат ҳодисаларига кўчирилади. Бу ҳол тасвирнинг таъсиричанлигини ошириб, туйгулар универсаллиги, сезимлар умумийлигини таъминлайди:

*Оёқлар остига тўқилар ҳазон,
Дараҳтлар йўлларга тўқишиар ғамни.*

Шеърда тасвирланаётган ҳолатга инсоний муносабат, баҳолаш сезилиб турган бу мисралардаги ҳазинлик, тушуниксиз мунг куз манзарасининг ўзи туфайли эмас, балки унинг шоир кўнглидан ўтиши сабабли пайдо бўлган. Ўқувчи кузги оғочлардан тўклилаётган япроқлар билан ўз умри ўртасида қандайдир мувозийлик топади ва бу ҳолат унда ҳасрат пайдо қиласди.

Эркин Самандар туйгуларини кўз-кўз қилмайди, ҳиссиётнинг ўзини ифодалашдан кўра, уни келтириб чиқарган ҳолатни тасвирлашга кўпроқ диққат қаратади. Шунинг учун ҳам унинг шеърлари замиридаги маънолар, мисралар қатига беркитилган туйгулар дарров кўзга ташлана қолмайди. Таъби нозик, синчков ўқувчигина уларни пайқashi мумкин. Эркин Самандарнинг “Ноябр далалари” деб қуруққина номланган бир шеъри бор. Унда шоир кеч кузги ўзбек даласини тасвирлагандай бўлади. Бундан йигирма йиллар олдин яратилган бу шеърда ҳосилдан бўшаган пахта даласининг тароватсиз манзараси чизилади:

*Кечаги бодроқдай чаноқлар бўм-бўш,
Қуруқ ва қўнғирдир гўзапоялар.
Униқсан аёлдай отизлар ўйчан,
Юзи-кўзларини изғирин ялар.*

Очилиб ётган бўм-бўш чаноқли куруқ қўнғир гўзапоялар, экинзорларнинг чарчаган, рангпар, фамбода аёлдай ўйчанлиги ва юзу кўзларини кузги изириндан ҳимоя қилолмаслиги тасвири кишида аниқ, лекин ёқимсиз таассурот уйғотади. Шоир тасвирни паҳтазордан шотутга, ундан одамга кўчириш асносида ифоданинг кучини босқичма-босқич ортириб боришига эришади:

*Шотутнинг уч-тўртта қуруқ япроғи
Шохига ёпишиб турад омонат.
Чўгирма кийган чол юзин иситар
Бир чимдим шуълага айлаб қаноат.*

Бир чимдимгина қуёшга юзини тоблаётган чолнинг қаноати таъкидланиши бежиз эмас. Биргина шу образда сабру бардоши чегара билмайдиган инсоннинг руҳияти ўз ифодасини топган. Тасвирнинг кейинги босқичида, атрофида не бўлаётгани билан иши йўқ, тараққиётнинг суръатидан, ҳаётнинг шиддатидан хабарсиз одам тимсоли чизилади.

*Инқилаб ўтади четанарава,
Устиди эгаси ухлаб боради.
Кўпrikнинг остида Ўзбекён тўнғиб
Феруза сувлари яхлаб боради.*

Четанараванинг инқиллаши, устидаги одамнинг уйқуда экани кеч куз

манзарасининг нохушлиги тасвирини янада кучайтиради. Сўнгги икки қаторда одамнинг, одамларнинг бепарволиги, совуққонлиги гёё Ўзбекёп – Ўзбекариқнинг музлашига сабабдай тасвириланади.

Юқорида Эркин Самандарнинг шаклий тажрибаларга ўч эмаслигини, янги лирик манзилларга эски йўллар билан боришни кўпроқ маъкул кўришини айтган эдик. Лекин шоир шеъриятидаги бу етакчи жиҳат унинг бадиий экспериментлардан мутлақо йироқлигини англатмайди. Жумладан, унинг “Узоқдаги оқ елкан”, “Дўстлик” шеърлари шоир бадиий тажрибаларининг яққол намуналаридир. “Узоқдаги оқ елкан” шеърида оқ елканли кема – болалигига қайтмоқчи бўлган киши кечинмалари ўзгача бир йўсинда тасвири этилади:

*Фақатгина елканни эмас,
Мен кемани ҳамда ундан
Болакайни – ўзни кўрмоқлик
Истагида типирчилайман.*

Эътибор қилинган бўлса, бу мисраларда Эркин Самандар шеъриятига ҳамиша хос бўлган анъанавий унсурлар уччалик кўзга ташланмайди. Шоир шеърларга оҳанг бағишлишга, унинг қаторларини ўзаро қофиялашга эътибор ҳам қўлмайди. Лекин унда лирик қаҳрамон туйғулари долғасини, ҳислари бебошлигини табиий акс эттиришга еришади. Инсон умрининг поклик, бегуборлик, эзгулик босқичи болаликнинг тимсоли бўлмиш оқ елканли кемани қайтариш мумкин эмаслиги, ундан ажралиш, уни тополмаслик шоир учун маънавий ҳалокат. Шу боис, шоирнинг кўйидаги ҳолат тасвири чин ва ишонарли:

*Ваҳм босар дилимни бирдан
Ажралгандай болалигимдан
Кўзларимдан ёшлар тирқирап
Ва у ювар қораҷўғдаги
Катта-кичик доғларни аста.*

Шоир йўқотилган эзгулик, бой берилган бегуборлик учун тўкилган кўзёш киши қалбини поклашини таъсирили ифодалайди.

Эркин Самандар шеърияти шоирона юракдан ўзга юракларга солинган кўз илғамас йўл эканлиги унга хос ана шу жиҳатларда ёрқин намоён бўлади.

ЭПИК КЕНГЛИКЛАР ИМКОНИЯТИ

Эркин Самандар бир шеърида: “Менинг юрагимда бордир сувратлар Аксари чизилган шуъалар билан”, деб ёзди. Ёзувчининг ўтмишини акс эттиришга бағишлиланган асарларида ҳам ана шу шуъла ёлқинланиб туради. Тарихнинг энг фожиали, қонларга гарқ бўлган ҳолатлари тасвириланганида ҳам адаб одам табиатидаги ёруғ жиҳатларни, уни улуғлайдиган эзгу сифатларни кўра ва акс эттира билади. Эътиборга лойиқ жиҳати шундаки, у буни атай асарига ёруғлик киритиш учун қилмайди, балки тасвирга олинган инсон феълидан келиб чиққан ҳолда табиий ифода этади.

Ёзувчининг 1989-1994 йилларда ёзилган “Тангри қудуғи” романида Хива хукмдори Арабмуҳаммадхон билан унинг отабезор ўғиллари: Ҳабаш ва Элбарслар ўртасидаги шафқатсиз тўқнашув фожиаси акс эттирилган. 2001 йилда Эркин Самандар айни шу воқеаларни “Арабмуҳаммад Баҳодирхон” трагедиясида ҳам тасвирилади. Бир тарихий ҳодисанинг бир адаб қаламидан чиққан икки жанрга мансуб асарда акс эттирилишини текшириш ёзувчининг бадиий маҳоратини, унинг инсонга ёндашув йўсинидаги ички тадрижини, айни ижодкорнинг турли адабий жанрлардаги асосий ифода тамоийларини кўрсатиш имконини беради. Шунингдек, бу ҳол жанр талабидан келиб чиқиб, муайян тарихий воқелик ва унинг иштирокчиларига ёндашув йўсинидаги ўзгаришлар жараёнини ҳам яққол кўрсатади.

Эркин Самандар “Тангри қудуғи” романида катта эпик жанрнинг имкониятларидан анча усталик билан фойдаланган ҳолда Арабмуҳаммадхон, унинг ўғиллари: Исфандиёр, Абулғози, Ҳабаш, Элбарс ҳамда уларнинг атрофидаги

тариҳий шахсларни турли ракурсларда тасвирлайди. Ушбу романда адибнинг маҳорати сюжет қуриш ва унинг қисмларини ўринлаштиришда тўла намоён бўлган дейиш мумкин. Асардаги ўнлаб қаҳрамонларнинг бирортаси ёзувчи назаридан четда қолмаган. Уларнинг ҳаёт йўли тасвири асарнинг сюжети ривожида ўзига хос жиддий ўрин тутади. Сон-саноқсиз тариҳий шахслар ва тўқима образлардан бирортасининг тақдири ҳам муаллиф назаридан қочмаганидан ташқари, уларнинг ҳар бири, албатта, сюжет ривожида муайян даражада иштирок қиласи. Ёзувчи уларнинг ҳар бирини ўзига яраша бадиий вазифа билан таъминлай билган. Романда “б” товушини “п”, “ж”ни “ч” тарзида айтадиган қовунчи, унинг Толиб тужжорнинг баҳтисиз қизи Муҳајёга ошиқ ўғли Нурулла, асарда икки боргина кўринадиган кекса мемор ва ўрта яшар созандо каби персонажлар ўзининг қисматига эга тимсоллар тарзида кўрсатилибгина қолмай, уларнинг асар қаҳрамони Абулғози шахсияти шаклланишида тутган муайян ўрни ҳам акс эттирилади.

Асарда эпизодик образлар бош қаҳрамонлар табиатини кўрсатиш учун иллюстрация эмас, балки ўз ҳаёт йўсимига эга шахслар сифатида акс эттирилгани эътиборга лойиқdir. Романдаги бирорта қаҳрамоннинг тақдири ўз ниҳоясига етмай, ора йўлда қолмаган. Йирик бадиий полотнодаги неча ўнлаб тимсоллар тасвирида тизгинни усталик билан ушлаб тура олиш ёзувчининг маҳоратидан далолатdir. Романдаги ҳар бир лавҳа ва ҳар бир тимсолнинг муайян ибтидо ҳамда мантиқий интиҳоға эгалиги асарнинг ёзувчи кўнгли қаъридан чиққанлигини, у битикнинг ҳар бир унсури устида астойдил ўйланганини англатади.

Романдаги асосий тимсоллардан бири Арабмуҳаммадхонга хос жиҳат асарда таъсири тасвирланган. У хон бўлишига қарамай, ҳаёти давомида кўпинча манфаат ва амалиёт кишиси эмас, балки кўнгил одами сифатида йўл тутиши ишонарли кўрсатилади. Кўнглининг нозиклиги, одамга, айниқса, ўз яқинларига чексиз ишонч кўпинча уни қатъий ҳаракатлардан, ҳукмдорга хос шафқатсизликлардан тийиб туради. Хон ўзини таҳт эгаси эмас, аввало, ота деб билгани учун ҳам отабезор ўғилларига қарши шафқатсиз чора кўришдан тутиб туради. Унинг суюкли ўғли Абулғозига қаратса: “Абулғози, фикр қил, улар ҳам худди сенингдек ўғлимдур, пушти камаримдан бўлган фарзандимдир. Қандоқ қилиб сенга уларни ўлдир деюрмэн”, - тарзида икрорида Арабмуҳаммадхон шахсига доир етакчи сифатлар намоён бўлади. У ношуд ва тадбирсиз ҳам, кўнгли бўш ҳам эмас. Лекин хон тақдирнинг ҳар қандай синовига тайёр бўлса-да, ўз ўғилларининг ёвузликларига қарши туришга ҳозир эмас. У ўғиллари исёенини босишдан ҳам кўра, Ҳабаш билан Элбарсни бундай қабоҳатта ундалган омилларнинг илдизини топмоққа уринади. У болаларининг ёвузликлари учун аввало ўзини айбдор деб билади. Бу ҳол хоннинг: “Сенлар вужудимдан сизиб чиққан бир томчи нутфа - иирингдан яралгансанлар. Менинг кўзларимни кўр қилган сенларнинг милиаринг эмас, ўз иирингларимдур. Мен ўз таҳтида ўз иирингларига беланиб жон беряётган ҳукмдормен”, тарзидаги сўзларида яққол кўринади. Ў фақат бирорлардан айб қидирмайди, ўзини тафтиш этади, ўзгаларнинг жиноятида ҳам ўз хатосини кўради.

Ёзувчининг тасвир маҳорати шундаки, у ҳар бир тимсол руҳиятининг турли ҳаётий вазиятларда турлича намоён бўлишини акс эттира билган. Имкон борида ўзига қарши бош кўтарган Ҳабаш ва Элбарсга чора кўришни истамаган Арабмуҳаммадхон улар томонидан қатл этилаётган пайтда: “Ихтиёrimda битта имконим қолибдур, яъниким, сенларни оқ қилмоқ ҳукуқи. Илгимдаги энг сўнгти бу ўқ шундай қудратга эгадурким, онинг заҳмидин жон берган фарзанд абадул-абад дўзах ўтларида ёнур, ийлар ўтур, замонлар ўтур, авлодлар кетидан авлодлар келур, аммоким бу ўқ товушлари қулоқлардин-кулоқларга етиб, одамларни хушёрикка, оталарни уйғоқликка, фарзандларни инсофга, меҳру шафқатга даъват этур. Сенларнинг номларнингни эшитганларида одамлар жирканурлар, сенларнинг руҳларингга отиладиган нафрат тошларининг адоги бўлмас!” тарзида қатъият кўрсатади. Бу тасвирда зўракилик, персонаж табиатига номувофиқлик йўқ. Чунки хон иложисиз қолишга, қаршилик кўрсатмасликка, душман юзига тик қарамасликка одатланмаган ўқтам шахс. Шунинг учун ҳам сўнгти дамда ўғилларини ота қони билан бўяган фарзандларини қарғамасдан туролмайди. Лекин салгина нари бориб, ўлими олдидан Яратганга қаратса: “Парвардигоро, ношукур ўғилларим гуноҳидин ўтгайсен, разолат ботқоғидин чиқариб, диёнат йўлига бошлагайсен, ота кечира олмаган ул икки ношуд ўғулни ўзинг кечиргайсен...”, тарзида қилган илтикосида ота руҳиятининг ўзга бир қирраси намоён бўлади. Ҳаётининг сўнгти дамида ўз

ўлимига сабаб бўлаётган болалари гуноҳидан ўтишни Аллоҳдан сўрай олиш тасвири хон шахсияти баландлигини акс эттириши жиҳатидан катта аҳамиятга эга. Бу тасвирлар айни бир одам табиатига хос жиҳатларнинг турли вазиятларда, турли йўсинда намоён бўлишини кўрсатганини билан ҳам муҳим аҳамият касб этади.

“Тангри кудуғи” романнда Эркин Самандар ҳаётий параллеллардан ўринли фойдаланган. Жўмладан, қотил ўғилларни кечира олган Арабмуҳаммадхон тимсоли азбаройи пойгани бузгани учун ўғлини ўлдирирган Эрон шоҳи Аббосга мувозий тасвирланганлиги ҳар икки тимсолга хос маънавий сифатларнинг тўлароқ очилишига хизмат қилган. Хоннинг сўзлаш тарзидаги бир қадар кўтаринкилик, тантанаворлик ҳам тимсолнинг табиатига мувофиқ келади. Аслан кўнгил кишиси бўлган Арабмуҳаммадхонни хонлик мартағаси янада юксалтиради, олижаноблаштиради. Айни шу ҳукмдорлик рутбаси шоҳ Аббос билан Исфандиёрни шафқатсиз ва ёвуз кимсаларга айлантиради. Мартағаси шахсидан баланд турган кимсалар билан шахсияти рутбасидан юксак инсон ўртасидаги фарқ шу йўсин кўрсатилади. Бир хил сабаб турлича оқибатларга олиб келиши мумкинлиги, бу айни одамнинг феълидан эканлиги асарда жонли персонажлар ҳаёти мисолида ишонарли акс эттирилган.

Ёзувчи саҳро йиртқичларининг курдатли ҳукмдори бўлмиш бўри Йилдирим билан ундан тараган ва уни ўлдириган ит Бўризод қисматини Арабмуҳаммадхон билан Ҳабаш, Элбарс тақдирига мувозий қилибгина қўймай, балки бу қисматларга даҳлдор ҳам этиб тасвирлаш билан катта эстетик самараға эришган. У шу йўл билан ҳам Ҳабашнинг қутуриши сабабини кўрсатган, ҳам палаги тоза бўлмаган жонлиқнинг айнан яратувчисига чанг солишини, бунга унинг қонидаги бетайнлик сабаб эканини ифода этган.

Адаб романда рамзий ишоралар тасвиридан ҳам ўринли фойдаланган. Асардаги тангри кудуғи, Биби Нур эна, Ҳазрати Султон Увайс, Ҳожа Шамсиддин тимсолига боғлиқ ҳаяжонли тасвирлар теран рамзий маънога ҳам эгадир. Тангри кудугининг турлича ҳолати қарор топган адолат ёки топталган ҳақиқатни акс эттираса, Биби Нур эна тимсоли келишмаслик ва ўзаро жанжаллар туфайли оёқ-қўлига кишиан солинган Ватан ҳамда миллатни ифодалайди... Султон Увайс ҳазратлари тимсоли раҳмдиллик, кечиримлилик ва қилинган гуноҳ учун тўловнинг шартлиги ифодаси тарзида илғанади.

Романдаги бир жиҳат синчков ўқувчининг эътиборидан четда қолмайди ва уни бир қадар безовта қиласди. Чунончи, асарнинг кўп ўринларида элу юрт тарихидаги даҳшатли давр ўтиб, унинг ўрнига адолат қарор топадиган кунлар келишига ишора сезилиб туради. Муаллиф атай ўқувчига ҳамма умид Абулғозидан эканини сездиришга уринаётгандай туюлади. Шунинг учун ҳам асарда эсда қоладиган, эътибор тортадиган бирор иш қилгани кўрсатилмаганига қарамай, муаллиф Абулғозига хайриҳоқ эканлиги сезилиб турадики, бу романнинг тасвир маромини бир қадар бузади. Негаки, ўқувчининг бадиий персонажлар мақомини илғаб олиш йўсинига зуғум қилингандай бўлади. Шу боис, романнинг номи унинг моҳиятига тўла мос эмасдай таассурот қолдиради. Ёзувчи романни сюжет ривожини таъминлаган кишилар ёки уларнинг хатти-ҳаракатлари номи билан аташни истамаган. Айни вақтда, муаллиф асар номи даражасига чиқаришни хоҳлаган тимсол (Абулғози)нинг табиати ва фаолият қамрови етарлича тасвирланмаган. Шунинг учун ҳам айни воқеаларни трагедия жанридаги асарига мавзу қилиб олганда, адабнинг унга “Арабмуҳаммад Баҳодирхон” деб ном қўйиши тўғри бўлган.

ДРАМАТИК ТЎҚИНИШЛАР КЕСКИНЛИГИ

“Арабмуҳаммад Баҳодирхон” фожиасида муаллиф ўз истакларини жиловлаб, Абулғозини саҳнанинг орқасига олади ва характерлараро тўқинишлар марказига нобакор ўғиллари томонидан кўр қилинган Арабмуҳаммадхонни чиқаради. Асл маъносида кўзидан ёш эмас қон оқсан ота руҳиятидаги ҳиссий тўлғанишлар асарнинг фожиавий руҳини оширган. Муаллиф асарда трагедия жанри имкониятларини тўғри ҳисобга олади. Шунинг учун ҳам шеърий йўлда ёзилган трагедия тилининг жозибадорлиги, персонажлар характерининг тўлақонли эканлиги билан эътиборни тортади. Муаллиф тарихда бўлиб ўтган қонли воқеликни акс

Эттирган асар ҳаёт ҳақиқатининг нусхасигина бўлиб қолмаслигига эришган. Саҳна асарида тарихда бўлиб ўтган барча воқеаларни кўрсатиш имконининг йўқлиги драматургдан асосий эътиборни қаҳрамонлар табиатининг бўртикроқ жиҳатлари тасвирланишига қаратишни тақозо этган. Шунинг учун муаллиф фожиадаги тимсолларнинг ҳар бирини ўзига хос табиат, феъл-автор билан таъминлаган. Фожиада тимсолларнинг ўзаро тўқнашувлари залвёри ҳаётий асосга эга қилиб кўрсатилганлиги асардаги ҳар бир тимсолнинг ўз қиёфасига эга бўлишига олиб келган.

Драматург Арабмуҳаммадхон ҳукмдорлигининг сўнгти даврида қандай воқеалар бўлганини эмас, балки ўша ҳодисалар хон руҳиятида қандай из қолдириб, қандай сезимлар ўйғоттанини тасвирилашга кўпроқ эътибор қиласди. Асарда хоннинг нобоп ўғиллар дастидан чеккан изтироблари тасвирига урғу берилганлиги бош қаҳрамонга хос инсоний сифатларни теранроқ акс эттиришга хизмат қилган. Шу боис асарда жанг манзараларини кўрсатишга эмас, характерлар орасидаги тўқинишлар ифодасига кўпроқ ўрин ажратилган.

Ҳар ишда инсонийлик ўлчовлари билан йўл тутадиган хон Ҳабаш ва Элбарс каби нокас ўғилларига қарши жанг қилиши лозимлигини ақлига сифдиромайди. Уни саросимага соглан, шаштини қайтариб, жанговарликдан маҳрум этган ҳолат асарда шундай берилади:

*Шарманда уруш бу. Ў, қандай даҳшат,
Майдонга от солиб ота-ўғиллар
Қонини тўқсалар бири-бирининг?!.*

Асарда Арабмуҳаммадхон учун таҳтдан айрилганидан кўра, Гулсимбонуга яхши эр, ўғилларига хурматли ота бўлолмагани қаттикроқ таъсир этгани ҳақиқий кўрсатилган. Шунинг учун ҳам фожиада яшагиси келмай қолган, дунёга қўл силтаган хоннинг руҳий ҳолати фоят таъсирли чиққан:

*Бошимни олмоқчи бўлган ўғлимдин
Бош олиб кетмоқчи ўғлимдин ёмон.*

Ҳамишаadolat, инсоф, эзгулик каби инсоний фазилатларга таянадиган хоннинг ўз хотини ва фарзандлари хиёнатидан фоят қаттиқ таъсирланиши ўкувчига тўла юқади.

Арабмуҳаммадхон - табиатан иродали, қатъиятли шахс. У душманларга нисбатан аёвсиз, жанг сирларини эгаллаган моҳир саркарда. Лекин у ўз фарзандлари билан олишмоққа тайёр эмас ва ҳеч қачон тайёр бўлолмайди. Унинг учун ўз хотини билан мавқе талашиш ўлимдан ҳам номуслироқ ҳолат. Драматург персонажлар ўртасидаги тўқинишлар кучини ошириш, бош қаҳрамон табиатига хос маънавий сифатларни яқъолроқ акс эттиришга эришиш мақсадида романдагидан фарқли равишда фожиага отабезор ўғилларнинг онаси Гулсимбону тимсолини олиб киради. Баланд мартабага эга эрнинг эл олдидаги бурчини, юрт тараққиётидаги ўрнини тушунишга қобил бўлмаган калтабин, ўжар ва димоғдор аёлнинг ўзича юритган сиёсати фақат оиласининг эмас, балки бутун юртнинг парокандалигига сабаб бўлганлиги асарда бутун даҳшати билан акс эттирилган. Оламга инсоф ва кўнгил кўзи билан қарайдиган одам бўлган Арабмуҳаммадхон учун ўз дилини қўйнидаги хотини ҳам англамаслиги барча фожиалардан кўра фожиалироқ эканлиги жуда нозик тасвирланган.

Умрининг қалтис пайтида ўғиллари: Ҳабаш билан Элбарсга кўнглидагиларини айтмоқчи бўлган отанинг сўзларини фарзандлар эшитишни ҳам истамасликлари хон юрагини вайрон қилиши асарда ишонарли акс эттирилган. Ўз оталари билан ёлғиз қолишни хоҳламай, унинг кўнглидаги дардларини эшитгилари келмаган ўғилларга ҳар қандай самимий гап ортиқча эканлигини чукур туйиши тасвири асарда хон фожиаси даражасини янада оширади:

*Демак, дилимдаги дардли гапларим
Юрагим тубида қолурлар пинҳон.
Мен хон можаросин қўйиб бир четга,*

“Тангри қудуғи” романнда Арабмуҳаммадхон сиймосининг ҳукмдор сифатидаги жиҳатларига кўпроқ эътибор қаратилган бўлса, фожиада унинг хотини, ўғиллари ва яқин деб юрганларининг кутилмаган хиёнатидан даҳшатта тушган тўғри кўнгил одам эканига ургу берилган. Муаллиф хоннинг таҳтни, ўз жонини асраб қолишга астойдил уринмаслигини хотинидан, ўғилларидан, яқинларим деб, бағрида асраб юрган кишиларидан сотқинлик кўрган оддий одамнинг дунёга исёни, унинг ташвишларига кўл силташи, умидсизликка тушиши мумкинлигига нозик ишора қиласди.

Асарда хоннинг ҳар қандай вазиятда ўзини муносиб тарзда, ўзбек оиласидаги отадай тутиши, ўлим олдида ҳам қадрини ерга урмаслиги, иродасизлик қўлмаслиги таъсири кўрсатилган. У жасоратли инсон бўлгани учун ҳам ўз шаънини баланд тутади. Бош қаҳрамон табиатининг бундай кўрсатилиши асардаги ўзга тимсолларни унинг юксак маънавий даражасидан туриб баҳолаш имконини беради. Муаллиф Элбарс билан Ҳабашнинг ўз оталарига тиф тортадиган даражага тушиб қолганлари сабабини кўрсатишга эмас, балки улардаги ана шу тубанликнинг ота кўнглидаги ињикосини тасвирлашга кўпроқ эътибор қаратади. Ўз ўғилларининг ўзига ёв бўлиши мумкинлигини на ақли ва на қалби билан ҳазм қилолган хон туйғулари фожиада таъсири тасвирланган:

*Сен ила рўбарў тургандин кўра
Ажалга рўбарў бўлган яхшироқ.
Аммо яширмаймен, сўнгги онимда
Бағримни тиф каби кесар бир армон.
Сенинг ва сенларнинг бадбахтикларинг
Юкини кўтариб кетмоқ армони.
Сенлар тугилганда нечун қувондим,
Нечун қувондим мен бўйларинг кўриб?
Шулар кўзларимни ўярлар дебми,
Жаллодга топширап дебми бир куни?*

Отанинг бу хитобларида заррача сунъийлик, атайиňлик йўқлиги, ҳаёти танг кўчага кириб қолган йирик шахс туйғулари самимий берилгани бу тасвирларнинг таъсири даражасини оширган.

Фожиада Арабмуҳаммадхон шахсияти турли нуқталардан туриб ёритилган. Шунинг учун ҳам драматург унинг барча гаплари, хатти-ҳаракати ишончли бўлишига эришган. Ҳукмдорнинг Элбарсга айтган: “Хонлик – ўт, тентакка бериб бўлмайди!” деган гапи хон таянадиган маънавий мезонлар қанчалар баланд эканини, у салтанатга шунчаки фарзанд бўлгани учун мерос қолдириладиган мулк деб эмас, балки ҳукмдорликка маънавий ҳуқуқи бор кишиларгина кўтара оладиган масъулият деб қарашини англатади. Оз сўз билан кўп маъно ифодалай олиш фожиа муаллифининг ютуғидир.

Фожиада эга бўлган қонуний ҳокимиятидан кутилмагандан айрилиб қолган одам табиати жуда билгичлик билан акс эттирилган. Чиндан-да, кечагина бир оғиз гапи билан минглаб кишиларнинг тақдирини ҳал қила олган ҳукмдорнинг бугун ҳеч кимга сўзи ўтмайдиган ва энг тубан кимсалар иродасига бўйинсинишга мажбур ожиз одамга айланиб қолиши ўта оғриқли кечадиган мураккаб руҳий жараёндир. Айни шу ҳолат асарда кескин қирралари билан кўрсатилган:

*Сиз хон дедингизми мени? Эй хожа,
Мен хон эмасман. Йўқ, мен баҳти қаро,
Бечора бир одам. Ҳали ҳалойик,
Бегуноҳ одамлар отилган чоғда
Не кўйга тушганим билдим бир ўзим
Ва бир Худо билди. Разолатни мен
Тўхтата олишга ожизлигимдин.
Товоним ялашга кеча шай турган*

**Ясовулбошига “Тўхта!”- демоқлик
Курбидин маҳрумлик заҳрини ютиб,
Минг игна санчилди жисму жонимга.
Худога ёлбордим жонимни ол, деб.**

Кечагина ҳодисаларга сабаб бўлиб юрган кишининг бирданига ҳеч ким бўлмай қолиши даҳшати юқоридаги мисраларда самимий ва ишонарли акс эттирилган. Бундай ҳолатда йирик шахслар учун ўлим эмас, балки тириклик фожиа саналиши асарда маҳорат билан кўрсатилган:

**Ёрилса эди ер, кошки мени ул
Қаърига олсайди, ютақолсайди!
Бироқ ютмади ер, ёримади ер,
Бегуноҳ одамлар ўлди, мен қолдим!**

Ушбу парчадаги бирор гап, ҳолат шунчаки ахборот учун берилмаган. Уларда улкан инсоний фожиа бутун салобати ва маҳв этувчи қудрати, изтиробларнинг алангали оғриқлари билан намоён бўлган.

Асарда чинакамига қудратли бўлган шахсни енгиб бўлмаслиги, бундай одам ҳар қандай вазиятдаadolатсизликка, зўрликка қарши турла олиши мумкинлиги ишонарли кўрсатилган. Жумладан, ўз оталарига ҳам тил, ҳам тиф ўқталган ўғилларидан енгилиб, кўзларига мил тортилган Арабмуҳаммадхоннинг қотил болаларига айтган сўнгти сўзлари унинг улуғвор сиймосига хос қатъиятни ёрқин акс эттиради:

**Сенларни қарғамоқ, оқ қилмоқлиқдин
Бўйлак имкон йўқтур ихтиёrimda,
Сўнгги ўқимдур бу илгимда қолган.
Бу ўқнинг захмидан жон берган фарзанд
Тоабад ёнгайдур дўзах ўтида.**

Бу мисраларда ҳам қаҳр, ҳам хавотир, ҳам афсуснинг қоришиқ оҳанглари акс этиб турибди. У болаларини жазолай олганидан хурсанд эмас. Хоннинг сўзлари унинг шундан ўзга чораси йўқлигини ҳам, айни пайтда, кўрнамак ўғилларни жазосиз қолдириб бўлмаслигини ҳам англатади. Оқладар ўғилларни дуойибад қилишга мажбур бўлган сўнгти дамда ҳам хон ўз аҳволини, чекаётган изтироблари, тортаётган азобларини эмас, балки оқ қилинган ўғиллар охиратининг куйиб кетишини ўйлади. Падаркуш бўлсалар-да, ўз фарзандларига ёмонлик қилишга мажбурлигидан қийналади.


Агар романда Ҳабаш ва Элбарс қиёфалари деярли бир хил, фақат қора рангла чизилган бўлса, фожиада Элбарс табиатида муайян эврилишлар содир бўлгани, у ўзининг қилимишлари ёвузишка асосланганини англай бошлагани ва бу жараён фоят оғриқли кечачётгани кўрсатилган. Бу ҳол тимсолнинг ҳаётийлигини оширган. Уни қиёфасизликдан қутқариб, ўзига хослик баҳш этган.

Тасвирга тортилган катта-кичик ҳар бир персонажнинг ўз табиати мантиғига мувофиқ ҳаракат қилиши, сўз айтиши фожианинг муваффақиятини таъминлаган. Ҳаётнинг усиз ҳам адори йўқ мушкулотларини кўпайтираётган, кўнгли тоза кишиларнинг беадад руҳий долғаларига сабаб бўлаётган одамларнинг туйгулари ҳаққоний ва ўта таъсирили кўрсатилган бу асар миллий драматургиямизнинг муносиб ютуғидир.

Шеърий тил билан ёзилганлиги, кўплаб ҳаётий тафсилотлардан воз кечилиб, персонажларнинг табиати ёрқин намоён бўладиган қирралар акс эттирилгани, бадий тадқиқ бир шахсга йўналтирилгани натижасида “Арабмуҳаммад Баҳодирхон” трагедияси ўзгача эстетик қиммат касб этган.

Муҳими шундаки, муаллиф ўтмишнинг фожиали саҳифалари акс эттирилган бу хил асарларида тарихда шундай бўлганини кўрсатиш билангина кифояланмайди, балки кечанинг замиридан бугуннинг илдизу белгиларини қидиради ва топа билади. Эркин Самандар асарларига алоҳида таъсиричанлик баҳш этадиган асосий жиҳат шундан иборатдир.

Қозоқбой Йўлдош



БОЛАЛАР ДУНЁСИ



Кудрат Ҳикмат

Эрталаб

Осмон тиник, зангори,
Бегубор афт-ангори,
Ярқираб нур анхори,
Офтоб чиқди оламга

— Ассалом! — дер ер пастда,
— Ассалом! — дер эл аста.
Қанча орзу-хавасда
Офтоб чиқди оламга.

Довон ошиб шод-хандон,
Хурсанд бўлиб у чандон,
Яшнасин деб ҳар бир жон,
Офтоб чиқди оламга.

Фикрим ошар ўрганиб

Кумушдек тонг. Тиник кўк.
Чалинади звонок.

Жиринг!

Жиринг!

Жиринг!

Болалар дарсга киринг!

Биз учун янги парта,

Китоб, дафтар ва карта.

Ўтирамиз бўйсира,

Ҳамма бунга бўйсунар.

Мехрибон муаллим —

Раҳматова Ҳалима,

Сўзлар мактаб ҳақида,

Тинглаймиз: мен, Ақида.

Қизиқтирас ҳарф мени,

Уқиймиз «Алифбе»ни.

Дугонамдан ҳам олдин

«О», «А»ни билиб олдим.

Фикрим ошар ўрганиб,

Келинг, синаб кўргани.

Кумушдек тонг. Тиник кўк.

Чалинади звонок.

ОЛМОС МЕДИИНГ НОРДАСИИМ

Жириң!
Жириң!
Жириң!
Болалар дарсга кириң!

Менинг юрагим

Олмос менинг юрагим,
Толмас менинг юрагим.
Ким айтади шеъримда –
Қолмас менинг юрагим?

Алишер ва китоб

Китобга ўч ўғилчам
Олтин топган сингари,
Чиқса янги бир асар
Ўқир мендан илгари

Майли бўлсин ҳикоя
Ёки тўрт йўл қувноқ шеър.
Айвончада мук тушиб,
Шариллатар Алишер.

Қош қорайиб кетгунча
Қўлдан тушмас китоби
Унга ёқсан шеърларнинг
Хозирча йўқ ҳисоби.

Олимдек серҳаракат,
Ишлар пухта берилиб.
Унча-бунча ёшлардек
Ошиб кетмас керилиб.

Турна қатор саволга
Аскар каби доим шай.
Хозиржавоб бўлмасди,
Шунча китоб ўқимай.

Чиллак ўйини

— Чиллак ўйин соз бунча,
Завқ берарми озмунча?
— Ким узоққа ҳазумлар:
Faффор, Содик, Азимлар?
— Узғири ким орада?
— Сўнг кўрасиз маррада.
— Спортчими улар?
— Йўк.
Югуришар худди ўқ.
Халқда шундай бор нақл:
«Софлом танда, соғ акл!»

Кудрат Ҳикмат ўзбек болалар шеъриятида ёрқин из қолдирган шоир. У 1925 йилда Тошкентда туғилган. Ҳозирги Тошкент Давлат Педагогика университетини битирган. Ижодкорнинг ўттизга яқин китоби нашр этилган. Унинг кўпгина шеърлари, эртаклари, достонлари дарсликларга киритилган. Кудрат Ҳикмат 1968 йилда вафот этган.

Самимиятдан түғилган сатрлар

Таникли болалар шоири Турсунбой Адашбоевнинг «Орзуларим — қўш қанотим¹» деб номланган сайланмаси ижодкорнинг қирқ йил давомида ёзган сара асарларидан жамланган.

Сайланма етти фаслдан иборат.

«Она Ватан» номли биринчи фасл Ватан васфига бағишиланган шеърлардан тузилган. Шоир фасл аввалидаги бағишиловида:

*Она Ватан,
Дурдона Ватан!
Киндик қоним тўкилган гўша,
Менга Каъба,
Ягона Ватан!
Боболардан мероссан— қадим,
Бағишиловни сенга атадим.*

дэйиш билан юрт шаънига ўзининг юрак қаъридан жўшиб чиққан дил сўзларини айтади.

Ушбу фаслдаги «Қиёси йўқ», «Тупроқ», «Зар унади», «Осмони кенг» шеърларининг барчасида она Ватан гўзалликларини мадҳ этиш баробарида, ёш китобхон қалбида уни кўз қорачигидай авайлаб-асраш руҳини ўстиришга интилади. Бинобарин, шу Ватанда туғилиб ўсан, унинг ноз-неъматларини тановвул қилиб улгайган, вояга етган ва яна бир кун шу тупроқга қайтадиган ҳар бир инсон учун Ватан меҳрибон, мушфиқ она эканлигини англаш туйғуси болаликданоқ қалбга жо этилиши, қалб тўридан ўрин эгаллаши кераклиги тасвири ушбу шеърларга кўрк бағишилайди, уларнинг бадиий-эстетик ва маърифий-тарбиявий қимматини белгилайди.

Киндик қони тўкилган тупроқ шоирга қанчалик азиз бўлса, миллатнинг ўзлигини англатувчи бош белги — она тили ҳам шу қадар азизу мукаррамадир. Зоро, шоир айтмоқчи:

*Алла бўлиб жаранглаган,
Она тишиш— жону дилим.*

Жону дилга пайванд она тили шу боисдан ҳам қадрлики, у:

*Мир Алишер бобомлардан
Мерос бўлиб қолган тилим,
Бобур Мирзо шеърларидан
Ранг ва оҳанг олган тилим.*

Бинобарин, Мир Алишеру Бобур Мирзолар қаламида сайқал топган, рангину оҳангдор бўлган тиљнинг қадр-қиммати тўғрисида гапириб:

*Шундай тилдан тонар бўлсам
Ёки ўгай санар бўлсам,
Кийма-қийма бўлсин тилим,—*

дэя хитоб қиласи шоир.

Ижодкор борки, ўз она тилиси ҳақида жўшиб, тўлиб-тошиб куйлайди, фахриялар битади. Турсунбой Адашбоевнинг «Она тилим» шеъри ҳам улар орасида, ҳақли равища, ўзининг самимияти билан муносиб ўрин тутади.

Китобнинг «Ҳали тугал ўқилмаган» деб номланган иккинчи фасл бағишиловидаги:

¹ Турсунбой Адашбоев. Орзуларим — қўш қанотим. Тошкент. «Шарқ» НМАК 2003 йил. (Барча мисоллар мазкур китобдан олинди)

*Майна, булбул,
Кўйлар шитоб.
Ҳар оҳангда
Шундай хитоб:
— Ўрмон, тоғлар,
Ноёб китоб
Ҳали тугал
Ўқилемаган,
Мевалари
Чўкилемаган.*

Ушбу сатрлар қайсиdir мъянода фасл мундарижасини белгилайди. Зеро, бу фаслда шоир «ҳали тугал ўқилемаган ноёб китоб» бўлмиш ўрмону тоғлар, қирадирлар, дала-даштлар гўзалигини қайта кашф қиласди, ёш китобхон кўз ўнгида табиатни борлиғи билан намоён этади.

Шу боис ҳам ушбу фаслдаги шеърлар китобхонни бефарқ қолдирмайди. Жумладан, «Чақмоқ» шеъридаги манзара шу жиҳатдан эътиборга сазовордир:

*Ўғлим терар бойчечак,
Ўйинни ҳам унутган.
Баҳор эса осмонга
Кўйлак тикар булутдан.*

*Ўғлим чопар мен томон,
Гул сайлини унутган.
Баҳор кўйлак кийдирди
Кўк эгнига булутдан.*

Шеър аввалида лирик қаҳрамон (шоир)нинг ўғли ўйинни ҳам унугтиб, бойчечак тераётган бир онда тиниқ осмонни булат қоплаб кела бошлайди (баҳор осмонга булутдан кўйлак тикияпти). Шу аснода, «ялт-юлт» чақмоқ чақиб, шовуллаб ёмғир қўиди (кўкни қоплаган булат унга баҳор тикиб кийдирган янги кўйлак). Эътибор беринг: баҳор ёмғири дала-даштга жон багишловчи обираҳмат, шу сабаб шоир уни севиб тасвирлайди.

Ижодкорнинг «Қизғалдоқлар қутлашар» шеърида баҳорнинг янада янги қирралари намоён бўлади:

*Тонг оқариб, юлдузлар
Аста учиб боради.
Яйлов олис, чўпонлар
Тоққа кўчиб боради.*

*Иргишлайди шўх қуулун,
Пешонаси қўнғир-оқ,
Лўқилайди бўталоқ,
Бўйнида жез қўнғироқ.*

*Яйлов бағрин яшнатди,
Оқ ўтовли огуллар.
Тунлар салқин бу ерда,
Куврай ўтин ловуллар.*

Бу шеърнинг муваффақиятини таъминлаган икки жиҳатни қайд этиш лозим. Биринчидан, шеърдаги оҳангдошлик, гўзал қофиялар бадиий санъатлардан моҳирона фойдаланиш маҳсулидир (қиёсланг: «қўнғир-оқ» ва «қўнғироқ» даги сўз ўйини — тажнис мумтоз адабиётимизнинг гўзал, бетакрор анъанаси янглиғ намоён бўлади). Иккинчидан, «тонг отади» — «тонг оқаради»; «юлдузлар сўнади» — «юлдузлар оқаради» (чироқ учиши мумкин, зеро, учиш бир лаҳзада воқе бўлади, сўниш эса аста-секин рўй беради). Гарчи, бу ўринда, назаримизда, «учиш»дан кўра «сўниш» мақбулроқдай туйилса-да, шоир қофия талаби (учиб-кўчиб) билан «учиш»ни кўллайди ва уни табиийлаштириш учун «аста учиб боради» тарзида ишлатади.

Биринчи мисрада «учиб — кўчиб» қофия бўлса, «боради» — радиф, яъни, қофиядан кейин такрорланиб келувчи сўз. Охирги мисрада «овуллар» ва «ловуллар» қофиядош сўзлар бўлса-да, саккиз товушдан иборат бўлган иккинчи сўзниг

етти товуши биринчи сўзда мавжудлиги қофия оҳангдорлигини шу қадар кучайтирганки, у бир вақтда радиф вазифасини ҳам бажараётгандай таассурот қолдиради.

Худди шундай ёрқин манзаралар, гаройиб жонлантириш ва ўхшатишлар ушбу фаслдаги «Толдибулоқ», «Асфальтдаги расмлар», «Чилла чиқиб», «Осмон қайдан бошланар?» «Куз», «Қишлоқда тун» шеърларига ҳам теран руҳ бағишлайди.

*Дўстим, зийрак китобхоним
Сизга бир гап айтаман.
Кишилогимга борган сайин,
Болаликка қайтаман,—*

бағишлови билан бошланадиган учинчи фасл ростдан ҳам болаликка қайтиш бўлиб, «Болаликдан бир лавҳа», «Мен ёқтирган рақам», «Чакка», «Бошим узра», «Фуфайка» шеърлари болалиги қаттол уруш даврида кечган, отаси урушда шаҳид бўлган лирик қаҳрамон (шоир) хотиралари. «Мен ёқтирган рақам»да:

*Кирқ беш рақам кўнглимга
Жуда яқин негадир,
Ўзга сонга ўхшамаган
Зўр мазмунга эгадир,—*

дейилар экан, 45 рақамининг «ўзга сонга ўхшамаган зўр мазмунга эга»лиги 1945 йилда иккинчи жаҳон урушининг тутаганлиги, таҳликали кунлар орқада қолиб, эл-юрт бағрига шамол текканига шукронга тарзида намоён бўлади.

Бу шеърлар орасида, айниқса, «Фуфайка» шеъри ўзига хос таъсирчан кучга эга. 1947 йилнинг 9 майида мактаб ҳовлисига ўқувчилар йиғилиб, урушда отасидан жудо бўлган болаларга ёрдам тариқасида фуфайка (пахталик калта тўн) тарқатилади. Алифбо сираси бўйича фамилиялар ўқиласиди: Абдуллаев, Аброров....:

*Хуруж қилар безгагим,
Силлам қурир зирқираб,
Кўргошинодай зил ёйдан
Киприк ночор пирпирап.*

Фуфайка тарқатилиши-ку, отаси урушда ҳалок бўлган болаларга, ночор оиласарга ҳукуматнинг марҳамати. Бироқ, бола — бола-да. Шу марҳамат ҳам унга оғирлик қиласи, бусиз ҳам ярим кўнглини янада чўқтиради:

*Зич сафларнинг орасин
Аста суріб, очаман,
Менга навбат етгунча
Ўйга қараб қочаман.*

Назаримизда, ушбу шеърда уруш даври кўнгли ярим болаларнинг жонли сиймоси чизилган.

Бироқ, баъзан шундай мағзи тўқ шеърларда қофия талаби билан «қулогидан тортиб келтирилган» сўзлар ҳам учрайдики, улар зукко китобхоннинг эътирозига сабаб бўлиши ҳеч гап эмас:

*Поезд учар шимолга,
Йўрга отдек пилдираб,
Учуб кетди орадан
Қирқ ийл ҳам гилдираб.*

«Йўлчи юлдуз» шеъридаги «қирқ йилнинг филдиракдай филдираб ўтиб кетиши» инсон ҳаёти бу боқий дунёда нақадар ўткинчилигининг чиройли ифодаси. Бироқ, «поезднинг йўрга отдай пилдираши» уччалик ўрнига тушмаган. Чунки, пилдираш, аввало, отга хос бўлмай, одатда, кичик нарсаларга нисбатан ишлатилади. Иккинчидан эса пилдирашда, маълум маънода салбийлик бор. Бинобарин, поезднинг пилдираши ҳам сунъий туюлади.

Тўртинчи фасл қаҳрамонлари — болакайлар. Шоирнинг:

*Ёш дўстларим, болакайлар
Энг покиза, шўх, шаъндири.*

дэйиши бежиз эмас. Бу фаслга жамланган шеърларнинг икки жиҳатини алоҳида таъкидлаш керак. Биринчи гуруҳдаги шеърларда болаларнинг ўзига хос, беғубор олами яратилган. Уларни ўқир экансиз, ҳали ушоққина бўлган болакайларнинг кутилмаган топқирликларидан ҳайратга тушасиз.

«Энг покиза, шўх, шаъндири» деб номланган ушбу фаслдаги шеърлар орасида «Хайвонот боғида», «Тўрт амал», «Олув», «Қўшув», «Ишонмасанг» сингари битиклар маърифий, тарбиявий жиҳатдан ажралиб туради. Зеро, болалар адабиётининг ўзига хосликлари сирасида бадиият билан бирга маърифий, тарбиявий жиҳат ҳам ўзига хос ўрин тутиши маълум ҳақиқатидир.

«Учқур тулпор» деб номланган бешинчи фасл, ўз номи билан, хаёлотнинг бепоён оламига қилинган саёҳатлардан ташкил топган. Шоир айтмоқчи, бизга азалий мерос бўлмиш лоффлар ёш китобхонни ҳам хаёлотнинг учқур тулпори янглиг ўз ортидан эргаштиради, унинг хаёлот оламини бойитади. «Овнинг гашти», «Барчаси ёдимда», «Пойга завқи», «Бешта саноч», «Ширмон кулча», «Юган солиб, эгар уриб» сингари шеърлар халқ оғзаки ижодидаги «қирқ ёлғондан бир ёлғон» сирасидаги уйдирма, лоффларга асосланган.

Маълумки, кичик ёшдаги болакайларнинг хаёлот олами тизгинсиз, кўкларда парвоз қўйувчи бўлади. Улар ҳад-худуд билмас хаёлот қанотида оёқ етмас ўлкаларга саёҳат қиласидилар, гайритабиий саргузаштларни бошдан кечирадилар, инсон зотининг қўлидан келмайдиган ишларни амалга оширадилар.

Ушбу фаслга кириллган шеърлар қаҳрамони Латифбой ҳам шундай болакайлар тоифасидан. Унинг уйдирмалар билан тўлиб-тошган гайритабиий саргузаштлари шу боисдан ҳам тенг-тўшларини беихтиёр ўз орқасидан эргаштириб кетади, уларни ҳам ушбу саргузаштлар иштирокчисига айлантиради:

Барчаси ёдимда, эсимда,
Ҳали туғилмаган кезимда,
Бобомнинг йилқисин боқардим,
Харсанг тошга қозиқ қоқардим.

Латифбойнинг туғилмаган пайтиданоқ бобосининг йилқисини боққанлиги хусусидаги гайритабиий воқеа баёнидан бошланган саргузашт давоми ҳам гаройибдир. У йўқолиб қолган байтални боғдан, тоғдан, хуллас, ҳамма ёқдан қидиради. У пайтларда ой ҳам ётмас экан, қуёш ҳам ботмас экан, булут бўлмаса ҳам дўл ёғар экан, бувиси қисир эчкини соғар экан. Бироқ:

Фойда борми гапни чўзгандан,
Байталимни топдим Узгандан.
Ойна кўлнинг шундоқ ёнида,
Жуман улоқчининг томида,
Кулуналб ётибди, қаранглар
Тойчоқ мени таниб, аланглар.

Жуман улоқчининг томида қуланлаган байталнинг тойчоги ҳам онаси сингари гайритабиий, у умрида кўрмаган Латифбойни таниб, аланглайди. Латифбой уларни томдан олиб тушиб, байталга қуленни ортиб, ўзи ҳам миниб, «чух» деб, қамчини тортса, байтал уларни кўтариб туролмабди ҳам, юролмабди ҳам.

Воқеа қанчалик гайритабиий бошланган бўлса, шунчалик гайритабиий тугайди:

Сўнгра, тойни отга ўнгариб,
Эгарини боғлаб-тўнкариб—
Қамчи урсам, қаноти бордай,
Қулен чопиб кетди шунқордай.

«Овнинг гашти» шеърида сергак тозиси билан овга чиқсан Латифбой сичқон қоплонни ғажиб турганининг гувоҳи бўлади. «Юган солиб, эгар уриб» шеърида у чигиртканинг эркагига юган солиб, эгар уриб, қамишдан найза ясад, откулоқдан қалқон қилиб овга чиқади. Хайри холанинг товуқларига қирон келтирган тулки ови тасвири ҳам юқоридагилардан кам эмас. Чигирткани роса емлаб, толга боғлаб қўйган Латифбой пешин чоғи ўлжа илинжида келган бегемотдай тулкини қамишдан ясалган ўқ-ёйидан отиб ўлдиради. Кўйруғи икки қулоч бўлиб кетган тулкининг

танасини тўрт паҳлавон шилади, мўйнасидан қўнчилар ўнта пўстин тикадилар, икки қулоч Қўйруғидан қирқта телпак тайёрлайдилар.

Хуллас, «лоф гапларга суяги йўқ» Латифбойнинг саргузаштлари шу тариқа давом этаверади. «Бешта саноч» шеърида ў бўрдокига боқсан бешта чивинни гузардаги қассобларни ишга солиб сўйдиради, қўрадаги бир чивинни жўраларидан ажратиб олиб чиққунча икки қассоб қора терга тушади, сўйилган чивиннинг терисидан бешта саноч (қимиз солинадиган идиш) чиқади. «Пойта завқи» шеърида бургани тақалатиб, оқ қанд бериб овутган, арпа бериб боқсан, йўргалашга ўргатган Латифбой пойгада барча тулпорларни ортда қолдириб, маррага биринчи бўлиб етиб келади.

Турсунбой Адашбоев шоир сифатида ҳам, инсон сифатида ҳам бир умр устозларига садоқатли шогирд, дўстларига оқибатли оғайни, шогирдларига меҳрибон устоздир. Сайланманинг «Ихлос билан» номли олтинчии фасли ушбу садоқат, оқибат, меҳрибонлик рамзи янглиф намоён бўлади. Жумладан, «Устозларга бағишлов» шеърида у шоир сифатида шаклланишига катта таъсир кўрсатган устозларига таъзим бажо айлади:

*Суҳбат кетса аҳли қалам,
Шеърга доир,
Кўз ўнгимдан ўтар ҳар гал
Ўчта шоир.*

*Шеъриятда уч устознинг
Ўз ўрни бор.
Кудрат Ҳикмат, Султон Жўра,
Зафар Диёр.*

Турсунбой Адашбоев ўтган асрда ўзбек болалар адабиётига салмоқли ҳисса қўшган бу уч шоирни бежиз тилга олмайди. Турсунбой Адашбоев улардан шеъриятдаги самимилик ва ростгўйликни ўрганди, пухта вазн, оҳангдорлик ва тўқ қофияларни ўзлаштириди, анъанавий мавзуларнинг гўзал бадиий санъатларга йўғрилган янгича талқинини эгаллашга муваффақ бўлди. Шу боисдан, ушбу бағишлов шеърида у ҳатто ном (исм)ларнинг турфа маънодорлигини кўллашда ҳам ажойиб натижага эришади:

*Уч устознинг ёзганлари
Болга татир,
Бири Султон, бири Зафар,
Кудратлидир,—*

дэя устозларининг шеъриятда султонлиги, зафар қучганлиги ва қудратли эканлигини гўзал сўз ўйини тарзида ифодалайди.

Шу ўринда, китобга Узбекистон халқ ёзувчиси Тохир Малик томонидан ёзилган сўзбошида Турсунбой Адашбоевнинг ижодий такомили, ижод лабораториясининг ўзига хослиги хусусида муфассал ва самимий муносабат билдирилганлигини ҳам қайд этиш жоиз.

Китоб фазилатлари ҳақида бундан ҳам кўп гапириш мумкин. Бироқ, энг асосийси, Турсунбой Адашбоевнинг «Орзуларим — қўш қанотим» деб номланган сайланмаси, шоирнинг ўзи таъкидлаганидек, «юрак қўри жойланган», «топингани»дир. У ёш китобхонлар учун энг яхши совфа.

Раҳматулла Баракаев,
Бахшилло Ашуроев.



ЖАВОНМАРДЛИК ҲАҚИҚАТИ

Панд-насиҳат тарзида айтилган ҳамда жавонмардликнинг асл мөҳиятини ёритган қуийидаги сатрлар Алишер Навоий қалбининг гавҳари, ҳаётининг маъноси сифатида эътиборни тортади:

*Эранлар хизматидан чекмагил бош,
 Агар бошингта гардундин ёғар тош.
 Ки, гар ул тош била бошинг ушалғай,
 Саодат хаттидур, гар захми қолғай.*

Буюк мутафаккир талқин этган эранлар — дарвешлар, сўфиylар, сиддиқлардир. Алишер Навоий ақлинни таниган даврдан бошлаб шу тоифанинг хизматига умрини сарф этди. Бутун ижоди, фаолияти, молу мулкини, бору будини ахдуллоҳни етиштирган ҳалқа нисор айлади. Яхшилик йўлида жондин кечишни ўз шахси мисолида исботладики, бундан ортиқ фидойиликни тасаввур қилиш амри маҳолдир.

Ҳусайн Воиз Кошифийнинг «Футувватномаи султоний ёхуд жавонмардлик тариқати» асарида келтиришича, такя мусофири мискинлар яшаши учун нишона — беминнат бир маскандир. Шунинг учун ҳам такя бир неча хос сифатлари билан бошқа хонақоҳу мусофирихоналардан фарқ қилиши, энг аввало, такядор такя сақлашга лойик закий ва донишманд киши бўлмоғи зарур. Такя соҳиби — жавонмард моддий дунёдан таалуқ, торини узган, ризо ахлоқий сифатига эришган, ўзини қазову кадар ҳукмига топширган комил инсон бўлиши даркор. Чунки моддий оламга бояланиб қолган, дунёпараст кимса ҳеч қачон, ҳеч бир замонда ҳалқа ўзини фидо эта олмайди. Фақрроҳатидан тўла баҳраманд кишиги на эл фарогати учун машаққат тортишдан қўрқмайди. Ранж чекса ҳам, элдан меҳр торини узмайди. Дийдор талаб қиласверади. Дийдорни ғанимат билади. Дийдорга тўймайди. Хилватда дарвешларнинг «анису маҳрами», такядор камбағалларнинг «рафиқу ҳамдами», лангарда мусофириларнинг «муҳибу меҳрибони» бўлади. Шунинг учун ҳам Аҳмад Яссавий «кўнгли бутун» дунёпараст кимсалардан қочган, «дийдор талаб» ҳалойиқни севган. Жонини Паҳлавон Муҳаммад янглиғ, «дийдор талаб» энинг жонига улаган. Ҳикматларини ҳирс бандаларига, нокасу ножинсларга эшигтирасликни, хор қилмасликни илтижо қилган. Сўзларини бутун вужуди билан: «Жонни-жонга пайванд қилиб, юрагни улаб», ғарибу фақирлар, мискину мусофирилар дардига малҳам бўлган, дийдорга муштоқ аҳли дил инсонларга атаган.

Такянинг хушбўй, мевали дарахти ҳосили — дийдор, қибласи эса «назарни кўнгилларга қаратиш»дир. Жавонмард дарвеш — кўнгил гадоси. Унинг мусофири мискинлар олдига дастурхон ёзиш, камбағалу ғариблар қалбига чироқ ёқишидан муроди кўнгил олиш.

Жавонмард совуқ бир оҳ ила саранжом бўладиган дунёни назарга

илмайди, аммо бир ғарип қалбининг қадрини мулки борлиқдан ба-ланд тутади. Шунинг учун ҳам унинг эҳсонида тариқча ҳам миннат бўлмайди. Дарвеш наздида миннат билан тортилган дастурхон жир-канчdir. Бахилдан «дори сўраш — заҳри қотил сўраш билан баробардир, миннат билан тирик юргандан, иззат билан ўлмоқ аъло», деб ёзган экан Саъдий Шерозий.

Юқорида эслатган «Футувватномаи султоний ёхуд жавонмардлик тариқати»да ўқиймиз: «Агар такя сўзининг ҳарфлари қанақа маъноларга ишора этади, деб сўрасалар, айтгин: Т — таваккулга далолат этади; К — карамга далолат этади, яъни, такя эгаси карим — сахий бўлсин; Й — якрангликка далолат этади, яъни, такя эгаси ўз ишида собит туриб, ўзгармасин; Х — ҳаводорлик, яъни, муҳаббатга далолат этади. Такя эгаси дарвешлар, мусофиirlарга муҳибу меҳрибон бўлсин, уларни севсин». Ҳусайн Воиз Кошифий. «Футувватномаи султоний ёхуд жавонмардлик тариқати». Абдулла Қодирий номидаги ҳалқ мероси на-шириёти. Тошкент. 1994 йил. 55-бет. Бундан кейин шу манбага мурожаат қилинганда саҳифани кўрсатиш билан кифояланамиз).

Нега «такя»нинг дастлабки ҳарфи таваккулга ишора этади?! Чунки таваккул аҳлининг Аллоҳ розиқлигига бўлган ишончи барқарордир. Бу борада заррача иккиланиш эътиқод сустлигидан белгиdir. Жавонмард элга таом берар экан, давлатим камайиб кетмаяптими, деб ўйламайди. Эртага яна шунча молни қаердан топаман, деган фикрни кўнглига келтирмайди. Алишер Навоий қуйидаги жумлада таваккул аҳли ахлоқининг айни шу жиҳатига ишора қилган. «Тенгри раззоқлигин билган рўзи учун фам емагай ва қассомлигин билган ризқ озу кўпida сўз демагай».

Жавонмард назарида, моддий эҳтиёжлар учун асралган энг кичик нарса ҳам солик билан Ҳақ ўртасида тўсиқ ҳисобланади. Шунинг учун ҳам у захира сақламайди, бугун топганини бугун элга беради. Алишер Навоий қайд этишича, дон ўғирлаб, тутун ахтармоқ — сичқоннинг иши, машоқ териб, инига йигмоқ — чумолининг касби. Бундай тубан ҳаракатлар олий хилқат — инсоннинг шаънига тўғри келмайди. Чунки ер тагида яшириниб ётган хазинадан одамку одам, тупроқ ҳам баҳра олмайди. Футувват аҳли ахлоқининг мазкур гўзал жиҳатлари бугун моҳияти билан Алишер Навоийнинг ўз шахсида зуҳур этган. «Вақфия»дан ўқиймиз: «Жоним нақди ул Тенгрига закотким, кўнглумга насаб-қа етгунча мол захира қилмағаймен, солмади ва насабқа етган мол закотин айирғунча илкимда қолмади». Ҳирот ҳудудидаги гектарлаб унумдор ерлар ҳамда ўнлаб дўконлар соҳиби, муҳрдор, вазир, ҳоким мақому мартабаларида фаолият кўрсатган жавонмард инсоннинг закот тўлашга лойиқ маблағ «илкида қолмаганлиги» Ҳондамирнинг «Макоримул-ахлоқ» асарида келтирилган қуйидаги қайдлар билан тасдиқланади: «Чунки мулоzимларнинг қўлига нимаики тушса, тездан кишиларга инъом бериш йўли билан сарф қилинар ёки хайрли бинолар барпо қилишга кетарди».

Алишер Навоийнинг дўсти ва мураббийси Паҳлавон Муҳаммад ҳам такя соҳиби бўлган. Күштигирнинг такяси Ҳиротдаги жўйи «Султоний» соҳилида жойлашган.

XV асрнинг иккинчи ярмида Хуросон күштигирларининг сарвари бўлган Паҳлавон Муҳаммад шоҳу гадога, бою камбағалга, мискину мусофиirlга бирдек меҳру мурувват, иштиёқу ихлос кўрсатган. Нега? Чунки «Орифнинг наздида бир чақа билан олтин, арслон билан мушук тенгдир». Маноқибда берилган қуйидаги талқинлар мазкур мулоҳазалар тасдигига хизмат қиласи ҳамда «Футувватномаи султоний ёхуд жавонмардлик тариқати»да акс эттирилган ахлоқий сифатлар билан уйғунлик шафқату раҳо муфрит (бехад баланд), улуғларга зотий ниёзмандик ва хизмат ва кичикроқ нотавонларга расми меҳру шафқат ва сарпайвандлик (раҳномолик) ва мутавасситул-ҳолларга

(ўртача ҳолатдаги кишилар) иши мулоямат (мувофиқлик) ва хўб забонлиқ ва фуқаро ва масокинга (мискинлар, камбағаллар, бечоралар) варзиши (одати) мувофақат ва нафрасонлиғ (фойда етказиш)». (Алишер Навоий. «Холати Паҳлавон Муҳаммад». Муқаммал асарлар тўплами. 20 жилдик. 15 жилд. «Фан» нашриёти. Тошкент 1999. 112 бет. Бундан кейин иқтибослар ҳам асарнинг шу нашридан олинади ва саҳифаси қавс ичида кўрсатилади).

Назаримизда, айнан ана шундай фазилатлар ижтимоий алоқаларни мустаҳкамлашга, комил жамиятни барпо қилишга олиб келади. Бахиллик дардидан буткул покланган одамнинг табиатида саховат ғолиб бўлади. Инсоннинг инсонга ачиниши, доимо бошқаларга шафқат назари билан қарашиб, ўзгалирнинг қайгу-ташвишини тортиш, камбағал, заифхол, муҳтоҷларга ёрдам бериш, барча билан муроса қилиб яшаш комил инсонга хос хислатлардир.

Ҳусайн Воиз Кошифий талқинича, «улугларга ниёзмандлик» — ўзидан устун кишига етганда, одоб сақлаб, сукут қилиш, ундан таълим олишдир. Алишер Навоий ифодасидаги «хўп забонлиқ» «Футувватномаи сultonий ёхуд жавонмардлик тариқати»да «ширин тил билан дўстларни сийлаш» тарзида такя сақлашнинг зарурий одоблари сирасида зикр қилинади.

Паҳлавон Муҳаммаднинг такясидан эртаю кеч одамларнинг қадами аримаган. Куштигир хизматида бўлган ўнлаб ходиму ошпазларнинг қўли турфа хил таомлар, лаззатли овқатлар пишириш, дастурхонга хуштаъм шарбатлар, ширин-шакар мевалар, ҳар хил ҳольваю ширинликлар тортишдан бўшамаган. Бу ноз-неъматлардан камбағал-бечоралар, мискину мусофиirlар ҳеч бир такаллуфсиз баҳраманд бўлганлар: «Кечароклик ва кундузлик йигирма тўрт соатда Паҳлавоннинг такясида хоҳ, сафарда, хоҳ, ҳазарда табх иштиғолидин фароғат йўқ эрди, турлук-турлук атъима (таомлар, овқатлар) эрди. Андоқки, бу неъмату ағзиядан фуқаро ва масокину муқим ва мусофиir маҳзуз эрдилар» (112 бет). Давлатманд ва эътиборли кишилар, юртнинг улуглари, шаҳзодалар, ҳатто мамлакат ҳукмдори Ҳусайн Бойқаро ҳам куштигирнинг сахий дастурхонидан баҳраманд бўлган: «...Султонус салотин ҳам етгач, бу мазкур бўлғон атъималар ҳам тортилур эрди ва етмасалар эрди — Паҳлавоннинг ушоқлари кўтариб тоғга элтурлар эрди ва агар элтмасалар эрди — юқоридан киши келиб, тилаб элта борурлар эрди» (112 бет).

Фарига нон бериш, бошпана бериш мезбондан катта мардик, шижоат, қатъият талаб қиласи. Табиб табиб эмас, бошдан ўтказган табиб, дейди доно ҳалқимиз. Мусофиir кишининг ҳаёти, тирикчилиги, ҳолатини муҳожирлик фурбатини бошидан кечирган тўғри ҳис қиласи. Алишер Навоий мусофиirlar изтиробларини ўз тақдири мисолида синовдан ўтказган эди. Шунинг учун ҳам Паҳлавон Муҳаммад шахсиятидаги фарипарварликка алоҳида урғу беради. «Футувватномаи сultonий ёхуд жавонмардлик тариқати»да мусофиirlar олдига уч кун давомида дастурхон ёзишни канда қилмаслик уқтирилади (55 бет).

Маноқибда таъкидланишича, мамлакатга турли манзиллардан келган фаригу гураболар, мусофиirlar ўн кун, бაъзида, бир ой-икки ой-лаб Паҳлавон Муҳаммаднинг такясида қолиб кетган. Кўнокларга ҳар куни икки-уч маҳал овқат, ётиб-туришлари, истироҳат қилишлари учун шинам уй, уловлари борларининг от, эшак ва туяларига арпаю сомон ҳамда ётоқ ёхуд ҳамиша тайёр бўлган: «...ҳар тарафдин келган фуқаро ва гурабо ва аксараш ўн кун, балки бир ой — икки ойғача таваққуф қилсалар эрди — бу маъкулот аларнинг илайига кулфатсиз, балки икки-уч қатла тортилур эрди...» (55-бет).

Алишер Навоий ўз адабий қаҳрамонларининг сахийлик, олий ҳимматлилик каби фазилатларини ёритар экан, аксарият ҳолатларда бадий матнда «кулфатсиз», «бетакаллуф» каби сўзларни қўллайди. Кул-

фатсиз қилинганд ҳиммат баҳиллик, миннат, гайирлик каби қусурлардан холи бўлади.

Ҳусайн Воиз Кошифий талқинича, футувватнинг қуввати нафсни мағлуб этиш, анонияту худписандикни тарк этишдан ҳосил бўлади. Такаллуфдан эса такаббурлик ва манманлик ҳиди келади. «Футувватномаи султоний ёхуд жавонмардлик тариқати» муаллифи «мусофирилар ва дарвешлар чиқиб кетганда», яъни, такяни тарк этиб, ўз манзилларига қайтганларида, улардан ҳар қанча ёмонлик ўтган бўлса ҳам кечириш, унтиб юбориш, нолимаслик, ҳасрат қилмаслик лозимлигини уқтиради. Паҳлавон Муҳаммадда ихлос ва самимият, муруват ва қарам, жавонмардлик шу даражада балаңд бўлганки, мусофирилардан нолиш, шикоят қилиш нарида турсин, кузатиш олдидан уларнинг ҳар бирiga дарвешона либослар, хотира сифатида қимматли совғалар ҳадя қилган: «Ва бу ҳалойиқдин кўпи андоқ, эрдиким, борур чоғларида... йўл ҳаржиси ва баъзи дарвешона либослар ва табаррукларға ҳам мустафид бўлуб эрдилар» (112 бет). Эзгуликка ташна юраклар фазли дарё, покиза инсонларнинг саҳий қалбидан ҳамиша «ўз маҳласи учун» нажот, оғият истайди. Ихлос улуғ давлатдир. Маърифат ихлос нишурган кўнгилга нур таратади: «Жамии аҳди туруқ ўзларини Паҳлавоннинг фотиҳа ва такбириға еткурмағунча ўз тариқларида ишлари тамом бўлмас эди» (113 бет).

Жавонмард, аввало, ширин такаллум билан одамларнинг кўнглига йўл топади. У одамларга покиза назар билан қарайди. Ўзгалардан айб изламайди. Кишиларнинг яхши томонларини кўради. Бошқаларнинг кўнгилга жароҳат етказувчи қўпол муомалали, аччиқ сўзларига шикоятсиз бардош беради. Ўзага озор бергунча, ўз нафсини қийнайди. Ўзигараво кўрмаган эзгуликларни ўзгаларгараво кўради. Қон ютқизганга асал, заҳар тутганга шакар узатади. Нега? Чунки Алишер Навоий талқинича: «Чучук тилки, аччиғилиққа эврулди, зарари ом бўлди, қандники, мускир бода қилдилар, ҳаром бўлади».

Алишер Навоий аччиқ сўзни заҳарли найзага қиёслайди. Ҳалқимизнинг: «Тиф яраси тузалади, аммо тил яраси тузалмайди», ҳикматини қуидагича тасниф этади: «Кўнгулда тил синони жароҳати бутмас, анга ҳеч нима марҳам ерин тутмас». Жавонмард забон найзасидан қалби яралангандарнинг жароҳатига яхши сўз ва ширин тил билан малҳам қўяди.

Тилини ўз ихтиёрида сақлай билган одам — оқил, тилига эрк берган киши — андишасиз ва тубандир. Тил ширин бўлса яхши, тил билан дил бир бўлса, нур устига нурдир. Инсон вужуди мисоли бўстон. Тил — гул, кўнгил — гунча. Гулистонда гулсафсар ва гунча энг ёқимили гуллар бўлгани каби инсон танасида тил ва дил энг маҳбуб аъзолардир.

Жавонмард ана шу икки аъзо шарофатидан инсоний камолот чўққисига кўтарилигандир. Унинг кўкси — яхшилик хазинаси. Тилидан эса бол томади. «Ҳолоти Паҳлавон Муҳаммад»дан ўқиймиз: «Барча содоти машойих ва уламою фуқаронинг маҳбубул қулиби эрди ва подшоҳ эшигида арқони давлатдин олийшон беклар ва олиймакон ичкилар ва судур ва сойир ҳалойиқға Паҳлавоннинг суҳбати наврӯз ва байрамча бор эрди...» (113 бет).

Улуғ мутафаккир даҳосидан сўнгги ёдгорлик — «Маҳбул-қулиб» асари номининг изоҳи ва мазкур асарни ёзишдан ижодкор кузатган бош мақсад ҳам кўчирилган жумлада ёрқин акс этган.

Алишер Навоий «Маҳбул-қулиб»да авлодарга ношойиста хислатлардан озод бўлиш, нафсни риёзат ила маҳв этиб, сабру қаноат билан пок яшаш, баркамол ахлоққа эришмоқнинг энг оқилона йўлларини кўрсатган. Асар иймон-эътиқод мустаҳкам, хушфеъл ва хушсухан, зоҳири ва ботини мувоғиқ, олижаноб ва саховатли, ҳимматли ва муруватли, ҳалол ва жўмард, андишали ва тавозеъли, мулоҳазали ва

маърифатли, ҳаёли ва вафоли, инсонсевар ва халқчил инсоннинг яхлит суврат ва сийратини чизади. Ва ана шундай «ҳирсу ҳавас хирмонини ўтда ёқан», сурату сийрати гўзал, юриш-туриши кўркам, хуш ахлоқу хуш табассумли, ширин сўзли одам миллионлаб қалбларнинг суюклисига айланади, деган фоя улуғ мутафаккирнинг таҳдилу талқинлари замирида туради. Асарда ахлоқий-фалсафий, ижтимоий-сиёсий, бадиий-илмий, ҳаётий-илоҳий фикрлар уйғуналашиб кеттан, бири-бирига сингдириб юборилган. «Ҳолоти Паҳлавон Мұхаммад»да эса маҳбубул-қулуб инсоннинг мукаммал сиймоси ҳаёт кўзгусида күштигир тимсолида акс-садо беради.

Алишер Навоий Паҳлавон Мұхаммад сиймосини авлодларга ибрат қиласар экан, шундай ёзади: «...Ҳаттоқи султонзодалар тиламас эрдиларким, бир лаҳза онсиз (Паҳлавонсиз) бўлмагайлар эрдиким, подшоҳзодалардин нечаки мұттамад отланиб, Паҳлавоннинг такясига бориб, сұхбатлиғе қылғайлар эрди. Ул даги барчасига лойиқ хизматлар қилиб, сұхбатлар тузиб, неъматлар тортиб, созандалиғ ва гўяндалиғ буюруб, самоъ ва рақс қилиб, аларни хушҳол ва мунбасит узотур эрди» (113 бет). Маноқибдан келтирилган мазкур иқтиbos катта маънавий-маърифий қимматга эга. Ҳусайн Бойқаро хонадонига мансуб шаҳзодаларнинг күштигир такясига очликдан ёки инъом-эҳсон кутиб келмаганлиги кун каби равшандир. Шунинг учун ҳам муаллиф масаланинг айни жиҳатига дикқатини қаратган. Подшоҳзодалар кўнгли тортиб, вужудини қамраган меҳр ғолиб келиб Паҳлавон Мұхаммад сұхбатига ошиқдан.

Софинч туйфуси, комил инсонни қўмсаш иштиёқи одамларни күштигир даргоҳига етаклаган. Кўчирилган иқтиbosнинг иккинчи жумласидан аён бўлаётирки, Паҳлавон Мұхаммад такясига ташриф буюрганларга меҳрини пойандоз қилган. Ҳар турли ширин таомлар, анвои ноз-неъматлар, ҳофизу созандалар, раксу само ўз йўлида давом этган, амал қилган. Алишер Навоий тасвиридан аён бўладики, күштигир остонасига қадам босгандарга ўзининг гулдек қалбини тутган. Бундай марҳамат футувват аҳлига хос эди. Футувват аҳли ахлоқининг туб мөҳияти Алишер Навоийнинг қўйидаги фардида ёрқин тажассумини топган:

*Мурувват барча бермакдур, емак йўқ,
Футувват барча қилмакдур, демак йўқ.*

Остонасига қадами ётганларни «хушҳол ва мунсабит (хурсанд)» қилиб узатиш йўлида бисотидаги ҳеч нарсани аямаслик, инсон қалбига шоддик олиб кириши мумкин бўлган бор имкониятларини ишга солиш Алишер Навоий шахси учун ҳам хос ҳусусият эди. Бинобарин, айни масалада улуғ мутафаккир билан Паҳлавон Мұхаммад сиймоси уйғундир.

Ҳусайн Воиз Кошифий «Футувватномаи султоний ёхуд жавонмардлик тариқати» рисоласининг бешинчи, тариқат йўлига кирган соликнинг ўтириш одоби ҳақидаги фаслида улуғлар ҳикматидан шундай бир намуна келтиради: «Жой мард билан шараф топар, мард жой билан эмас» (57 бет). Ҳикмат мавзуу тақозосига кўра, тариқат муридларининг шайх мажлисларидағи ўрни ва мақомига оид баҳс муносабати билан келтирилган. Аммо унинг фоявий-бадиий мундарижаси фақат шу масала билан чегараланмайди. Бизнингча, «Футувватномаи султоний ёхуд жавонмардлик тариқати»да келтирилган ҳикмат замирида турган теран маънолардан бири шуки, мансаб ва мансабсизлик, шунингдек, бирор юқори лавозимдаги кишига яқинлик ва узоқлик комил инсоннинг нуфузини юқори ҳам кўтара олмайди, пастта ҳам тушириб юбормайди. Аксинча, ўзини билган амалдор комил инсонга эҳтиёж сезади ва унга қараб интилади. У баркамол инсондаги етук-

лик сифатлари билан ўз сиймосини безайди, ундаги тафаккур нури ва заковат кўзи билан амал мақомини ёритади.

Комил инсоннинг сўзи, иши, фикри, муомаласи — тили, миллати, эътиқоди, мулку мамлакати, давлату савлати бир-биридан тубдан фарқ қилувчи барча элу элатлар, бою камбағаллар, яхшию ёмонлар, кофи-ру мусулмонлар билан мувофиқ келади. Паҳлавон Муҳаммад ана шундай инсон. «...ва ҳол улким, етмиш икки фирмә била маоши ушбу наҳаж била воқеъ эрдиким, ҳар киши аниңг мулояматин ўз ҳолига мулоҳаза қиласа эрди — хаёлига бу келур эрдиким, андин маҳсусроқ ва мулоҳизроқ ёри ва мусоҳиби йўқ эрди эркан» (114 бет).

Улуг мутафаккир шундай таҳлилу талқин, таърифу тавсифдан кейин ҳам бу номдор күштигир Ҳусайн Бойқаро қаламравидаги полвонларнинг пири ҳамда Ҳирот жавонмардларининг пешвоси тасвирида ўз қаламини ожиз ҳис қиласи. Алишер Навоий табиатидаги ўта ҳокисорлик бу ўринда ҳам намоён бўлган. Паҳлавон Муҳаммадек мукаммал инсон шахсининг шарҳида ўзидан бошқа энг улуг сўз санъаткорларининг ҳам забони қисқа, камчиликли, энг сўзамол достон айтувчиларнинг ҳам имкониятлари чекланган эканлигига ишора қиласи: «Алқисса, Паҳлавоннинг барча навъ ишларининг хушлиги баёнида ва ҳар тавр сийрат ва суратининг дилкашлигининг шарҳида забонварлар тили қосир ва достонгустарлар нутқи ожиздур» (114 бет).

Инсон зоти табиатидаги энг оз нарса сир сақлаш хусусиятидир. Самимий дўст — комил инсон эса киши дилидаги сирларни сақлашга қодир бўлган мустаҳкам қўргондир. Тавҳид сирини қалбida жондек яширин сақлай олган, Ҳақ ила яқинлигу сирдошлиқ синовидан ўтиб, «гавҳари мақсад»га етган комил инсон Аллоҳ бандалари ила сирдошлиқ қилишга энг ишончли, энг муносиб номзоддир. «Футувватномаи сultonий ёхуд жавонмардлик тариқати» асарининг муаллифи дўст сирини бирорга айтмасликни ҳақиқий дўстликнинг йигирмата одобиран бири сифатида рақам қиласи.

Ҳар қандай дўстлик инсон ҳаётининг икки нозик фаслидаги имтиҳон — синовлардан муваффақиятли ўтса, умрбоқийлик касб этади. Биринчидан, инсон турмушидаги йўқчилик, камбағаллик, заифлик ёки ғариблик унинг дўсти ким, душмани ким эканлигини кўрсатади. Иккичидан, дўст амалга мингандা, унинг мақоми юксалганда, у бойлик ва куч-қудратга эга бўлганида дўстлик яна бир оғир синовга дуч келади. Алишер Навоийнинг «Ҳолоти Паҳлавон Муҳаммад» асаридан келтирилган қўйидаги фикри юқорида қайд этилган жумла мазмуни билан бирлашиб, айни ҳаёт ҳақиқатини акс эттиради: «Фалокат (бахтсизлик, йўқсизлик) айёмидан зоҳир юзидин таайиун (элда ном қозониш) ва иститоат (куч-қудрат) замонигача кўпрак авқот била экандур» (114 бет).

XV аср эллигинчи йилларининг охири ва олтмишинчи йилларининг биринчи ярми Алишер Навоий ҳаётининг қайпули давридир. Отаси Фиёсиддин Баҳодир ҳамда ҳомиyo ғамхўри шоҳ Абдулқосим Бобур фоний дунёдан риҳлат қилган, нуғузли ва меҳрибон қариндош-уруглари Мирсаид Кобулий ҳамда Муҳаммад Фарийлар Абусаид Мирзо қўлида шаҳид бўлган. Отадан қолган молу мулки Абусаид Мирзо томонидан мусодара қилинган. Улуг мутафаккир ўз ҳаётининг мазкур даврини насрор асарларида «айни ифлосу фалокат ва сарнавишу ранжуриш» айёми дея хотирга олади. Маноқибдан келтирилган жумлада «таайиун ва иститоат» замони дейилганда, Алишер Навоий таржимаи ҳолининг Ҳусайн Бойқаро ҳукмронлиги давридаги саналари, яъни, унинг «зоҳир юзидин» амал ва мансаб, бойлик ва куч-қудратга эга бўлган пайтдаги ҳаёти назарда тутилади.

Паҳлавон Муҳаммад Алишер Навоий майший ҳаётининг бир-биридан тубдан фарқланувчи ҳар иккала даврида ҳам дўстлик шартла-рини аъло даражада бажарган. Дўстга содиқликнинг олий намунаси-

ни кўрсатган. Алишер Навоий қалбини ўз эътиқодининг кўзгуси янглиғ асраб-авайлаган. Абусаид Мирзо Хурросон мулкида ўз ҳокимиятини ўрнатган, Хурросон ҳалқи «ҳар навъ зулм» ва тажовуз ундан «воқеъ бўлса», бўйсунишга мажбур бўлган бир вазиятда ота-она, ҳомий-фамхўрлар, қариндош-уруғ, мол-мулқ, ҳовли-ҳарамдан ажралган, туғилган, киндик қони томган Ҳиротдан йироқлашган Алишер Машҳадда гарип бир ҳолатда, кутиммагандага мафосил (бўғимлар оғриғи) касалига чалиниб, бир хилват, чекка жойда ётиб қолади. Тасодифий равишида, ўша пайтда, йўли Машҳад сари тушган Паҳлавон Муҳаммад воқеадан хабар топади: «Бу факирнинг ҳолидин хабар топғондин сўнгра ҳар кун қадам ранжа қилиб, улча қоидай шафқат ва ёрлиғ ва тариқи муҳаббат ва фамхўрлиқ бажо келтирур эрдилар — ангачаки мараз дафъ бўлди» (114-115 бетлар). Маноқибдан келтирилган иқтибос ортиқча шарҳу изоҳларсиз, Паҳлавон Муҳаммад вужуди биродарликдек муқаддас туйгу билан тўлиқ эканлигини кўрсатади.

Ҳирот жавонмардларининг пешвоси Паҳлавон Муҳаммад эътиқод кўйган маслакнинг (футувват) ботиний руқнларидан бири — «тавозуъ, яъни, бошқаларни ўзидан афзал билмоқ, барчага камтар, хоксор муносабатда бўлиш...» (10 бет). Кичик абжадларидан бири эса: «хокисорлик била ўзини тупроққа айлантиришдир» (115 бет). Ўз-ўзига маломат назари билан қараш, бор нуқсонлар, қусурлар, айбларни ўзига нисбат бериш ҳам шу маслакнинг ахлоқий талабларидан биридир. Мазкур маънавий гўзалликларнинг Алишер Навоий шахсида қай дарражада зухур этганлигини улуғ мутафаккир ва күштигир орасидаги дўстлик талқинига йўналтирилган қўйидаги жумладан ҳам ёрқин тасвур қилиш мумкин: «Мундин ўтмаски, қирқ йил бир менингдек худрой (ўжар, қайсар) ва бесарупой (телба, бебош), ошгуфасору паришин рўзгор киши била мусобиҳлик (дўстлик) қилғайки, хотирға келмаски, андин хотирға губоре ўлтиришиб бўлғай ва кўнгулга етмаски, ҳаргиз андин кўнгулга озоре етмиш бўлғай, балки андоқ, нисбат қилмиш бўлғайким, кундан-кунга муҳаббат ришталари маҳкамроқ ва ма vaddat (дўстлик) қоида ва тариқи муаккад (такрор қувватланган) ва мустаҳкамроқ бўлмиш бўлғай...» (114 бет).

Ҳусайн Воиз Кошифий дўстлик риштасининг кундан-кунга мустаҳкамроқ бўлиши шартларидан бири (ўзигараво кўрганни унга (дўстга) ҳамраво кўриши), эканлигини қайд қилади. Алишер Навоий ва Паҳлавон Муҳаммад футувват тариқининг бу қоидасига ҳадди аълосидан ҳам ошириб риоя қилишган. Мана, жозиб юраги дўстга муҳаббат туйгулари билан тўлган Алишер Навоий қалбининг тұхфаси:

*Ёр улдурки, ҳар нечаким ўзига
Истамас, ёриға ҳам истамагай.
Ўзи истарки, ёр учун ўлгай.
Ани мунда шерик айламагай.*

Футувватнинг Ҳусайн Воиз Кошифий китобидан келтирилган ҳикмати Алишер Навоий табиати, иродаси, дидига тўла мос келган ва унга илҳом берган. Улуғ мутафаккир ҳамда унинг Паҳлавон Муҳаммад янглиғ яқин биродарларининг инсоний муносабатларида ўз ҳаётий тасдифини топган жавонмардлик ҳақиқати Алишер Навоий ижодида қайта ишланган. Ва Алишер Навоийнинг образли фикрлаш усули воситасида футувват ақидасининг фоявий, ҳаётий, фалсафий, ижтимоий миқёси кенгайган. «Футувватномаи сultonий ёхуд жавонмардлик тариқати»дан кўчирилган ҳикматда дўст ўзига ёқсан нарсаларни ҳамда ўзигараво кўрган эзгуликларни дўстигараво кўриши лозимлигини уқтирилган. «Махбубул-қулууб»нинг ўттизинчи танбиҳида эса мавзунинг манфий қутби ҳам қаламга олинган, яъни, дўст ўзигараво кўрмаган ёмонликларни, хорлик ва қийинчиликларни дўстига ҳамраво кўрмаслиги таъкидланган: «Ҳар кимки, бирор била ёрдур ёки ёрлиғ

даъвийиси бордур, керакким, ўзига раво тутмағонни ёрига раво тутмаса, кўп нимаким, ўзига ҳам раво тутса, анга тутмаса».

Кўринадики, Алишер Навоий ружуъ санъати имкониятларидан монхирона фойдаланиб, бадиий ғоя салмоғини янада оширган. Ўлуғ мутафаккир талқинича, дўст ўз жисму жонига раво кўрган қийинчилликларни, машаққатларни дўстига раво кўрмаслиги даркор. Ўзи қанча жабр торгса, тортсинг, аммо бу жисмоний ёки руҳий азобларнинг бирор зарраси дўстига қўнмасин. Албатта, шундай фидойилик, ўта садоқат билан иш тутилса, дўстлик озор кўрмайди. Алишер Навоий ва Паҳлавон Муҳаммад сиймоси мисолида кузатилганидек, «кундан-кунга муҳаббат риштаси маҳкамроқ ва маваддат қоида ва тариқи муаккад ва мустаҳкамроқ» бўлиб боради. Бундай дўстлик ҳеч қачон завол кўрмайди.

Улуғ инсонларга хос бундай буюк дўстликнинг қарор топиши учун ҳис-туйғулар яқинлиги, маънавий мақсадлар муштараклиги камлик қиласди. Адолатга, Ҳаққа ва Ҳақиқатга ташналиқ, ҳалқа, Ватанга ва миллатга фидойилик ҳам талаб қилинадики, шундагина Дўст — Адолат, Ҳақиқат, Ҳалқ, Ватан ва Миллат тимсолида эътиқод кўзгусига айланади.

Шунинг учун ҳам, айни масала, Алишер Навоийнинг ахлоқий-фалсафий масалалар қаламга олинган барча асарларида асосий моҳият тарзида намоён бўлади.

Шавкат Ҳайитов,
филология фанлари номзоди





ЗАМОН, МАКОН, ИХВОН Хожа Абдухолиқ Фиждувоний қарашлари мисолида

Ўрта асрларда бутун Шарқ оламида машҳур бўлган Шайх Юсуф Ҳамадонийнинг иккинчи халифаси Хожа Ҳасан Андоқийдан шундай ҳикмат етиб келган: «Замон, Макон, Ихвонсиз — яъни, муайян вақт, муайян жой, муайян шахс бўлмас экан, жаҳднинг ўзи самарасиздир».

Ҳикматда олами сурро, яъни, алоҳида олинган ҳар қандай жамият ҳаётида ва олами қубро — муайян шахс ички оламида содир бўладиган муҳим оламшумул аҳамиятга молик ҳодисага ишора этилмоқда. Жаҳд — бу бир мақсадга эришиш йўлидаги қаттиқ, саъй-ҳаракат, ғайрат, интилишдир. Албатта, ҳар қандай интилиш доим ҳам бирор натижажа беравермаслиги мумкин. Натижага эришиб, мурод ҳосил бўлмоғи учун эса, юқорида қайд этилган талабларни назарда тутмоқ лозим.

Исломий адабиётда ушбу ғоянинг зоҳирий ҳаётдаги, яъни, тарихий воқеа-ҳодисалар содир бўлиши борасидаги тасдиғи хусусида жуда кўп маълумотлар мавжуд. Маноқиблар, тазкиралар, ҳолотларда авлиёларнинг туғилишидан огоҳлик берувчи воқеалар ҳикоя қилинади. Расули акрам саллолоҳи алайҳи васалламнинг ўз саҳобаларидан бири Арслонбобга хурмо бериб, тўрт юз йилдан кейин Туркистонда туғилажак Аҳмад исмли болага етказишни буюришлари, Шайх Нажмиiddин Кубронинг эса, Бобо Камол Жундий исмли халифаларини Туркистонга йўллаб, мавлоно Шамсииддин Муфтининг ўғли — Аҳмадий мавлонога ўзларининг тўнларини топширишни тайинлашлари, шунингдек, Хожа Муҳаммад Бобойи Самосий ҳазратларининг Хожа Муҳаммад ибн Муҳаммад Баҳоуддин Балогардон Нақшбанднинг туғилишини кутишлари каби воқеалар Замон, Макон ва Ихвон етилмас экан, оламшумул бирор воқеа содир бўлмаслиги борасида гувоҳлик беради. Бу қонуният жамият сиёсий ва ижтимоий ҳаётида ҳам кузатилади. Испан мусулмонларидан бўлган Абдураҳмон ибн Ҳалдун ижтимоий тараққиёт жараёнини юлдузлар ҳаракатига қараб тадқиқ этиб, ҳар қандай империя 120-130 йил атрофида ҳукм суриши ва ҳар бири ўз тараққиётида уч босқични босиб ўтиши эҳтимоли, шубҳасиз, эканлигини таъкидлайди ва мисоллар билан тасдиқлайди. Демак, маълум Маконда ҳукм сурган империянинг таназзули учун маълум, белгиланган Замон келиши шарт, бу замонда Ихвон тарбияланиб, вояга етади. Фикримизни далиллаш учун биргина мисол келтирамиз. Марказий Осиёни мӯғул босқинчилари зулмидан Соҳибқирон Амир Темур ҳалос этди. Бундай қараганда, Хоразмлик ватанпарвар, мард шаҳзода Жалолиддин Мангуберди ҳам Соҳибқирон Амир Темур эришган шону шавкатга эришиши мумкин эди. У ўз даври — Замонининг буюги эди. Унинг ҳарбий ва сиёсий имкониятлари Соҳибқирон Амир Темур фаолиятининг бошларидағи имкониятларидан устунроқ эди. Бироқ, Жалолиддин толе юлдузининг чиқар вақти ҳали етмаган эди. Замон — мӯғуллар замони эди. Бу баҳт эса Соҳибқирон Амир Темурга насиб этди.

Туркий ҳалқ осмонининг шамси пуранвори Амир Низомиддин Алишер Навоий ҳам ана шундай толе танлаган сиймолардан бири эдикӣ, бани ба-

шар учун илми адаб ва шеърият султони даражасига эришиш фақат унгагина мұяссар бўлди. Жуда кўп истеъодлар, жумладан, олимлик ва шеърият бобида беназир Заҳирийдин Мұхаммад Бобур каби шахслар учун Замон ва Макон имконияти йўқ эди. Тарихда бундай мисоллар анчагина.

Энди масаланинг инсон руҳияти ички қонуниятлари билан алоқадорлиги, ботиний жиҳатларига эътибор қаратсак. Тасаввуф тарихидаги Увайс Корани воқеасидан сўнг, анъанавий қонуниятта айланиб қолган увайсийлик ҳодисаси ҳам Замон, Макон, Ихвон концепциясининг тасдиги учун хизмат қилади. Хожа Абдухолик Фиждувоний ва Баҳоуддин Нақшбанднинг руҳоний учрашувлари воқеаси Алишер Навоийнинг «Насойим ул-муҳабbat» асарида келтирилар экан, Навоий ёш Мұхаммад Баҳоуддин илоҳий жазба хуруж этиб зиёратга чиқсан мазоротлар ва уларда шуълалари хиралашиб қолган бир неча шамларга ишора этади. «Хожай бузруг» — Хожа Абдухолик Фиждувоний таълимига кўра, Баҳоуддин Нақшбанд илоҳий маърифат булоқларининг кўзини очиши, сўниб бораётган шамларнинг пилигини заковат ва илму каромат билан тозалаб, илоҳий ҳақиқат нурини кишилар қалбида порлатиши керак эди. Дарҳақиқат, Хожа Абдухолик Фиждувонийдан кейин Бухорои шарифда «Хожагон сулуки» фаолияти анча сусайган эди. Демак, Баҳоуддин Нақшбанд етук муршид, балогардон, силсила занжирининг тебратувчиси мартабаларига эришиши учун, айнан, у туғилган ва яшаган Замон ҳамда Бухорои шариф ва Мовароуннахр — Макон зарур эди. Ана шу Замон ва Макон Ихвоннинг камолга этиши учун ижобий имконият бўлиб хизмат қилди. Хожа Абдухолик Фиждувонийнинг руҳи поки руҳоний тарбия учун Баҳоуддин Нақшбандни танлагани замирида ана шу ҳикмат ётади. Умуман, увайсийлик ҳодисаси барча ҳолларда мазкур ҳикмат асосида содир бўлди. Тасаввуф таълимотининг иирик вакилларидан бири Жунайд Бағдодий ҳам «Тасаввуф нима?» деган саволга, худи шу ҳикмат нуқтаи назаридан жавоб берган, яъни, «Хулқу карим язҳирул карим физ замони карим мин ражли карим байнин қовмун киром» (маъноси: шундай бир карим хулқи, у каримдан карим замонда карим қавм аро ҳосил бўлур). Бу ерда карим Замон деганда — Замон; карим қавм деганда — Макон; карим деганда — Ихвон назарда тутилади. Демак, ҳар бир сўфийнинг тариқатта кириши ва камолот касб этиши юқоридаги илоҳий иноят юзасидан содир бўлар экан. Нақшбандия таълимотининг Хожа Абдухолик Фиждувоний ишлаб берган рашҳаларида сўфий тафаккури ва қалбида тавҳид асрори очилиши ҳамда вахдат юзага келиши учун мазкур уч имконият ҳозир бўлиши қайд этилади. Хусусан, таълимотнинг «ҳуш дар дам» рашҳаси сўфий қалбида Замондан огоҳикни, «назар бар қадам» рашҳаси ўзига тегишли Макондан чалғимасликни тарбиялайди. «Сафар дар ватан» рашҳаси бевосита Ихвоннинг нафс юкидан қутулиб, поклик сари юксалиши учун хизмат қилади. «Хилват дар анжуман» рашҳаси эса муайян Замонда, яъни, зоҳиран ҳалқ билан бирга бўла туриб, муайян маконда, яъни, солик юраги тўрида Аллоҳ, таоло зикри тақрорланиб туриши воситаси билан Ихвон ёки ориф камолотини намоён этади. Таълимотнинг кейинги рашҳаларини ҳам шу таҳлит таҳдил этиш мумкин. Бироқ, улар асосан солик қалби поклиги ва мақсад йўлидаги куч-кувватини ортириш учун истифора. этилади.

Замон, Макон, Ихвон ҳикмати, шунингдек, чиллага кирган сўфий мисолида ҳам ўз ифодасини топади. Яъни, Замон — қирқ кун, Макон — ергўла, юр ёки дашт-саҳро ва Ихвон — камолотта интилган шахс.

Хуллас, бу мавзунинг изчил, чуқур таҳдили янги илмий хулоса ва мулоҳазаларни юзага келтириши мумкин.

Дилором Салоҳий,
филология фанлари доктори

Хотира тиниклиги: шоир ва унинг шахсияти

Атоқли адиларнинг болалик, ўсмирилик ҳақидағи асарлари, биринчидан, уларнинг болалиги ўтган давр руҳини, халқ ҳаётини ҳаққоний күрсатиш билан, иккинчидан, ижодкор шахсининг қандай оиласвий ва ижтимоий мұхитда, қандай жамиятта шаклланғанлигини билдириш билан мұхим ақамиятта эга. Баъзи адилар ижодий маҳорати ўсган, шахс сифатида етилган пайтида болалигини эслаб, асар ёзсалар, баъзи адилар ижодининг бошидаёқ, болалик таассуротларининг охори тұқымдай, ҳис-ҳаяжонлари сўнмай туриб, дастлабки асарларини болалик даври тасвирига бағишлийдилар. Бу хусусда фикр юритганда, беихтиёр Толстойнинг «Болалик»,Faфур Фуломнинг «Шум бола», Ойбекнинг «Болалик», Абдулла Қаҳҳорнинг «Утмишдан эртаклар» сингари асарлари хаёлга келади. Узбекистон халқ шоири Жуманиёз Жабборовнинг «Ҳайрат олами» асари ҳам шундай сираға мансуб.

Мазкур бадеа-қиссани ўқиши мобайнида, шоирнинг болалик чөгларида күрган табиат гўзлаликларига мафтунлиги ҳамда ҳайрат-ҳаяжонлари билан танишамиз. Шоир болалиги кечган Пўлати қишлоғи манзараларини эслар экан, ҳаёлида баҳор оғушида яшнаган кўм-кўк адирлар, сою қирларнинг узлуксиз зумрад тўлқини, беҳад (бепоён) далаларнинг сокин ва улуғвор манзараси, узумзор боғлар, полизлар, бедазорлар гавдаланади. У қишлоғининг сут дарёсидай жимиллаган оппоқ тонгларини, қизғалдоқдан чаман бўлган алвон кенгликларини соғинади.

Шоир болалигига мафтун бўлган севимли табиат манзараларини тасвиirlар экан, лирик чекиниш қилиб, инсоният ҳаётида табиатнинг мұхим ўрни ҳақида фалсафий ўйларини изҳор қиласди: «Она ер! Биз унинг фарзандларимиз. Табиатнинг ардоқли бир бўлгагимиз. Тақдир бизни Она ерга муфтун бўлиб, ундан баҳраманд бўлиб яшаш учун яратган. Биз уни меҳру мұхаббатимиз билан, меҳнатимиз билан янада яшнатиш учун дунёга келганимиз. Унинг қайси кисмида, қайси қитъасида яшасак ҳам у бизга бирдек азиз ва муқаддас. Ҳаммамиз учун битта осмон, битта замин, битта қуёш, битта ой мавжуд. Оддийгина айтганда, у (Она ер) бизнинг ўз уйимиз, хонадонимиз, кошонамиз, ҳаёт беланчагимиз».

Она ер, табиат саховати чексизлигини шоир бундай таърифлайди: «Тугилган дақиқаларимиздан то умримиз охиригача биз унинг бағридамиз. У (яъни, табиат) ризқу рўзимиз, кийим-кечагимиз, борлигимиз. Мева тўла боғлар, азамат чинорлар, тўлғаниб оқсан анҳору сойлар, нуқра (кумуш) чўққили мовий тоғлар, сурув-сурув чорва, кўм-кўк бедазорлар, оппоқ паҳтазорлар, турли-туман гиёҳлар-ҳаммаси бизнини». Шоир болалик чөгларида одамлар ҳозиргидай очкўз эмаслигини, табиатга тажовуз қилимаганлигини, табиатга буюк ҳурмат билан қараганлигини айтади: «Кўм-кўк бедазорларда камалак патли тустовуқлар пориллаб учарди. Шу ажойиб жаннатни қушларни отиш мумкин, деган мудҳиш ҳаёлни ақлга сифдириб бўлмасди... Гала-гала кийиклар сув ичгани келишарди. Улар одамлардан ҳайиқмас ҳам эдилар... Кейинчалик тараққиёт деган улуғ тушунчани юзаки англаб, табиатга кенг кўламда ҳужум бошлаб юбордик. Милтиқ кўтариб, учқур машиналарда барча жониворларни қувлаб, ҳолдан тойдирив, отавериб, уларни деярли йўқотиб юбордик. Кийик, жайрон, оху, куралай, марол, физол деб минглаб фазалларда улуғланган, гўзллик тимсоли бўлган ажойиб ҳайвон ана шундай йўқолиб кетди». Шоир бу ҳақда машхур ёзувчи Чингиз Айтматов ўзининг «Қиёмат» («Кунда») романыда таъсирчан ва ҳаяжонли ҳикоя қилиб берганлигини айтиб, табиат ҳимоячисига миннэтдорлигини билдиради.

Табиат, унинг бир қисми — ҳайвонот оламига инсон етқизган заарлар ҳақида Жуманиёз Жабборов жуда куйиниб ёзади: «Баъзан ўйлаб қоламан: жайронларни, бургутларни, қушларни, филларни, товусларни, ҳаттоки,

илонларни қафасда тутиб, ҳайвонот боғида сақлаб томоша қилиш, бечора жонзодларни эркин учишдан, югуришдан, ўрмалашдан маҳрум қилиб, нотабий шароитларда яшашга маҳкум этиш — инсоний ахлоқ-одоб талабларига қанчалик түғри келади? Улар ҳам ўзларига ато қилинган ҳаётларини яшашга ҳақли, ахир?»

Шоир Термиздаги ҳайвонот боғида бўлганида бечора бир түяқушнинг қафасдаги талпинишини, ўзини сим тўрга уравериб қўкси, тумшуғи ярачақа бўлиб кетганлигини кўриб ўксинади. «Қаердан бунча бағритошли?! Табиатни шу зайдла ўрганиш керакмикан? Бундай мисоллар эса жуда кўп. Турли-туман заҳарли дорилардан хасталаниб кетган Она еримизнинг тақдирини сиз билан биз ўйламай, ким ўйлади бугун?»

Жуманиёз Жабборов «Ҳайрат олами» бадеа-қиёсасида шўролар фаолият кўрсатган давр руҳи ҳақида бундай ёзади: «Уша йиллар қандайдир бесаранжом (ташвишли) йиллар эди (1937). Кимда урчуқ, кимда пахта йигирадиган чарх бўлса, тортиб олинарди. Аллақандай катта бир сайловга ҳам тайёргарлик борар эди. Эсимда, бир куни мактабимиз ёнидаги хонадоннинг бошқа ҳовлиси милиса кийимидағи одамлар билан тўлиб кетди. Одамларнинг юз, кўзида кўрқинчли, ноаниқ бир изтироб ҳоким эди. Билсак, 12-13 кишини чаласавод, бечораҳол колхозчи дехқонни ўй-уйидан суриб келиб, қамоққа олинибди, халқ душманлари деб, айблари - «тепа»дан келган бир раҳбар пахта даласига ўтлаб кириб қолган 5-6 кўй, эчкини кўриб қолган экан. Бўлди қиёмат. Ҳукуматга, давлатга қарши мислсиз исён сифатида уларни айблашган. Халқ душмани нималигини билмаган шўринг қурғурлар шу ҳолича «борса-келмас»га, бадарға бўлиб, йитиб кетишган. Шулардан биттаси 10-12 йилдан сўнг нимжон, ногирон бўлиб қайтиб келган, холос».

Бу сўзларга ҳозирги авлод имшонмас, балки. Лекин, кекса авлод биладики, Жуманиёз Жабборовнинг болалиқ ҷоғарида кўрган ўша мудҳиш воқеалар аччиқ ҳақиқат эди. Уша вақтларда Узбекистонда бойлар ва мулкдор дехқонлар муштумзўр қулоқ деб, ўз юртидан бегона, олис жойларга қувғин қилинган. Инсон ҳуқуқлари, шахс эркинлиги шу қадар оёқости қилинганки, бу фожеий ҳолатни етти ёшли гўдак Жуманиёз ҳам бутун вужуди ва масъум руҳи билан чуқур ҳис этган. «Ўзинг ўш бола бўла туриб ташвишли йиллар изтиробини қаёқданам била қолдинг? деб ҳайратланувчиларга жавобим шу, амакимнинг отамга шивирлаб айтган: «Ака, уч киши бир ўйда чироқ ёқиб, гаплашиб ўтириши мумкин эмас эмиш», ёки: «Фалончиларнинг ўйидан пахта йигирадиган чарх чиқибди» ёки: «Эскича китоби борларни қамоққа олармиш», деган гапларини ўз қулоғим билан эшитган эдим». Бу сўзлар ўша вақтда фақат «миш-миш», фийбат эмас, балки реал ҳақиқат эди. Узбек халқи йигирманчи ва ўтизинчи йилларда мустамлакачи давлатга юз минг гектар ерларда пахта етишириб берса ҳам, ўзи пахтадан ип йигириб, кўйлак ёки кўрпа-тўшак қилишга, рўзгорига ишлатишга ҳақсиз эди. Дарров «халқ душмани» деб, озодликдан маҳрум қиласар эдилар.

Ҳаёт ҳар қанча машақкатли, фожеаларга бой бўлса ҳам инсон болалигига бари бир шўх, қувноқ, ҳаётсевар, орзу-умидларга тўлиб-тошган бўлади. «Болалигинг қандай шароитда қандай замонда ўтган бўлмасин, бари бир уни ширин бир энтикиш билан эслайсан... — деб ёзади шоир ва драматург Жуманиёз Жабборов. — Одам соғинади ўша йилларни... тупроқ кўчалар, ойдин кечалар завқини қўмсайсан. Ариқларда тўлиб оққан бўтана сувлар, полизлардан тараған қовуннинг хушбўйи, гулхан атрофида давра қуриб, Алномишу Гўрўғлига сирдош бўлганинг олис тунлар, янтоқ чопиб, ўтин йифиш, хирмон янчиш, сомон жамғариш, адирда қўйларни ўтлатиш, варрак ва чиллакдан олинган чарчоқ ва сафо.. Уларни санаб адо қилиб бўлмайди».

Шоир айтгандай, одамнинг болалик таассуротлари қанчалик бой, ранг-баранг бўлса, воқеалар, учрашувлардан, табиатдан баҳрамандлиги қанчалик мўл, рангин бўлса, у шунчалик маънавий кучни ўзида мужассамлантиради. Табиатга меҳр-муҳаббат ҳам ана шу даврда — болалик оламида туғилади.

Шоҳида Каромова,
тадқиқотчи

Миртемирнинг дастлабки таржимаси

Ўзбек китобхонларида рус ёзувчиси Достоевский ижодига бўлган қизиқиши ўтган асрнинг 30-йилларидан бошланган. Ўша даврда адабининг «Ўлик уйдан хабарлар» романи Миртемир томонидан ўзбек тилига ўтирилган.

Таржимон асарни тўлалигича таржима қилмай, балки сюжетнинг алоҳида аҳамиятта эга асосий қисмларига эътибор берган. «Мактублар»нинг фақат баъзи қисмлари таржима қилинганига қарамай, романнинг асосий мазмуни сақлаб қолинган. Шу ўринда ўша даврдаги ўзбек тилининг тавсифига тўхталиб ўтиш жоиздир. Асар билан танишган бутунги китобхон биринчи навбатда О, Х, И, F ҳарфларининг қўлланилишига эътибор беради. Масалан, О ҳарфи ўрнига X, A ҳарфлари, Е ҳарфи ўрнига Я ҳарфи кенг қўлланилган:

ятақ — ётоқ	бойи — бўйи	дана — дона
яритилган — ёритилган	он — ўн	ибарат — иборат
ятар — ётар	оттиз — ўттиз	жайим — жойим
яхуд — ёхуд	тоғри — тўғри	ғаят — фоят
ят — ёт	топаланлар — тўполонлар	қалгунча — қолгунча
	ориilar — ўғрилар	саатлаб — соатлаб
	болган — бўлган	шавқун — шовқун
	ойлашни — ўйлашни	инсан — инсон
		қабил — қобил

Шунингдек, ҳозирги ўзбек тилидаги ГА қўшимчаси FA деб олинганлиги ҳамда И ҳарфининг умуман ишлатилмаганлиги эътиборга лойик. Парча эски ўзбек тилида, лотин ёзувига асосланган ўзбек алифбосида яратилганини ҳам эслатиш лозим.

Шуни ҳам айтиш керакки, таржимон асардаги йирик жумлаларни, тузилиши жиҳатдан муракқаб гапларни таржима қилмай қолдирган. Қўшма гаплар содда гапларга, баъзан эса шахссиз гапларга айлантирилган. Қуйида солиштирма таҳдил ўтказиш учун қўлланилган мисолларда таржима жараёнида йўл қўйилган ўзгартиш ҳамда камчиликлар мавжудлигига қарамай, уларни таржима санъати намуналари дея хулоса чиқариш мумкин. Солиштирма таҳдил учун тақдим этилаётган мисоллар таржима санъатини илмий жиҳатдан ўрганишда янги қирраларни очиб беради.

ОБРАЗЛАР

Достоевский тасвирида ҳар бир образ, ким бўлишидан қатъи назар, ўз хусусиятига эга. Бу — «Мактублар»нинг энг асосий жиҳатларидан бири.

Қамоқдаги ҳаётнинг бир хиллиги одамлар орасидаги фарқни ўчирмайди, аксинча, уларнинг ҳар хиллигини аниқроқ акс эттиради, ҳолбуки, қамоқдан олдин ҳар бирининг ҳаёти, турмуш тарзи, миллати, тарбияси, характеристи ва руҳияти ўзгача бўлган.

Образларнинг хусусиятларини ифодалашда қисқартиришлар ҳамда содалаштиришларга қарамай, таржимон имкони борича оригиналга яқинроқ тасвиirlарни қўллаган. Роман муаллифи бир қанча миллатга хос образларни, турли жиноятлар учун маҳкум этилган шахсларни ифодалаган, таржимада эса, бу ҳолларнинг қўпчилиги тушириб қолдирилган.

«Были здесь убийцы невзначай и убийцы по ремеслу, разбойники и

атаманы разбойников. Были просто мазурики и бродяги-промышленники по находным деньгам или по столевской части. Были и такие, про которых трудно было решить: за что бы кажется, они могли прийти сюда? А между тем у всякого была своя повесть, смутная и тяжелая, как угар от вчерашнего хмеля. Вообще о былом своем они говорили мало, не любили рассказывать и, видимо, старались не думать о прошедшем».

«Бу ерда, фавқулодда одам ўлдирғанлар бўлганидек, қан тўкиш ўз ҳунари бўлиб қалған басмачилар, ва уларнинг саркардалари ҳам кўп эди. Оғрилар, басмачилар билан бирга, нима учун турмага қамалганликларини билиш қийин болган сиймалар ҳам аз эмас эдилар.

Шу билан бирга ҳар кимнинг ўз юрагида кечаси сар хушлиқдан қилған баш ағриғи каби қарангни дастан бар эди. Умуман улар ўзларининг тарихларидан аз сўзлар эдилар, гўя ўз кечмишлари ҳақида ойлашни ва биравга сўзлаб беришни истамас эдилар».

Биринчи гапдаги «разбойники» сўзига эътибор берсак, у таржимада «басмачилар» деб олинган. Таржима амалга оширилаётган пайтида «босмачи» сўзи «разбойник-қароқчи» сўзига нисбатан кўп қўлланилган сўзлардан ҳисобланган. Эҳтимол, шу нуқтаи назардан ҳамда ўқувчиларни гумондан ҳоли қилиш учун таржимада айнан «басмачи» сўзи ишлатилгандир. Келтирилган парчанинг рус тилидаги нусхасида иккита гап битта гапга бирлаштирилганлигини кўрамиз. Бироқ, бундан парча ўзининг маъносини йўқоттани йўқ.

Таржима қилинган қисмларни ўқиганда, кўзга яққол ташланадиган яна бир нарса, бу бир хил сўзларнинг оригиналдан фарқли равишда тиржима қилинганини ёки атоқди отларнинг ўзгартириб берилишидир. Масалан, Оригиналдаги шакли: Таржимадаги шакли:

Изоҳ:

Куликов	«Куликуф»	Таржима қоидаларига биноан, атоқли
Трезорка	«Терезорка»	отлар ўзгартиришсиз олинади. Мазкур
Нерчинск	«Ерчинск»	ҳолда эса атоқли отлар ўзгартирилган.
		Яна шуни таъкидлаш керакки, бу сўзлар ҳар сафар ҳар хил кўринишида учрайди.
Сибиряк	«Сибирияли»	Имло қоидаларига кўра, келиб чиқиш жойини кўрсатганда, жой номига — лик қўшимчаси қўшилади, номнинг ўзи эса ўзгартирилмайди. Айни ҳолда «сибирлик» сўзи қўлланилиши мумкин эди.

Пристав «Пиристеф» Ўзбек тилига кириб келган лавозим номлари ҳам ўзгартилмайди.

Шунга ўхшаш бошқа мисолларни ҳам келтириш мумкин. Бу сўзларнинг қўлланилишини изоҳлайдиган битта сабаб бўлиши мумкин. 30-йилларда эски ўзбек тилида ягона қонун-қоидалар қабул қилинмаган эди.

Қўйидаги парча юқоридаги фикрларимизни далиллайди:

«Это был мужик-сибиряк, хитрый, умный, действительно очень ловкий ветеринар, но вполне мужичок».

«Бу киши Сибирияли дийқан болиб, ўзи фавқиладда ақилли киши эди. Ул ҳақиқатан уста. Ҳайванлар табиби, бирақ жуда ҳам аддий киши эди».

Таржимон «фавқиладда» сўзини айни ўзининг маъносидан ташқари ҳолда ҳам ишлаттган. Парчада у бошқа ўринда қўлланилган. Мазкур гаҳда гапнинг тузилиши ўзгартирилган, лекин маъноси сақлаб қолинган.

РУҲИЯТ, ҲОЛАТЛАРНИНГ АКС ЭТТИРИЛИШИ

Достоевский қаҳрамонларининг руҳиятини — ички ҳолатини аниқ тасвирларда ифодалаган. Ҳар бир образ ўзининг ўй-хаёлларига, кечинмаларига, орзу-умидларига эга. Қўйида келтирилган парчада таржимоннинг кўпгина жумлаларни тушириб қолдирганига қарамай, уни оригиналга яқинроқ тасвирлашга ҳаракат қилганини кўриниб турибди. Парчадаги асосий ғоя, оҳанг, тузилма сақланган. Ҳозирги ўзбек тили имло қоидалари нуқтаи

назаридан, грамматик хатоларга йўқ кўйилган, тиниш белгиларининг қўлла-нилишида катта фарқ бор. Бу ҳолат бутун таржима давомида кузатилади:

«Всякий каторжник чувствует, что он не у себя дома, а как будто в гостях. На двадцать лет он смотрит, как будто на два года, и совершенно уверен, что и в пятьдесят пять лет по выходе из сторога он будет такой же молодец, как и теперь, в тридцать пять. «Поживем еще!» — думает он и упрямо гонит от себя все сомнения и прочие досадные мысли. Даже сланные безсрока, особого отделения, и те рассчитывали иногда, что вот нет-нет, а вдруг придет разрешение из Петербурга. «Переслать в Нерчинск, в рудники, и назначить сроки». Тогда славно: во-первых, в Нерчинск чуть не полгода идти, а в партии идти против острога куды лучше! А потом кончить в Нерчинске срок и тогда... И ведь так рассчитывает иной седой человек!»

«Ҳар бир маҳбус ўзининг уйида эмас, меҳмандарчиликда каби сезар эди. 20 йилга гўя икки йил каби қарап эди. Ва мутлақа ўзини 50 яшда турмадан чиқса ҳам 35 яшлик йигит каби болишига ишанар эди. «Ўлмасак, «яна яшармиз» деган жумлани айтадирда қаршисидағи қара фикирларни нариг атарди. Ҳатта муҳлатсиз келган ақ сақалли чаллар ҳам «эрта-эндин» Нерчинскидаги темир канига юбариб муҳлат белгилансин» деган бўйруқ келишига умуд тутади ва Нерчинскига ярим йил юриб барилғач, муҳлат биттандан сонг... деган фикрлар билан ўзини юпатади».

Услуб

Достоевскийнинг ёзиш услуби жуда оғир деган танқидчилар кўп бўлган. Аслида, нафақат буюк рус ёзувчиси, балки ҳар қандай ёзувчининг ўз услуби бўлганидай, ҳар бир ижодкорга алоҳида эътибор, диққат билан ёндошиш керак. Ҳудди шундай улуф ёзувчи Достоевскийга ҳам. «Мактублар»да диалоглар алоҳида эътиборга эга, чунки, уларнинг тузилиши жуда ҳам оддий. Жиддий ибора ва жумлалар орасида оддий диалогларни учратиш, уларнинг моҳирона матнга киритилганини англаш алоҳида қизиқиш уйғотади. Асарни ўқиётган ҳар қандай китобхон қўлланилган диалогларнинг услубини яхши тушунади. Таржимада ҳам бу оддийлик, соддалик сақланган. «Нашего брата, дураков, не сеют, а мы сами родимся...» иборасига тўғри таржима топилган. Парчада қўлланилган: «Бизни ахмақлар экин қилиб эккан эмас. Биз ўзимиз туғилганимиз» жумласи тузилиш жиҳатидан ҳам, мазмун жиҳатидан ҳам айнан оригиналдаги маънени билдиради. Гап ўзбек тилида иккита содда гапга бўлинган бўлса ҳам маъноси ўзгармаган.

Достоевский яратган ҳар бир образ бетакорлиги билан аҳамиятли. Бу ҳол ёзувчининг маҳоратини яна бир бор кўрсатади. Келтирилаётган парчада Куликов тавсифи соддалаштирилганига қарамай, ўзбек тилида айнан қилиб берилган. Бу ҳолда ҳам гаплар соддалаштирилган. Рус тилидаги фразеологик ибора ўзбек тилида ҳам ўз муқобилини топган:

«Я уже говорил о Куликове. Человек он был немолодой, но страстный, живучий, сильный, с черезвычайными и разнообразными способностями. В нем была сила, и ему еще хотелось пожить; таким людям до самой глубокой старости все еще хочется жить. И если бы я стал дивиться, отчего у нас не бугут, то, разумеется, подивился бы на первого Куликова. Но Куликов решился». 284

«Мен юқорида Куликуф ҳақида сўзлаган эдим. Ул яш йигит эмас эди. Бирақ файратли, кучли ва ниҳаят ўткир лаяқатли эди. Унда қувват бар. Ул ҳаман яшамақ истар эди. Бу каби кишилар энг сўнгги қаримиқиға қадар яшаш истей беради.

Агар мен кишиларнинг қачмақлиқиға ҳайран бола башласам биринчи галда Куликуф учун тахайир бармакимни тишлашка тоғри келарди. Улар қачишиға қарар бердилар.

Бош қаҳрамоннинг озод этилиши ҳамда хайрлашишига асарда алоҳида эътибор қаратилган. Мазкур парча моҳирона таржима қилинган. Муаллифнинг foяси сақлаб қолинган. Таржимон бош қаҳрамон Горянчиков ҳамда бошқа маҳбусларнинг ўша вакъдаги ҳолатини маҳорат билан ўтирган. Гаплар тузилиши жиҳатидан ўзгартирилган, жумлалар маъно жиҳатидан тугалланмаган бўлса-да, умуман олганда, айни парча ўз foясини сақлаб қол-

ган.

Бош қаҳрамоннинг қамоқдан чиқаётган пайтининг тавсифи рус тилида маънодор қилиб берилган. Бир қанча жумла замирига муаллиф Горянчи-ковнинг бутун характерини мужассамлаштирган, унинг художўйлиги (у бир неча бор худога илтижо қилган), софдиллиги (у аристонларнинг ички кечинмалари, руҳияти, ўзига кўрсатилаётган илтифотларни яхши тушуна олган) ҳамда соддалиги (у ҳаётдан хурсанд бўла олиш қобилиятини йўқотмаган, озодлик, баҳтта интилган) бутун асар давомида бизни бир маромда ушлаб туради. Сўнгти сўзларида эса, романнинг асосий foяси намоён — бошидан то охиригача у озодлик, янги ҳаёт сари интилган, ўзининг олдига уларга етишишни мақсад қилиб қўйган. Парча таржимаси рус тилидаги кайфиятни, ҳолатни китобхонга етказа олмаган. Уни ўқиётганда қаңдайдир оддийлик, совуқликка дуч келади киши, оригиналдагидай кўтаринкилик, ҳис-туйғу, ҳаяжон йўқ. Художўйликка катта аҳамият берилган бўлсада, парчада у умуман тушириб қолдирилган:

«Каңдалы упали. Я поднял их... мне хотелось подержать их в руке, взглянуть на них в последний раз. Точно я дивился теперь, что они сейчас были на моих же ногах.

— Ну, с богом! С Богом! — говорили арестанты с отрывистыми, грубыми, но как-будто чем-то довольными голосами.

Да, с богом! Свобода, новая жизнь воскресенье из мертвых... экая славная минута!»

«Кишанлар узилиб тушди. Мен қолимға алдим... уларни энг ахирги мартаба қолимға алиб кўрмак истар эдим. Ҳазирфина аяғимда болған кишанларни энди қолимда кўриб мен хайран болардим.

— Азадлик, менги турмуш, ўлимдан қайтадан тирилиш, ах... қаңдай яхши дақиқа! — дидим мен...»

Умуман олганда, таржимоннинг ўша даврда бошқа тилда ёзилган бадиий асарни ўзбек тилига ўтириши, бошқа миллат адабиёти билан танишишга, ўзга ҳалқнинг ҳаёти, руҳиятини ўрганишга бўлган қизиқишини билдиради. Ўз ҳалқини дунё адабиётининг дурданалари билан таништириш ҳамма вақт ҳам таржимоннинг ёинки ёзувчининг фидойилигини билдиради.

Биз фикр юриттан биргина асар таржимасининг мисоли бунинг далилидир.

Феруза Тўлабоева,
тадқиқотчи.



МУНДАРИЖА

ЭХТИРОМ	
Александр Файнберг. Азиз шаҳрим, зангори макон	3
НАЗМ	
Ҳалима Худойбердиева. Кўнгилларнинг титрофидан изланг мени	13
Яхё Тоға. Дунёга бокдим.	18
Қамбар Ота.Юрагим дурларин сенга бераман.	95
Икром Искандар. Юрагимнинг рангини кўражаксан томларда.	98
НАСР	
Рисолат Ҳайдарова. Мағрура. Қисса	21
ОГОХЛИК	
Маҳфузा Қорахўжаева, Рисолат Искандарова. «Гуноҳ унитилмайди, эзгулик ерда қолмайди...»	101
МУЛОҲАЗА, КУЗАТУВ, МУНОСАБАТ	
Олим Тошбоев. Глобаллашув: тасаввур ва ҳаёт.	103
«БУ ИШҚ СИРРИН КИТОБ ЭТДИНГ...»	
Атойи. Ишқинда қаро бошим оқарди	107
БУЛОҚ КЎЗ ОЧДИ	
Мусаллам Умирова. Тонгнинг ҳижронида оқарар кўнглим.	108
ҲИКОЯЛАР ҲАЗИНАСИДАН	
Иван Бунин. Қасдлашув, Қўналға. Икки ҳикоя	110
УЛУФИМСАН, ВАТАНИМ	
Машраб Бобоев. Ўзбекистон	121
«МУШОИРА ЭТАДИ ДАВОМ...»	
Ўзликнинг мағзини танҳодин топдик.	122
АДАБИЁТШУНОСЛИК	
Козоқбай Йўлдош. Кечадан бугунни истаб.	129
Шоҳида Каромова. Хотира тинниклиги: шоир ва унинг шахсияти.	154
Феруза Тўлабоева. Миртемирнинг дастлабки таржимаси.	156
БОЛАЛАР ДУНЁСИ	
Кудрат Ҳикмат.Олмос менинг юрагим..	137
Рахматулла Баракаев, Бахшилло Ашурев. Самимиятдан йўғрилган сатрлар .	139
МЕРОСИМИЗНИ ЎРГАНАМИЗ	
Шавкат Ҳайитов. Жавонмардлик ҳақиқати	144
ЗАКОВАТ НУРИ	
Дилором Салоҳий. Замон, Макон, Ихвон. Ҳожа Абдуҳолик Фиждувоний қарашлари мисолида.	152

Компьютерда саҳифаловчи: Манзура Файзиева

* Муаллифлар фикри таҳририят фикри деб қабул қилинмасин. Таҳририятга келган бир босма табоқча бўлган материаллар муаллифларга қайтарилмайди. * Таҳририят ўз тавсиясига кўра амалга оширилган таржима асарларини қабул қиласи. * Обунага монеълик кўрсатилса ёки журнал етиб бормаса Тошкент — 700000, Амир Темур тор кўчаси, 2. Республика «Матбуот тарқатувчи» акциядорлик компанияси ёки унинг вилоят, туманлардаги тармоқларига мурожаат қилинсин.

Теришга берилди 20.11.2005 й. Босишга рухсат этилди 26.12.2005 й. Қофоз бичими 70x108^{1/16}. Офсет босма усулида 2-қофозга босилди. Босма табоги 10. Шартли босма табоги 14. Нашриёт ҳисоб табоги 14,25. Адади — 1300 дона. Буюртма № 2128

ЧАКАНА САВДОДА БАҲОСИ КЕЛИШИЛГАН НАРХДА
«Шарқ» нашриёт-матбаа акциядорлик компанияси
(700000, Тошкент шаҳри, Буюк Турон кўчаси, 41) да чоп этилди.